

PM  
1024  
655  
1891  
50A

# DAKOTA WOWAPI WAKAN KIN.

*Bible,*

## THE NEW TESTAMENT,


IN THE

DAKOTA LANGUAGE:

TRANSLATED FROM THE ORIGINAL GREEK,

BY STEPHEN R. RIGGS, A. M.

MISSIONARY OF THE A. B. C. F. M.



NEW YORK:  
AMERICAN BIBLE SOCIETY,  
INSTITUTED IN THE YEAR MDCCCXVI.

# MATTHEOS

## WOTANIN WAŠTE OYAKE CIN.

### WICOWOYAKE 1.

1 Jesus Messiya, Dawid cinhintku, Abraham cinhintku, oicage wowapi kin he dee.

2 Abraham Isaak cincaya; qa Isaak Jakob cincaya; qa Jakob Judas qa hunkawanjitku ko cincawicaya:

3 Unkan Judas Phares qa Zara, Tamar etanhan, cincawicaya; qa Phares Esrom cincaya; qa Esrom Aram cincaya:

4 Qa Aram Aminadab cincaya; qa Aminadab Naasson cincaya; qa Naasson Salmon cincaya:

5 Qa Salmon, Racab etanhan, Booz cincaya; qa Booz, Ruth etanhan, Obed cincaya; qa Obed Jesse cincaya:

6 Qa Jesse Dawid wicaštayatapi kin cincaya; qa Dawid wicaštayatapi kin Solomon cincaya, Urias tawicu qon etanhan.

7 Qa Solomon Roboam cincaya; qa Roboam Abia cincaya; qa Abia Asa cincaya:

8 Qa Asa Josaphat cincaya; qa Josaphat Joram cincaya; qa Joram Ozias cincaya:

9 Qa Ozias Joatham cincaya; qa Joatham Akaz cincaya; qa Akaz Ezekias cincaya:

10 Qa Ezekias Manasses cincaya; qa Manasses Amon cincaya; qa Amon Josias cincaya:

11 Qa Josias Jekonias cincaya; hunkawanjitku hena koya, Babulon ekta awicayapi qon he ehan.

12 Unkan Babulon ekta awicai pi hehan Jekonias Salathial

cincaya; qa Salathial Zorobabel cincaya:

13 Qa Zorobabel Abiud cincaya; qa Abiud Eliakim cincaya; qa Eliakim Azor cincaya:

14 Qa Azor Sadok cincaya; qa Sadok Akim cincaya; qa Akim Eliud cincaya:

15 Qa Eliud Eleazar cincaya; qa Eleazar Matthan cincaya; qa Matthan Jakob cincaya.

16 Unkan Jakob Joseph, Mary hihnaku kin, he cincaya; he etanhan Jesus Messiya eciyapi kin icaga.

17 Hecen wicoicage owasin, Abraham etanhan Dawid hehanyan, wicoicage ake topa; qa Dawid etanhan, Babulon ekta awicayapi qon hehanyan, wicoicage ake topa; qa Babulon ekta awicayapi etanhan, Messiya hehanyan, wicoicage ake topa.

18 Unkan Jesus Messiya icage cin he kaketu: Hunku Mary he Joseph yuze kta, tuka hinahin kici un šni, wanna Woniya Wakan kin on ihdušaka.

19 Unkan hihnaku Joseph he wicašta owotanna, qa taninyan oyake kta tawaŕenye šni, heon naħmana elipeye kta kecin.

20 Tuka hena hecen awacin un qehan, iho, Itancan taohnihde wan wowihanmde en ihdutanin qa heya; Joseph, Dawid cinhintku, Mary winohinca nitawa kin he yahduze kta kokipe šni wo, taku itpihnake cin he Woniya Wakan kin etanhan.

21 He cinca tón kta, unkan



Jesus eya caşyaton kta ; iye tao-yate kin wahtanipi kin etanhan niwicaye kta, heon etanhan.

22 Unkan dena owasin hecen econpi, Itancan oie, wicaşta wokcan oyake ciqon he yuecetupi kta ; he hecen eya ;

23 Iho, witanşna un wan ihduşake ça cinca ton kta ; unkan Emmanuel eya caştonpi kta ; Wakantanka unkicipi un, eyapi kin he kapi.

24 Unkan Joseph iştinma etanhan kikta, hehan Itancan taohnihde token econşi qon he ecen econ, qa tawicu hduza.

25 Tuka cinca tokapa cinca ton şni hehanyan sdonye şni ; unkan Jesus eya caşkiton.

## WICOWOYAKE 2.

1 Unkan Herod wicaştayatapi taanpetu kin he ehan, Bethlehem Juda makoce kin en Jesus tonpi, hehan iho, wiyohiyanpatanhan wicaşta ksapa Jerusalem en hipi qa heyapi ;

2 Tuwe Juda oyate kin en wicaştayatapi kta tonpi kin he tukten un he ; wicanşpi tawa kin he wiyohiyanpata wanunyakapi qa ohoundapi kta on unhipi ce.

3 Herod wicaştayatapi kin he naşon, unkan nina yuşinyaya, Jerusalem ocowasin nakun.

4 Unkan woşnapi kagapi owasin qa oyate kin en wowapi kagapi kin hena wicayuwitaya, hehan Messiya tukten tonpi kta hecinhan, he iwicawanga.

5 Unkan heciyapi ; Juda makoce kin en Bethlehem otonwe kin hetu ce ; wicaşta wokcan kin en kaken owapi ;

6 Qa niş Bethlehem, Juda makoce kin en, Juda itancanpi kin ehna iyotan nicistinna şni ; enitanhan wicaştayatapi wan u kta,

he Israel mitaoyate kin wonwicaye kta.

7 Hehan Herod wicaşta ksapapi qon nalimana wicakico, qa wicanşpi kin tohanhan tanin ece, he atayedan iwicawanga.

8 Hehan Bethlehem ekta ye wicaşi qa heya ; Ya po, qa hokşiyooqopa kin nina ode po ; qa iyeyayapi kinhan hoşimakahdi po ; miş eya wau qa ohowada kta, eya.

9 Wicaştayatapi ia naşonpi hehan tankan iyayapi ; unkan iho, wicanşpi, wiyohiyanpata wanyakapi qon he wicitokam iyaye ça hokşiyooqopa wanke cin he iwan-kam inajin.

10 Unkan wicanşpi kin wanyakapi qehan wowiyuşkin tanka on iyuşkinpi.

11 Unkan ti mahen ipi hehan hokşiyooqopa kin wanyakapi, hunku Mary nakun, qa itokam makata ehpeiciyapi qa ohodapi : unkan wopiye hduhdokapi hehan taku qupi, mazaskazi, qa cansin pejihuta waştamna koya.

12 Unkan wowihanmde on Wakantanka wahowicaya, Herod ekta hdapi kte şni, hehan canku tokeca ohna iye tamakoce ekta hdapi.

13 Hena wanna kihdapi hehan, iho, Itancan taohnihde wan wowihanmde on Joseph en ihdutanin qa heya ; Najin qa hokşiyooqopa hunku kici iwicacu qa Egipta ekta najica wo, qa tohan ociciyake kte cin hehanyan hen un wo : Herod hokşiyooqopa kin kte wacin on etanhan ode kta ce.

14 Hecen hanyen najin hiyaye, ça hokşiyooqopa hunku kici ewicahdaku, qa Egipta ekta iyaya :

15 Qa hen un, Herod te cin hehanyan : Hecen Itancan wicaşta wokcan on taku eye ciqon

he yuacetupi kta ; Egupta etanhan micinksi weco ce.

16 Wicašta ksapapi qon Herod hnayanpi wanhdake çehan nina síhda ; qa akicita ekta yewicaši, qa Bethlehem qa makoce ihduksan koya en, hoksiyopa owasin wicakte, tona waniyetu nonpa qa ihukuya, wicašta ksapapi wiwicawange ciqon he iyacinyan.

17 Unkan hehan Jeremiya wicašta wokcan oie qon yuacetupi, he kaken eya ;

18 Rama en wicaho wan nahonpi, icidowanpi, wicaceya qa wasihdapi tanka ; Racel cinca awicakiceya qa wacintonknakapi kta cin sni, cinca en unpi sni nakaeš.

19 Tuka Herod wanna ta hehan, iho, Itancan taohnihde wan Egupta ekta Joseph en taniniçiya ;

20 Qa heya ; Najin qa hoksiyoqopa hunku kici ewicahdaku, qa Israel makoce tawa kin ekta hda wo ; tona hoksiyoqopa ta cinpi qon hena wanna tapi.

21 Unkan najin hiyaye ça hoksiyoqopa hunku kici ewicahdaku qa Israel tamakoce kin en hdi.

22 Qa Arcelaos, Juda makoce kin en, atkuku Herod tohe kin en wicaštayatapi yanka, he nahon hehan ekta hde kta kokipa ; tuka wowihanmde on Wakantanka wahoye cin on, Galile makoce kin ekta iyaya :

23 Qa otonwe wan Nazareth eciyapi kin he en hi qa hen yanka ; hecen, Nazareth wicašta eciyapi kta ce, wicašta wokcan eye ciqon he yuacetupi.

### WICOWOYAKE 3.

1 Unkan anpetu kin hena en, Johannes baptem wicaqu ece kin

he Juda tamakoce hewoskan ekta woyaka hi ;

2 Qa heya ; Ihducetutu po, mahpiya wokiconze kin wanna kiyedan u ce.

3 Isaya wicašta wokcan caje-yate ciqon he dee, kaken eya ; Wicaho hewoskan en hotanin ; Itancan tacanku kin wiyeya ehnaka po, ocanku tawa kin owotanna kaga po.

4 Unkan Johannes ege tawokoyake taku wan kamel eciyapi he hin kin on kagapi, qa tehmisso wan ipiyagkiton ; unkan tawoyute kin psipsicadan qa tuhмага canhanpi kin hee.

5 Hehan Jerusalem qa Juda qa Jordan ihdukšan tanhan owasin en hipi :

6 Unkan Jordan en baptem wicaqu, woalitani ohdakapi.

7 Unkan Pharisee qa Saddukee wicota baptem wicaqu kin en hipi wanwicayaka, hehan hewicakiya ; Wamduška wicoicage kin, wocanniye u kte cin naye-cipapi kta tuwe e wahokonniciyapi he.

8 Heon etanhan ihducetupi kta iyececa waskuyeca icaliya po :

9 Qa, Abraham ateunyanpi ce, eyeciyapi kta awacinpi sni po ; miye heciciyapi, Inyan kin dena etanhan Wakantanka Abraham cinca kicage kta okihi.

10 Unkan wanna onspe kin can hute kin en ehnakapi ; heon etanhan can otioyohi waskuyeca wašte aicage sni kin he kawan-kapi qa petan ehpeyapi ece.

11 Miye nihducetupi kta on mini on baptem ciçupi ; tuka wanji iyotan wašaka mihakam u, he tahanpe kin weciyuhe kta iyemicihantu sni ; he qe Woniya Wakan qa peta on baptem niçupi kta.

12 Icaduge nape ohna hduha, owanka tanyan hdahinte kta, qa aguyapi su kin dotopiye ohna mnakiye kta, tuka ha kin peta kasnipica šni on hufinaliye kta.

13 Hehan Jesus Galile etanhan u, qa Jordan ekta Johannes en hi, baptem qupi kta e heon.

14 Tuka Johannes tehinda qa heya ; Baptem mayaqu kta iye-maceca, qa niš en mayahi he.

15 Tuka Jesus ayupte a heciya ; Dehan iyowinyan wo ; decen wicoowotanna ocowasin unštan kta iyececa. Hehan iyowinkiya.

16 Unkan Jesus baptem qupi qehan ecahankeya mini kin etanhan itawankanhde hda ; unkan iho, mašpiya kin ayuzamnipi, qa Wakantanka Taniya kin wakiyedan kašiya kuntkiya u, qa en hiyahan, wanyaka.

17 Unkan iho, mašpiya eciyatnhan wicaho wan heya ; Micinkšni wašte wakidake cin he dee, on iyomakipi hinca ce.

#### WICOWOYAKE 4.

1 Hehan Jesus woniya on he-woskan makoce kin ekta ayapi, Wakanšica iyutanye kta e heon.

2 Unkan wanna anpetu wikcemna topa qa hanyetu wikcemna topa wote šni un, hehan wote-ktehda.

3 Unkan wawiyutanyan kin en hi qa heciya ; Wakantanka Cinhintku kin he niye hecinhan, inyan kin dena aguyapi icage kta keya wo.

4 Tuka iye ayupte a heya ; Aguyapi ecedan on wicašta ni kte šni, tuka wicoie otoiyo hi Wakantanka i eciyatnhan e-nanpe cin hena on, hecen wowapi kagapi qon.

5 Hehan Wakanšica otonwe

wakan kin ekta aya, qa tipi wakan oinkpa wan akan ehde ;

6 Qa heciya ; Wakantanka Cinhintku kin he niye hecinhan, he-tanhan kun ehpeiiya wo ; kaken wowapi en kagapi ce ; Tao-hnihde kin niye on econ wicašni kta, hecen nape ohna niyuhapi kta, inyan wan en siha iboni-šo kte šni.

7 Tuka Jesus heciya ; Akeš wowapi en kagapi ; Itancan Wakantanka nitawa kin he iyutanyaye kte šni.

8 Hehan ake Wakanšica paha wan tehanwankantuya kin he ekta aya, qa maka akan wokiconze kin owasin wowitan ko kipazo ;

9 Qa heciya ; Makata ehpeniiye a ohomayada kinhan, dena owasin ciu kta ce.

10 Hehan Jesus heciya ; Satan miheyata ya wo ; Itancan Wakantanka nitawa kin he ohoyada kta, qa išnana wowidagniye kta ce, eya owapi tuka qon.

11 Hehan Wakanšica ayušan ; unkan iho, mašpiya ohnihde kin en hipi qa okiyapi.

12 Unkan Johannes kaškapi he našon hehan *Jesus* Galile ekta iyaya :

13 Qa Nazareth ehpeya iyaye a Kapernaum en hiyanka, he mde kin icahda, Zabulon qa Nephtalim opapun kin hetu.

14 Hecen Isaya oie qon yuecetupi kta ;

15 Zabulon makoce qa Nephtalim makoce, mde kahda ocanku kin, Jordan akasanpa tanhan, Galile Ikcewicašta onnyanpi kin :

16 Oyate otpaza en iyotanke ciqon he iyoyanpa tanka wanyakapi, qa tona wiconte makoce qa ohanzi kin en iyotankapi kin hena iyoyanpa awicahinanpa ce.

17 Unkan hetanhan Jesus wo-



yaka aye ça heya ece ; Ihduece-  
tu po, mañpiya wokiconze kin  
wanna kiyedan u ce.

18 Unkan Galile mde kin ica-  
hda mani icunhan, wicašta nom  
sunkakiciyapi wanwicayaka, Si-  
mon, Inyan eciyapi, qa sunkaku  
Andrew *eciyapi*, ho wan mde kin  
en iyeyapi ; hena hopsicapi kin  
hecapi :

19 Unkan hewicakiya ; Miyahna  
u po, kinhan wicašta wicadupsi-  
capi ece e kta cicagapi kta ce.

20 Unkan ecahankeya ho kin  
eñpeyapi qa ihakam iyayapi.

21 Unkan hetanhan iyoopta ye  
ça, nakun nom sunkakiciyapi  
wanwicayaka, Jakob Zebede  
cinhintku qa sunkaku Johannes,  
wata kin ohna atkukupi Zebede  
kici unpi qa ho piyapi ; unkan  
hena wicakico.

22 Ís eya wata kin atkukupi ko  
ohankoya eñpeyapi qa ihakam  
iyayapi.

23 Unkan Jesus Galile owan-  
caya iyaya, omniciye tipi yuhapi  
kin ohna waonspewicakiye ça,  
wokiconze wotanin wašte kin  
oyaka ece, qa oyate kin en wo-  
wayazan owasin qa wicocante  
šica owasin asniyan ece.

24 Unkan ohan kin Suriya  
owancaya oyakapi ; hecen tona  
šicaya yuknapi, qa tona wowa-  
yazan ocaje owasin on waya-  
zanpi, qa tehiya unpi, qa tona  
taku wakan šica yuhapi, qa taťa-  
piké cin hena koya owasin en  
awicahipi ; unkan asniwicaya.

25 Hecen oyate ota ihakam  
yapi ece, Galile etanhan, qa De-  
kapolis qa Jerusalem qa Juda  
etanhan, qa Jordan akasanpa  
tanhan.

## WICOWOYAKE 5.

1 Unkan wicota wanwicayaka  
hehan paha wan ekta iyaya ; qa

hen iyotanka hehan waonspewicakiye cin en hipi.

2 Unkan i hdukawa qa waon-  
spewicakiye ça heya ;

3 Tona cante mahen onšiiçi-  
dapi kin hena wicayawaštepi ce ;  
mañpiya wokiconze kin he tawa-  
pi ece.

4 Tona ceyapi kin hena wicaya-  
waštepi ; hena wicakihnapi kta.

5 Tona onšihanpi kin hena wi-  
cayawaštepi ; maka kin de ta-  
wapi kta.

6 Tona woowotanna on wote-  
ktehdapi qa ipuzapi kin hena  
wicayawaštepi ce ; hena imnan-  
pi kta.

7 Tona waonšidapi kin hena  
wicayawaštepi ; hena onšiwica-  
dapi kta.

8 Tona cante en ecepidan kin  
hena wicayawaštepi ; hena Wa-  
kantanka wanyakapi kta.

9 Tona wookiye kagapi kin he-  
na wicayawaštepi ; hena Wakan-  
tanka cinca ewicakiyapi kta.

10 Tona woowotanna econpi  
kin on šicaya kuwapi kin hena  
wicayawaštepi ; mañpiya woki-  
conze kin he tawapi ece.

11 Tohan aniiapi qa šicaya ni-  
cuwapi, qa miye on itonšniyan  
taku šica owasin eniciyapi kin-  
han, niyawaštepi ece.

12 Wiyuškinpi qa nina cante  
wašte po, mañpiya ekta ocinyo-  
peniyanpi tanka yanka ; wicašta  
wokcan nitokam unpi qon hena  
ís eya hecen wicakuwapi qon.

13 Maka miniskuya kin he ni-  
yepi. Tuka miniskuya kin he  
skuye šni kinhan taku e on sku-  
yeyapi kta he ; hetanhan taku-  
dan okihi kte šni, tankan eñpe-  
yapi kta qa wicašta amanipi kta.

14 Oyate iyoyanpa kin he niye-  
pi. Otonwe wan paha akan ka-  
gapi kin he analibepica šni ece.

15 Nakun petijanjan ideyapi qa

koka ohdateya iyeyapi šni, tuka petijanjan ihupa wan en oštanpi, hecen tipi kin ohna owasin iyoyamwicaya ece

16 He iyecen wicašta itokam iyoyanpa nitawa iyojanjan kta, hecen wicohan wašte nitawa wanyakapi kta, qa mašpiya ekta ateyayapi yanke cin he yuonihanpi kta.

17 Woope qa wicašta wokcan kin mdutakuni kte šni on wahi kecinpi šni po, ihangyapi on wahi šni tuka yucetupi kta on.

18 Awicakehan heciciyapi; Mašpiya qa maka kin atakunišni ešta, oowa wanjidan qa oehna ke wanjidan woope kin etanhan icupi kte šni, owasin ecetu kta.

19 Heon etanhan, tuwe woahope kin dena wanji cistinna ahope šni, qa hecen wicašta onspewicakiye cinhan, he mašpiya wokiconze kin en iyotan cistinna yawapi kta; tuka tuwe ecen econ qa iyecen waonspewicakiye cinhan, he mašpiya wokiconze kin en tanka yawapi kta.

20 Miye heciciyapi ce; Wicoo-wotanna nitawapi kin, wowapi kagapi qa Pharisee tawapi kin isanpa tanka šni kinhan, mašpiya wokiconze kin en ecaca oyapapi kte šni.

21 Tuwedan yakte kte šni, hunkawicayapi kin eyapi keyapi nayahonpi; qa tuwe tin wicakte kinhan he yacopi kta ce.

22 Tuka miš heciciyapi; Tuwe taku on etanhan šni sunkaku šicekidake cinhan he yacopi kta; qa tuwe sunkaku, Waštešni, eciye cinhan he omniciye tanka kin en ayapi kta; qa tuwe, Winikotkoka, eciye cinhan, he Wakansica tapeta kin en iyohpeyapi kta iyecaca.

23 Heon etanhan wošnapa nitawa owayušna kin ekta ayahi kin-

han, qa hen nisunka taku iyanonpa he yeksuya hecinhan;

24 Ito wošnapa nitawa owayušna kin itokam ehna ke qa ekta ya wo, tokaheya nisunka kici okiciciye qa hehan ku qa wahušna wo.

25 Tuwe taku en aniu hecinhan he kohanna kici okiciyuwašte wo, canku ohna kici yaun kin icunhan; okinni wayaco ekta aniye kta, qa wayaco kin iš akicita en aniye kta, qa hecen kaška nihnakapi kta:

26 Awicakehan heciciya; Tohanyan mazašadan ehake yahdajuju šni kinhan hetanhan tankan yaku kte šni.

27 Wawicihalapi ecanon kte šni, hunkawicayapi qon eyapi keyapi nayahonpi.

28 Tuka miš heciciyapi; Tuwe winohinca wan en etonwe qa cantiheye cinhan he wanna cante ekta kici wawicihalapi econ.

29 Ništa etapa eciyatanhan kin he wahtaniniye cinhan hdušdoke qa ehpeya wo; ništa wanji atakunišni kinhan he wašte kta, qa tancan ocowasin Wakansica ti kin en ehpeniyanpi kte šni.

30 Qa ninape etapa kin wahtaniniye cinhan hdakse qa ehpeya wo; nihuha wanjidan atakunišni kinhan he wašte kta, qa tancan ocowasin Wakansica ti kin en iyohpeniyanpi kte šni.

31 Tuwe tawicu ehpekiye kta hecinhan kpaganpi wowapi wan qu kta, keyapi qon.

32 Tuka miš heciciyapi; Tuwe tawicu ehpekiya, wawicihalapi econ kin on etanhan šni, he wawicihalapi econkiya ece; qa tuwe winohinca ehpeyapi kin he yuze cinhan he nakun wawicihalapi econ ece.

33 Akeš hunkawicayapi qon he-yapi keyapi nayahonpi; Itonšni



## WICOWOYAKE 6.

niçicage kte ñni, tuka taku konza Itancan kin eyakiye çinhan hena yahducetü kta ee.

34 Tuka miş heciciyapi; Taku cajedate ça he namañon ee, eye ñni wo; mañpiya kin he hecen cajedate kte ñni, he Wakantanka oiyotanke tawa kin hee.

35 Qa nakun maka kin de, he Wakantanka siha oahe kin ee; qa nakun Jerusalem hecen cajedate kte ñni, Wicaştayatapi tanka tonwe kin hee.

36 Qa nakun nipa kin he caje yahdate kte ñni, paha wanjidan kaeş ska qa is sapa yakage kta oyakihi ñni, heon etanhan.

37 Tuka taku ehe cin, Han, han; Hiya, hiya, ecedan kta; taku dena sanpa kinhan he taku şica etanhan icage kta.

38 İsta wanji İsta wanjidan on etanhan, qa hi wanji hi wanjidan on etanhan, keyapi nayañonpi.

39 Tuka miş heciciyapi; Taku şica tokicõnpi ñni po; tuka tuwe tapon etapa eciyatanhan anipe cinhan unma eciyatanhan kipazo po.

40 Qa tuwe woopë on niyaco qa onhdoñda nici kta cin kinhan, nitaşina nakun teñinda ñni wo.

41 Qa tuwe wiyutapi hanska wanji hehanyan kici yeniye kta hecinhan, nom kici ya wo.

42 Tuwe taku nicida kinhan qu wo; qa tuwe wonicidota hecinhan etanhan ihdamna ñni wo.

43 Tuwe nikiyedon un kin he waştayadake kta, qa tuwe tokaniye cin he şiceyadake kta, eyapi qon nayañonpi.

44 Tuka miş heciciyapi; Tona tokaniyanpi kin hena cante wicakiya po; qa tona niyaşicapi kin hena wicayawaşte po; tona şicenidapi kin hena tawa waşte ecawicakicon po; qa tona taku i en iyenianpi qa teñiya nicuwapi

kin hena woçekiye ewicakiciya po.

45 Hecen Ateyayapi mañpiya ekta un kin he cincaniyanpi yaunpi kta; he qe anpetu wi tawa kin wicaşta şica wicaşta waşte ko en awicahinanpeya ece, qa wicaşta owotanna owotanna ñni ko awicamagajuya ece.

46 Tona waštenidapi kin hena waşte wicayadapi kinhan woka-juju taku duhapi he; wamnanyanpi kin hena eepi kaeş heconpi ñni he.

47 Qa sunka wicayayapi kin henana napewicaduzapi kinhan, taku econpi ece sanpa tukte e ecanonpi he; wamnanyanpi kin hena eepi kaeş heconpi ñni he.

48 Heon etanhan Niyatepi mañpiya ekta un kin he owotanna hinca he iyecen niş eya owotanna hinca un po.

## WICOWOYAKE 6.

1 Wicaşta itokam ihnuhan taku ituyañanpi kinhan, wanniya-kapi kta heon; hecen ecanonpi kinhan Niyatepi mañpiya ekta un kin he takudan niçupi kte ñni.

2 Heon etanhan tohan taku wicayaqu kta hecinhan nitokam cotanka yajowicayakiye kte ñni, wanaicihmanpi kin omniciye tipi qa canku ohna econpi ece kin iyececa, wicaşta on wicayatanpi kte cin heon; awicakehan heciciyapi; Hena wokajuju hduhapi ece.

3 Tuka niye taku wicayaqu eca ninape etapa taku econ kin he nicatka sdonye kte ñni.

4 Hecen wawicayaqu kin he nañmana un kta; qa Niyatepi taku nañmana un kin wanyaka ece kin he iye taninyan nicicajuju kta.

5 Qa tohan ceyakiya eca wana-  
içihmanpi kin iyenicece kte sni;  
hena eqe omniciye tipi qa canku  
oise kin en najin cekiyapi wašte-  
dakapi ece, wicašta wanwicaya-  
kapi kta e heon; awicakehan  
heciciyapi; Hena wokajuju hdu-  
hapi ece.

6 Tuka niye qe ceyakiye cin-  
han, tipi cistinna nitawa kin en  
timahen yakiyahde ça tiyopa  
ecen iyacu kinhan, hehan Ni-  
yate nahmana un kin he cekiya  
wo, qa Niyate nahmana wawan-  
yaka ece kin he taninyan nici-  
cajuju kta.

7 Ceyakiyapi kinhan akihdehde  
oie kiçunpi sni po, Ikcewicašta  
econpi kin iyececa; hena e iapi  
ota unpi kin on nawicahon kta  
kecinpi.

8 Niye hena iyenicecapi kte  
sni; hinalin yakidapi sni itokam,  
hena taku kin yacinpi, Niyatepi  
sdonya ece.

9 Heon etanhan kaken cekiya  
po; Ate unyanpi mahpiya kin  
en; Nicaje wakandapi kte;

10 Nitokiconze u kte; Nitawa-  
cin ecen econpi nunwe, mahpiya  
kin en iyececa, nakun maka  
akan:

11 Anpetu kin de anpetu woyu-  
te unqu miye:

12 Qa waunhtanipi kin unkici-  
cajuju po, tona waunkieihlanipi  
wicunkicicajujupi kin he iye-  
ceca:

13 Qa taku wawiyutanyan un  
kin en unkayapi sni po, tuka  
taku siçe cin etanhan eunhdaku  
po: Wokiconze kin he niye ni-  
tawa, qa wowaşake kin, qa wo-  
witan kin, owihanke wanica.  
Amen.

14 Niye wicašta wahtanipi wi-  
cayecicajujupi kinhan, Niyatepi  
mahpiya ekta un kin he nakun  
niye nicicajujupi kta.

15 Tuka niye wicašta wahta-  
nipi kin wicayecicajujupi sni  
ehantanhan, nakun Niyatepi wa-  
yahitanipi kin nicicajujupi kte  
sni.

16 Tohan wote sni yaunpi kin-  
han wanaicihmanpi kin iyecen  
ite şinkiyapi sni po; hena eqe  
ite hduşicapi ece, hecen wicašta  
ekta wote sni unpi e ihdutaninpi  
kta; awicakehan heciciyapi,  
Hena wokajuju hduhapi ece.

17 Tuka niye qe wote sni yaun  
kinhan pa sdakiye ça ite hduja-  
ja wo:

18 Hecen wicašta en wote sni  
yaun nihdutanin kte sni, tuka  
Niyate nahmana un kin he en  
nihdutanin kta; qa Niyate na-  
hmana wawanyake cin he tanin-  
yan nicicajuju kta.

19 Woyuha maka akan ekihn-  
kapi sni po; hen wamduşkadan  
qa gigi kin wayutakunişni ece,  
qa wamanon sa wayujujupi qa  
wamanonpi ece.

20 Tuka woyuha mahpiya kin  
ekta ekihnaka po; heciya wa-  
mduşkadan qa gigi kin wayuşiçe  
cin wanica, qa wamanon sa wa-  
yujujupi sni qa wamanonpi sni.

21 Tukten woyuha niciyanka-  
pi hecinhan, nicantepi nakun  
hen un kta.

22 Wicišta kin he wicatançan  
iyoyanpa kin hee; heon etanhan  
ništa tokeca sni kinhan nitan-  
can ocowasin iyoyanpa kta:

23 Tuka ništa siçe cinhan ni-  
tancan kin ocowasin otpaze kta.  
Heon iyoyanpa en niun kin he  
otpaza hecinhan, otpaza kin he  
tanka linca.

24 Tuwedan wicašta itancan  
nom anawicagoptan kta okihi  
sni; wanji siçe kidake kta, qa  
unma kin is wašte kidake kta;  
wanji en iyaihdaşke kta, qa un-  
ma kin is en etonwe kte sni;

Wakantanka qa mammon napin anagoptan oyakhipi kte śni.

25 Heon etanhan heciciyapi ; Yanipi kin on nagiyeciŕiyapi śni po, taku yatapi kta, qa taku daktanpi kta ; qa nakun nitancanpi on taku kodakapi kta : Wiconi kin he woyute isanpa śni he ; qa wicatančan kin iś wokoyake isanpa *yawapi* śni he.

26 Małpiya okinyanpi kin hena wanwicayaka po, hena wojupi śni, qa woksapi śni, qa mazopiye en omnayanpi śni, tuka Niyatepi małpiya ekta un kin he hena wo wicaqu ece ; unkan niye hena isanpa niyawapi śni he.

27 Niyepi etanhan wanji tukte e he awacannipi on wiciśpa wanjidan kaeś sanpa nihduhanskapi oyakhipi kta he.

28 Qa tokeca wokoyake on iyokiśinniciyapi he ; tinta mnałcałca kin wanyaka po, icage cin ; łtani śni qa nakun wapałmun śni ;

29 Tuka heciciyapi ; Solomon wowitan tanka hduha un qon hee kaeś de wanji iyececa wokoyake kiçun śni.

30 Unkan tinta peji, dehan icage ça heyakecinhan oceti en ełpeyapi ece kin, he Wakantanka hecen koyagya hecinhan, niś niye wacinyan nicistinpidan, sanpa wakoyagnianpi kte śni he.

31 Heon etanhan, Taku untapi, qa taku unyatkanpi, qa taku kounyakapi kta he, eya wacin iyokiśicapi śni po.

32 Taku kin hena owasin Ikcewicaśta akitapi ece ; qa Niyatepi małpiya ekta un kin he dena takuowasin yacinpi esdonya ece.

33 Tuka Wakantanka tokiconze kin he tokaheya akita po, qa toowotanna nakun ; kinhan dena taku owasin koya niçupi kta.

34 Heon etanhan heyakecinhan

on iyokiśinniciyapi śni po ; heyakecinhan he taku tawa kin on iyokiśica ece e kta ; anpetu eca taku śica tawa kin yukan ece e kta.

## WICOWOYAKE 7.

1 Wayacopi śni po, hecen niyacopi kte śni.

2 Woyaco tukte e on wadacopi hecinhan he on niś eya niyacopi kta ; qa wiyutapi tukte e on widuntapi eca hee on winiciyutapi ece e kta.

3 Qa nisunka iśta kin en takuśni yanka e tokeca wandaka he ; qa cankaga wan niśta ohna yanke cin he wanyahdake śni.

4 Qa iś token nisunka, Ito niśta kin etanhan takuśni kin icicicu kta, eyakiye kta he ; qa iho, cankaga wan niśta ohna yanka ce.

5 Wanaičiłman, tokaheya cankaga iśta ohna niyanke cin he hduśdoka wo ; qa hehan takuśni nisunka iśta ohna yanke cin he iyacu kta tanyan wandake kta.

6 Taku tona wakan kin hena śunka wicaqupi śni po, qa inyan tehika nitawapi kin kukuśe wicitokam ełpeyapi śni po ; okinni siha on amanipi kta, qa akeś hdicupi qa niyahdecapi kta.

7 Da po, kinhan niçupi kta ; ode po, kinhan iyeyayapi kta ; en katoto po, kinhan niciyuhdokapi kta.

8 Tuwe da eca icu ece ; qa tuwe ode eca iyeya ece ; qa tuwe *tiyopa* katoto eca he kiciyuhdokapi ece.

9 Unkan enitanhanpi wicaśta wanji cinhintku aguyapi kida kinhan, inyan wanji qu kta he.

10 Qa hogan kida kinhan wamduśka wan qu kta he.

11 Heon etanhan niye niśicapi



ešta, taku wašte nicinca wica-  
yaqupi kta onnisepi ehantan-  
han, Niyatepi malpiya ekta un  
kin he, sam iyeya tona kidapi  
kin, taku waštešte wicaqu ece  
e kta.

12 Heon etanhan taku tona  
wicašta ecaniconpi kta yacinpi  
kinhan, hena owasin ecawicaki-  
con po; wope qa wicašta wo-  
kcanpi kin iho hee.

13 Tiyopa ciqadan kin he ohna  
ya po; Tiyopa kin tanka qa can-  
ku nakun tanka wicotakunišni  
iyahde, qa ohna iyayapi kin wi-  
cota hinca.

14 Tuka tiyopa kin ciqadan qa  
canku nakun ocistiyedan wico-  
ni iyahde; qa wicašta tonana  
iyeyapi ece.

15 Wicašta wokcan itonpišni  
kin hena kowicakipa po; hena  
tahinca wanunyanpi iyecen ko-  
yag en nihipi, tuka mahen šun-  
ktokeca wayapota ece kin hecapi.

16 Waskuyeca tawapi kin on  
sdonwicayayapi kta. Wicašta  
wapepeka etanhan hastanhanka  
yušpipi he, qa toka hu kin etan-  
han suken waskuyeca icupi he.

17 He iyecen can wašte owasin  
waskuyeca wašte icaliya ece;  
tuka can šice cin waskuyeca  
šica aicaga ece.

18 Can wašte kin he waskuye-  
ca šica icalye kta ohihi šni; qa  
nakun can šice cin he waskuyeca  
wašte icalye kta ohihi šni.

19 Can otioyohi waskuyeca  
wašte aicage šni kin he kawan-  
kapi qa petan ehpeyapi ece.

20 Heon etanhan waskuyeca  
tawapi on sdonwicayayapi kta.

21 Tona, Itancan, Itancan, ema-  
kiyapi kin owasin malpiya wo-  
kiconze kin en yapi kte šni; tu-  
ka tuwe Atewayaya malpiya ekta  
un kin tawacin kin ecen econ  
kinhan hee *en un kta*.

22 Anpetu kin he en wicota  
hemakiyapi kta; Itancan, Itan-  
can, nicaje on wiunyukanpi šni  
he; qa nicaje on taku wakan  
šica napewicunyanpi; qa nicaje  
on wicohan tanka ota econkupi  
ce.

23 Tuka hehan hewicawakiye  
kta; Tohinni sdonciyapi šni,  
wicohan šica ecanonpi kin mi-  
tantanhan iyaya po.

24 Heon etanhan tuwe mioie  
kin dena nañon, qa ecen econ  
kinhan, he wicašta ksapa e imda-  
cin kta, he qe imnija wan akan  
ti kicaga.

25 Unkan nina magaju qa mi-  
nitan aya; nakun tateyanpa  
hinca, qa tipi kin he en iheya,  
tuka hinhpaye šni; inyan akan  
kagapi nakaes.

26 Qa tuwe mioie kin dena  
nañon, tuka ecen econ šni kin-  
han, he wicašta witkotkoka iye-  
ceca, he wiyaka akan tipi kica-  
ga.

27 Unkan nina magaju qa mini  
tanka icaga, nakun tateyanpa  
hinca, qa tipi kin he en iheya;  
uncan hinhpaya; qa ihangyapi  
kin he tanka.

28 Unkan Jesus wicoie kin  
dena ihunnikiya, hehan wicota  
wahokonwicakiye cin on yušin-  
yayapi.

29 Wanji wookihi yuhe cin  
iyecen wahokonwicakiya, qa wo-  
wapi kagapi econpi kin iyece-  
ce šni.

### WICOWOYAKE 8.

1 Unkan paha kin etanhan kun  
ku qehan, wicota hinca ihakam  
unpi.

2 Unkan iho, wicašta wan lep-  
ros ececa he en hi qa canpeška  
makehde inajin qa heciya; Itan-  
can, yacin kinhan, asnimayaye  
kta oyakihi.

3 Unkan Jesus nape ekta yekiye ça yutan, qa heciya; Wacin; hecen asni wo. Unkan ecehna-na wowayazan kin ayuŕtan.

4 Unkan Jesus heciya; Ihunhan tuwe oyakidake cinhan; tuka ekta ye ça woŕnapi kage cin he en ihdutanin wo, qa taku Moses econniŕi qon he wayuŕna wo, sdonyapi kta e heon etanhan.

5 Unkan Jesus Kapernaum en hi qehan, akicita tancan wan en u qa cekiya;

6 Qa heya; Itancan, hokŕidan mitawa tiyata wanka taŕaka, ni-na yazan.

7 Unkan Jesus heciya; Wau qa aŕniwaye kta.

8 Hehan akicita opawinge wicayuhe cin he ayupte ça heya; Itancan, wati en timahen yau kta iyemacece ŕni; tuka oie kin ecedan eya wo, kinhan hokŕidan mitawa asni kta:

9 Miŕ eya wicaŕta itancan hema-ca, qa akicita wicamduha; unkan wanji, Ya wo, ewakiya eca, ya ece; qa wanji tokeca, U wo, ewakiya eca, u ece; qa mitaokiye, Kaken econ wo, ewakiya eca, ecen econ ece.

10 Unkan Jesus he naŕon qehan yuŕinyaya, qa ihakam unpi kin hewicakiya; Awicakehan heciyapi, Israel hee kaes en wacinyanpi hinsko tanka iyewaye ŕni ce.

11 Nakun heciyapi; Wiyo-hyanpa tanhan qa wiyohpeya tanhan wicota upi kta, qa Abraham qa Isaak qa Jakob om iyotankapi kta, mahpiya woki-conze kin en:

12 Tuka wokiconze cincapi kin hena tankan iyewicayapi kta, otpaze hinca ekta; heciya wicaceya hi hdakinskinzapi ko yuke kta.

13 Unkan Jesus akicita opa-

winge wicayuhe cin heciya; Hda wo, wacinyaye cin iyecen ecaniconpi nunwe. Unkan wihiyayedan oape kin he en hokŕidan tawa kin asniyanpi.

14 Unkan Jesus Inyan ti kin en tin iyaya, hehan kunku kin makata wanka wanyaka, tancan kata.

15 Unkan nape kin yutan, hehan tancan kate cin ayuŕtan; unkan najin qa wowicakihan.

16 Wanna htayetu hehan wakan ŕica wicayuhnaŕkinyan ota en awicahipi; unkan oie kin on wakan ŕica napewicaya; qa tona wayazankapi kin owasin asniwicaya.

17 Hecen Isaya wicaŕta wokean taku eye ciqon he yuecetupi kta; he kaken eya; Iye tehiya unyakonpi kin eunkiciyakupi qa waunyazanpi kin yutokan iyeunkiciyapi ece.

18 Unkan Jesus wicota hinca ihdukŕan yukanpi kin hena wanwicayaka hehan akasanpa yapi kta keya.

19 Unkan wowapi kaga wan en hi qa heciya; Waonspekiya, tokiya da eca cihakam waun ece e kta.

20 Unkan Jesus heciya; ŕungidan waŕun tonpi, qa mahpiya okinyanpi kin hoŕpi yuhapi ece; tuka Wicaŕta Cinhintku kin tukten pa ipahinye kta yuhe ŕni.

21 Hehan waonspewicakiye cin tokeca wanji heciya; Itancan, tokaheya wahde ça ate wehe kta e iyowinmakiya ye.

22 Tuka Jesus heciya; Miha-kam un wo; ito taŕi kin hena tona kiŕapi kin wicakiŕapi kta.

23 Unkan wata wan en opa, hehan waonspewicakiye cin iha-kam upi.

24 Unkan iho, mini kin ekta tate iyumni wan tanka; hecen



wata kin taja on akalipapi ; tuka iye ístinma yanka.

25 Unkan waonspewicakiye cin en hipi, qa yuhicapi qa heciyapi ; Itancan, niunkiya po, unŕapi kta ce.

26 Unkan hewicakiya ; Cistin- na wacinyayapi kin, tokeca koyakipapi he. Hehan inajin qa tate mini ko kiśica ; unkan amdakedan tanka.

27 Tuka wicaśta kin hena yuśinyayapi qa heyapi ; De taku wicaśta ka hwo, hecen tate mini ko anagoptan ece.

28 Unkan akasanpa i, Gada- rene makoce tawapi kin en, he- han wicaśta nom wakan śica wicayuhnaśkinye cin hena itko- kipapi, wicaśta hnakapi kin etanhan upi, wohitikapi ĩnca, hecen tuwedan canku kin he ohna ye kta okihi śni.

29 Unkan iho, heya howayapi ; Jesus Wakantanka Cinhintku, taku unkiyotahedan un he ; hinahinke śni tuka itokam ka- kiśunyayapi kta on yahi he.

30 Unkan yukanpi kin itehan kukuśe optaye wan wo wicaqupi ece.

31 Hecen wakan śice cin hena cekiyapi qa heyapi ; Napeunya- yapi kinhan kukuśe optaye kin en unkiyayapi kta iyowinunkiya miye.

32 Unkan ; Ya po, ewicakiya. Hecen tankata hinanpapi hehan kukuśe optaye kin en iwicaya- yapi. Unkan iho, kukuśe optaye kin iyulipa maya ĩnca apa- mahde inyang naśdog iyayapi, mde kin en, qa minin ŕapi.

33 Unkan tona wo wicaqupi qon hena najicapi ; qa otonwe en kipi, qa taku owasin oyakapi, wicaśta wakan śica wicayu- hnaśkinyanpi qon, taku ecawi- cakiconpi kin hena koya.

34 Unkan iho, otonwe kin oco- wasin Jesus itkokim upi, qa wanyakapi qehan, makoce ta- wapi kin etanhan hde kta ice- kiyapi.

WICOWOYAKE 9.

1 Hehan wata kin en okipe a akasanpa kihde a iye totonwe kin en ki.

2 Unkan iho, wicaśta ŕatake cin wan owinja akan wanka e he en ahipi. Unkan Jesus wa- cinyanpi kin wanyake ehan ŕatake cin heciya ; Cinś, cante waśte wo ; wayahtani kin nici- cajujupi ce.

3 Unkan iho, wowapi kagapi kin wanjikji iyakitedan hekici- yapi ; Wicaśta kin de śicaya ia.

4 Unkan Jesus canteyuzapi kin wanyaka hehan heya ; Tokeca cante mahen taku śica awa- cannipi he.

5 Wayalitani kin nicicajujupi ce, eyapi ; qa íś ; Najin qa mani wo, eyapi kin, unma tukte waśa- kadan he.

6 Tuka Wicaśta Cinhintku kin woalitani maka akan kajuju kta okihi e he sdonyayapi kta ; he- han ŕatake cin heciya ; Najin wo, nitowinja ehdaku qa tiyata hda wo.

7 Unkan najin hiyaye a iye ti ekta hda.

8 Tuka wicota he wanyakapi hehan yuśinyayapi, qa Wakan- tanka wicaśta wookihi hinsko tanka wicaqu kin he yatanpi.

9 Unkan Jesus hetanhan iyoo- pta iyaya hehan wicaśta wan Mattheos eciyapi, mazaska mna- yanpi kin en iyotanka he wan- yaka ; qa heciya ; Miyahna u wo. Unkan najin hiyaye a ihakam iyaya.

10 Unkan ti mahen wota iyo-

tanka yanka hehan, iho, mazaska mnayanpi walitanipi sa ko ota en hipi, qa Jesus kici iyotankapi, waonspewicakiye cin om.

11 Unkan Pharisee kin is he wanyakapi hehan waonspewicakiye cin hewicakiyapi; Tokeca Waonspekiye nitawapi mazaska mnayanpi walitanipi sa ko om wota he.

12 Unkan Jesus he nahon qehan hewicakiya; Tona zanipi kin hena pejihutawicašta cinpi šni, tuka wayazankapi kin.

13 Tuka ya po, qa de taku kapi hecinhan sdonya po; Wowaonšida iyomakipi qa wošnapi wacin šni. Wicašta owotanna wicakico wahi šni, tuka walitanipi sa iyopeiciyapi kta on wahi ce.

14 Hehan Johannes waonspewicakiye cin en hipi qa heciyapi; Tokeca unkiye qa nakun Pharisee kin ijehan akihanunkiciyapi, tuka waonspewicakiye cin akihaniciyapi šni.

15 Unkan Jesus hewicakiya; Wakankiciyuza cincapi kin tohanyan tawicu ton kte cin om un kinhan, hehanyan token ecin iyokišicapi kta he; tuka anpetu u kta tawicu ton kte cin ewicakiciyakupi kta, unkan hehan akihaniciyapi kta.

16 Tuwedan šina teca onšpa wokoyake tanika en akibdag ton šni; kinhan onšpa teca qon he mnawahe kta qa sanpa tanka hdecahan aya ece.

17 Nakun miniša teca ojuha tanika en okaštanpi šni ece; kinhan ojuha kin napopa, qa miniša kin skepa, qa ojuha kin ihangyapi ece. Tuka miniša teca ojuha teca en okaštanpi ece, hecen napin tanyan yuhapi.

18 Hena hecen ewicakiya icunhan, iho, wicašta itancan wan en u qa canpeška makehde ina-

jin qa heciya; Micunksi nakaha ťa, tuka en yau qa nape on aya-putake cinhan kini kta.

19 Unkan Jesus najin qa kici hda, nakun waonspewicakiye cin.

20 Unkan iho, winolinca wan waniyetu ake nonpa wayazanka, we ece iheya, he idazatanhan en u qa tašina opapun kin yutan:

21 Tašina kin hee kaeš mdutan kinhan amasni kta ce, cante mahen eye ca *hecon*.

22 Tuka Jesus ihdamna, qa wanyake čehan heya; Cunš, cante wašte wo; wacinyaye cin he asniniyan ce. Unkan wihiyayedan oape kin he en winolinca kin asni.

23 Unkan Jesus wicašta itancan qon ti kin en i, qa tona cotanka yajopi, oyate ceyapi ko wanwicayaka;

24 Hehan hewicakiya; Ako iyaya po; wicinyanna kin ťe šni, tuka ištinnma ce. Unkan ihahapi.

25 Tuka oyate tankan hdicuwicayapi, hehan ti mahen i, qa nape on yuza; unkan wicinyanna kin inajin.

26 Unkan he makoce kin owancaya oyakapi.

27 Unkan Jesus hetanhan iyopte iyaya, hehan wicašta nom ištagogapi kin hena ihakam yapi, howayapi qa heyapi; Dawid Cinhintku onšunkida miye.

28 Unkan ti mahen iyaya, hehan wicašta ištagogapi kin en hipi: Unkan Jesus hewicakiya; Hecen ecamon kta owakihi wicayadapi he. Unkan, Han, Itancan, cyapi.

29 Hehan išta en wicayutan qa heya; Wacinyayapi kin iyecen ecaniconpi nunwe.

30 Hecen išta hdukawapi. Unkan Jesus wašagya wahokonwi-

cakiye ça heya; Ito tuwedan sdonye kte śni

31 Tuka tankan hdapi hehan makoce kin he owancaya nina oyakapi.

32 Unkan hena iyayapi hehan iho, wicašta wan ia okitpani, wakan śica yuhnaśkinyan, he en ahipi.

33 Unkan wakan śice cin napayapi hehan ia okitpani qon ia; unkan oyate kin inihanpi qa heyapi; Israel en tohinni decen wanyakapi śni tuka qon.

34 Tuka Pharisee kin heyapi; Wakansica itancan kin on taku wakan śica napewicaya ece.

35 Unkan Jesus otonwe kin owasin, otonwe ciqadan ko iyaza un, omniciye tipi yuhapi kin ohnahna waonspekiye ça wokiconze wotanin wašte kin he oyaka ece; qa wayazankapi owasin, oyate kin en teliya unpi ko asniwicaya ece.

36 Tuka wicota wanwicayaka hehan onśiwicakida; nina mdo-kiťapi qa enanakiya iyayapi ece, taħinca wanunyanpi tuwedan wicayuhe śni iyececa.

37 Hehan waonspewicakiye cin hewicakiya; Awicakehan woksapi kin he tanka, tuka ĩtanipi kte cin hena tonana:

38 Heon etanhan woksapi en Itancan kin iye tamaga kin en wicašta ĩtanipi kte cin hena hiyuwicaye kta icekiya po.

## WICOWOYAKE 10.

1 Unkan waonspewicakiya akenonpapi kin hena wicakico qehan, taku wakan śica on wowaśake wicaqu, napewicayapi kta, qa nakun wowayazan śicaya unpi ko, owasin asniwicayapi kta.

2 Unkan wahośiyapi akenonpapi kin kakenken ewicakiyapi;

tokaheya Simon he nakun Inyan eciyapi, qa Andrew iye sunkaku; Jakob Zebede cinhintku qa Johannes iye sunkaku;

3 Philip qa Bartholomew; Thomas qa Mattheos wamnaye ciqon; Jakob Alpheus cinhintku qa Lebbeus he nakun Thaddeus eciyapi;

4 Simon Kananite kin, qa Judas Iskariot wiyopeye kte cin hee.

5 Dena akenonpapi kin Jesus yewicaśi, wahokonwicakiye ça heya; Ikcewicašta tacanku wan ohna yapi śni po, qa Samaria oyate otonwe tawapi kin en yapi śni po:

6 Tuka Israel ti kin etanhan taħinca wanunyanpi taninpi śni kin hena ekta ya po.

7 Qa dapi eca yaotanin po, qa; Maħpiya wokiconze kin wanna kiyedan un ce, eya po.

8 Tona wayazankapi kin asniwicaya po, tona lepros ececapi kin ska wicakaga po, ĩtapi kin hena kiniwicaya po, qa taku wakan śica napewicaya po; iyunwin codan iyacupi, iyunwin codan wicaqu po.

9 Ipiyake nitawapi ohna mazaskazi, qa mazaska, qa mazaśa unmana yuhapi śni po.

10 Qa icimayanipi kin on wujuhadan, qa onħidoħda nonpa, qa hanpa, qa cansagye, yuhapi śni po; tuwe ĩtanı kin he woyute qupi ece e kta iyececa.

11 Qa otonwe tanka otonwe ciqadan ko, wanji tukte en yaipi kinhan, tuwe iyececa hecinhan iwicawanga po, qa he kici yukan po, tohanyan etanhan yahdapi śni kinhan.

12 Qa tipi wanji en yaipi kinhan, Wookiye en un nunwe, eya po.

13 Qa tipi kin he iyececa hecinhan wookiye nitawapi akan



un kta; tuka iyecece śni kinhan wookiye niye en nihdipi kta.

14 Qa tukten iyowinniciyapi śni qa nioiepi kin nahonpi śni kinhan, tipi kin he, qa otonwe kin he, etanhan tankan yahdapi kinhan, watusėkśeca siha omi-  
tkapapi kin he natata po.

15 Awicakehan heciciyapi; Woyaco anpetu kin en otonwe kin he tehya un kta, Sodom qa Gomorra makoce kin isanpa.

16 Iho, talinca wanunyanpi śunktokeca wicehna iyecen yeciśipi; heon etanhan wamduśka iyecen ksapa po, qa wakiyedan iyecen wahbapidan po.

17 Tuka wicaśta iwanwicayaka po; woyaco omniciye kin en aniyampi kta, qa omniciye tipi yuhapi kin ohna nicapsinsintapi kta:

18 Qa wicaśta itancanpi wicaśtayatapi ko, en aniyampi kta, miye on etanhan, hecen iyepi qa Ikcewicaśta ko wicayakiyutaninpi kta.

19 Unkan tohan hecen wicanićupi kinhan, taku, qa token ehapi kte cin, heon iyokiśinićiyapi śni po; wihiyayedan oape kin he en token ehapi kta he nićupi kta ce.

20 Ie kte cin he niyepi śni, tuka Niyatepi Taniya en niunpi kin he iye ie kta.

21 Hunkawanjinkiciyapi kin is unna ktepi kta e wicaqu kta; qa wicaśta wan iye cinhintku kin nakun; qa wicacinca kin is hunkakewicayapi itkowicakipapi qa wicakiktepi kta.

22 Qa micaje on owasin śicedidapi kta; tuka tuwe owihanke kin hehanyan sutaya un kinhan he ni kta.

23 Tuka tohan otonwe kin de en śicaya nicuwapi kinhan, wanji

tokeca ekta najica po; awicakehan heciciyapi, Israel otonwe tawapi kin iyaza yaunpi kte śni ecen Wicaśta Cinhintku kin hi kta.

24 Waonspekiyapi kin he waonspekiya tawa kakipe śni; qa tuwe wowidake un kin he yuhe cin isanpa tanka śni ece.

25 Tuka waonspekiyapi kin waonspekiya tawa kin iyececa, qa wowidake un kin yuhe cin iyececa hecinhan hecetu kta. Tipi tawa kin he Beelzebub eciyapi hecinhan, tiyohnake tawa kin is nakun hewicakiyapi kte śni he.

26 Heon etanhan kowicakipapi śni po; taku akahpapi qa yuzamnipi kte śni wanica, qa taku anahmanpi qa sonyapi kte śni wanica.

27 Taku otpaza en ociciyakapi kin he anpa en daotaninpi kta; qa taku noge on nayahonpi kin he tipi akahpe kin etanhan eyanpaha odakapi kta.

28 Unkan tona wicatancaan ecdan ktepi kta okihipi, qa wicanagi kte okihipi śni kin hena kowicakipapi śni po; tuka tuwe wicanagi wicatancaan ko Wakanśica ti kin en ihangye kte cin hee e kokipa po.

29 Zitkadan nom mazaśa wanjidan iyopeyapi śni he; qa etanhan wanjidan kaeś Niyatepi cdan makata ihpaye kte śni.

30 Tuka paha nitawapi kin hec kaeś owasin yawapi ece.

31 Heon etanhan kopehdapi śni po; zitkadan ota isanpa niyawapi ece.

32 Heon etanhan tuwe kaśta wicaśta wicitokam miye omayake cinhan, he Ate mahpiya en un kin itokam omdake kta.

33 Tuka tuwe wicaśta wicito-

kam miye elipemaye cinhan, he miye Atewaye mahpiya en un kin itokam elipewaye kta.

34 Wookiye maka akan wicawaqu kta on wahi kecinpi sni po; wookiye wicawaqu kta wahi sni tuka mazasgye.

35 Wicašta wan atkuku šicekidake wakiye kta wahi, qa cunwintku iye hunku kin, qa takošku iye kunku kin šicekidake kta heon.

36 Qa wicašta tona tokayapi kin iye ti en unpi kin hena eepi kta.

37 Tuwe miye isanpa atkuku qa is hunku kin waštekidake cinhan, he mici un kta iyecece sni; qa tuwe miye isanpa cinhintku qa is cunwintku kin waštekidake cinhan, he mici un kta iyecece sni:

38 Qa tuwe cansusbeca tawa kin ehdaku sni qa miyahna u sni kinhan, he mici un kta iyecece sni.

39 Tuwe wiconi tawa kpatan kinhan, he toki elpekiye kta; qa tuwe miye on etanhan wiconi tawa kpapan kinhan, he kpatan kte cin ee.

40 Tuwe iyowinniciyapi kin he iyowinmakiya; qa tuwe iyowinmakiye cin he tuwe umaši kin he iyowinkiya ece.

41 Tuwe wicašta wokcan, wicašta wokcan caje on iyowinkiye cinhan, he wicašta wokcan iyunwin tawa yuhe kta; qa tuwe wicašta owotanna, wicašta owotanna caje on iyowinkiye cinhan, he wicašta owotanna iyunwin tawa kin icu kta.

42 Qa tuwe waonspekiyapi caje on, dena cikcistinpidan wanji wiyatke ohna mini sni ecedan yatkekiye cinhan, awicakehan heciciyapi, he iyunwin tawa toki elpekiye kte sni.

WICOWOYAKE 11.

1 Unkan Jesus waonspewicakiye akenonpapi kin taku econwicaši ayaštan, hehan hetanhan iyaya, otonwe tawapi kin ohnahna woyake kta qa waonspekiye kta.

2 Unkan Johannes kaška hnakapi kin en Messiya ohan kin naħon qehan, iye waonspewicakiye cin nom ekta yewicaši;

3 Qa heciya; Tuwe u kte cigon he niye he, qa is tuwe tokeca wanunyakapi kta he.

4 Unkan Jesus waayupte ca hewicakiya; Hda po, qa taku tona nayaħonpi qa wandakapi kin hena Johannes okiyaka po:

5 Išttagongapi kin tonwanpi ece, huštepi kin manipi ece, tona lepros eecapi kin ska wicakagapi ece, ťapi kin kinipi ece, qa tona onšikapi kin hena wotanin wašte owicakiyakapi ece.

6 Qa tuwe miye on našdute sni kinhan, he yawaštepi ce, eya.

7 Hena wanna kihdapi hehan Jesus Johannes on oyate kin wowicakiyaka; Taku wandakapi kta on hewoskan yaipi he; cedi wan tateyanpa kahubuza:

8 Tuka taku e wanyag yaipi he; wicašta wan wokoyake panpanna koyake cin he; iho tona taku panpanna koyakapi kin hena wicaštayatapi tipi ohna yakonpi ece.

9 Tuka taku e wanyag yaipi he; wicašta wokcan kin heca he; han, eciciyapi, qa wicašta wokcan isanpa.

10 Wowapi en kagapi qon, Iho, niite itokam wahošiya mitawa yewaši, he nitokam canku nitawa nicage kta ce, iho hee.

11 Awicakehan heciciyapi; Tona winolinca eciyatanhan



## WICOWOYAKE 12.

wicatonpi kin wanji Johannes baptem wicaqu ece kin sanpa tanka icage šni; tuka tuwe małpiya wokiconze kin en iyotan cistinna kin he sanpa tanka.

12 Nakun Johannes baptem wicaqu taanpetu kin hetanhan dehanyan małpiya wokiconze kin nina akitapi, qa nina akite cin hena iyalałpayapi ece.

13 Johannes hehanyan woope qa wicašta wokcanpi owasin woyakapi:

14 Qa niš wicada wacannipi hecinhan Elias u kte ciqon he dee.

15 Tuwe noge winahon yukan hecinhan he ito nahon kta.

16 Tuka ito wicoicage kin de taku e imdacin kta he. Hokšipidan tihocoka en iyotankapi kin hena e iyececa, takodakupi wicakipanpi,

17 Qa hewicakiyapi; Cotanke unnicijayopi tuka niye wayacipi šni; wašinunhdapi tuka niye yaceyapi šni.

18 Johannes wote šni qa wayakte šni hi; unkan, Taku wakan šica yuha ce, eyapi.

19 Wicašta Cinhintku kin wota qa wayatkan hi; unkan heyapi; Iho, wicašta wan wote sa qa miniša yatkan ece, wamnayanpi qa walitanipi sa takodawicaya ece. Tuka woksape iye cinca kin on owotanna oyakapi ece.

20 Hehan otonwe kin tona en iye ohan tanka econpi qon hena iyopewicaya, iyopeiçiyapi šni heon.

21 Hehehe Korazin, hehehe Bethsada; wicohan tanka niyepi en econpi kin, hena Turos qa Sidon en econpi unkanš, wana-kaja heyake šica całota ko en iyopeiçiyapi kta tuka.

22 Heon etanhan heciciyapi; Woyaco anpetu kin en, tehiya

yaunpi kta, qa Turos Sidon kici aopten unpi kta.

23 Qa Kapernaum niye, małpiya ekta wankan aniyampi, tuka wicahapi ekta elipeniyampi kta; wicohan tanka niye en econpi kin hena Sodom en econpi unkanš, anpetu kin dehanyan ecen un kta tuka.

24 Heon etanhan heciciyapi; Woyaco anpetu kin en tehiya yaun kta, qa Sodom makoce kin ahecece kta.

25 Anpetu kin hena en Jesus waayupte ça heya; Ate, małpiya maka ko Itancan kin, ciyatan, dena taku kin tona ksapapi qa wasdonyapi kin anawicayakiłbe ça hokšiyooqopapi owicayakidaka ece.

26 Han, Ate hecetu, hecen iyonicipi nakaes.

27 Ate taku owasin maqu; unkan tuwedan Cinhintkuyapi kin sdoney šni, Ateyapi un kin hecedan sdonkiya; nakon tuwedan Ateyapi kin sdoney šni, tuka Cinhintku kin hecedan; qa tuwe Cinhintku kin sdoneykiye cin he nakon.

28 Tona litayanipi qa tkeya wayaqinpi kin owasin en mau po, kinhan ozikiyapi ciçupi kta.

29 Can napinpi mitawa kin he icu po, qa miye eciyatanhan onspeiçiya po, cante ekta onšimiçida qa walıbayedan waun; hecen ninagipi en woozikiye duhapi kta.

30 Can napinpi mitawa kin he tehike šni, qa waqin mitawa kin he kapojedan.

## WICOWOYAKE 12.

1 Anpetu kin hena en, anpetu wakan icunhan, Jesus aguyapi ojupi kin ehna iyaya; unkan waonspewicakiye cin wotekte-

hdapi, qa aguyapi yuksa icupi qa yutapi.

2 Unkan Pharisee kin he wan-yakapi hehan heciyapi; Wanyaka wo, waonspewicayakiye cin, anpetu wakan icunhan taku econpi kte śni ece kin, hee econpi.

3 Unkan iye hewicakiya; Dawid taku econ qon he tohinni dawapi śni he; iye qa tona om un kin wotektehđapi qehan;

4 Tipi wakan kin en i, qa aguyapi taninyan ehnakapi kin yuta, he iye qa tona om un kin yutapi kte śni, tuka wośnapi kagapi kin ecedan yutapi kta tuka.

5 Qa woope kin en nakun dawapi śni, wośnapi kagapi kin tipi wakan ohna anpetu wakan ahopapi śni ešta iyaonpepica śni unpi.

6 Tuka heciciyapi; Tuwe tipi wakan kin isanpa tanka waden un.

7 Wowoańsida wacin qa wośnapi wacin śni ce, eyapi qon he idukcanpi unkańs, tona wahtanipi śni kin hena wicadacopi kte śni tuka.

8 Qa Wicašta Cinhintku kin he anpetu wakan Itancan kin he nakun ee.

9 Hehan hetanhan iyaye a omnieiye tipi tawapi kin en i.

10 Unkan iho, wicašta wan nape śnija hen un; unkan wi-wangapi qa heciyapi; Anpetu wakan icunhan waasniyapi kta iyececa he; he iyaonpapi kta e heyapi.

11 Unkan hewicakiya; Enitanhanpi wicašta wanji tahnca wanunyanpi wanjidhan yuhe cinhan, he anpetu wakan icunhan wolha en iyohpaya hecinhan, tancan en yuze a ehdaku kte śni he.

12 Wicašta kin he tahnca wanunyanpi isanpa ece. Heon etanhan anpetu wakan icunhan taku wašte econpi kta iyececa.

13 Hehan wicašta qon heciya; Nape hdukatin wo; hecen yukatin, unkan unma kin iyecen asni icaga.

14 Unkan Pharisee kin hetanhan tankan hdapi, qa token ktepi kte cin he akiłapi.

15 Tuka Jesus he sđonye a hetanhan tokan iyaya; unkan wicota hnca ihakam unpi, qa iye hena owasin asniwicaya:

16 Qa nina oyake śni wicaşı.

17 Hecen Isaya wicašta wockan kin taku eye ciqon yueceptupi kta; he kaken eya;

18 Iho, mitahokśidan wahđahņige ciqon; wašte wakidake cin on minagi iyuskin ece; mitaniya kin waqu kta, hecen Ikcewicašta kin woyaco owicakiyake kta.

19 Wicakize kte śni, qa pau kte śni, qa ho kin tuwedan canku ohna nahon kte śni:

20 Cedi kaśuśujapi kin he yukse kte śni, qa hańonta ide kte cin he kasni kte śni, woyaco he woohiye ekta au śni kinhan:

21 Qa iye aje kin Ikcewicašta wacinyanpi kta.

22 Hehan wanji wakan śica yuhnaśkinyan he en ahipi, išttagonge a ia okitpani; unkan asniyan, hecen išttagonge a ia okitpani kin he ia qa nakun tonwan.

23 Unkan wicašta ota kin owasin yuśinyayapi qa heyapi; Dawid cinhintku kin he dee śni he.

24 Tuka Pharisee kin is he nahonpi qehan heyapi; Wicašta kin de wakan śica napewicaye cin he Beelzebub wakan śica itancan kin on hecon ece.

25 Unkan Jesus token cante-

yuzapi kin he sdonye ça hewicakiya; Wokiconze wan iye iyakitedan kiciza eca hinhpaya ece; nakun otonwe qa tipi otoiyo hi iye iyakitedan kicizapi ehan-tanhan ecen he kte śni.

26 Qa Satan Satan napeye cinhan wanna iye içiciza; hecen token tokiconze kin sutaya he kta he.

27 Qa miye Beelzebub on wakan śica napewicawaya ehan-tanhan, nicincapi kin is taku on napewicayapi he; heon etanhan hena niyacopi kta.

28 Tuka miye Wakantanka Taniya on wakan śica napewicawaya hecinhan, Wakantanka tokiconze kin wanna en nihipi.

29 Wicašta waşaka ti kin en, tuwe tin iyaye ça taku tawa kin ihangye kta token okihi kta he; tokaheya wicašta waşake cin kaşke cinhan hehan tipi kin ihangye kta.

30 Tuwe mici un śni kinhan he makipajin ece; qa tuwe micipahi śni kinhan he yutakuni śni ece.

31 Heon etanhan heciyapi; Woahitani owasin iapi śica ko wicašta wicakicicajujupi kta; tuka Woniya Wakan aiapi kin he wicašta wicakicicajujupi kte śni.

32 Qa tuwe Wicašta Cinhintku kin taku śica eciye cinhan, he kicicajujupi kta; tuka tuwe Woniya Wakan kin taku śica eciye cinhan, he kicicajujupi kte śni, wiconi kin de en, qa nakun wiconi u kte cin en.

33 Can kin wašte kaga po, kinhan waskuyeca wašte kta; qa is can kin śica kaga po, kinhan waskuyeca śice kta; can kin waskuyeca tawa kin on sdonyapi ece.

34 Wamduška wicoicage, ni-

śicapi hecen token taku wašte ehapi kta oyakihipi he; wicacante ojudan kin he eciyatanhan wicai kin ia ece.

35 Wicašta wašte kin iye cante wašte ojudan kin eciyatanhan taku wašte hiyuya ece; qa nakun wicašta śice cin iye cante śica ojudan kin etanhan taku śica hiyuya ece.

36 Tuka wicoie wašte śni otoiyo hi wicašta eyapi kin hena on woyaco anpetu kin en ohdakapi ece e kta, he miye eciyapi.

37 Nioie kin on niyaowotanpi kta, qa nakun nioie kin on niyacopi kta.

38 Hehan wowapi kagapi wanjikji qa Pharisee kin ayuptapi qa heciyapi; Waonspekiya, wowapetokeca wan wanyagunya-kiyapi kta uncinpi.

39 Tuka iye waayupte ça hewicakiya; Wicoicage śice ça wawicihalapi econ sa kin he wowapetokeca da, tuka wowapetokeca wanjidana qupi kte śni, Jonas wicašta wokcan wowapetokeca tawa kin hecedan kta.

40 Anpetu yamni qa hanyetu yamni hehayan Jonas hogan tanka tezi kin ohna un qon, he iyecen anpetu yamni qa hanyetu yamni Wicašta Cinhintku kin maka cante kin en un kta.

41 Woyaco anpetu kin en Ninewe wicašta kin inajinpi qa wicoicage kin de yacopi kta; hena e Jonas woyake cin on iyopeiciyapi tuka; unkan iho, Jonas isanpa tanka wanji den un.

42 Itokah wicaştayatapi winohinca qon he woyaco kin en inajin kta, qa wicoicage kin de yaco kta; ege Solomon toksape nahon kta on maka ihanke kin etanhan u tuka; unkan iho,



wanji Solomon isanpa tanka den un.

43 Woniya šape cin wicašta kin etanhan tanka ta hinanpa, hehan makoce puza en omani, ozikiyapi akita, tuka takudan iyeye šni;

44 Hehan heya; Tipi mitawa etanhan wahinape ciqon he ake ekta wahde kta. Unkan ekta ki, qa tuwedan ohna yanke šni, kahintapi qa ayuco yuštanpi, hecen iyeya.

45 Hehan iyaye ča woniya tokeca šakowin iye isanpa šicapi, hena iwicacu qa om mahen iyaya, qa ohna yukanpi; unkan wicašta kin he hetanhan tehiya un, tokaheya un qon isanpa. Wicoicage šice cin de hecece kta.

46 Unkan oyate kin hecen wowicakiyaka icunhan, iho, iye hunku qa hunkawanjtku kin tankan hinajinpi qa okiyapi kta cinpi.

47 Unkan wanji heciya; Iho, nihun qa nihunkawanji tankan najinpi qa oniciyapi kta cinpi.

48 Tuka iye waayupte ča tuwe heye cin he heciya; Tuwe inawaya he, qa mihunkawanji kin hena tuwepi he.

49 Unkan waonspewicakiye cin ektakiya nape hdugate ča heya; Iho, mihun qa mihunkawanji dena eepi ce.

50 Tuwe kašta Ate mašpiya ekta un tawacin kin ecen econ kinhan he mihunkawanji qa mitawinohtin qa mihun ee.

### WICOWOYAKE 12.

1 Unkan anpetu kin hena en Jesus tipi kin etanhan tankata iyaye ča mde kin icahda iyotanka.

2 Unkan wicota linca en mniciyapi, hecen iyotanke kta e

wata wan en opa, qa oyate kin iyulipa hutata najinpi.

3 Unkan wiyacinpi on taku ota owicakiyaka, qa heya; Iho, wicašta woju wan woju iyaya:

4 Unkan woju icunhan, apa canku icahda hinlipaya; hecen wahupakoza en hipi qa temyapi.

5 Qa apa tukten inyan ota ehna ilipaya, hen maka tonana; unkan ohankoya hinanpa, maka tonana nakaes.

6 Tuka wi kata aya hehan owasin gu; qa hutkan nica heon etanhan šnija.

7 Unkan apa is wapepeka ehna ilipaya; unkan wapepeka tanka icage ča hecen kte.

8 Tuka apa maka wašte en ilipaya, qa etanhan ota icaga, apa opawinge, apa wikcemna šakpe, apa wikcemna yamni.

9 Tuwe noge winahon kta yukan hecinhan, ito nahon kta.

10 Unkan waonspewicakiye cin en hipi qa heciyapi; Tokeca wiyacinpi on owawicayakiya he.

11 Unkan iye awicayupte ča heya; Mašpiya wokiconze woa nahibe kin niye oyakalinigapi kta ničupi, tuka hena hecen wicacupi šni, heon etanhan.

12 Heon tuwe taku yuhe cinhan nakun qupi kta, hecen iyakičuya yuhe kta; tuka tuwe takudan ton šni, tona yuhe cin hee kaeš kipi ece e kta.

13 Heon etanhan wiyacinpi on wowicawakiyaka ece; hecen tonwanpi keš wanyakapi šni, qa winahonpi keš nahonpi šni, qa nakun okalinigapi šni.

14 Qa hecen Isaya wicašta wokcan taku eye ciqon iyepi on yucetupi; Winahonpi on nahonpi kta, tuka oyakalinigapi kte šni; qa tonwanhan wandakapi kta, tuka idukcanpi kte šni ce.

15 Oyate kin de cantepi kin cepa aya, qa nogepi kin kitan se winalhonpi, qa istohmuzapi; hecece sni unkanś, ista on wanyakapi kta, qa noge on nahonpi kta, qa cante on iyukanpi kta, qa ihduhomnipi kta, kinhan a-sniwicawaye kta tuka.

16 Tuka niistapi kin wowašte, on wandakapi ece; qa ninogepi kin wowašte, on nayalhonpi ece.

17 Awicakehan heciciyapi; Wicašta wokean ota, qa wicašta owotanna, taku wandakapi ece kin hena wanyakapi kta cinpi, tuka wanyakapi sni; qa taku nayalhonpi ece kin, hena nahonpi kta cinpi, tuka nahonpi sni.

18 Heon etanhan wicašta wuju qon wiyacinpi kin he ito nahon po.

19 Wicašta otioyohi wokiconze oie kin nahon keś, okałnige sni kinhan, he tuwe śice cin en hi, qa taku cante en ojupi qon eyaku ece; iho, canku icahda ojupi icu qon hee.

20 Unkan inyan ota en ojupi icu qon he dee; tuwe wicoie kin nahon qa ołankoya iyuśkinyan icu;

21 Tuka iye en hutkan wanica, hecen ecadan enakiya; tohan wicoie kin on wokakije qa śicaya kuwapi akipa hecinhan, hinna-kaha ayuśtan iyaya ece.

22 Unkan wapepeka ehna ojupi icu qon, tuwe wicoie kin nahon kin hee; tuka wiconi kin de awacinpi qa woyuha ota wolnaye kin hena wicoie kin kte ece, hecen waskuyeca takudan aicage sni.

23 Tuka maka wašte en ojupi icu qon, he tuwe wicoie kin nahon qa okałniga; qa hecen waskuyeca icahya ece; apa opawinge, qa apa wikcemna śakpe, qa

apa is wikcemna yamni icaga ece.

24 Wiyacinpi tokeca wan owicakiyake ca heya; Malipiya wokiconze kin wicašta wan iye tamaga en su waštešte oju kin he iyececa.

25 Tuka wiciŝtinma hiyeya icunhan, toka wan en hi, qa aguyapi ehna wayahota oju, qa kihda.

26 Unkan ape kin wanna uye ca wahuwapa icage kta, hehan wayahota is nakun tanin.

27 Unkan tipi tawa wowidakewicaye cin en hipi qa heciyapi; Itancan, nitamaga en su waštešte oyaju sni he; hecen wayahota kin tokiyatanhan yuha he.

28 Unkan iye hewicakiya; Wicašta wan toka kin heca e hecon. Unkan wowidakewicaye cin hena heciyapi; Unyanpi qa unpahipi kta yacin he.

29 Tuka iye heya; Hiya; okinni wayahota kin yapahipi kinhan, nakun aguyapi koya dujunpi kta.

30 Ito woksapi kta hehanyan napin icicahiya icage kta. Unkan woksapi anpetu kin he en, wayuksapi kin hewicawakiye kta; Tokaheya wayahota pahipi qa lułnalhiyapi kta on palita po; tuka aguyapi kin he doto-piye mitawa en omnayan po.

31 Wiyacinpi tokeca wan owicakiyake ca heya; Malipiya wokiconze kin sinape su wanji iyececa, he wicašta wan icu qa iye tamaga kin en oju.

32 He su kin owasin iyotan cistinna; tuka icaga hehan wato kin owasin isnana tanka; qa can iyececa icaga, hecen malipiya okinyanpi kin en upi, qa adetka kin en ahiyahan ece.

33 Wiyacinpi tokeca wan owicakiyaka; Malipiya wokiconze kin on napohiyapi kin iyececa,



he winolinca wan icu qa wotpanpi wiyutapi yamni en inahman, hecen ocowasin napohiyapi.

34 Dena taku owasin Jesus wiyacinpi on oyate kin owicakiyaka, qa wiyacinpi codan takudan owicakiyake šni.

35 Hecen wicašta wokcan taku eye ciqon yuacetupi, he hecen eya; Wiyacinpi on i wahdukawa kta; taku maka kagapi chantanhan anahmanpi kin he omdake kta ce.

36 Hehan Jesus oyate kin hde-wicaši, qa tipi wan en tin iyaya. Unkan waonspewicakiye cin en hipi qa heciyapi; Maga en wayahota wiyacinpi kin he unkokiyaka miye.

37 Unkan iye awicayupte ça hewicakiya; Tuwe su waštešte oju qon he Wicašta Cinhintku kin hee.

38 Maga kin he maka ocowasin ee; su waštešte qon he wokiconze cinca kin hena eepi; wayahota kin he tuwe šica cinca kin hena eepi:

39 Toka hena oju qon Wakanšica hee. Woksapi kin he wiconi kin de owihanke kin hee; qa wayuksapi kte cin malhipiya ohnihde kin hena eepi.

40 Heon etanhan, wayahota pahipi qa peta en hulnagapi qon he wiconi kin de owihanke kin ekta hecece kta.

41 Wicašta Cinhintku kin tona ohnihdewicaye cin hena yewicaši kta; unkan tokiconze kin etanhan tona walhanipi qa taku šica econpi kin owasin pahipi kta:

42 Qa peta mde kin en elpe-wicayapi kta; hen wicaceya hi hdakinskinzapi ko yuke kta.

43 Hehan wicašta owotanna kin anpetu wi kin iyecen iyega-

pi kta, atkukupi tokiconze kin en. Tuwe noge winahion kta yukan hecinhan, ito nahion kta.

44 Akeš malhipiya wokiconze kin he mazaska, maga wan en nahmanpi kin he iyececa, he wicašta wan iyeya, unkan analibe ça, wiyuškinyan iyaye ça, taku yuhe cin owasin wiyopekiye ça, maga kin he opeton.

45 Akeš malhipiya wokiconze kin wicašta wopeton inyan tehika akite ciqon he iyececa ye:

46 He inyan tehika wanjidan, ota iyopeyapi kin, he iyeya, unkan iyaye ça, taku tawa kin owasin wiyopekiye ça, he opeton.

47 Akeš malhipiya wokiconze kin he ho wan, mde kin en iyolpeyapi, qa ocaje owasin etanhan manaye cin, he iyececa;

48 He wanna ojudan hehan hutata ahdipi, en iyotankapi, qa waštešte kin hena cega ohna mnakiyapi, tuka šiksice cin hena elpeyapi.

49 Maka owihanke kinhan he iyecece kta; hehan malhipiya ohnihde kin upi kta, qa tona šice cin owotanna unpi kin wiciyopeyapi kin hena iwicacupi kta;

50 Qa peta mde kin en iyolpewicayapi kta. Heciya wicaceya hi hdakinskinzapi ko yuke kta.

51 Jesus hewicakiya; Dena owasin oyakalinigapi he. Han, Itancan, eciyapi.

52 Hehan hewicakiya; Heon etanhan wowapi kaga otioyohi, malhipiya wokiconze on onspekiyapi kin, he wicašta wan tipi yuhe ça, mazopiye tawa kin etanhan taku teca tannika ko ikikeu ece kin he iyececa.

53 Unkan Jesus wiyacinpi kin dena ihunnikiya, hehan hetanhan tankan iyaya:

54 Qa iye tamakoce kin en ki qehan, omniciye tipi yuhapi kin ohna waonspewicakiya; hecen yušinyayapi qa heyapi; Woksape kin de, qa wicohan tanka, wicašta kin de tokiyatanhan yuha he.

55 Cankajipa cinhintku kin he dee šni he; hunku he Mary eciyapi, qa sunkawicaye cin hena Jakob qa Joses qa Simon qa Judas:

56 Qa tawinohtin hena owasin unkiyopeyapi unpi šni he; hecen tokiyatanhan dena taku kin owasin yuha he.

57 Unkan canniyeyapi. Tuka Jesus hewicakiya; Wicašta wokcan yuonihanpi ece, tuka iye tamakoce qa iye ti kin ohna *yuonihanpi* šni.

58 Unkan wicohan tanka ota hen econ šni, wicadapi šni heon etanhan.

## WICOWOYAKE 14.

1 Unkan anpetu kin hena en Herod wicaštayatapi kin Jesus oyakapi kin he naħon;

2 Qa tahokšidan kin hewicakiya; Johannes baptem wicaqu ece kin he dee; řapi kin etanhan kini, heon etanhan wicohan tanka econ ece.

3 Herod Johannes yuze řa kaška, qa conkaške en ehnaka, Herodias iye sunkaku Philip tawicu qon heon.

4 Duhe kta iyecece šni ce, Johannes eciye ciqon.

5 Unkan heon kte kta cin, tuka oyate kin kowicakipa; hena e wicašta wokcan heca kecinpi.

6 Tuka Herod anpetu en tonpi qon he ake hiyohipi, hehan Herodias cunwintku kin wicacokaya waci, qa Herod iyokipiya.

7 Heon etanhan, taku wakan

cajeyate řa, taku kida kta hecinhan, awicakehan qu kta, keciya.

8 Unkan he itokam hunku onspekiya, heon heyaya; Wanna Johannes baptem wicaqu ece qon he pa kin wakšica wan ohna maqu ye.

9 Unkan wicaštayatapi kin iyokišice hinca, tuka wakanyan wacajeyate cin heon, qa tona om wota iyotanke cin hena on, he qu wicaši.

10 Hecen ekta ye wicaši, qa conkaške mahen Johannes pa baksa.

11 Unkan pa kin he wakšica ohna akupi, qa wikoška kin qupi; unkan iye iyoopta hunku qu.

12 Unkan waonspewicakiye cin hena en hipi, qa tancan kin eyakupi qa řapi; hehan yapi qa Jesus okiyakapi.

13 Unkan Jesus he naħon qehan, hetanhan watom iyaye řa, išnana řewoskan makoce wan ekta i. Unkan oyate kin he naħonpi qehan, otonwe etanhanhan huinyun ihakam yapi.

14 Unkan huta ekta ihunni qehan, wicota wanwicayaka; qa onšiwicakida, qa tona tehiya unpi kin hena asniwicaya.

15 Unkan wanna řtayetu hehan waonspewicakiye cin en hipi qa heyapi; Makoce kin de řewotahedan, qa wanna řtayetu, heon oyate kin hde wicaši wo, hecen otonwe ciqadan kin en yapi kta, qa taku yutapi opeiçitonpi kta.

16 Tuka Jesus hewicakiya; Hdapi kta iyecece šni; ito niye taku yutapi wicaqu po.

17 Unkan heciyapi; Aguyapi kagapi zaptan qa hogan nonpa, henana den unhapi ce.

18 Unkan heyaya; Hena makau po.

19 Unkan oyate kin wato en iyotanke wicaşı, qa aguyapi zaptan qa hogan nonpa nakun icu, qa malıpiya ekta etonwan, hehan yawašte, qa yuşıpaşıpa qa waonspewicakiye cin wicaqu, unkan waonspewicakiye cin is oyate kin wicaqupi.

20 Unkan owasin wotapi qa imnanpi; unkan oyaptapi etanhan pahipi, makanopiye akenonpa ojudan.

21 Unkan tona wotapi kin hena wicašta kektopawinge zaptan ecetu, nakun winohinca sıceca koya.

22 Hehan echankeya Jesus waonspewiyakiye cin wata wan en ope wicaşı, iye itokam akanpanpa yapi kta, oyate kin hde wicaşı icunhan.

23 Unkan wanna oyate kin hde wicaşı, hehan isnana paha wan ekta cekiya iyaya. Wanna otpaza tuka isnana ekta yanka.

24 Tuka wata kin wanna mde kin cokaya un, taja on iyotanhani iyekiyapi, tatohekiya yapi nakaes.

25 Unkan hanyetu en itopa kiktapi hehan Jesus mini kin amani en wicaya.

26 Unkan waonspewicakiye cin mini kin amani wanyakapi qehan, yuşinyayapi qa heyapi; He wanagi; qa kokipapi on sıcahowayapi.

27 Tuka Jesus kohanna owicakiye ça heya; Cante wašte po; de miye ce; kopehdapi şni po.

28 Unkan Inyan ayupte ça heya; Itancan he niye hecinhan, ekta mini kin amani u maşı wo.

29 Unkan; U wo, eciya. Hecen Inyan wata kin etanhan kun iyaye ça Jesus ekta ye kta mini kin amani.

30 Tuka wohitiya tateyanpa wanyaka, hehan kokipa. Qa spaye kta iyaya, hehan sıcahowaya, qa heya; Itancan, nima-yan wo.

31 Unkan Jesus echankeya nape ekta yekiye ça yuwankan icu, qa heciya; Cistinna wacin- yaya, tokeca wacetunyahda he.

32 Unkan wata kin en opapi hehan amdakedan icu.

33 Hehan wata en unpi kin en hipi, makata elıpeiçiyapi qa heciyapi; Awicakehan Wakantanka Cinhintku kin he niye.

34 Unkan akasanpa ihunnipi hehan Geneseret makoce kin en hipi.

35 Unkan wicašta makoce kin he en unpi kin hena iyekiyapi, qa ihduksan wanke cin owancaya hoşı wicakayapi. Unkan tona telıya unpi kin owasin en awicahipi;

36 Qa cekiyapi, taşina opapun heceedan kaeşyutanpi kta heon; unkan tona yutanpi kin owasin tanyan asnipi.

#### WICOWOYAKE 15.

1 Hehan Jerusalem etanhan wowapi kagapi qa Pharisee kin Jesus en hipi qa heyapi;

2 Tokeca waonspewicayakiye cin hunkawicayapi woope oyakapi qon acakşinpi he; qa aguyapi yutapi kte cinhan nape hdujajapi şni.

3 Unkan iye waayupte ça hewicakiya; Qa niş nakun tokeca woope odakapi kin on Wakantanka toope kin acayakşinpi he.

4 Wakantanka heya econ wicaşı; Niyate nihun kici wicahduonihan wo; nakun; Tuwe atkuku hunku kici wicayaşice cinhan wiconşe on te kta ce.

5 Tuka niye hehapi; Tuwe



atkuku qa ís hunku kin heciye kta iyececa ; Taku on ociciye kte cin he wanna wošnapi ce ; qa hecen atkuku hunku kici wicahduonihan šni ece

6 Hecen woope odakapi kin on Wakantanka toope kin dutakunipišni.

7 Wananičilmanpi, niyepi on Isaya tanyan woyake ça heye ciqon ;

8 Oyate kin de i on mikiyedani upi, qa iha on mayaonihanpi ; tuka cantepi kin hena mitehan umpi ece.

9 Wicašta wicoope kagapi kin hena woope keya onspewicakiyapi, qa on mayuonihanpi kte cin he takudan okihi šni ece.

10 Hehan oyate kin wicakico qa hewicakiya ; Nañonpi qa okaliniga po :

11 Taku wicai kin ohna iyaye cin he wicašta kin yušape šni ; tuka taku wicai kin etanhan hiyu kin he wicašta yušape cin ee.

12 Hehan waonspewicakiye cin en hipi qa heciyapi ; Wicoie kin de Pharisee kin nañonpi qa šihdapi, he sdoniyaya he.

13 Unkan waayupte ça heya ; Taku ojupi kin, tona Ate mañpiya ekta un kin oju šni kinhan, hena owasin yujunpi kta.

14 Awicayuştan po ; ístagongapi ístagongapi awicayapi kin hena hecapi. Unkan tuwe ístagonga ístagonga wan yus aye cinhan, napin makoñdoka en ohinñpayapi kta.

15 Hehan Inyan ayupte ça heciya ; Wiyacinpi kin de unkoñiyaka miye.

16 Unkan Jesus heya ; Niš nakun hinañin oyakañmigapi šni he.

17 Taku wicai kin ohna iyaye cin he wicatezi kin ekta i ece, qa hehan hetanhan tankan eñpe-

yapi ece ; he hinañin oyakañnigapi šni he

18 Tuka taku wicai kin etanhan hiyu kin hena wicacante kin eciyatanhan u ece ; qa wicašta yušape cin hena ee.

19 Wicacante kin eciyatanhan wicotawacin šica hiyu ece ; tinwicaktepi, wawicihahapi, wiinañmanpi, wamanonpi, woitonšni qa wicayašicapi kin.

20 Wicašta yušape cin dena ee ; tuka nape hdujaja šni wotapi kin he wicašta kin yušape šni.

21 Hehan Jesus hetanhan token iyaye ça, Turos qa Sidon makoce ihdukšan wanke cin he ekta i.

22 Unkan iho, Kanan winohinca wan makoce kin hetanhan hiyu, qa hoyekiye ça heya ; Itancan, Dawid Cinhintku, onšimada ye, micunkši wakan šica yuhnaškinyan, šicaya un.

23 Tuka iye oie wanjidan ayupte šni. Unkan waonspewicakiye cin en hipi, cekiyapi qa heyapi ; Hdeši wo, unkihakam šicahowaya ece.

24 Tuka iye waayupte ça heya ; Israel tiyohnaka tañinca wanunyanpi nunnipi kin henana ekta umašipi ce.

25 Hehan winohinca qon en hi, makata eñpeiciye ça heciya ; Itancan, omakiya we.

26 Tuka iye ayupte ça ; Hókšiyopa aguyapi tawapi kin icupi qa šunka wicacupi kin he hecetu šni ce, eya.

27 Unkan iye ; Han, Itancan ; tuka šunka kin iye wicayuhapi wahna wotapi tawapi kin etanhan ošnašna hinñpaye cin hena etanhan yutapi ece, eya.

28 Hehan Jesus ayupte ça heciya ; Winohinca, wacinyaye cin he tanka ; token yacin kin he enicicetu nunwe. Unkan wihi-

yayedan oape kin he hetanhan cunwintku kin asni.

29 Unkan Jesus hetanhan iyaye ça Galile mde kin ikiyedan u; qa paha wan ekta iyaye ça akan iyotanka.

30 Unkan wicašta ota en hipi, tona huštepi, ištágongapi, ia okitpanipi, hu bawicaksapi, qa toktokeca ota en awicahipi, qa Jesus siha kin en ewicahna-kapi; unkan asniwicaya.

31 Hecen wicota yušinyayapi, ia okitpanipi qon hena iapi, hu bawicaksapi qon hena tokecapi šni, huštepi qon hena manipi, qa ištágongapi qon hena tonwanpi wanwicayakapi, heon etanhan; qa Israel Taku Wakan tawapi kin he yatanpi.

32 Hehan Jesus waonspewicakiye cin wicakico qa hewicakiya; Oyate kin onšiwicawakida, wanna yamni can taku yute šni mici unpi; qa wote šni hde-wicawaši kta tawaŕenwaye šni, okinni tahepi ihpayapi kta.

33 Unkan waonspewicakiye cin heciyapi; Makoce hewotahedan kin de en tokiyatanhan aguyapi iyenakeca unhapi qa oyate hinsko tanka imnawicunyanpi kta he.

34 Unkan Jesus hewicakiya; Aguyapi kağapi tona duhapi he. Unkan; Šakowin qa hoganstina tonana nakun, eyapi.

35 Unkan oyate kin makata iyotanke wicaši;

36 Qa aguyapi šakowin icu, hogan kin hena nakun, qa yawašte, hehan kiyuštapa qa waonspewicakiye cin wicaqu; unkan waonspewicakiye cin oyate kin wicaqupi.

37 Unkan owasin yutapi qa imnanpi; qa oyaptapi kin hena pahipi, makanopiye šakowin ojudan.

38 Wotapi kin hena wica ece kektopawinge topa, nakun winohinca šiceca koya.

39 Hehan oyate kin hdewicaši, qa wata wan en ope ça Magdala makoce kin en hi.

## WICOWOYAKE 16.

1 Unkan Pharisee qa Sadukee etanhan en hipi, qa małhiya eciyatanhan wowapetokeca wan wicakiyutanin šipi, iyutanyanpi kta.

2 Tuka iye waayupte ça hewicakiya; Tohan hitayetu eca, Małhiya šaša heon owaštecake kta ce, ehapi ece.

3 Qa hanhanna eca, Ecin ošicecake kta, małhiya šaša qa šapšapa, heon etanhan. Wanničilmanpi, małhiya ite kin he yukcan onnispepi, tokeca anpetu kin dena wowapetogton oyakałnigapi šni he.

4 Wicoicage šice ça wawicilahapi econ sa kin he wowapetokeca wan da; tuka wowapetokeca wanjidan qupi kte šni; Jonas wicašta wokcan tawowapetokeca kin hecedan. Unkan ehpewicaya iyaya.

5 Unkan waonspewicakiye cin akasanpa ipi, qa aguyapi icu akiktonjapi.

6 Hehan Jesus hewicakiya; Pharisee qa Sadukee on napoliyapi tawapi kin he iwanyakapi qa kokipa po.

7 Unkan iye iyakitedan akini-capi qa heyapi; Aguyapi unki-cupi šni, heon etanhan, *heya ce*.

8 Tuka Jesus he sdonye ça hewicakiya; Cistinna wacinyayapi kin, tokeca niye iyakitedan ayakinicipi he, aguyapi iyacupi šni heon.

9 Hinałhin oyakałnigapi šni, wicašta kektopawinge zaptan

ça aguyapi zaptanna, qa makanopiye ojudan tonakeca yapahipi he yeksuyapi šni he.

10 Nakun wicašta kektopawin-ge topa qa aguyapi šakowin, qa makanopiye ojudan tonakeca iyacupi he.

11 Tokeca oyakašnigapi šni he, Pharisee qa Sadukee on napohiyapi tawapi kin he kokipe cišipi, he aguyapi on heciciyapi šni.

12 Hehan aguyapi on napohiyapi kin he kokipe wicaši šni, tuka Pharisee qa Sadukee woon-spe tawapi kin hee kokipapi kta, he okašnigapi.

13 Jesus Kesarea Philippi ma-koce kin en i qehan waonspewi-cakiye cin wiwicawange ça heya; Wicašta Cinhintku kin miye, matuwe kin, wicašta keyapi he.

14 Unkan heyapi; Apa Johannes baptem wicaqu qon; qa apa iš; Elias; qa toktokeca; Jeremias, qa iš wicašta wokcan wanji.

15 Qa niš matuwe kehapi he, ewicakiya.

16 Unkan Simon Inyan ayupte ca; Messiya Wakantanka ni un Cinhintku kin he niye, eya

17 Unkan Jesus ayupte ça heciya; Simon Jona cinhintku niyawaštepi ce; wicacehpi qa wicawe kin he oniciyake šni, tuka Ate mašpiya ekta un kin he *oniciyaka*

18 Qa miš nakun heciciya; Inyan he niye, qa imniya kin de akan okodakiciye mitawa wakage kta; qa wakanšica tatiyopa kin he yujuju kte šni

19 Unkan mašpiya wokiconze iyuhdoke kin he ciču kta; hecen taku maka akan yakaške cinhan he mašpiya ekta kaškapi kta; qa taku maka akan yakiduške cinhan he mašpiya ekta kiyuškapi kta.

20 Hehan waonspewicakiye

cin Jesus Messiya kin he iye, he tuwedan okiyake šni wicaši.

21 Hetanhan Jesus waonspewicakiye cin wowicakiyaka, Jerusalem ekta ye kta iyececa, qa wicahincapi, wošnapi kagapi, wowapi kagapi ko on taku ota kakije kta, qa ktepi kta, qa anpetu iciyanmi hehan ake kini kta, hena owicakiyaka.

22 Hehan Inyan Jesus icu qa iyopeye ça heya; Itancan, hecetu šni; dena ayakipe kte šni.

23 Tuka iye ihdubomni qa Inyan heciya; Satan mihekta-pa tanhan ya wo, tokamayaya; Wakantanka taku tawa kin awacanni šni, tuka wicašta taku tawapi kin.

24 Hehan Jesus waonspewicakiye cin hewicakiya; Tuwe miyahna u kta cin kinhan, wai-piičida kta, qa cansusbeca ehda-ku qa mihakam un kta.

25 Tuwe kašta wiconi tawa kpatan kinhan, he toki ehpekiye kta; qa tuwe miye on wiconi tawa kin kpagan kinhan, he iyeye kta.

26 Wicašta wan maka kin ocowasin kamna, qa nagi kin toki ehpeye cinhan he taku okihi kta he; qa wicašta nagi kin taku iyopekiye kta he.

27 Wicašta Cinhintku kin iye Atkuku towitan hduha taohni-hdewicaye cin om u kta; hehan wicašta otoiyohi iye ošanpi kin eciyatanhan wicaqu kta.

28 Awicakehan heciciyapi; Tona den najinpi kin etanhan wanjikji wiconte utapi kte šni, ecen Wicašta Cinhintku kin iye tokiconze kin en u wanyakapi kta.

## WICOWOYAKE 17.

1 Unkan iyohakam anpetu šakpe hehan Jesus Inyan qa



Jakob, qa iye sunkaku Johannes, hena iwicacu, qa paha wan tehanwankantu ekta awicaya;

2 Qa wicitokam yutokecapi; ite kin anpetu wi kin iyecen iyega, qa tawokoyake kin iyoyanpa iyecen ska.

3 Unkan iho, Moses qa Elias en ihdutaninpi qa kici wohdakapi.

4 Hehan Inyan ayupte ça Jesus heciya; Itancan, den unyakonpi kin he wašte; yacin kinhan, den wakeya yamni ti untagapi kta, wanji unnicagapi kta, qa Moses Elias kici wanjikji *wicunkicagapi* kta.

5 Iahan icunhan iho, iyoyanpa mahpiya wan aowicahanzi, qa iho, mahpiya kin eciyatanhan wicaho wan heya; Micinksi wastewakidake ça on iyomakipi kince cin he dee ce; anagoptan po.

6 Unkan waonspewicakiye cin he nahonpi hehan makipusdiya elpeiciyapi, qa nina kokipapi.

7 Tuka Jesus en wicahi, qa wicayutan qa heya; Inajin po, qa kokipapi sni po.

8 Unkan ista yuwankan ikikcupi hehan, tuwedan wanyakapi sni, Jesus ecedan.

9 Unkan paha kin etanhan kun hdicupi, hehan Jesus wahokonwicakiye ça heya; Wowanyake kin he tuwedan okiyakapi sni po, Wicasta Cinhintku kin wiconte etanhan piya ikicage sni hehanyan.

10 Unkan waonspewicakiye cin wiwangapi qa heciyapi; Wowapi kagapi kin, Elias tokaheya hi kta ce, eyapi kin, tokeca heyapi hwo.

11 Unkan Jesus waayupte ça hewicakiya; Awicakehan Elias tokaheya hi kta, qa taku owasin yuacetu kta.

12 Tuka heciyapi; Elias wanna hi tuka iyekiyapi sni, qa token cinpi qon ecakiconpi. He iyececa Wicasta Cinhintku kin iyepi eciyatanhan kakije kta.

13 Hehan waonspewicakiye cin okahnigapi, Johannes baptem wicaqu qon e he ke ça heon hewicakiya.

14 Unkan wicota en hdipi qehan, wicasta wan en hi qa canpeška makehde inajin,

15 Qa heya; Itancan, micinksi onsimicida ye, hanyetu wi ihnasinyan qa sicaya un; otakiya peta en ihpaye ça otakiya mini en iyolipaya ece:

16 Qa waonspewicayakiye cin wicawakahi, tuka asniyanpi kta okihipi sni.

17 Hehan Jesus ayupte ça heya; Wicoicage wacinye sni qa wacin tehike, tohanyan cicipi waun kta he; tohanyan iyowinciciyapi kta he; den makau po.

18 Unkan Jesus iyopeya, qa hecen wakan sice cin tankata hinanpa; unkan wihiyayedan oape kin hetanhan hoksidan kin asniyanpi.

19 Hehan waonspewicakiye cin Jesus isnana yanke cin en hipi qa heyapi; Tokeca unkiye he napeunyanpi kta unkokihipi sni he.

20 Unkan Jesus hewicakiya; Wacinyayapi sni heon; awicakehan heciyapi; Sinape su wanjidhan hinskokeca wacinyayapi unkan, paha kin de, Detanhan token iyaya wo, eyakiyapi kta; unkan token iyaye kta, qa taku oyakitpanipi wanime kta.

21 Tuka taku decece cin he cekiyapi qa wote sni unpi ecedan on tankan hinanpa ece.

22 Unkan Galile en unpi icunhan Jesus hewicakiya; Wicasta

Cinhintku kin wanna ecadan wicašta napepi kin en wicaqupi kta.

23 Unkan ktepi kta, qa anpetu iciyamni kinhan ake piya ikicage kta ce, eya. Unkan nina iyokišicapi.

24 Hehan Kapernaum en hipi qehan, tona mazaska mnayanpi ece kin Inyan en hipi qa heyapi; Waonspeniciyapi kin he mazaska mnayanpi en iyohpeye kta he.

25 Unkan, Han, eya. Hehan tin hdicu qehan Jesus tokaheya ie ça heciya; Simon token idukkan he; maka akan wicaštayatapi kin tokiyatanhan mazaska mnayanpi he; iye cincapi etanhan. qa is wicašta tokecapi kin etanhan.

26 Wicašta tokecapi etanhan, Inyan eya. Unkan Jesus heciya; Hehan cincapi kin wicakaskapi šni ece:

27 Tuka šihda wicunyanpi kte šni, e heon niš mde kin ekta ye ça hinšikijupi wan minin iyeya wo, qa hogan tokaheya hiyu kin he icu wo; he i kin dukawa kinhan ohna kangi kagapi wan iyeyaye kta; he icu qa miye qa niye on wicaqu wo.

## WICOWOYAKE 18.

1 Unkan hehan waonspewicakiye cin Jesus en hipi qa heciyapi; Małpiya wokiconze kin en tuwe iyotan tanka he.

2 Unkan Jesus hokšiyooqopa wan kico qa wicacokaya ehna;

3 Qa heya; Awicakehan heciyapi; Nihduhomnipi šni, qa hokšiyooqopa iyenicecapi šni kinhan, małpiya wokiconze kin en yaipi kte šni.

4 Tuwe ihduhukuye ça hokšiyooqopa kin de iyecen canteyuze

cinhan, małpiya wokiconze kin en iyotan tanka kin hee.

5 Qa tuwe hokšiyooqopa decewan, micaje on, iyowinkkiye cinhan, he miye iyowinmakiya ece.

6 Qa tuwe hokšiyooqopa kin dena, wacinmayanpi kin, wanji wałtanikiye cinhan, he inyan wiyutpan wan tahu en iyakaškapi, qa iye miniwanca ošbe kin en iyohpeyapi unkanš wašte kta tuka.

7 Wałtaniwicayapi kin on oyate kin wotehi yuhapi kta; eya wałtanikiyapi yuke kta iyecewa; tuka wicašta tuwe wałtaniwicaya hecinhan, he wotehi yuhe kta.

8 Heon etanhan, ninape qa nisiha wałtaniniyanpi hecinhan, hena hdakse ça ehpeya wo; huhu kaksapi wiconi en yai kta hee wašte, qa nape nonpa qa siha nonpa hduha peta owihanke wanica en iyohpeniyanpi kte cin he šica.

9 Qa ništa wałtaniniye cinhan, hdušdoke ça ehpeya wo; išta wanjidan hduha wiconi en yai kte cin he wašte, qa išta napin hduha peta owihanke wanica en iyohpeniyanpi kte cin he šica.

10 Ihnuhan dena cikcistinpidan wanjidan ešta šiceyadake cinhan; heciyapi ce; Małpiya ekta ohnidewicayapi tawapi kin hena Ate małpiya ekta unkin ite ohinniyan wanyakapi ece.

11 Wicašta Cinhintku kin taku atakunišni qon he niye kta on hi.

12 Hecen token idukanpi he. Wicašta wan tałinca wanunyanpi opawinge wicayuhe, ça etanhan wanjidan kitaninšni hecinhan, wikcemna napeinwanka sanpa napeinwanka hena owanjidan ewicahnake ça he kin ekta iyaye ça wanji taninšni kin he okide šni he.

13 Qa iyeye cinhan, awicakehan heciciyapi; hee on iyuskin, qa wikcemna napcinwanka sanpa napcinwanka tokiya iyayapi sni kin hena on iyuskin sni ece.

14 He iyececa, dena cikeistinpidan wanjidan esta toki ehpeyapi kta, Niyatepi mahpiya ekta un kin hecen tawacin sni.

15 Tuka nisunka wanicihtani kinhan, ekta ye ca iye niye kicisnana he okiciyaka ye; nanihon kinhan nisunka ake yahduhe kta.

16 Tuka ananigoptan sni kinhan, hehan wanji qa is nonpa om de kta; hecen waayatanin nonpa, qa is yamni ipi kin on wicoie owasin yusutapi kta.

17 Tuka hena nakun anawicagoptan sni kinhan, hehan okodakiciye kin owicakiyaka wo; unkan okodakiciye kin anawicagoptan sni kinhan, hehan lkcewicašta qa wamnayanpi kin iyecen yahdawa kta.

18 Awicakehan heciciyapi; Taku maka akan yakaskapi kinhan, he mahpiya ekta kaskapi kta; qa taku maka akan yakiduskapi kinhan, he mahpiya ekta kiyuskapi kta.

19 Akes heciciyapi; Tuwe nom maka akan taku wanjidan yadapi kta e wayeconzapi kinhan, Ate mahpiya ekta un kin he ecen ecawicakicon kta.

20 Tukten nom yamni, micaje on mniciyapi kinhan, hen wiciyopeya waun ece.

21 Hehan Inyan en hi qa heciya; Itancan, misunka tona wamicihtani qa wecicajuju kta he; šakowin lehanyan he.

22 Jesus heciya; Šakowin lehanyan kta, eciciye sni, tuka wikcemna šakowin ece šakowin.

23 Heon etanhan mahpiya wokiconze kin wicaštayatapi wan

iyeececa, he wowidake wicayuhe cin wicakiciyawa kta:

24 Unkan wicakiciyawa icunhan wanji mazaska ikeutapi tanka kektopawinge wikcemna iyohiye sni kin he ahipi.

25 Unkan on kajuju kta takudan yuhe sni, hecen yuhe cin he tancan wiyopeyapi kta, qa tawicu, qa cinca, qa taku yuhe cin owasin, qa kajujupi kta, keya.

26 Heon wowidake un kin he en makipusdiya ehpeiciya, cekiye ca heya; Itancan, amakipe ye, owasin cicičajuju kta.

27 Hehan yuhe cin he wowidake tawa kin onšikida, kiyuska qa ikicazo qon kicicajuju.

28 Tuka wowidake un kin he tankan iyaye ca om idakapi kin wanji, kaspapidan opawinge ikicazo kin he iyeya, qa iyahpaye ca poskin yuze ca heciya; Tona imiyecazo kin micicajuju wo.

29 Hehan kici idakapi un kin he siha en ehpeiciya, cekiye ca heya; Amakipe ye, kinhan owasin cicičajuju kta.

30 Unkan wicada sni; tuka iyaye ca conkaške mahen kaskahnaka, oicazo hdajuju kta lehanyan.

31 Unkan kici wowidake unpi kin hena taku econpi kin wan yakapi qeban, nina iyokišicapi: heon en hipi qa wicayuhe cin taku econpi kin owasin okiyakapi.

32 Hehan yuhe cin he ake kico qa heciya; Wowidake nišice hinca, icazopi hinsko tanka qon he cicičajuju, cemayakiye cin heon.

33 Hecen miye onšicida kin he iyecen kici wowidake yaun kin is eya onšiyakida kta iyecece sni he.

34 Unkan yuhe cin šihda qa kakišyapi kte cin en wicaqu,



tona iyohiye šni qon ocowasin hdajuju kta hehanyan.

35 He iyecen, Ate małpiya ekta un kin ecaniconpi kta, otoi-yohi cante eciyatanhan nisunkapi tona wanicłhtanipi kin wicayecicajupji šni kinhan.

## WICOWOYAKE 19.

1 Unkan Jesus wicoie kin he-na heya ayařtan, hehan Galile makoce kin etanhan iyaye řa Juda makoce, Jordan wakpa akasanpa tanhan he en hi :

2 Qa wicařta ota hinca ihakam unpi ; unkan hen asniwicaya.

3 Pharisee kin iř nakun en hipi, řa iyutanyanpi kta heciyapi ; Taku owasin on wicařta tawicu elpekiye kta iyececa he.

4 Unkan waayupte řa hewicakiya ; Tuwe otokahe ekta-wicakage cin he wica winyan ahna wicakaga, he tohinni dawapi šni he :

5 Qa heya ; Heon etanhan, wicařta atkuku hunku kō elpewicaye kta, řa tawicu kin en iyai-hdařke kta ; řa henaōza celpi wanjidan kta.

6 Heon, hetanhan nonpapi šni, tuka wicacełpi wanjidan ece. Heon, taku Wakantanka yuonwanjidan kin he ihnuhan wicařta kiyuřpe cinhan.

7 Hehan heciyapi ; Itancan, Moses kpaganpi wowapi wan qu kta, řa elpeye kta, tokeca heconwicaři hwo.

8 Unkan hewicakiya ; Nican-tepi suta kin heon winohinca elpewicayayapi kta, Moses iyo-winniciyapi ; tuka otokaheya tanhan hecetu šni.

9 Qa miř heciyapi ce ; Tuwe, wawicilahałapi econ kin on etanhan šni, tawicu elpekiye řa

wanji tokeca yuze cinhan, he wawicilahałapi econ ece ; řa tuwe winyan elpeyapi kin yuze cinhan, he nakun wawicilahałapi econ ece.

10 Unkan waonspewicakiye cin heciyapi ; Wicařta winohinca kici hecetu kinhan, tawicu tonpi kin he wařte šni.

11 Tuka hewicakiya ; Wicoie kin he owasin okihipi šni, tona wicałupi kin henana okihipi.

12 Yunokos heca yukun ; hunł hunku tezi kin etanhan heca icagapi ; řa hunł wicařta on heca wicakagapi ; řa hunł małpiya wokiconze kin on heca iřicagapi. Tuwe he icu okihi kinhan he icu kta.

13 Hehan hokřiyołopa en awicahipi, nape awicaputake řa cekiyekta e heon ; unkan waonspewicakiye cin tehindapi.

14 Tuka Jesus heya ; Hokřiyołopa en mahipi kta iyowinwicakiya po, řa tehindapi šni po ; małpiya wokiconze kin he hetanhanpi ece.

15 Unkan nape awicaputake řa hetanhan tokan iyaya.

16 Unkan iho, wanji en hi řa heciya ; Waonspekiye wařte, taku wařte ecamon kta, on wiconi owihanke wanica mduhe kta, tukte e he.

17 Unkan heciya ; Tokeca wařte emayakiya he ; tuwedan wařte šni, wanji heceedan wařte, Wakantanka hee. Tuka wiconi en yai kta yacin kinhan woahope kin hena ahopa wo.

18 Hehan heciya ; Tukte e he. Unkan Jesus heya ; Dena, Tinwicayakte kte šni ; Wawicilahałapi ecanon kte šni ; Wamayanon kte šni ; Woitonšni ođake kte šni ;

19 Niyate nihun kici wicahduonihan wo ; řa, Niye inihda-

cin nikiyedān un kin wašteyada-ke kta.

20 Koška kin he heciya; Imacaga ehantanhan dena owasin ecen ecamon ece; taku hinañin iyotpani waun he.

21 Jesus heciya; Owotanna yaun kta yacin kinhan, hde ça taku nitawa wiyopeye ça wahpanicapi kin wicaqu wo; kinhan mañpiya ekta woyuha duhe kta; hehan ku qa mihakam un wo.

22 Tuka koška kin he wicoie kin de nahon qehan iyokišica kibda; taku ota ton kin heon etanhan.

23 Unkan Jesus waonspewicakiye cin hewicakiya; Awicakehan heciciyapi; Tuwe wijica un kin he kitan se mañpiya wokiconze kin en i kta.

24 Qa ake heciciyapi; Kamel wan tahinšpaciqadan oñdoka obna iyaye kte cin he teliike šni, qa wicašta wijica Wakantanka tokiconze kin en ye kte cin he teliha.

25 Waonspewicakiye cin he nahonpi, hehan nina yušinyayapi qa heyapi; Tuwe hehan ni okihi kta he.

26 Unkan Jesus ekta etonwe ça hewicakiya; Wicašta ekta he okihipica šni; tuka Wakantanka ekta taku owasin okihipica ece.

27 Hehan Inyan ayupte ça heciya; Iho, taku owasin elpeunyanpi qa nihakam unyakonpi; hecen taku unhapi kta he.

28 Unkan Jesus hewicakiya; Awicakehan heciciyapi; Niyepi tona teca ni en wicatonpi kin de en omayapapi kin, tohan Wicašta Cinhintku kin wowitan oiyotanke tawa kin en kiyotanke einhan, niš eya oiyotanke akenonpa akan idotankapi kta, qa

Israel wicoun akenonpa wicadacopi kta ce.

29 Qa tuwe kašta, tipi, qa hunkawanjitku, qa tawinoñtin, qa atkuku, qa hunku, qa tawicu, qa cinca, qa maga, micaje on etanhan elipeye cinhan, he opawinge akihde hduhe kta, qa nakun owihanke wanin wiconi mnaičiye kta.

30 Tuka tokaheya unpi kin wicota ehake unpi kta; qa ehake unpi kin hena tokaheyapi kta.

## WICOWOYAKE 20.

1 Mañpiya wokiconze kin he wicašta wan tipi yuhe cin he iyececa, he hanñanna linca hastanhanka iyuwi ojupi tawa kicanyanpi kte cin wicašta ope-ton iyaya.

2 Unkan wicašta anpetu eca kašpapidan wanjidān on opewicatōn, hehan hastanhanka iyuwi ojupi tawa kin en yewicaši.

3 Unkan wihiyayedān oape yamni, hehan ake tankan iyaye ça toktokeca tihocoka en taku tokon šni najinpi wanwicayaka;

4 Qa hewicakiya; Niš eya hastanhanka iyuwi ojupi kin en ya po; kinhan token owotanna ciçupi kta ce. Unkan en iyayapi.

5 Ake oape išakpe qa inapcinwanka hehanhan tankan iyaye ça ake iyecen econ.

6 Hehan oape iakewanji ecetu, ake tankan iyaye ça toktokeca taku tokon šni najinpi wanwicayaka, qa hewicakiya; Tokeca anpetu osan taku tokon šni najajinpi he.

7 Unkan, Tuwedān opeuntonpi šni ce, eciyapi. Hehan hewicakiya; Niš eya hastanhanka iyuwi ojupi kin en ya po, kinhan taku owotanna iyacupi kta.

8 Wanna h̄tayetu hehan, hastan-  
hanka iyuwi ojupi yuhe cin iye  
taokiye itancan kin heciya; Wi-  
cašta h̄tanipi kin wicakico qa  
wokajuju wicaqu wo, ehake hipi  
kin hena tokaheya, ecen toka-  
heya hipi qon wicayeciyuŝtan  
kta ce.

9 Unkan tona oape wanjidan  
h̄tanipi kin hena hipi, qa otoi-  
yohi kaŝpapidan wanji icupi.

10 Tokaheyapi kin hena en  
hipi qehan, sanpa yuhapi kta  
kecinpi, tuka iŝ eya otoiyo-  
hi kaŝpapidan wanji icupi.

11 He icupi hehan tipi tawa kin  
bapi;

12 Qa heyapi; Ehake hipi kin  
dena oape wanjidan h̄tanipi, tuka  
unkiye anpetu osan, wi kata ešta  
h̄taunnipi, iyeuncecapı wicaya-  
kaga ece.

13 Unkan iye waayupte qa  
wanji heciya; Koda, taku ŝica  
ecacicon ŝni; kaŝpapidan wanji-  
dan on h̄tamiyecini kta kema-  
yakiye ŝni he.

14 Taku nitawa kin ehdaku qa  
hda wo; ehake hi kin de niye  
ciçu kin iyecen waqu ece e  
kta.

15 Miye mitawa kin token wa-  
cin kin ecen ecamon kta iyecece  
ŝni he; miye mawaŝte kin heon  
etanhan iŝta niŝica he.

16 Hecen ehake unpi kin hena  
tokaheyapi kta; qa tokaheya  
unpi kin hena ehake unpi kta;  
wicota wicakicopi, tuka tonana  
wicakah̄nigapi ece.

17 Unkan Jesus Jerusaleme ekta  
itanwankan̄hde ya, hehan wa-  
onspewicakiya akenonpa kin  
canku kin icunonpa iŝnana awi-  
caya, qa hewicakiya;

18 Iho, Jerusaleme ekta itan-  
wankan̄hde unyanpi, qa Wicašta  
Cinhintku kin woŝnapi kagapi  
wowapi kagapi ko nape en wi-

caqupi kta; unkan te kta on  
yacopi kta,

19 Qa ihaŋapi kta, kapsinpsin-  
tapi kta, qa icipaweh okatanpi  
kta on Ikcewicašta iyoopta wi-  
caqupi kta; unkan anpetu ici-  
yamni hehan kini kta ce.

20 Hehan Zebedee cinca hun-  
kupi kin en hi, cinhintku na-  
pin om, cekiye qa taku wanji  
kida.

21 Unkan iye heciya; Taku ya-  
cin he. Hehan heciya; Micinkŝi  
kin denaoza wokiconze nitawa  
en, unma nietapa ekta iyotanke  
kta, qa unma iŝ canitka en iyo-  
tanke kta, keya ye.

22 Tuka Jesus waayupte qa  
heya; Taku yadapi kin sdonya-  
kiyapi ŝni. Wiyatke etanhan  
mdatke kte cin he etanhan ya-  
tkan oyakihipi he; qa baptem  
maqupi kte cin he niŝ eya niçu-  
pi kta oyakihipi he. Unkan, Unko-  
kihipi ce, ecıyapi.

23 Hehan hewicakiya; Awica-  
kehan wiyatke mitawa kin etan-  
han datkanpi kta, qa baptem ma-  
qupi kte cin heon niŝ eya baptem  
niçu pi kta; tuka ematapa qa  
camatka tanhan iyotankapi wi-  
caqupi kte cin he miye mitawa  
ŝni; tuka Ate tona wiyeya wi-  
cakiciyuŝtan kinhan hena tawapi  
kta.

24 Unkan wikcemnapi kin hena  
he naŋonpi qehan sunkakiciyapi  
nom on ŝihdapi.

25 Tuka Jesus wicakico qa  
heya; Ikcewicašta ekta tona  
itancanpi kin hena oyate wica-  
yuhapi, qa wicašta tankinyan-  
yanpi kin oyate wowidakewica-  
yapi ece, he sdonyayapi.

26 Tuka niyepi ekta hecece  
kte ŝni; tuka wanji tukte tanka  
yaunpi kta yacinpi kinhan, he  
wowidake duhapi kta.

27 Qa tuwe niyepi en tokapa



un kta hecinhan, wowidake nitawapi kin hee kta.

28 He iyececa, Wicašta Cinhintku wowidake wicayuhe kta on hi šni, tuka idakapi kta, qa wiconi tawa wokajuju kta wicota on wicaqu kta heon hi.

29 Unkan Jeriko etanhan iyootapi, hehan wicota ihakam unpi.

30 Unkan iho, wicašta ištá-gonga nonpa canku icaħda iyotankapi, Jesus en hiyaya naħonpi, hehan howayapi qa heyapi; Itancan, Dawid Cinhintku onšunkida miye.

31 Unkan wicota kin teħindapi qa inina yanke wicašipi; tuka iš hehan heon iyotan howayapi qa heyapi; Onšunkida po, Itancan, Dawid Cinhintku.

32 Unkan Jesus owanji najin qa wicakico qa heya; Taku ecaciconpi kta yacinpi he.

33 Itancan ištá unħdukawapi kta ye, eciyapi.

34 Hehan Jesus onšiwicakida qa ištá wicayutan; unkan ecahankeya ištá on tonwanpi qa ihakam unpi.

#### WICOWOYAKE 21.

1 Unkan Jerusalem ikiyedán yapi, qa Betbpage ehan ipi, Olive paha kin etu, hehan Jesus waonspewicakiye cin nom yewicaši;

2 Qa hewicakiya; Dukanpi kin otonwe iyotakons wanke cin he ekta ya po; kinhan kohanna šonšonna wan cinca iyahna han iyeyayapi kta; kiyuškapi qa makaku po.

3 Qa tuwe taku eniciyapi kinhan, Itancan kin hena cin ce, eya po; kinhan kohanna awicau nišipi kta.

4 Dena owasin econpi, wicašta wokcan oie qon yuecetupi kta, he kaken eya;

5 Zion cunwintku kin heciya po; Iho, Wicaštayatapi nitawa en niu, walibadan qa šonšonna wan akan iyotanka, šukcinca wan, šonšonna cinca kin akan u ce.

6 Unkan waonspewicakiye cin yapi, qa Jesus econ wicaši kin ecen econpi;

7 Qa šonšonna cinca iyahna awicahipi, qa iye tašina akan ehpeyapi, qa hena iakan Jesus ehnakapi.

8 Unkan wicota canku ohna šina ehpeyapi; qa apa canwapa kaksapi qa canku ohnahna owinšiyapi.

9 Qa wicota tokata yapi, qa tona ihakam upi kin, howayapi qa heyapi; Dawid Cinhintku woohiye yuha nunwe. Tuwe Itancan caje on u kin yawaštepi nunwe: Maħpiya ekta woohiye yuha nunwe.

10 Unkan Jerusalem en hi qehan otonwe kin ocowasin škanškanpi, qa heyapi; De tuwe he.

11 Unkan wicota kin heyapi; Jesus wicašta wokcan Galile en Nazareth otonwe kin etanhan he dee.

12 Unkan Jesus tipi wakan Wakantanka tawa kin en i, qa tipi wakan ohna wiyopeyapi ece, wopetonpi ko, hena tankan iye-wicaya; qa mazaska tokiyopeyapi ahna econpi kin hena yuahdapsinyan ehpeya, tona wakiyedán wiyopeyapi oiyotanke tawapi koya;

13 Qa hewicakiya; Tipi mitawa kin he wocekiye tipi eciyapi kta, eya wowapi en kagapi; tuka niye wamanon tipi yakagapi.

14 Hehan ištá-gongapi huštepi ko tipi wakan kin en hipi; unkan okiziwicaya.

15 Unkan wošnapi kagapi wo-

wapi kagapi ko taku wowapetokeca econ kin hena wanyakapi, qa hoksiyoqopapi tipi wakan kin ohna, Dawid Cinhintku kin woohiye yuha nunwe, eya howayapi, hehan nina shidapi :

16 Qa heciyapi; Dena taku eyapi kin nayahon he. Unkan Jesus hewicakiya; Han; Hoksiyoqopa, tona azinpi ko ipi kin etanhan wowitan duŝtan ce, eyapi kin he tohinni dawapi ŝni he.

17 Hehan awicayuŝtan, qa otonwe kin etanhan tankan iyaye qa Bethani ekta i, qa hen wanka.

18 Unkan hanhanna linca otonwe kin ekta icicawin hda, unkan wotektehda;

19 Qa suken can wanji canku ohna han wanyake cehan, he en i, tuka takudan iyeye ŝni, ape eceedan aicaga; unkan heya; Icimana waskuyeca ainicage ŝni nunwe. Unkan suken can kin kohanna ŝnija aya.

20 Unkan waonspewicakiye cin he wanyakapi qehan yuŝinyayapi qa heyapi; Ehanqon suken can kin kohanna ŝnija aya.

21 Jesus waayupte ca hewicakiya; Awicakehan heciyapi; Wowacinye duhapi qa wace-tuŝnyahdapi ŝni kinhan, taku suken can kin de ecakiconpi kin heceedan ecanonpi kte ŝni, tuka paha kin de, Tokan iyaye qa miniwanca kin en iyohpeniyanpi nunwe, eyakiyapi kinhan, ecetu kta.

22 Qa taku tona wocekiye eya yadapi, qa wicayadapi kinhan, hena owasin duhapi ece e kta.

23 Unkan tipi wakan kin en hi, qa waonspewicakiya icunhan, woŝnapi kagapi, qa oyate kin en wicaŝta tankapi ko, en hipi qa heciyapi; Wicookihi tukte e on dena ecanon he; qa tuwe wicookihi kin de niçu he.

24 Unkan Jesus waayupte ca hewicakiya; Miŝ eya taku wanji iciwangapi kta; he omayakidakapi kinhan, hehan wicookihi kin tukte on dena ecamon kin ociciyakapi kta.

25 Johannes baptem wicaqu qon he tokiyatanhan he; mahpiya eciyatanhan qa iŝ wicaŝta eciyatanhan. Unkan he iyakitedan aiapi qa hekiciyapi; He mahpiya eciyatanhan, unkeyapi kinhan; Tokeca he wicayadapi ŝni he, eye kta:

26 Tuka, He wicaŝta eciyatanhan, unkeyapi kinhan, oyate kin kowicunkipapi; owasin Johannes wicaŝta wokcan heca kecinpi.

27 Unkan ayuptapi qa Jesus heciyapi; Sdonunyanpi ŝni ye. Unkan iŝ hehan hewicakiya; Miŝ nakun wicookihi tukte on dena ecamon kin ociciyakapi kte ŝni.

28 Tuka token idukcanpi he: Wicaŝta wan cinhintku nonpa; unkan tokapa kin en hi qa heciya; Cinŝ, anpetu kin de hastanhanka iyuwu ojupi mitawa kin en litani ya wo.

29 Unkan ayupte ca heya; Ecamon kte ŝni ye. Tuka iyohakam iyopeiciye qa iyaya.

30 Unkan hakakta kin en hi, qa iyecen eciya; Unkan iye ayupte ca; Itancan, mde kta ce, eya. Tuka ye ŝni.

31 Denaoza unma tukte atkukupi tawacin kin ecen econpi he. Unkan, Tokapa kin, eciyapi. Hehan Jesus hewicakiya; Awicakehan heciyapi; Wamnanyanpi qa wawicilahapi econpi sa niyepi nitokam Wakantan-ka tokiconze kin en yapi kta.

32 Johannes wicooatanna canku kin ohna en niupi, tuka wicayadapi ŝni; tuka wamna-

yanpi qa wawicibaliapi econpi sa, hena wicadapi; he wanda-kapi ešta nakun iyohakam wicayadapi kta e on nihduhomnipi šni.

33 Wiyacinpi wan tokeca nahon po; Wicašta wan tipi yuhe cin he hastanhanka iyuwi ojupi wan oju, qa ihdukšan nataka ça ohna iyuškiye wan qe ça nakun cowahe wan en kaga; qa wicašta kicanyanpi kta owicaqu, hehan icimani iyaya.

34 Unkan wanna waskuyeca suton kta, hehan wowidake wicayuhe cin wicašta kicanyanpi kin ekta yewicaši; waskuyeca etanhan icupi kte cin heon.

35 Unkan wicašta kicanyanpi kin wowidake unpi kin hena wicayuzapi; wanji apapi, wanji ktepi, qa wanji inyan on kininpi.

36 Akeš wowidake toktokeca ota ekta yewicaši; unkan is iyecen wicakuwapi.

37 Hehan ehake iye cinhintku kin ekta yeši, qa heya; Micin-ksi yuonihanpi kta.

38 Tuka maga kicanyanpi kin cinhintku wanyakapi, hehan heciciyapi; Tawa kte cin he dee; iho po, unktepi kta, hehan taku yuhe cin he unki cupi kta.

39 Hecen yuzapi qa hastanhanka iyuwi ojupi kin etanhan tankan ehpeyapi qa ktepi.

40 Hecen tohan hastanhanka iyuwi ojupi tawa kin hi kinhan kicanyanpi kin hena token eawicakicon kta he.

41 Unkan heciciyapi; Wicašta šiksice cin hena tehiya ihangwicaye kta, qa kicanyanpi toktokeca tohan iyehantu eca waskuyeca kicupi ece e kta hena hastanhanka iyuwi ojupi kin owicaqu kta.

42 Hehan Jesus hewicakiya; Inyan wan tipi kagapi kin ehpe-

yapi qon he oise pa kin icaga; he ltancan kin eciyatanhan hecetu, qa unkištapi en taku wuwapetokeca kin hee, eyapi kin he tohinni wowapi wakan kin en dawapi šni he.

43 Heon etanhan heciciyapi; Wakantanka tokiconze kin enicciyakupi kta, qa oyate wan waskuyeca icalhyapi kte cin he wicacupui kta.

44 Unkan tuwe inyan kin de ahinlipaye cinhan kamden elipeyapi kta; qa tuwe he akan ilpaye cinhan tanyan kamdu kta.

45 Unkan wošnapu kagapi hena, qa Pharisee ko wiyacinpi tawa kin nahonpi qehan, iye wicaka e heya sdonyapi.

46 Qa heon yuze wacinpi, tuka oyate kin kowicakipapi; owasin wicašta wokcan heca kecinpi.

## WICOWOYAKE 22.

1 Unkan Jesus waayupte ça ake wiyacinpi on wowicakiyake ça heya;

2 Wicašta wan wicaštayatapi heca cinhintku kin wakankiciyuzapi kicage cin he mahpiya wokiconze kin iyececa.

3 Unkan wowidake wicayuhe cin hena yewicaši, tona wakan-kiciyuzapi en wicakicopi qon hena uwicašipi kta; tuka upi kta wicadapi šni.

4 Akeš wowidake toktokeca ekta yewicaši qa hewicakiya; Tona wicakicopi qon hena hewicakiya po; Wotapi mitawa wiyeya yanka; tatanka mitawa ptejicadan ko wanna ktepi, qa taku owasin wiyeya hiyeya; iho po, wakankiciyuzapi kin en u po.

5 Tuka ihaliapi qa toki iyayapi; wanji tamaga ekta iyaye ça, wanji is mazopiye tawa ekta iyaya.



6 Qa hunh wicakico ipi kin hena wicayuzapi, qa śicaya wicakuwapi qa wicaktepi.

7 Wicaśtayatapi kin he nañon qehan nina śihda; qa taakicita ekta yewicaśi, qa tinwicaktepi kin hena ihangwicaye a totonwepi kin huhnaha.

8 Hehan wowidake tawa kin hewicakiya; Wakankiciyuzapi kin wiyeya yanka, tuka tona en wicakicopi qon hena opapi kta iyececa pi śni.

9 Heon etanhan canku ojate kin ektakta ya po, qa tona iye-wicayayapi kin wakankiciyuzapi kin en uwicaśi po.

10 Hecen wowidake unpi kin hena canku ojate kin ektakta iyayapi, qa tona iyewicayapi, śica qa waśte ko, en awicau pi; hecen wakankiciyuzapi wicaśta ota en opapi.

11 Unkan wicaśtayatapi kin tona wotapi kte cin hena wanwicayaka tin hiyu, qa iho, wicaśta wanji wakankiciyuzapi wokoyake kin kiun śni hen wanyaka :

12 Qa heciya; Koda, tokeca wakankiciyuzapi wokoyake kiun śni en hidotanka he. Unkan takudan eye śni.

13 Hehan wicaśtayatapi kin taokiyewicaye cin hewicakiya; Siha nape ko pañtapi qa detanhan aya po, qa tankan otpaza kin en ehpeya po; heciya wicaceya qa hi hdakinskinzapi yuke kta.

14 Wicota wicakicopi tuka tonana wicakañigapi ece.

15 Hehan Pharisee kin iś yapi, qa token iapi on yuśkiśkapi kta aiapi.

16 Qa iye waonspewicakiyapi kin Herodian hena om ekta yewicaśipi qa heyapi; Waonspekiye, iewicayaka sdonunyanpi, qa awicakehan Wakantanka ta-

canku kin onspeunyakiyapi ece, qa tuwedan koyakipe śni; wicaśta akantu ekta eyatonwe śni nakaes.

17 Heon token idukean he; unkokiyaka po; Kesar mazaska qupi ece kin he owotanna he.

18 Unkan Jesus taku śica en wicaun kin he sdonya qa heya; Wananiilmanpi, tokeca iyutanmayayapi he :

19 Mazaska mnayanpi ece kin he makipazo po, eya. Unkan kaśpapidan wanji kahipi.

20 Hehan hewicakiya; Wicite qa wowapi kagapi kin de tuwe tawa he.

21 Unkan, Kesar tawa ce, eyapi. Hehan hewicakiya; Heon etanhan Kesar taku tawa kin kicu po, qa Wakantanka taku tawa kin kicu po.

22 He nañonpi hehan yuśinya-yapi qa ehpeya hdicupi.

23 Unkan anpetu kin he en Sadukee kin en hipi, hena piya wicoicage kin wanica ce, eyapi ece, qa wiwangapi;

24 Qa heciyapi; Waonspekiye, Wicaśta wan cinca yuhe śni e cinhan, tawicu qon he iye sunkaku yuze kta, qa cinca cinca icah-kiciciye kta, Moses keye ciqon.

25 Unkan unkiyepi en wicaśta śakowin sunkakiciyapi; unkan tokapa kin he winohinca wan yuza tuka a; qa cinca nica heon iye iyokihe cin he tawicu aihpekiya.

26 Qa icinonpa iyecen econ, qa iyamni, qa ecen śakowinpi kin.

27 Hehan ehake winohinca qon a.

28 Hecen piya wicoicage kin en, hena śakowinpi kin wanji tukte winohinca kin he hduhapi kta he; owasin yuzapi.

29 Jesus waayupte a hewicakiya; Yanunipi, wowapi wakan

qa Wakantanka towaŝake kin sdonyayapi ŝni.

30 Piya wicoicage kin en wino-hinca wicayuzapi ŝni, qa hihnatonpi ŝni, tuka mahiŝiya ekta Wakantanka ohnihdewicaye cin iyececapı ece.

31 Tuka wicaŝe cin piya icagapi kin on Wakantanka taku eniciyapi kin he dawapi ŝni he; he kaken eya;

32 Abraham Wakantanka tawa, Isaak Wakantanka tawa, qa Jakob Wakantanka tawa kin he miye: Wakantanka wicaŝta ŝapi kin tawapi ŝni, tuka ni unpi Wakantanka tawapi ece.

33 Unkan oyate kin hena nahonpi hehan taku onspewicakiye cin on yuŝinyayapi.

34 Tuka Pharisee kin hena, Jesus Sadukee kin inina yanke wicakiya, he nahonpi hehan en mniciyapi:

35 Qa etanhan wanji woope aiekiyapi kin heca wiwange a iyutanyan heciya;

36 Waonspekiye, woope kin en woahope kin tukte iyotan tanka he.

37 Unkan Jesus heciya; Itancan Wakantanka nitawa kin he nicante ocowasin on, qa ninagi ocowasin on, qa nitoksape ocowasin on waŝtocyakidake kta.

38 Woahope tokaheya qa tanka kin hee.

39 Qa inonpa kin he iyececa; Nikiyedani un kin niye inihdacin waŝteyadake kta ee.

40 Woahope kin denaoza woope ocowasin wicaŝta wokcan ko en ikoyaka ece.

41 Pharisee kin iŝ en mniciyapi icunhan Jesus wiwicawange a heya;

42 Messiya on token idukanpi he; tuwe cinhintku he. Unkan, Dawid Cinhintku ee, eciyapi.

43 Hehan hewicakiya; Hecen token Dawid Woniya Wakan kin on Itancan, eciya he; qa heya;

44 Itancan kin Itancan mitawa heciya; Mietapa ekta iyotanka wo, tona tokaniyanpi kin siha oahe nitawa wicawakage kta, hehanyan.

45 Hecen Dawid, Itancan, eciya hecinhan, token ecin cinhintkuye kta he.

46 Unkan tuwedan oie wanjidan ayupte kta okihi ŝni; qa anpetu kin hetanhan tuwedan ake wiwanga tawaŝenye ŝni ece.

### WICOWOYAKE 23.

1 Hehan Jesus oyate kin, iye waonspewicakiye cin om wowicacakiyaka:

2 Qa hewicakiya; Wowapi kagapi Pharisee ko Moses oiyo-tanke tawa kin en iyotankapi ece.

3 Heon etanhan taku tona openiŝipi kin hena owasin opapi qa econ po; tuka iye ohanpi kin ohna econpi ŝni po; taku eyapi, tuka iyecen econpi ŝni ece.

4 Waqinpi tketke qa qinpi tehika heca oheyunpi, qa wicaŝta tapete akan ehnapı ece, tuka iye qe ŝaŝte on yutanpi kta tawaŝenyapi ŝni.

5 Qa wicohan econpi kin owasin wicaŝta wanwicayakapi kta e heon econpi ece. Wateŝdake tanka icicagapi, qa ŝina opapun hdutankapi ece.

6 Wotapi en oyanke waŝteŝte cinpi, qa omniciye tipi kin ohna wankan iyotankapi kte cin he waŝtedakapi ece:

7 Qa tihocoka kin en wicayuwintapi, qa, Itancan, Itancan, wicaŝta ewicacakiyapi kta cinpi.

8 Tuka niye, Itancan, eniciya-

pi kte śni ; wanji mdetahunka duhapi, Messiya hee ; qa niyepi owasin hunkawanjinyeci-yapi.

9 Qa nakun maka akan tuwe-dan, Ate, eci-yapi śni po ; Wanji mahpiya ekta un kin he Ateya-yapi.

10 Qa nakun, Waonspekiye, enici-yapi kte śni ; Wanji Waonspekiye duhapi, Messiya hee.

11 Qa tukte wanji iniyotanpi kta hecinhan, he wowidake nitawapi ee kta.

12 Tuwe yuwankan iyeiçiye kta hecinhan, he yuhukun ehpe-yapi kta ; qa tuwe ihduhukuya hecinhan, he yuwankan iyeyapi kta.

13 Tuka wowapi kagapi qa Pharisee kin, wananiçihmanpi, wotehi niciyankapi nunwe ; wiwazica tipi tawapi ihangya-yapi ece, qa wanniyakapi kta on wocekiye hanska ehapi ece ; heon etanhan woyaco tanka iyahdenici-yapi kta.

14 Wowapi kagapi qa Pharisee kin, wananiçihmanpi, wotehi niciyankapi nunwe ; mahpiya wokiconze kin wicašta anawicayeci-yapi, niye en dapi kte śni, qa tona en yapi kta cinpi kin teyahindapi ece.

15 Wowapi kagapi qa Pharisee kin, wananiçihmanpi, wotehi niciyankapi nunwe ; miniwanca maka ko aokibeyayapi, wicašta wanjidan duhomnipi kta ; qa ece-tu kinhan, niye isanpa nonpa akihde Wakanśica cinca yakagapi ece.

16 Tokakeya mani išttagongapi kin, wotehi niciyankapi nunwe ; ehapi ece ; Tuwe tipi wakan kin on wakonze cinhan he taku śni ; tuka tuwe tipi wakan kin en mazaskazi yuke cin, he on wakonze cinhan, he walitani ece.

17 Winitkotkokapi qa išttagongapi ; mazaskazi, qa is tipi wakan mazaskazi wakan kage cin unma tukte iyotan he.

18 Nakun, Tuwe owayuśna kin on wakonze cinhan he taku śni ; tuka tuwe wośna owayuśna akan un kin he on wakonze cinhan, he walitani ece.

19 Winitkotkokapi qa išttagongapi kin ; wośnapi qa is owayuśna wośnapi kin wakan kage cin unma tukte tanka he.

20 Heon etanhan tuwe owayuśna kin on wakonze cinhan, he owayuśna qa taku akan un kin koya on wakonza ece.

21 Qa tuwe tipi wakan kin on wakonze cinhan, he tipi wakan, qa nakun tuwe ohna ti ece kin, hee on wakonza ece.

22 Qa tuwe mahpiya kin on wakonze cinhan, he Wakantan-ka oiyotanke tawa, qa nakun tuwe akan iyotanke cin on wakonza ece.

23 Wowapi kagapi qa Pharisee kin, wananiçihmanpi, wotehi niciyankapi nunwe ; ceyakata walipe skuya, wacanga ko, iwikecma kin waduśnapi ece ; qa woope kin en taku tanka, wootanna, wowaonsida qa wawacinye, hena ayaktapi śni ece ; dena e ecanonpi kta, qa unma nakun econ śni yaunpi kte śni tuka.

24 Tokaheya mani išttagongapi kin, hoponkadan puskem edakupi, qa kamel heca napea iye-yayapi ece.

25 Wowapi kagapi qa Pharisee kin, wananiçihmanpi, wotehi niciyankapi nunwe ; wakśica wiyatke ko akantanhan duskapi ece, tuka mahen wamanonpi qa wicotawacin śica on ojugjudan.

26 Pharisee išttagonge, tokaheya wiyatke wakśica ko ma-



hentanhan ska kaga wo, kinhan akantanhan he nakun ska kta.

27 Wowapi kagapi qa Pharisee kin, wananiçihmanpi, wotehi niciyankapi nunwe; ohna wicahapi sanyanpi henicecapi; hena akantanhan owanyag wašte, tuka mahentanhan wicašta huhu qa taku śica owasin on ojuguđdan ece.

28 He iyecen niyepi wicašta ekta akantanhan owotanna yaunpi seececa, tuka mahentanhan wanaçihmanpi qa woowotanna śni on onijupidan.

29 Wowapi kagapi qa Phari-see kin, wananiçihmanpi, wotehi niciyankapi nunwe; wicašta wokcan ohna wicahapi kin en tipi wicayecagapi, qa wicašta owotanna ohna wicahnakapi kin hena sanyayapi ece:

30 Qa hehapi; Atewicunyanpi ni unpi he anpetu kin en unyakonpi unkanś, wicašta wokecan wicaktepi qon en ounpapi kte śni tuka ce.

31 Hecen tona wicašta wokcan wicaktepi qon cincapi kin hena niyepi e onihdakapi ece.

32 Qa nakun niye niyatepi wicoħan tawapi kin hena wicayeciyuštanpi kta.

33 Wamduška henicapi, sinteħda wicoicage, token wakanśica ti iwicayacopi kin nayecipapi kta he.

34 Heon etanhan iho, wicašta wokcan, wicašta ksapa, wowapi kagapi hena koya, niyepi ekta yewicawaši; unkan etanhan apa wicayaktepi kta, qa icipaweħi owicayakatani kta; qa apa omni-ciye tipi nitawapi kin ohnahna wicayakapsinsintapi kta; qa otonwe iyasyaza śicaya wicayakuwapi ece e kta.

35 Hecen maka akan wicašta owotanna wicaktepi hena we

kin ocowasin niyepi en aniupi kta; Abel owotanna we kin hetanhan, Zakarias, Barakias cinhintku, tipi wakan qa owayuśna kin iyotahedan yaktepi qon he we kin hehayan.

36 Awicakehan heciciyapi; Dena owasin wicoicage kin de en awicau kta.

37 Jerusalem, Jerusalem, wicašta wokcan wicayakte sa, qa tona niye ekta yewicasi pi qon hena inyan on wicayakinin ece qon, wahupakoza wan iye cinca ĥupahu ihukuya wicatpahi ece kin, he iyecen wanna ota nicinca wicawapahi kta wacin, tuka niye wicayadapi śni ece.

38 Iho, yatipi kin wanna otiwota ehpeniciyapi:

39 Qa heciciyapi; Detanhan tohayan, Tuwe Itancan caje yuha u kin he yawaštepi nunwe, ehapi śni, hehayan wanmayadakapi kte śni.

#### WICOWOYAKE 24.

1 Unkan Jesus tipi wakan kin etanhan tankan inanpe ĉa token iyaya; unkan waonspewicakiye cin en hipi qa tipi wakan token kagapi kin he wanyag śipi.

2 Unkan Jesus hewicakiya; Dena owasin wandakapi śni he; awicakehan heciciyapi; Dena inyan wanji inyan itakihna wanke kte śni, owasin yujujupi kta.

3 Unkan Oliwe paha kin akan iyotankehan yanka, hehan waonspewicakiye cin isnana en hipi qa heciciyapi; Dena tohan ecetu kta, qa niye yahi kte ĉa maka ibanke kta, taku on sdonyapi kta, he ito unkokiyaka miye.

4 Unkan Jesus waayupte ĉa hewicakiya; Ihnuhan tuwe nihnyanpi kinhan.

5 Wicota micaje on upi kta qa,

Messiya he miye ce, eyapi kta ; qa wicašta ota wicahnayanpi kta.

6 Unkan wicokicize qa kiczapi oyakapi kin nayahonpi kta ; ihnuhan nihinniciyapi kinhan ; hena owasin hecetu kte, tuka owihanke kin hinahinke šni.

7 Oyate wan oyate azuwicaye kta, qa wokiconze wokiconze anatan kta ; qa tuktekten wicakihan qa makošikšica qa maka škanškan yuke kta.

8 Dena owasin wicoiyokišice tokaheya kin hee.

9 Hehan wicokakije en yenyanyi kta qa niktepi kta ; qa micaje on oyate owasin šicenidapi kta.

10 Unkan hehan wicašta ota šihdapi kta, qa otoiyo hi kicihnayanpi kta qa šicekicidapi kta.

11 Qa wicašta wokcan itonšni ota icagapi kta, qa wicota wicahnayanpi kta.

12 Hehan wicohan šica ota icage kta, heon wicota wašte-dake ciqon he sni aye kta.

13 Tuka tuwe owihanke hehanyan najin kinhan he ni kta.

14 Unkan wokiconze wotanin wašte kin de maka kin owancaya oyakapi kta, oyate owasin en wotanin un kta ; qa hehan owihanke kta.

15 Tohan wošice woihangye kin, Daniel wicašta wokcan cajeyata qon he tipi wakan kin en han wandakapi kinhan ; tuwe yawa kinhan okahiniga nunwe ;

16 Hehan tona Juda makoce kin en unpi kin he kin ekta napapi kta.

17 Qa tuwe tipi akan un kinhan kun ku, qa taku ti mahen tanhan ehdaku kte šni.

18 Qa nakun tuwe magata un kinhan, hdicu qa wokoyake iki-ku kte šni.

19 Unkan tona anpetu kin hena en ihdušakapi, qa hokšiyooqopa azinwicakiyapi kin hena wotehi yuhapi kta.

20 Tuka waniyetu, qa anpetu wakan icunhan, nayajicapi kte šni e ito cekiya po.

21 Hehan wokakije tanka kte, maka kagapi kin ehantanhan dehanyan taku hecece šni, qa nakun tohinni tokata ekta hecece kte šni.

22 Qa anpetu kin hena yuptecedan šni kinhan, wicašta tuwedan ni kte šni ; tuka wicakañnigapi kin hena on anpetu kin hena yuptecedan kta.

23 Hehan tuwe, Messiya den un ce, qa, kakiya un ce, eniciyapi ešta, wicadapi šni po.

24 Messiya itonšni, qa wicašta wokcan itonšni kin heca icagapi kta, qa wowanyake tanka wicohan tanka ko econpi kta, hecen okihipica unkanš wicakañnigapi kin hena eepi kaeš wicahnayanpi kta tuka.

25 Iho, itokam hena ociciyakapi.

26 Heon etanhan ; Iho, hewotahedan un ce, eniciyapi ešta, ekta yapi šni po ; qa, Iho nahmana un ce, eniciyapi ešta, wicadapi šni po.

27 Wakanhdi wiyohiyanpa tanhan u, qa wiyohpeyata hehanyan tanin hinhda ece, Wicašta Cinhintku kin hi kte cin he iyecece kta.

28 Tukten taku ŋa wanka eca, hen wamdi kiwitayapi ece e kta.

29 Unkan wokakije anpetu kin hena ahankeya, anpetu wi kin aotpaza kta, qa hanyetu wi kin iyoyanpa kte šni, qa wicanłipi malłiya eciyatanhan hinłipaye kta, qa malłiya wowašake kin yuhuhuzapi kta.

30 Unkan hehan malłiya en,

Wicašta Cinhintku kin wowakta tawa kin tanin kta. Hehan maka akan oyate owasin nihinciyapi kta, qa Wicašta Cinhintku kin wowaśake qa wowitan tanka hduha, mahpiya śapa akan u wanyakapi kta.

31 Unkan mazayahotonpi tanka hotanin kin on ohnihdewicaye ein yewicaśi kta, qa hena tate uya topa ecizatnhan, tona wicakahnige ciqon hena wicapahi kta, mahpiya ihanke kin etanhan unma ihanke kin ekta hehanyan.

32 Wanna suken can kin etanhan wiyacinpi wan onspeiciciya po. Can intpa hinaĥin suta śni, qa wanna ape uya, hehan mdoketu kin wanna ikiyedn sdonyayapi ece.

33 He iyecen dena owasin ecetu wandakapi kinhan, wanna ikiyedn, tiyopa kin ehantu e sdonya po.

34 Awicakehan heciciyapi; Wicoicage kin de ihanke kte śni, ecen dena owasin ecetu kta.

35 Mahpiya maka ko ihanke kta, tuka mioie kin owihanke kte śni.

36 Tuka anpetu kin he, qa wihiyayedn oape kin he tuwedn sdonye śni; mahpiya ohnihde kin hena *sdonyapi* śni; Ate ecedn sdonya.

37 Nowa taanpetu qon hena, Wicašta Cinhintku kin hi kte cin iyecece kta.

38 Minitan qon isanpa anpetu kin hena en, wotapi qa wayatkanpi, winoĥinca wicayuzapi qa wicašta hihnawicayapi ece, Nowa wata kin en iyaye cin anpetu kin hehanyan;

39 Qa iyukanpi śni, ecen minitan aye qa iyuhpa ihangwicaya: iho, Wicašta Cinhintku kin u kte cin he iyecece kta.

40 Hehan wicašta nom magata

unpi kta; wanji icupi kta, qa unma kin is okaptapi kta.

41 Winoĥinca nom wiyutpan on wotpan unpi kta; wanji icupi kta, qa unma kin okaptapi kta.

42 Heon etanhan waktaya unpo, wihiyayedn oape tukte en Itancan nitawapi u kta sdonyayapi śni.

43 Tuka de sdonya po; wicašta tipi tawa kin wamanon sa tohan hi kta sdonya unkanś, ktkta un qa tipi tawa yuhdokapi kta iyowinwicakiye kte śni tuka.

44 Heon etanhan niś eya wiyeya un po; Wicašta Cinhintku kin wihiyayedn oape tukte wanji en hi kta, he sdonyayapi śni.

45 Tuwe wowidake owotanna qa wayupika, itancan tawa tipi awanyagkiya, tohan iyehantu eca wo wicaqu ece e kta.

46 Wowidake kin hecen econ ece, itancan tawa en hdi qa wanhdake cinhan, he yawaštepi ece.

47 Awicakehan heciciyapi; Taku yuhe ein owasin awanyagkiye kta.

48 Tuka wowidake śice cin he cante mahen, Itancan mitawa tehan hdi śni ce, eye cinhan;

49 Qa tona om wowidake un kin hena wicakaśtake qa, witkopi om wote qa wayatke cinhan;

50 Anpetu wan waktaya un śni, qa wihiyayedn oape wanji iye kecin śni, he en wowidake un kin yuhe cin hdi kta;

51 Qa cokaya kicakse kta, qa wanaicĥmanpi kin om taku yuhekiye kta; heciya wicaceya qa hi hdakinskinzapi yuke kta.

#### WICOWOYAKE 25.

1 Hehan mahpiya wokiconze kin witanśna unpi wikcemna iyacinpi kta; petijanjan ihupa



ikikcupi qa tawicu ton kte cin he itkokim iyayapi.

2 Unkan zaptan ksapapi, qa zaptan witkotkokapi.

3 Witkotkokapi kin hena petijanjan ihupa icupi, tuka wihdi takudan yuhapi sni.

4 Tuka ksapapi kin hena cega ohna wihdi hduhapi, petijanjan ihupa iyahna.

5 Unkan tawicu ton kte cin he u sni; hehanyan iyuhpa libapi qa istinmapi.

6 Unkan hanyecokaya hehan wicaho wan tanin, Iho, tawicu ton kte cin he u ce; itkokim ya po.

7 Hehan witanсна unpi kin hena owasin iyotankapi, qa petijanjan kin piyapi.

8 Unkan witkotkokapi kin hena ksapapi kin hewicakiyapi; Wihdi nitawapi etanhan ongege unqu miye, petijanjan unkicisnipi kta.

9 Tuka ksapapi kin waayuptapi qa hewicakiyapi; Hiya, okinni unkiye niyepi nakun iyounhipi kte sni; tuka tona wopetonpi ece kin ekta ya pe, qa opeiciton miye.

10 Unkan he opeton iyayapi, hehan tawicu ton kte cin he hi; unkan tona wiyeya unpi kin hena wakankiciyuzapi kte cin en kici iyayapi; hehan tiyopa kin ecen icupi.

11 Iyohakam witanсна unpi unmapi kin en hipi, qa heyapi; Itancan, Itancan, tiyopa unki-ciyuhdoka miye.

12 Tuka iye waayupte ca; Sdonciyapi sni, awicakehan eci-ciyapi ce, eya.

13 Heon etanhan kiktahan unpo, anpetu qa wihiyayedan oape kin tukte wanji en, Wicašta Cinhintku kin hi kte cin he sdoniyayapi sni.

14 He iyecen wicašta wan makoce tokeca ekta ye kta, hehan wowidake wicayuhe cin wicakico, qa woyuha tawa kin wicakipamni.

15 Unkan wanji mazaska tkeutapi tanka zaptan qu, qa wanji nom, qa wanji is wanjidan qu; otoiyo hi token okihi kta hecen wicaqu; hehan icimani iyaya.

16 Unkan tuwe tkeutapi tanka zaptan icu qon he iyaye, ca on wopeton ece econ, qa nakun tkeutapi tanka zaptan kamna.

17 Qa tuwe nom icu qon is eya iyecen nom nakun kamna.

18 Tuka tuwe wanjidan icu qon he iyaye ca, maka qe ca, yuhe cin mazaska tawa kin inahma.

19 Unkan wanna tehan hehan wowidake unpi kin dena itancan tawapi kin hdi, qa wicakiciyawa.

20 Unkan tuwe tkeutapi tanka zaptan icu qon he zaptan toktokeca koya ahi qa heya; Itancan, tkeutapi tanka zaptan mayaqu; iho, nakun tkeutapi tanka zaptan hena awakamna, eya

21 Unkan yuhe cin heciya; Han, wowidake waste qa wacin-yepica; taku tonana on wacin-yepica yaun, taku ota yuheci-ciyete kta; niyuha towiyuskin kin en opa wo.

22 Hehan tuwe tkeutapi tanka nom icu qon he hi, qa heya; Itancan, tkeutapi tanka nom mayaqu; iho, nakun tkeutapi tanka nom hena awakamna.

23 Itancan tawa kin heciya; Han, wowidake waste qa wacin-yepica; taku tonana on wacin-yepica yaun, ito taku ota yuheci-ciyete kta; niyuha towiyuskin kin en opa wo.

24 Hehan tuwe tkeutapi tanka wanjidan icu qon he hi, qa heya;

Itancan, wicašta nitehika sdonwaya, tukten woyaju šni ešta etanhan wamnayaya ece, qa tukten taku ehpeyaye šni kin hetanhan wayapahi ece.

25 Qa kowakipa, heon imdamde ça mazaska tkeutapi tanka nitawa maka kin en nawahibe; iho, nitawa kin yahduha.

26 Itancan tawa kin waayupte ça heciya; Wowidake nišice ça nikuja; tukten wowaju šni kin hetanhan wamnawaya ece, qa tukten taku wakada šni hetanhan wawapahi ece e sdonyaya;

27 Heon etanhan mazaska mitawa wicašta wopetonpi kin yuhewicayakiye kta iyececa tuka; hecen wahdi, qa mitawa oicage ko ewehdaku kta tuka.

28 Heon tkeutapi tanka kin ekiciyaku po, qa tuwe tkeutapi tanka wikcemna yuhe cin he ito qu po.

29 Tuwe taku ota yuhe cin he nakun qupi ece e kta, hecen iyakicuya yuhe kta; tuka tuwe takudan yuhe šni kin hetanhan taku ton kin hee kaeš ekiciyakupi ece e kta.

30 Qa wowidake wakamna šni kin he tankan otpaza kin en ehpeya po; heciya wicaceya qa hi hdakinskinzapi yuke kta.

31 Tohan Wicašta Cinhintku kin wowitan hduha, ohnihdewicaya wakan kin owasin om u kinhan, hehan wowitan oiyotanke tawa kin en kiyotanke kta:

32 Qa itokam oyate kin iyulipa mniciyapi kta; unkan wicayukinukan kta, waawanhdake wan tahinca wanunyanpi, tatokadan etanhan wicapahi ece kin he iyececa.

33 Qa tahinca wanunyanpi kin hena iye etapa eciyatanhan, qa tatokadan kin iye catka eciyatanhan ewicahnake kta.

34 Hehan Wicaštayatapi kin tona etapa eciyatanhan unpi kin hena hewicakiye kta; U po, Ate eciyatanhan niyawaštepi kin, wokiconze maka kagapi kin ehantanhan wiyeya niciyankapi kin he ito hduha po.

35 Wotektewahda, unkan wo mayaqupi; imapuza, unkan wayatkemayakiyapi; wicašta matokeca waun, unkan tin hiyumayayapi:

36 Tancomakadan, unkan wamayakahpapi; wamayazanka, unkan onšimayadapi; makaškapi, unkan wanyag mayahipi ece.

37 Hehan wicašta owotanna kin hena ayuptapi qa heciyapi kta; Itancan, tohinni wotektewahda wanunniyakapi, qa wo unnicupi he; qa inipuza qa wayatkëunniciyapi he:

38 Tohinni wicašta tokeca yaun wanunniyakapi, qa tin hiyuunniyanpi he; qa tancodan yaun, qa wokoyake unnicupi he:

39 Tohinni waniyazanka qa kaška nihnakapi yaun wanunniyakapi, qa en unnihipi he.

40 Unkan Wicaštayatapi kin waayupte ça hewicakiye kta; Awicakehan heciyapi; Mihunkawanji kin dena cikcistinpidan hecawicayeconpi kin he miye ecamiyeconpi ece.

41 Hehan tona catka kin eciyatanhan unpi kin hewicakiye kta; Niyašicapi kin, mitantanhan iyaya po, peta owihanke wanica ekta, wakansica iye taokiyewicaye cin koya on kagapi qon.

42 Wotektewahda, tuka wo mayaqupi šni; imapuza, tuka wayatkemayakiyapi šni:

43 Wicašta matokeca waun, tuka tin hiyumayayapi šni; tancodan waun, tuka wokoyake mayaqupi šni; wamayazanka qa

kaška mahnakapi waun, tuka onsimayadapi šni.

44 Hehan ayuptapi qa heciyapi kta; Itancan, tohinni wotektayahda, qa inipuza, qa wicašta tokeca yaun, qa tanconikadan, qa waniyazanka, qa kaška nihnakapi yaun wanunniyakapi, qa ounniciyapi šni he.

45 Hehan awicayupte ça heye kta; Awicakehan heciciyapi; Dena cikeistinpidan hecawicayeconpi šni kin he miye ecamiyeconpi šni ece.

46 Unkan dena owihanke wain wokakije kin en yapi kta; tuka wicašta owotanna kin hena owihanke wain wiconi kin en yapi kta.

## WICOWOYAKE 26.

1 Unkan Jesus wicoie kin dena owasin ihunniykiya, hehan waonspewicakiye cin hewicakiya;

2 Anpetu nom iyohakam woacakšin kin hehantu kta sonyayapi; hehan Wicašta Cinhintku kin icipaweł okatanpi kta e wicaqupi kta.

3 Hehan wošnapı kagapi, wo-wapi kagapi qa oyate kin en wicašta tankapi kin hena koya mniciyapi, wošnapı kagapi itancan, Kaiaphas eciyapi, he ti kin en.

4 Qa Jesus token nahmana icupi qa ktepi kta he aiapi.

5 Tuka wotapi anpetu kin hena icunhan šni, okinni oyate kin owodutaton kta, eyapi.

6 Unkan Jesus Bethani en Simon lepros ecece ciqon he ti kin ohna yanka.

7 Hehan winohinca wan inyan opiye wan wihdi waštemna tehika ojudan he yuha en hi, qa iye iyotankehan yanka icunhan, pa kin en okaštan.

8 Tuka waonspewicakiye cin

hena he wanyakapi qehan šihdapi, qa heyapi; Tokeca de awihunniyapi he.

9 Wihdi waštemna kin de ota iyoheyapi kta, qa wahpanica wicaqupi kta iyececa tuka ce.

10 Jesus he okahinige ça hewicakiya; Tokeca winohinca kin de iyokišinyayapi he; wicohian wašte wan ecamicon.

11 Wahpanicapi kin ohinniyawicaduhapi, tuka miye ohinniyawicaduhapi šni.

12 Wihdi waštemna kin de mitancan amakaštan kin, mahnakapi kte cin on etanhan hecon.

13 Awicakehan heciciyapi; Maka kin owancaya wootanin wašte kin de tukten oyakapi hecinhan, winohinca kin de taku econ kin he wowitan on oyakapi ece e kta.

14 Hehan akenonpapi kin etanhan wanji, Judas Iskariot eciyapi, he wošnapı kagapi kin ekta wicai;

15 Qa heya; He ciçupi kinhan taku mayaqupi kta he. Unkan mazaska wikcemna yamni qupi kta, keciyapi.

16 Unkan hetanhan token hnayan wicaqu kta e he akita.

17 Aguyapi on napohiyapi codan anpetu tokaheya, hehan waonspewicakiye cin Jesus en hipi, qa heciyapi; Tukten woacakšin kin yate kta wiyeya unnicihnakapi kta yacin he.

18 Unkan heya; Otonwe kin en ya po, qa wicašta kae heciya po; Wanna iyemicihantu, woacakšin kin yati en waonspewicawakiye cin om ecamon kta ce, Waonspekiye cin heya ce.

19 Unkan waonspewicakiye cin Jesus econ wicaši kin ecen econpi, qa woacakšin kin wiyeya ehnakapi.



20 Wanna htayetu hehan ake-nonpapi kin om en iyotanka.

21 Qa wotapi icunhan heya; Niyepi etanhan wanji wiyopemayayapi kta, awicakehan eciciyapi ce.

22 Unkan iyokišicapi hinca, qa otoiyohi heciyapi; Itancan, he miye he.

23 Unkan waayupte ça heya; Tuwe wakšica ohna kici nape yewaye cinhan he wiyopemaye kte cin ee.

24 Wowapi en kagapi qon he iyecen, Wicašta Cinhintku kin ye kta; tuka wicašta kin Wicašta Cinhintku kin wiyopeye cinhan he woteli kiciyanke kta; wicašta kin he tohinni tonpi šni unkanš wašte kta tuka.

25 Unkan Judas wiyopeye kte cin he ayupte ça; Itancan, he miye he, eya. Unkan, Niye heha ce, eciya.

26 Unkan wotapi icunhan Jesus aguyapi icu, qa yawašte, qa yušpašpa, qa waonspewicakiye cin wicaqu, qa heya; Icupi qa yuta po; mitancan kin he dee.

27 Qa wiyatke kin ehdaku, qa wopida eye ça wicaqu, qa heya; Owasin etanhan yatkan po.

28 Mawe kin he dee, wicotakuye teca kin en, wicota on papsopni, woalitani kajuju kta heon.

29 Tuka heciciyapi, Detanhan hastanhanka iyuwu waskuyeca kin etanhan icimana mdatke kte šni, Ate tokiconze kin en anpetu wan teca unyatkanpi kte cin behanyan.

30 Unkan odowan wan ahiyayapi hehan tankan iyayapi, Oliwe paha kin he ekta.

31 Hehan Jesus hewicakiya; Hanyetu kin de niyepi owasin ehpemayayapi kta. Kaken wowapi en kagapi; Waawanhdake

kin he awape kta, unkan hetanhan talinca wanunyanpi optaye kin enanakiya iyayapi kta.

32 Tuka ake wakini kinhan Galile ekta nitokam mde kta.

33 Hehan Inyan ayupte ça heciya; Owasin ehpeniyanpi ešta, miye tohinni elipeciye kte šni.

34 Jesus heciya; Hanyetu kin de anpaohotonna hoton šni itokam yamni anamayakišbe kta, awicakehan eciciya.

35 Inyan heciya; Nici mašta ešta anacilibe kte šni. Waonspewicakiye cin iyulipa nakun iyecen eyapi.

36 Hehan Jesus waonspewicakiye cin om can wojupi wan Gethsemane eciyapi kin he en i, qa hewicakiya; Den iyotanka po, ito kakiya cekiya mde kta.

37 Unkan Inyan qa Zebedee cinhintku kin napin iwicaqu, qa iyokišica hinnda qa nina yušaka.

38 Hehan hewicakiya; Minagi iyokišice hinca, mašte kta iyececa; den kiktahan mici yukan po.

39 Unkan hetanhan kitan ecinyan iyoopte iyaye ça makata ehpeičiya, cekiye ça heya; Ate, okihipica kinhan, wiyatke kin de tokan imiciyaye kta; tuka miye wacin kin hee šni, niye token yacin kin hee ecetu kte.

40 Unkan waonspewicakiye cin iština hiyeya en wicabdi, qa Inyan heciya; Tokeca wihiyayedan oape wanji kiktahan mici yaunpi kta oyakihipi šni he.

41 Kiktahan unpi qa cekiya po, okinni taku wawiyutanyan un kin en idadapi nun ce. Wicana-gi kin he wicada, tuka wicacełpi kin wašake šni.

42 Ake inonpa ekta iyaye ça cekiye ça heya; Ate, wiyatke kin de mdatke šni tokan imiciyaye kta okihipica šni kinhan, nitawacin ecen econpi nunwe.

43 Hehan ake en wicahdi, qa ístinma hiyeya wanwicahdaka ; ísta íbapi hinca nakaes.

44 Unkan ehpewicaye ça ake iyaye ça iyamni cekiya, oie un qon hena ake ohna ecen eya.

45 Hehan waonspewicakiye cin en wicahdi qa hewicakiya ; Wanna niistinmapi qa oziniçiyapi he ; iho, wanna iyehantu, qa Wicašta Cinhintku kin walitanipi sa napepi kin en wicaqupi.

46 Najin po, unyanpi kta ; iho, tuwe wiyopemaye cin he kiyedan u ce.

47 Unkan iahan icunhan, iho, Judas, akenonpapi kin wanji ee, he hi, qa wicota wošnapí kagapi qa oyate kin en wicašta tankinyanpi etanhan, mazasagye cansagye ko yuha kici hipi.

48 Unkan tuwe wiyopeye cin he iwaktawicaye ça heya ; Tuwe i iwaputake cinhan hee kta ; sutaya yuza po.

49 Unkan katinyan Jesus en hi qa, Iho, Itancan, eye ça i iputaka.

50 Unkan Jesus heciya ; Kicuwa, taku on yahi he. Hehan en hipi qa Jesus nape ahnakapi qa yuzapi.

51 Unkan, iho, Jesus kici unpi wanji nape hdukatín, qa mazasagye ehdaku, qa on, wošnapí kagapi itancan taokiye wanji ape ça noqe kašpa.

52 Hehan Jesus heciya ; Mazasagye nitawa ojuha en iyekiya wo ; tona mazasagye ehdakupi kin owasin mazasagye kin on tapi kta.

53 Nakaha Ate cewakiya owakihí šni kecanni he ; qa hinna-kaha malhipiya ohnihde wicobe akenonpa sanpa maqu kta tuka.

54 Tuka hecetu kinhan, wowapi en kagapi, he decetu kta eyapi qon he token yuecetupi kta he.

55 Wihiyayedan oape kin he en Jesus oyate kin hewicakiya ; Tokeca wamanon sa iyecen, mazasagye cansagye ko hduha takpe mayahipi he ; anpetu otioyohi tipi wakan kin ohna waonspeciciyapi manka, tuka mayaduzapi šni.

56 Tuka dena owasin econpi, wicašta wokcan taku owapi qon he yuecetupi kta heon. Hehan waonspewicakiye cin owasin ehpeyapi qa najicapi.

57 Unkan tona Jesus yuzapi kin hena Kaiaphas wošnapí kagapi itancan kin ekta ayapi, wowapi kagapi wicašincapi ko mnicíyapi kin en.

58 Tuka Inyan itehan ihakam u, wošnapí kagapi itancan ti kin hehanyan, qa mahen ye ça ookiyewicayapi kin om iyotanka, owihanke kte cin he wanyake kta.

59 Unkan wošnapí kagapi qa wicašincapi kin, qa omniciye ocowasin, woitonšni wootanin oyakapi Jesus on akitapi, ktepi kte cin heon :

60 Tuka takudan iyeyapi šni ; woitonšni woyakapi ota hipi, tuka takudan iyeyapi šni. Unhanketa woitonšni oyakapi nom hipi ;

61 Qa heyapi ; Wicašta kin de, Tipi wakan Wakantanka tawa kin he mdujuju, qa anpetu yamni kinhan ake piya wakage kta owakihí ce, eya ce.

62 Hehan wošnapí kagapi itancan kin najin hiyaye ça heciya ; Dena taku iyanionpapi kin takudan adupte šni he.

63 Tuka Jesus inina yanka Unkan wošnapí kagapi itancan kin heciya ; Wakantanka ni un kin on wacajeciciyate, Messiya Wakantanka Cinhintku kin he niye hecinhan, unkokiyaka miye.

64 Unkan Jesus heciya; Niye ecen eha; tuka nakun heciciyapi; Tokata ekta Wicašta Cinhintku kin wowaśake etapa eciyatanhan iyotanka qa mahpiya śapa akan u wandakapi kta.

65 Hehan wośnapi kagapi itancan kin śina hduhdelidece a heya; Taku śica eya; taku on sanpa woyakapi unkakitapi kta he; iho, wanna śicaya ie cin he nayahonpi:

66 Token idukcanpi he. Unkan ayuptapi qa, He e kta iyececa ce, eyapi.

67 Hehan ite atagośapi qa nape on apapi; qa hunh kapsinsintapi;

68 Qa heyapi; Messiya he niye, tuwe anipe cin he ito unko-kiyaka po.

69 Inyan tankan tipi kin ohna iyotankehan yanka; unkan wikośka wan en hi qa heciya; Qa niś nakun Jesus Galile etanhan kin he kici yaun qon.

70 Tuka iye owasin wicitokam anakihbe a heya; Taku ehe cin he sdonwaye śni.

71 Unkan ohanzi hdepi kin ekta tankan iyaya, hehan wanji tokeca wanyake a tona en unpi kin hewicakiya; De nakun Jesus Nazareth etanhan kin he kici un qon.

72 Unkan akeś anakihbe a, Taku wakan namañon, wicašta kin de sdonwaye śni ce, eya.

73 Hehan ake iecadan tona en najinpi kin hena hipi, qa Inyan heciyapi; Awicakehan ewicatanhan yaun; iyae cin he oniyaka ece.

74 Hehan iapi śica ota eye a, Taku wakan namañon, wicašta kin he ecaca sdonwaye śni ce, eya. Unkan echankeya anpaohonna kin hoton.

75 Hehan Inyan, Jesus taku

eciye ciqon, Anpaohonna hoton śni kin itokam yamni anamayakihbe kta ce, eye cin he kiksuya. Unkan tankan iyaye a nina ceya.

WICOWOYAKE 27.

1 Unkan hanhanna hinca wośnapi kagapi kin owasin qa oyate kin en wicahincapi kin hena koya, Jesus token ktepi kta e he aiapi.

2 Unkan kaśkapi hehan ayapi, qa Pontios Pilate wicašta itancan kin he kaipi.

3 Unkan Judas wiyopeye cin he wanna yacopi wanyaka, hehan iyopeiiye a, mazaska wikcemna yamni kin, wośnapi kagapi wicahincapi ko ake wicakahi;

4 Qa heya; Wawahtani, wicawe taku iyaonpepica śni kin wiyopewaya ce. Unkan heyapi; He etanhan unkitokecapi śni; he niś niye.

5 Unkan mazaska kin tipi wakan kin en ehpeye a kihda; qa hetanhan iyaye a poskin icikte.

6 Unkan wośnapi kagapi kin mazaska kin hena icupi, qa heyapi; Mazaska opiye kin en unko-hnakapi kta iyecece śni, wicawe iyopeyapi kin dena ee, heon etanhan.

7 Hecen wiyukcanpi qa hena on wakśica kage cin tamaga he opetonpi; ohna wicašta tokeca wicahapi kta.

8 Heon etanhan maga kin he, Wicawe maga, eciyapi, anpetu kin dehanyan.

9 Hehan Jeremiya wicašta wokcan taku eye ciqon yucetupi; he kaken eya; Unkan mazaska wikcemna yamni, tuwe iyopeyapi qon, Israel cincapi kin hecen iyacinpi qon, hena icupi,



10 Qa waksíca kage cin tamaga kin iyopeyapi, Itancan kin econmaší iyececa.

11 Unkan Jesus wicašta itancan kin itokam injin: Qa wicašta itancan kin wiwange ça heciya; Juda wicaštayatapi kin he niye he. Unkan; Niś heha ce, Jesus eya.

12 Unkan wośnapi kagapi wicalincapi ko taku iyaonpapi, tuka takudan ayupte śni.

13 Hehan Pilate heciya; Dena taku iyanionpapi kin nayañon śni he.

14 Tuka oie wanjidand ešta ayupte śni, hecen wicašta itancan kin nina yuśinyaya.

15 Wotapi kin de iyehantu eca wicašta itancan kin wicakaškapi wanji kiyuška ece, tukte wanji oyate kin kicapi.

16 Unkan he ehan wanji tanyan sdonyapi, Barabbas eciyapi, he kaška hnakapi.

17 Hecen en mniciyapi hehan Pilate hewicakiya; Unma tukte ciciyuškapi kta yacinpi he, Barabbas qa íś Jesus nakun Messiya eciyapi.

18 Winawizipi on he iye en kahipi e sdonya.

19 Unkan woyaco oiyotanke kin akan kiyotanka hehan tawicu kin tuwe en uśi, qa heciya; Wicašta owotanna kin he takudan ecakicon śni we, on anpetu kin de wiwahamna en nina maśinyaya ce.

20 Tuka wośnapi kagapi wicalincapi ko oyate kin wahonwicakiyapi, Barabbas kicapi kta, qa Jesus ihangyapi kta.

21 Hehan wicašta itancan kin ake wiwicawange ça hewicakiya; Unma tukte ciciyuškapi kta yacinpi he. Unkan, Barabbas, eyapi.

22 Pilate hewicakiya; Jesus

nakun Messiya eciyapi kin he token ecamon kta he. Unkan owasin; Icipaweñ okatanpi kta, eciyapi.

23 Unkan wicašta itancan kin heya; Tokeca, taku śica econ kin tukte e he. Tuka nina panpi qa; Icipaweñ okatanpi kta, eyapi.

24 Hecen Pilate takudan okihi śni, qa nina owodutaton icaga he wanyaka, hehan mini icu, qa wicota wicitokam nape hdujaja, qa heya; Wicašta owotanna kin de we kin miye en amaupi kte śni; niye ito wanyaka po.

25 Hehan oyate kin iyuhpa ayuptapi qa heyapi; He we kin unkiyepi qa unkićincapi koya en unkaupi nunwe.

26 Unkan hehan Barabbas wicakiciyuška; qa Jesus kapsinpsinta hehan icipaweñ okatanpi kta e wicaqu.

27 Hehan wicašta itancan taakicita kin Jesus ti mahen ayapi, qa wicobe ocowasin en mniciyapi.

28 Qa iye tawokoyake kiyuśdokapi, qa śina duta wan inkiyapi.

29 Qa wapepeka kazontapi on wateśdake kagapi qa teśdagkicatonpi, qa cedi wan nape etapa kin on yuskiyapi; qa itokam canpeška makehde injinpi, qa iħaħapi, qa heyapi; Iho, Juda Wicaštayatapi kin.

30 Qa atagośapi, qa cedi kin icupi qa pa en apapi.

31 Unkan hecen iħaħapi hehan śina kin ekiciyakupi qa iye tawokoyake qon kićunkiyapi, qa icipaweñ okatanpi kta ayapi.

32 Tankan ayapi hehan wicašta wan Kurene etanhan, Simon eciyapi, he wanyakapi; unkan he cansusbeca kin kicićinkiyapi.

33 Unkan makoce wan Golgo-

tha eciyapi, he wicapahu makoce eyapi kin he kapi, he ekta ipi ;

34 Hehan miniša pizi icahiyapi kin hetanhan yatkekiyapi ; tuka uta hehan yatke kta wicada šni.

35 Unkan hen icipawełi okatanpi, oeonna econpi qa tawokoyake kicipamnipi. Hecen wicašta wokcan oie qon yuacetupi ; Mitawokoyake kicipamnipi qa onłidołda mitawa on oeonna econpi ce.

36 Unkan hen iyotankapi qa awanyakapi :

37 Qa wiyaonpapi kin de owapi qa pa iwankam ehnakapi ; JESUS, JUDA WICAŠTAYATAPI KIN HE DEE.

38 Nakun wicašta wamanon sa nom kici icipawełi owicakatanpi, unma etapa eciyatanhan, qa unma iš catka tanhan econpi.

39 Unkan tona en hiyayapi kin hena aiapi, qa apomnamnapi ;

40 Qaheyapi ; Tipi wakan ihangyaye qa anpetu yamni ake piya yakage kte ciqon, ničiya wo. Wakantanka Cinhintku kin he niye hecinhan, cansusbeca kin etanhan kun ku wo.

41 He iyececa, wošnapi kagapi kin ihahapi, qa wowapi kagapi wicahincapi ko om heyapi ;

42 Wicašta tokeca niwicaya ece, iye ničiye kta okihi šni ; Israel wicaštayatapi tawapi hecinhan, iho, wanna cansusbeca kin etanhan kun ku kta, kinhan wicaundapi kta.

43 Wakantanka wacinkiye ciqon ; tawa kta hecinhan wanna ehdaku kta ; Wakantanka Cinhintku kin he miye ce, eye ciqon.

44 Nakun wicašta wamanon sa, kici icipawełi owicakatanpi kin hena iš eya iyecen i en hiyeyapi.

45 Unkan wihiyayedan oape

šakpe hetanhan napcinwanka ape cin hehanyan makoce kin owancaya otpaza.

46 Unkan napcinwanka apa hehantu ecetu, Jesus howaye ça hotankakiya heya ; Eli, Eli, lama sabakthani ; Wakantanka mitawa, Wakantanka mitawa, tokeca cłpemayaya he, eyapi kin hee.

47 Unkan en najinpi kin he nahonpi qehan, apa heyapi ; Elias kipan ce.

48 Unkan wanji etanhan inyang ye ça mini iyulhepe wan icu, qa miniskuya en oputkan, cedi wan icape ça yatkekiya.

49 Unmapi kin heyapi ; Hinahanka, Elias nikiya hi kta hecinhan ito wanunyakapi kta.

50 Tuka Jesus ake hotankakiya hotanin qehan, taniya kin hiyuya.

51 Unkan iho, tipi wakan cokaya ozanpi kin he okiyuldecapi, wankantanhan qa kun ihanke kin hehanyan ; nakun maka kin škanškan qa inyan namdecapi :

52 Qa wicahapi kin yulhdokapi, qa wicašta wašte ištinnapi kin hena ota hiyupi ;

53 Qa wicahnakapi kin etanhan hninanpapi, qa otonwe wakan kin en hipi, qa wicota en taniničiya.

54 Unkan akicita tancan qa tona om Jesus awanyake cin hena maka kin škanškan qa taku econpi ko wanyakapi qehan, nina yušinyayapi, qa, Awicakehan Wakantanka Cinhintku kin he dee tuka ce, eyapi.

55 Unkan winoñinca ota hen unpi qa itehanyan wanyakapi ; tona Galile etanhan upi qa okiyapi ece qon :

56 Mary Magdalene he wanji ee, qa Mary Jakob qa Joses hunku, qa Zebede cinca hunkupi kin.

57 Wanna htayetu hehan Ari-mathea etanhan wicašta wijica wan en hi, Joseph eciyapi, he nakun Jesus waonspewicakiye cin wanji ee :

58 He Pilate en i, qa Jesus tancan kin kida. Hehan Pilate tancan kin he quwicaši.

59 Unkan Joseph tancan kin he icu qehan, minihuha ska wan opazunta ;

60 Qa ohna hnakapi tawa teca, innija kin en kahdoke cin, he en ohnaka ; qa inyan wan tanka ohna hnakapi i kin en eonpa, hehan kihda.

61 Unkan ohna hnakapi kin iyotakons, Mary Magdalene qa Mary unma qon iyotankehan yukanpi.

62 Unkan anpetu en ihduwiyeyapi ece kin he ihanhanna, hehan wošnapi kagapi qa Phari-see kin hena Pilate en hipi,

63 Qa heyapi ; Itancan, wicahnaye sa kin de ni un qehan, Anpetu yamni hehan wakini kta ce, eya keyapi, he unkiksuyapi.

64 Heon etanhan wicahnakapi kin natag wicaši wo, anpetu yamni hehanyan ; okinni waonspewicakiye cin hena en hipi qa tancan kin manon akiyahdapi kta, qa hehan, Wicašte cin etanhan kini ce, oyate kin ewicakiyapi kta ; hecen ehake wicahnayanpi kin he tokaheya kin isanpa tanka kta.

65 Pilate hewicakiya ; Akicita wicaduhapi ; hdapi qa token oyakihipi sutaya nataka po.

66 Hecen kihdapi qa wicahnakapi kin sutaya natakapi ; inyan kin he apuspapi qa akicita en najinwicakiyapi.

## WICOWOYAKE 28.

1 Anpetu wakan owihanke kin ekta, wanna anpetu tokaheya

ayanpa kta hehan, Mary Magdalene qa Mary unma kin, wicahnakapi kin wanyag hipi :

2 Unkan iho, maka škanškan wan tanka ; mahpiya eciyatanhan Itancan taobnihde wan kun u, en hi qa tiyopa kin etanhan inyan kin yuptanye ça akan iyotanka.

3 He ite kin wakanhdi kin iyececa, qa tawokoyake kin wa iyecen ska :

4 Unkan he kokipapi on awanyakapi kin nina cancانpi qa wicašta tapi kin iyecen ayapi.

5 Unkan mahpiya ohnihde kin he waayupte ça winohinca kin hewicakiya ; Niye kokipapi šni po ; Jesus icipaweh okatanpi qon he oyadepi sdonwaya :

6 Den un šni ; wanna ihduwicetetu, heye ciqon iyececa : Kuwa po, Itancan kin wanke ciqon he wanyaka miye.

7 Qa kohanna hdapi qa, Wicašte cin etanhan kini ce, waonspewicakiye cin ewicakiya po ; unkan iho, Galile ekta nitokam iyaya ce, hen wandakapi kta ; iho, wanna ociciyakapi.

8 Unkan wokokipe wowiyuškin tanka ko yuha koyahanna kihdapi ; waonspewicakiye cin hoši wicakakipi kta inyang hdapi.

9 Unkan waonspewicakiye cin hoši wicakahdapi icunhan, iho, Jesus itkowicakipa qa heya ; Wiyuškin po. Unkan en hipi qa siha en yuzapi qa ohodapi.

10 Hehan hewicakiya ; Kopehdapi šni po ; mihunkawanji owicakiyag ya po, Galile ekta yapi kta ; heciya wanmayakapi kta ce.

11 Unkan hena hdapi icunhan, akicita awanyakapi qon etanhan wanjikji otonwe kin en hipi, qa wošnapi kagapi kin taku econpi kin owasin owicakiyakapi.



## MARKOS.

12 Unkan hena witaya mniei-yapi, wicahincapi ko om, qa he akiiapi, hehan akicita mazaska ota wicaqupi;

13 Qa heyapi; Unkiŝtinmapi icunhan waonspewicakiye cin hanyen hipi qa manon icupi ce, eya po.

14 Unkan he wicaŝta itancan kin nañon kinhan, unkiye ceunki-yapi kta, qa anaunnickŝinpi kta.

15 Hecen mazaska kin icupi, qa token onspewicakiyapi kin iyecen econpi; heon wicoie kin he Juda oyate kin en oyakapi ece, anpetu kin dehanyan.

16 Hehan waonspewicakiye cin akewanjipi, hena Galile ekta iya-

yapi, paha wan Jesus cajeyate ciqon hetu.

17 Unkan wanyakapi hehan ohodapi; tuka apa ceñunhdapi.

18 Unkan Jesus en wicahi, owawicakiye ça heya; Mañpiya ekta qa maka akan wowaŝake ocowasin maqupi:

19 Heon etanhan ya po, oyate kin owasin waonspewicakiya po, qa Ateyapi, Cinhintkuyapi, qa Woniya Wakan kin caje on baptem wicaqu po;

20 Qa taku tona econciŝipi kin owasin yuhapi kta e onspewicakiya po. Unkan iho, anpetu owasin cicipi waun, maka owi-hanke kin hehanyan. Amen.

## M A R K O S

### WOTANIN WAŝTE TAWA.

#### WICOWOYAKE 1.

1 Jesus Messiya Wakantanka Cinhintku kin Wotanin Waŝte tawa tokaheya kin he dee.

2 Wicaŝta wokcanpi kin en owapi qon iyececa; Iho, niite kin itokam wahoŝi mitawa yewaŝi kta, nitokam canku wiyeya enicihnake kta.

3 Wicaho wan hewotahedan hotanin kin hee, Itancan tacanku kin wiyeya ekicihnaka wo, ocanku owotanna kicaga wo.

4 Johannes hewotahedan baptem wicaqu, qa woahtani kajujupi kta, on iyopeiçiyapi baptem wicaqupi kin he oyaka ece.

5 Unkan Juda makece kin owan-caya tanhan, qa nakun Jerusa-lem etanhan ekta yapi; unkan woahtani ohdaka, Jordan wakpa

kin en, iye owasin baptem wicaqu.

6 Unkan Johannes kamel hin kin koyake ça telmiso wan ipiyagkiton; qa psipsicadan tuhмага canhanpi ahna yuta ece:

7 Qa woyake ça heya; Miha-kam wanji mikapeya waŝake cin he u ce, he patuŝ nawajin qa hankpan weciyuŝdoke kta iye-micihantu ŝni.

8 Miŝ miye awicakehan mini on baptem ciçupi; tuka iye qe Woniya Wakan kin on baptem niçupi kta ce.

9 Unkan anpetu kin hena icunhan, Galile en Nazareth etanhan Jesus u, qa Jordan en Johannes baptem qu.

10 Unkan mini kin etanhan itanwankanhde ku qehan, ecahankeya mañpiya kin yuzamnipi qa Woniya Wakan kin wakiye-

dan kaŋiya kuntkiya u qa en hi-  
yahan, he wanyaka.

11 Unkan maŋpiya eciyatanhan  
wicaho wan tanin, Micinksi wa-  
štewakidake ɕa tanyan iyoma-  
kipi kin he niye ce.

12 Hehan ecahankeya Woniya  
kin hewoskan makoce kin ekta  
kaŋam aya.

13 Unkan anpetu wikcemna  
topa hewotahedan makoce kin  
en un; qa hen Satan iyutanyan;  
wamanica kin om un, unkan  
maŋpiya ohnihde kin okiyapi  
ece.

14 Unkan Johannes kaška hna-  
kapi qehan, Jesus Galile en hi,  
qa Wakantanka tokiconze wo-  
tanin wašte kin oyaka:

15 Qa heya; Wanna iyehantu,  
Wakantanka tokiconze kin kiyed-  
an un; iyopeiɕiya po, qa wo-  
tanin wašte kin wicada po.

16 Unkan Galile mde kin icahda  
omani, hehan Simon wanyaka,  
qa iye sunkaku Andrew nakun,  
mde kin en ho wan iyohpeyapi;  
hena hopsicapi kin hecapi na-  
kaeś.

17 Unkan Jesus hewicakiya;  
Miyahna u po, kinhan wicašta wi-  
cadupsicapi kta cicagapi kta ce.

18 Unkan ecahankeya ho kin  
ehpekiyapi, qa ihakam iyayapi.

19 Unkan hetanhan kitan ecin-  
yan iyoopta ye ɕa, Jakob Zebede  
cinhintku, nakun sunkaku Jo-  
hannes eciyapi, wanwicayaka;  
hena wata ohna ho kin piyapi.

20 Unkan ecahankeya wica-  
kico; unkan atkukupi Zebede,  
qa tona wowidake wicayuhe cin  
hena om, wata kin en ehpewica-  
yapi, qa ihakam iyayapi.

21 Hehan Kapernaum en yapi;  
unkan anpetu wakan icunhan  
omniciye tipi kin katinyan en  
ye ɕa, woyaka.

22 Unkan taku oyake cin on

yuşinyayapi; wicašta itancan-  
yan waonspewicakiya, qa wo-  
wapi kagapi kin iyecece ŋni.

23 Unkan omniciye tipi kin he  
ohna wicašta wan woniya ŋica  
yuha; unkan he howaya,

24 Qa heya; Unkayuştan po;  
Jesus Nazareth etanhan, taku  
ecaunniconpi he; ihangunya-  
yapi kta yahi he; nituwe kin  
sdonwaya, Taku Wakan Wanji  
Wakantanka tawa kin he niye.

25 Hehan Jesus iyopeye ɕa he-  
ciya; Inina yanke ɕa, tankata  
hninanpa wo.

26 Unkan woniya ŋice cin he  
wicašta kin yuhedece ɕa, hotan-  
kakiya hotanin, hehan tankan  
hinanpa.

27 Unkan owasin inihanpi qa  
heya ikiciwangapi; De taku he;  
de woonspe teca kin tukte e he;  
woniya ŋice cin itancanyan owa-  
wicakiya, unkan anagoptanpi  
ece.

28 Unkan hetanhan Galile ma-  
koce ihdukšan owancaya ohan  
kin oyakapi.

29 Unkan omniciye tipi kin  
etanhan hdicupi, hehan katinyan  
Simon qa Andrew tipi tawapi  
kin en yapi, Jakob qa Johannes  
nakun opapi.

30 Tuka Simon tawicu hunku  
kin he tancan kata on wayazan-  
ka yanka; unkan he okiyakapi.

31 Hehan en hi, qa napata  
yuze ɕa najinkiya; unkan eca-  
hankeya tancan kata ayuştan,  
qa hehan owicakiya.

32 Wanna hitayetu, wi iyaya  
hehan, wayazankapi kin owasin  
yanke cin en awicahipi, tona  
wakanŋica wicayulnaşkinyan  
hena koya.

33 Hecen otonwe kin ocowa-  
sin tiyopa kin en kata ihaya.

34 Unkan wowayazan tokto-  
keca on wayazanpi kin ota asni-

wicaya, qa taku wakan síca ota makun tankan hinanpe wicakiya; qa wakan síce cin hena ia iyowinwicakiye síni, hena iyekiyapi nakaés.

35 Unkan ihanhanna, hinahin anpa itehan, hehan inajin, qa tankan inanpe ça, hewotahedan makoce wan ekta ye ça, hen wocekiye eya.

36 Unkan Simon tona om un kin hena koya ihakam iyayapi.

37 Qa iyeyapi hehan heciyapi; Owasin anicitapi ce.

38 Unkan hewicakiya; Otonwe ikiyedán kin hena en unyanpi kta; hen nakun womdake kta; heon etanhan wahi ce, eya.

39 Unkan Galile makoce kin owancaya, omniciye tipi kin ohna woyake ça, wakan síca hinape wicakiya ece.

40 Unkan wicašta wan lepros ececa, he en hi, qa cekiya, canpeška makehde inajin qa heciya; Yacin kinhan ska mayakage kta oyakihi.

41 Unkan Jesus onsíkida, nape ekta yekiye ça, yutan qa heciya; Wacin, ska un wo.

42 Unkan heye cin hecehnana, lepros ececa qon he ayuștan, qa ska icaga.

43 Hehan tanyan wahokonkiye ça hetanhan hdeși;

44 Qa heciya; Ihnuhan tuwe taku eyakiye cinhan; tuka hde ça, woșna kage cin he en hdutanin wo, qa niyuskapi kta on taku Moses econ wicași qon hena wayușna wo, hecen iyepi ekta woyutanin kta.

45 Tuka tankan hde ça, nina ohdake ça, owancaya yaotanin, hecen hetanhan Jesus otonwe kin en taninyan ye kta okihi síni, tuka tankan hewotahedan un ece: unkan owancaya tanhan yanke cin en hipi ece.

## WICOWOYAKE 2.

1 Anpetu tonana iyohakam hehan ake Kapernaum en i; unkan ti mahen yanka he oyakapi.

2 Unkan hecehnana wicota en mniciyapi, hecen tuktedan en hipi kte síni, tiyopa kin itankan tanhan ocikan síni: unkan wicoie kin owicakiyaka.

3 Unkan hehan en hipi, wicašta wan țatake cin wicašta tom akiyuhapi, he en aupi.

4 Unkan wicota kin on tokadan ikiyedán upi síni, hehan tipi akașpe kin yuhidokapi; he yujujupi hehan țatake cin owinja akan yanka ecehna en yuhukun iye-yapi.

5 Unkan wacinyanpi kin he Jesus wanyake cehan, țatake cin heciya; Cinș wayaștani kin nicicajujupi ce.

6 Tuka wowapi kagapi wanjikji hen iyotankehan unpi kin hena cante mahen hecinpi;

7 Tokeca wicašta kin de sícaya ia he: Tuwe woaștani kajuju kta okihi he, Wakantanka ecedan.

8 Unkan hena hecekcen awacinpí kin, Jesus iye tawacin ekta sđonya, hehan hewicakiya; Tokeca hena hecekcen awacinpí he.

9 Wayaștani nicicajujupi, qa is, Najin, owinja ehdaku qa maní wo, țatake cin ecíyapi kta, unma tukte wașakadan he.

10 Tuka Wicašta Cinhintku kin he maka akan woaștani kajuju kta okihi, he sđonyayapi kta; hehan țatake cin he heciya;

11 Najin, qa owinja ehdaku, qa yati ekta hda wo, eciciya ce, eya.

12 Unkan hecehnana najin hiyaye ça, owinja ehdaku, qa owa-sin wicitokam tankan kihda; he.



cen owasin inihanpi, Wakan-tanka yatanpi qa heyapi; Tohinni taku dececa wanunyakapi šni.

13 Hehan ake tankan mde kahda iyaya; unkan wicota en mniciyapi; unkan waonspewicakiya.

14 En hiyaya icunhan, Lewi, Alpheus cinhintku, mazaska mnayanpi ece kin en iyotanka, he wanyake ça; Miyahna u wo, eciya. Unkan najin hiyaye ça ihakam ya.

15 Unkan he ti kin ohna Jesus wota iyotanka, hehan mazaska mnayanpi wahtanipi sa ko ota Jesus kici iyotankapi, waonspewicakiye cin hena koya: wicota qa ihakam unpi ece.

16 Unkan wowapi kagapi Pharisee ko, wamnayanpi qa wahtanipi sa om wota yanka wanyakapi, hehan waonspewicakiye cin hewicakiyapi; Tokeca e wamnayanpi wahtanipi sa ko om wota qa wayatkan he.

17 Jesus he nahon, hehan hewicakiya; Tona zanipi kin hena pejihutawicašta kin cinpi šni, tuka wayazankapi kin hena e cinpi: wicašta owotanna kin heca on wahi šni, tuka wahtanipi sa iyopeiciyapi kta e wicakico wahi ce.

18 Johannes waonspewicakiye cin hena, qa Pharisee tawapi kin akihaniçiyapi ece; unkan en hipi qa heciyapi; Tokeca e Johannes waonspewicakiye cin hena, qa nakun Pharisee tawapi kin, akihaniçiyapi he, tuka waonspewicayakiye cin hena akihaniçiyapi šni.

19 Unkan Jesus hewicakiya; Wakankiciyuzapi cinca kin hena tohanyan tawicu ton kte cin om un kin hehanyan akihaniçiyapi kta okhipi he. Tohanyan

tawicu ton kte cin yuhapi kinhan, hehanyan akihaniçiyapi kte šni.

20 Tuka anpetu kin u kta, tohan tawicu ton kte cin he ewicakiciyakupi kta, unkan anpetu kin hena en akihaniçiyapi kta.

21 Tuwedan šina teca onšpa onhdohda tanike cin en akihdagton šni; hecon kinhan onšpa teca en akagegepi kin he tanike cin etanhan namna kta, hecen oyuhdece kin sanpa tanka aya.

22 Nakun tuwedan miniša teca ojuha tanike cin en okaštan šni; hecon kinhan miniša teca kin he ojuha tanike cin kahdeca ece, hecen miniša skepe ça ojuha kin ihangyapi; tuka miniša teca kin ojuha teca kin en okaštanpi kta.

23 Unkan anpetu wakan icunhan wojupi kin ehna iyaya; qa waonspewicakiye cin, yapi icunhan, wahuwapa yuksapi.

24 Hehan Pharisee kin heciyapi; Wanyaka wo, anpetu wakan icunhan, taku econpi kta iyecece šni tokeca econpi he.

25 Unkan hewicakiya; Dawid qa tona om un qon, wotektehda pi qa cinpi qehan, token econpi qon he dawapi šni he.

26 Abiathar wošnapı kaga itancan taanpetu kin en, Wakantanka ti kin en ye ça, wayutanin aguyapi kin he yute ça, om un kin hena nakun wicaqu; he wošnapı kagapi isnana yutapi kta tuka.

27 Unkan hehan hewicakiya; Anpetu wakan kin he wicašta on kagapi, qa wicašta kin is anpetu wakan kin on kagapi šni:

28 Heon etanhan Wicašta Cinhintku kin anpetu wakan kin en Itancan un.

WICOWOYAKE 3.

1 Hehan ake omniciye tipi kin en iyaya; unkan wicašta wanji nape šnija hen yanka.

2 Unkan anpetu wakan icunhan asniye kta hecinhan he ia-wanyakapi; taku iyaonpapi kta e heon.

3 Unkan wicašta nape šnije cin he heciya; Cokata inajin wo.

4 Hehan hewicakiya; Anpetu wakan icunhan taku wašte econpi kta iyececa, qa is taku šica econpi kta, unma tukte he; waniyanpi kta qa is waŕeyapi kta he. Tuka inina hiyeya.

5 Unkan icanksiya awicatónwan, cante telipike cin on iyokišica, hehan wicašta kin heciya; Nape hdukatin wo. Unkan hduowotanna; hecen nape kin ocowasin yuacetupi, unma kin iyececa.

6 Hehan Pharisee kin hena iyayapi, qa ecahankeya Herodian kin om wohdakapi, token he ihangyapi kta e heon.

7 Tuka Jesus mde kin ekta hdicu, waonspewicakiye cin om; qa Galile etanhan qa Juda makoce kin etanhan wicota linca ihakam yapi.

8 Nakun Jerusalem etanhan, qa Idumia, qa Jordan akasanpa tanhan; qa Turos qa Sidon ihduksan tanhan wicota, taku wicohan tanka econ nahonpi, hehan en hipi.

9 Unkan wicota aotinsyapi kta e heon, wata cistinna wan yuha waonspewicakiye cin akipepi kta, kewicakiya.

10 Wicašta ota asniwicaya; heon tona tancan šihťinpi kin hena yutanpi kta e yuotinzapi.

11 Qa tona woniya šapa yuhapi kin hena wanyakapi, hehan itokam makata ihpayapi qa he-

ya howayapi, Wakantanka Cinhintku kin he niye ye.

12 Unkan oyakapi kte šni nina kewicakiya.

13 Unkan hetanhan paha wan ekta ye a, tona cin kin hena wicakico; unkan en hipi.

14 Unkan akenonpa wicakaliniga, ohinniyan kici unpi kta, qa woyaka yewicaši kta;

15 Qa wayazankapi kin asniwicayapi kta, qa wakan šica napewicayapi kta, wowašake yuhapi kta.

16 Unkan Simon he Inyan eya cašton;

17 Qa Jakob, Zebede cinhintku, qa Johannes Jakob sunkaku; unkan hena Boanerges ewicakiya, Wakinyan cincapi he kapi;

18 Qa Andrew, qa Philip, qa Bartholomew, qa Mattheos, qa Thomas, qa Jakob Alpheus cinhintku, qa Thaddeus, qa Simon Kananite;

19 Qa Judas Iskariot, wiyopeye cin hee. Unkan tipi wan ti mahen iyayapi.

20 Hehan ake wicota en mniciyapi, hecen aguyapi yuta okihipi šni.

21 Unkan iye takuwicaye cin he nahonpi qehan, yuzapi kta e ekta iyayapi; qa, Wanna wacinhnuni ce, eyapi.

22 Nakun wowapi kagapi Jerusalem etanhan hipi kin hena heyapi; He Beelzebub yuha, qa wakanšica itancan kin on wakan šica napewicaya ece.

23 Unkan iye hena wicakico qa wiyacinyan hewicakiya; Token Šatan Satan napeya okihi kta he.

24 Qa wokiconze wan iye iyakitedan kieize cinhan, wokiconze kin he ecen he kte šni.

25 Qa tipi wanji iye iyakite-

#### WICOWOYAKE 4.

dan kicize cinhan, tipi kin he ecen he kte śni.

26 Nakun Satan inajin, qa iye iyakitedan kicize a ihdunonpa kinhan, he ecen un kta okihi śni, tuka wanna owihanke kta.

27 Tuwedan wicašta wařaka ti kin en ye a, tawařpaya kin ihangye kte śni; wicašta wařake cin he tokaheya kařke cinhan, hehan tipi tawa kin ihangye kta.

28 Awicakehan heciyapi; Wařtanipi owasin wicašta cincapi kin wicakicicajupupi kta, qa iapi řica on wayařicapi ece kin hena nakun;

29 Tuka tuwe Woniya Wakan kin yařice cinhan, he icimana kicicajupupi kte śni; tuka woyaco owihanke wanica kicihe kta:

30 Woniya řapa wan yuha ce, eyapi kin heon etanhan heya.

31 Unkan hehan iye hunkawanjtkupi qa hunku kin hena en hipi, tankan hinajinpi, wahoyapi qa kicopi.

32 He icunhan wicota ihdukřan iyotankapi; unkan heciyapi; Iho, tankan nihun qa nihunkawanjipi anicitapi ce.

33 Unkan heya awicayupta; Inawaye cin he tuwe, qa mihunkawanji tuwepi he.

34 Unkan tona okřan iyotankapi kin hena ekta ewicatonwe a heya; Ina qa mihunkawanji, wanwicayaka po.

35 Tuwe Wakantanka tawacin kin ecen econ kinhan, he mihunkawanji ee, mitawinořtin qa inawaye cin nakun.

#### WICOWOYAKE 4.

1 Hehan ake mde kin icahda waonspewicakiya; unkan wicota linca en mniciyapi, hecen wata wan en ope a, mini ekta

iyotanka; unkan oyate kin owasin mde icahda maka akan unpi.

2 Unkan wiyacinpi on taku ota onspewicakiya; qa waonspewicakiya icunhan hewicakiya;

3 Nařion po: Iho, wicašta woju wan woju iyaya.

4 Unkan woju icunhan, apa canku icahda hinřpaya; unkan zitkatanka en ahियाhe a temyapi.

5 Qa apa inyan ehna hinřpaya, hen maka tonana; unkan maka akantuyedan heon ořankoya hinanpa.

6 Tuka wi hinanpa hehan gu; qa hutkan nice cin heon řniřaya.

7 Unkan apa wapepeka hu kin ehna hinřpaya; unkan wapepeka kin hu uye a aotřnsya, hecen waskuyeca takudan icage śni.

8 Unkan apa maka wařte kin en hinřpaya, he waskuyeca aicaga; hinanpe a icaga, qa sutton, hunř wikcemna yamni, hunř wikcemna řakpe, qa hunř opawinge akihde aicaga ece.

9 Hehan hewicakiya; Tuwe noge winařion yukan hecinhan, ito nařion kta.

10 Unkan iřnana un hehan, akenonpapi qa tona om ihdukřan unpi kin hena wiyacinpi kin he on iwangapi.

11 Unkan hewicakiya; Wakantanka tokiconze woanařibe kin hena niye sdonyayapi kta e niřupi; tuka tankan unpi kin hena taku owasin wiyacinpi kin on econpi.

12 Hecen wawanyakapi on wanyakapi kta, tuka iyukeanpi kte śni; qa winařionpi on nařionpi kta tuka okafinigapi kte śni; hecece řni kinhan okinni wicayuhomnipi kta, qa woařtani wicakicicajupupi kta.



13 Unkan hewicakiya; Wiyacinpi kin de sonyayapi šni he, hecen token ecin wiyacinpi owasin oyakañigapi kta he.

14 Tuwe woju kin he wicoie kin oju ece.

15 Tona canku icahda qon, tukten wicoie kin ojupi, tuka he nahonpi hehan, echankeya Wakansica en hi, qa wicoie cantepi kin en ojupi qon he icu ece, iho, hena eepi.

16 Qa he iyececa, inyan ota en ojupi qon, tona wicoie kin nahonpi eca, kohanna iyuskinyan icupi ece kin hena eepi;

17 Tuka iyepi mahen hutkan nicapi heon askayedan icaga; tohan wicoie kin on šicaya wicakuwapi qa šitkihdawicayapi icaga, hehan hinnahanka šihdapi.

18 Unkan tona wapepeka hu ehna ojupi qon, tona wicoie kin nahonpi;

19 Unkan maka kin de awacinpi, qa wijicapi on wicahnananpi, qa taku tokeca cantiheyapi kin hena en u, qa wicoie kin yuotınza, hecen wasuton šni, hena eepi.

20 Unkan maka wašte kin en ojupi qon, tona wicoie kin nahonpi eca icupi ece, qa waskuyeca icahyapi, wikcemna yamni, wikcemna šakpe, qa opawinge akihde, iho, hena eepi.

21 Unkan hewicakiya; Petijanjan koka wan ihukuya, qa iš ohehdepi ihukuya iyeyapi kta, qa petijanjan ihupa en ostanpi kte šni, aupi he.

22 Taku akahpetonpi qa yutaninpi kte šni wanica; qa taku analmanpi qa iyoyanpa en aupi kte šni wanica ce.

23 Tuwe noge winahon yukan hecinhan he nahon kta.

24 Unkan hewicakiya; Taku

nayahonpi kin awacin po. Wi-yutapi kin tukte on widutapi ece kin, he on ake winiciyutapi kta, qa tona anagoptan dukanpi kin sanpa niçupi ece e kta.

25 Tuwe wayuhe cin he sanpa taku qupi kta; qa tuwe takudan yuhe šni, taku yuhe cin hee kaeš kipi kta.

26 Unkan heya; Wakantanka tokiconze kin he wicašta wan taku su kin maka kin en iyolipeya, he iyececa;

27 Qa ištınma, qa hanyetu anpetu ko inajin; unkan su kin he hinanpe ça icage kta, tuka token icaga he sonye šni.

28 Maka kin he iye cinka wai-cahya ece, ape kin he tokaheya, hehan wahuwapa, qa hehan wahuwapa en tanyan wasuton ece.

29 Unkan wanna suton hehan kohanna isan škopa kin en iye-kiya, wanna kašdapi kta iye-hantu nakaes.

30 Hehan heya; Taku e Wakantanka tokiconze kin iyececa unyawapi kta he; qa wiyacinpi kin tukte e on unkiyacinpi kta he.

31 Sinape su wan iyececa, he maka kin en ehpeyapi, hehan taku su maka en un kin owasin he iyotan cistinna;

32 Tuka maka kin en ojupi, hehan uye ça wato owasin sanpa tanka icaga; adetka tankinyan aicalhya, hecen mahpiya okinyanpi kin ohanzi ihukuya manpi ece.

33 Unkan wiyacinpi hecekcen ota on wicoie kin owicakiyaka, token nahon okihipi kin he iyececa.

34 Qa wiyacinpi codan takudan owicakiyake šni. Unkan isnana yukanpi, hehan taku owasin waonspewicakiye cin hdaheya owicakiyaka ece.

## WICOWOYAKE 5.

35 Unkan anpetu kin he en, wanna hitayetu hehan, hewicakiya; Akasanpa unyanpi kta.

36 Unkan wicota kin wanna hdewicasi, hehan ecehna wata kin en ohnakapi: qa nakun wata cikcistinna toktokeca opapi.

37 Unkan tate tanka wan uya; qa taja wata kin apaspa, hecen wanna mini ojudan.

38 Tuka iye wahektapa tanhan ipahin wan akan istinma wanka. Unkan yuhicapi qa heciyapi; Waonspekiye, unkowihankepi kta he etanhan initokeca sni he.

39 Unkan iyotanka, tate kin kisice qa mde kin heciya; Owanji yanka wo. Unkan tateyanpa ayustan qa amdakedan tanka.

40 Hehan hewicakiya; Tokeca kopeyahdapi he; tokeca wicayadapi sni he.

41 Unkan nina kokipapi, qa iyakitedan hekiciyapi; De taku wicasta hwo, tate kin hee kae, mde ko anagoptanpi ece.

### WICOWOYAKE 5.

1 Unkan mde kin akasanpa ihunnipi, hehan Gadarene makoce kin en ipi.

2 Unkan wata kin etanhan inanpa, hehan echankeya wicasta wan woniya sica yuha wicahnakapi etanhan itkokim hiyu:

3 He wicahnakapi kin en un ece; qa tuwedan kaska okihi sni, mazaicahiha hee kae on.

4 Wanna ota kaskapi, siha on wicakaskapi mazaicahiha ko on; tuka mazaicahiha kin hena yuweliwega ece, qa siha on wicakaskapi kin yuksaksa ece; qa tuwedan walhbadan kaga okihi sni.

5 Ohinniyen, hanyetu anpetu koya, wicahnakapi kin ehna, qa he kin ekta sicahowaya un, qa inyan on kiidaksa ece.

6 Tuka Jesus tehan tanhan wanyaka, hehan ekta inyang ye ca ohoda.

7 Qa hotankakiya hotanin qa heya; Jesus Wakantanka Tethanwankantu Cinhintku kin, taku e unkiyotahedan un he; Taku Wakan cajeyan ceciciya, kakiismayaye kte sni.

8 Wanna, Woniya sapa, wicasta kin etanhan hinanpa wo, eciya nakaes.

9 Unkan, Token eniciyapi he, eya iwanga. Unkan heciya; Wicota, emakiyapi ce, wiuncotapi nakaes.

10 Unkan makoce kin he etanhan hde wicasi kte sni, nina cekiya.

11 Imnija lie kin hen ikiyedan kuku, optaye wan tanka wo wicayupi.

12 Hecen wakan sicapi kin cekiya; Kuku, kin ekta ye unsi po, mahen wicunyanpi kta ce.

13 Unkan hecehnana Jesus iyowinwicakiya. Hecen woniya sapapi kin tankan hinanpapi qa kuku, kin mahen iwicayayapi. Unkan optaye kin ecehna maya hince cin en nasdog eyaye ca minin iyayapi; owancaya kektopawinge nonpa ecetu, qa minin tapi.

14 Unkan tona kuku, wo wicayupi qon hena najicapi, qa otowwe kin en makoce ihduk, koya he oyakapi. Unkan taku econpi kin he wanyag ipi.

15 Qa Jesus en hipi, qa wicasta wakan sica yuhna, qa wicota yuhe cion, wanna ogekiton qa tawacin ecetu iyotankehan yanka he wanyakapi; unkan yuinyayapi.

16 Unkan tona wanyakapi qon hena, wicasta wakan sica yuhna, kuku, kin hena ko

token ecawicakiconpi qon hena owicakiyapipi.

17 Hehan makoce tawapi kin etanhan hde kta e icekiyapi.

18 Unkan wata kin en okipa hehan tuwe wakan síca yuhe ciqon he cekiya, kici un kta heon.

19 Tuka Jesus iyowinkiyé sni, qa heciya; Takuwicayaye cin ekta hda wo, qa taku tona Itancan kin ecanicon qa onsinida, hena owicakiyaka wo.

20 Hecen kihde ça Dekapolis en taku tona Jesus ecakicon kin he ohdaka ece. Unkan owasin yušinyayapi.

21 Unkan Jesus ake watom akasanpa ki qehan, oyate ota en mniciyapi; qa mde kin ikiyedanon.

22 Hehan iho, omniciye tipi itancanpi wanji, Jairus eciyapi, he en hi; qa wanyaka hehan siha kin en makata elpeiciya,

23 Qa nina cekiye ça heya; Micunksi cistinna wanna te kta wanka; en u qa nape on aputake ça asniya ye; hecen ni kta ce.

24 Unkan kici iyaya; qa wicašta ota ihakam yapi qa aotinsyapi.

25 Unkan winohinca wan waniyetu ake nom hehanyan we ece iheya;

26 Qa pejihutawicašta ota on tehiya kuwapi, qa taku owasin on hdusota, qa etanhan wašte icage sni, tuka sanpa síca aya;

27 He Jesus oyakapi nahon qehan, heyata tanhan wicota ehna hiyu, qa tawokoyake yutan.

28 Tawokoyake hee kaeš mdutan kinhan, amasni kta ce, eye ciqon.

29 Unkan hecehnana we iheye ciqon anapta; qa tancan mahen he wayazan kin on wanna akisni sdonkiya.

30 Unkan hecehnana woasni etanhan hiyu kin Jesus atayedan sdonkiya, wicota ehna ihduhomni qa heya; Mitawokoyake tuwe yutan he.

31 Unkan waonspewicakiye cin heciyapi; Wicašta ota aotinsniyanpi he wandaka, qa, Tuwe mayutan he, eha he.

32 Unkan tuwe hecon kin he wanyake kta e ohomni awicatonwan.

33 Tuka winohinca kin taku ecakiconpi kin sdonkiya, hecen kokipeyahan cancanyan en hi, qa itokam makata elpeiciye ça owasin awicakehan okiyaka.

34 Unkan heciya; Cuns, wacinyaye cin he asniniyan; wookiye hda wo, qa waniyazan qon okizi un wo.

35 Unkan iahan icunhan omniciye tipi itancan ti kin eciyatanhan upi qa heyapi; Nicunksi wanna ta; tokeca sanpa Waonspekiye cin nagiyeyaya he.

36 Tuka Jesus taku eyapi nahon qehan, hecehnana omniciye tipi itancan kin heciya; Kokipe sni wo, wicada wo ecedan.

37 Unkan tuwedan kici ye kta iyowinkiyé sni, Inyan, qa Jakob, qa Johannes Jakob sunkaku, he nananpidan.

38 Unkan omniciye tipi itancan ti kin he en hi, qa owodutaton kin he wanyaka, tona ceyapi qa nihinciyapi kin hena koya.

39 Unkan en i qehan hewicakiya; Tokeca owodutaton yakagapi qa yaceyapi he; wicinnyanna kin te sni, tuka istinma ce.

40 Unkan nina ihapi. Tuka owasin tankan iyewicaya, hehan wicinnyanna atkuku qa hunku, qa tona om un kin hena iwicacu, qa wicinnyanna wanke cin en i;

41 Qa wicinnyanna kin nape yuze ça heciya; Talitha kumi,



## WICOWOYAKE 6.

Wicinyanna najin wo, eciciya, eyapi kin he kapi.

42 Unkan' ecahankeya wicinyanna kin najin qa mani; wana waniyetu akenonpa. Unkan nina hin yuſinyayapi.

43 Hehan nina oyake ſni wicaſi; qa taku yutapi qupi kta, kewicakiya.

### WICOWOYAKE 6.

1 Unkan hetanhan iyoopta iya-ye a iye tamakoce kin ekta ki; qa waonspewicakiye cin hena opapi.

2 Unkan wanna anpetu wakan hehan omniciye tipi kin ohna waonspewicakiya. Qa wicota nahonpi qehan yuſinyayapi qa heyapi; Tokiyatanhan dena yuha he; qa taku woksape qupi he; qa token iye nape on wicoſian tanka dececa econpi he.

3 Cankajipe cin, Mary cinhin-tku, qa Jakob, qa Joses, qa Judas, qa Simon cinu kin he dee ſni he; qa tawinoſtin kin hena owasin den unkipi unpi ſni he. Unkan he on canniyeyapi.

4 Tuka Jesus hewicakiya; Wicaſta wokcan iye tamakoce en, qa iye takuwicaye cin ehna, qa iye ti kin ohna, ecedan yuonihanpi ſni ece.

5 Unkan heciya wicoſian tanka takudan econ okibi ſni; tuka wayazankapi tonana nape on awicaputake a asniwicaya.

6 Unkan wicadapi ſni kin heon yuſinyaya. Qa otonwe ihdukſan wanke cin ektakta waonspewicakiya iyaya.

7 Unkan akenonpapi kin wicakico, qa nom nom yewicaſi; qa woniya ſapa on wowaſake wicaqu;

8 Qa wahokonwicakiya, icimani yapi kte cin on takudan icupi

kte ſni, cansagye ecedan; wujuha, qa waneya, qa mazaſa opiye ohna hduhapi kte ſni.

9 Tuka hanpokihanpi kta; qa onhdofida nom kicunpi kte ſni.

10 Unkan hewicakiya; Tukten tipi wanji mahen yaipi kinhan, tohanyan hetanhan iyoopta dapi ſni, hehanyan hen yukan po.

11 Qa tona iyowinniciyapi ſni qa ananigoptanpi ſni kinhan, tohan hetanhan dapi kinhan, owicadakapi kta e heon watuſekſeca siha etanhan yahdatatapi kta. Awicakehan heciciyapi; Woyaco anpetu kin en, otonwe kin he kakije kte cin Sodom qa Gomorrah ahecece kta.

12 Unkan iyayapi, qa wicaſta ihducetupi kta e woyakapi.

13 Qa taku wakan ſica ota napewicayapi, qa wayazankapi kin ota wihdi on sdawicayapi qa asniwicayapi.

14 Unkan Herod wicaſtayatapi kin hena nahon; aje kin tankaya oyakapi nakaes; hehan heya; Johannes baptem wicaqu qon he api kin etanhan kini, heon etanhan wicoſian tanka econ ece.

15 Tuka toktokeca heyapi; Elias hee. Qa toktokeca is; He wicaſta wokcan, qa is wicaſta wokcan wanji iyececa ce, eyapi.

16 Tuka Herod nahon qehan heya; Johannes pa bawakse ciquon hee, wicone etanhan kini ce.

17 Herod atayedan yewicaſi, qa Johannes yuze a haſka hna-ka, Herodias iye sunkaku Philip tawicu qon heon etanhan; he yuza nakaes.

18 Unkan Johannes; Nisunka tawicu duze cin he hecetu ſni ce, Herod eciya.

19 Heon etanhan Herodias can-

niyekiyé ça kte kta cin tuka oki-  
hi šni.

20 Herod Johannes kokipa, wicašta owotanna qa wašte sdonya, heon itonpa; qa oie nañon eca taku ota ecen econ, qa iyuškin-  
yan nañon ece.

21 Tuka anpetu iyehantu qe-  
han, Herod anpetu en tonpi qon  
he ehan, wicašta itancanpi wi-  
cayuhe ça, akicita tancan tanka-  
pi, qa Galile en wicašta toka-  
heya kin hena, litayetu wotapi  
wan wicakicaga.

22 Unkan Herodias cunwintku  
kin en hi, qa waci, qa Herod  
tona om un kin hena koya iyo-  
kipiwicaya, hehan wicaštayatapi  
kin heciya; Taku yacin kinhan  
makida wo, hecen ciçu kta.

23 Nakun taku wakan cajeyan  
heciya; Taku mayakida kinhan  
ciçu kta, mitokiconze hanke he-  
hanyan.

24 Unkan tankan iyaye ça hun-  
ku heciya; Taku wakida kta he.  
Unkan is, Johannes baptem wi-  
caqu ece pa kin, eya.

25 Hehan echankeya inalñi-  
yan wicaštayatapi ekta tin hiyu  
qa heya kida; Johannes baptem  
wicaqu pa kin, wakšica obna ko-  
hanna mayaqu kta wacin ce,  
eya.

26 Unkan wicaštayatapi kin  
nina iyokišica, tuka taku wakan  
cajeyan heye cin heon, qa tona  
om wota iyotanke cin hena on,  
he ipida kta tawaŕenye šni.

27 Unkan hecelnana wicašta-  
yatapi kin wicakte wan ekta  
yeši, qa pa kin aku ši: Unkan  
he ekta iyaye ça, wicakaška  
tipi kin ohna pa baksa;

28 Qa wakšica wan ohna pa  
kin ahdi, qa wikoška kin qu;  
unkan wikoška kin is iyoopta  
hunku kin qu.

29 Unkan iye waonspewica-

kiye cin hena, he nañonpi qehan,  
en hipi qa tancan ehdakupi, qa  
ohna hnakapi wan en hnakapi.

30 Unkan tona yewicaši qon  
hena Jesus en hdipi, qa taku  
owasin okiyakapi, taku econpi  
qa taku oyakapi ko.

31 Hehan hewicakiya; Niye  
ito icunonpa hewotahedan ekta  
u po, qa cistiyedan oziiciya po.  
Wicota upi qa hdapi ece, qa he-  
cen wotapi kta hee kaeš okihipi  
šni.

32 Unkan heon hewoskan ma-  
koce wan ekta isñana watom  
iyayapi.

33 Tuka yapi kin wicašta ota  
wanyakapi, qa he iye iyekiyapi:  
qa otonwe owasin etanhan ekta  
inyang iyayapi, qa kawicapapi,  
qa en i kte cin hen mniciyapi.

34 Unkan Jesus ekta ihunni,  
hehan wicota wanwicayaka, qa  
onšiwicakida, tañinca wanun-  
yanpi tuwedan wicayuhe šni  
kin iyececapa heon, qa hecen  
taku ota onspewicakiya.

35 Unkan wanna wi kucedan  
hehan, waonspewicakiye cin en  
hipi qa heciyapi; De hewotahe-  
dan makoce qa anpetu kin wanna  
owihanke:

36 Hde wicaši wo, hecen ma-  
koce ihdukšan, qa otonwe kin  
ektakta yapi, qa woyute opeiçi-  
tonpi kta; taku yutapi takudan  
yuhapi šni.

37 Tuka iye waayupte ça he-  
wicakiya; Niš ito wo wicaqu  
po. Unkan heciyapi; Unyanpi  
qa kašpapi opawinge nonpa agu-  
yapi iyopeunyanpi, qa wo wic-  
unqupi kta he.

38 Aguyapi španyanpi kin tona  
duhapi he; ito wanyaka po,  
ewicakiya. Unkan sdonyapi he-  
han; Zaptan qa hogan nonpa,  
eyapi.

39 Unkan owasin wato kin

## WICOWOYAKE 7.

akan optayetonton iyotangkiye wicaśi.

40 Unkan optayeton iyotankapi, opawingege qa wikcemna zaptanptan.

41 Unkan aguyapi zaptan qa hogan nonpa hena icu, hehan mahipiya ekta etonwe qa yawaśte, qa aguyapi yuśpaśpa, qa waonspewicakiye cin wicaqu, oyate kin wicaqupi kta heon; nakun hogan nonpa kin hena owasin wicakipamni.

42 Unkan iyuhpa wotapi qa innanpi.

43 Qa oyaptapi kin etanhan makanopiye akenonpa ojudan pahipi, nakun hogan kin etanhan.

44 Unkan aguyapi yutapi kin hena kektopawinge zaptan eectu.

45 Hehan echankeya waonspewicakiye cin wata kin en okipe wicaśi, qa tokaheya akasanpa Bethseda ekta yapi kta, kewicakiya; icunhan iye wicota kin hde wicaśi kta.

46 Unkan hena hde wicaśi, hehan paha wan ekta wocekiye eya iyaya.

47 Wanna litayetu hehan, wata kin mde kin cokaya un, qa iye isnana maka akan un.

48 Unkan watopapi iyotanhan iyekiyapi wanwicayaka; tatohekiya yapi nakaes. Unkan hanyetu en awanyakapi itopa hehan, mini amani ekta wicaya.

49 Tuka mde kin amani wanyakapi qehan, he wanagi kecinni, qa śicahowayapi.

50 Owasin wanyakapi qa yuśinyayapi. Unkan hecehnana owicakiye ca hewicakiya; Cante waśte po, he miye, kokipapi śni po.

51 Unkan ekta wicaya, wata kin en; hehan tate kin ayuśtan.

Hecen nina yuśinyayapi qa ihniyanyanpi.

52 Aguyapi econ qon he awacinpi śni; cantepi kin aotpasyapi nakaes.

53 Unkan akasanpatanhan ipi, hehan Gennesaret makoce kin en yapi, qa hutata ihunnipi.

54 Unkan wata kin etanhan inanpapi, hehan hecehnana iyekiyapi;

55 Qa makoce kin he owancaya inyang yapi, qa tukten un nahonpi kinhan, wicaśta wayazankapi kin owinja akan wicayuhapi, qa en awicayapi.

56 Unkan otonwe ciqadan, qa otonwe tanka, qa ihdukśan makoce wanke cin, tukte en ya eca, canku ohna wayazankapi kin ahivicahnakapi qa cekiyapi; tawokoyake opapun hee kaes yutanpi kta; unkan tona yutanpi kin hena asnipi ece.

## WICOWOYAKE 7.

1 Hehan Pharisee qa wowapi kagapi wanjikji, Jerusalem etanhan upi qa en ahimniciya;

2 Qa iye waonspewicakiye cin wanjikji nape śapa, nape hdujajapi śni he kapi, aguyapi yutapi wanyakapi qehan wicabapi.

3 Pharisee kin Juda wicaśta ko owasin tanyan nape hdujajapi śni kinhan wotapi śni ece, qa wicahincapi tawoahope kin opapi.

4 Qa mazopiye etanhan hiyupi eca ihdujajapi śni ehantanhan wotapi śni. Unkan taku hececa ota opapi kta icupi, miniyatke, qa can koka, qa cega, ohehdepi ko yujajapi ece.

5 Hehan Pharisee kin wowapi kagapi ko wiwangapi; Tokeca waonspewicayakiye cin wicahincapi tawoahope kin ahopapi



śni he, tuka nape hdujaja śni aguyapi yutapi ece.

6 Unkan waayupte ça hewicakiya; Wananiçilmanpi, niyepi on Isaya tanyan woyake ciqon, hecen wowapi en kagapi; Oyate kin de ihapi kin on mayaonihanpi, tuka cantepi kin mitehanyan un ece.

7 Tuka wicašta akantu tawoahope kin hena woonspe eekiya-pi, qa oyakapi ece kin heon ohomadapi kin he taku śni.

8 Wakantanka tawoahope kin elpeyayapi, qa wicašta akantu toope kin duhapi, cega qa wakšica yujajapi kin; qa taku hececa ota ecanonpi ece.

9 Unkan hewicakiya; Wicašta akantu toope duhapi kta e heon Wakantanka tawoahope kin elpeyayapi, he tanyan ecanonpi he.

10 Moses hecen eya; Niyate nihun kici wicahduonihan wo. Nakun; Tuwe atkuku, qa is hunku kin hdašice cinhan, he wiconțe on țe kta ce.

11 Tuka niye hehapi; Wicašta wan atkuku, qa is hunku; He wohduze, tokan wicaqupi he kapi, hecen on ociciye kte śni, eciye cinhan he hecetu ce.

12 Hecen atkuku qa hunku taku sanpa owicakiye kta iyoyakipi śni;

13 Qa niye woope yakagapi qa wicayaqupi kin on Wakantanka tawoahope kin dutakunipi śni: qa taku hececa ota ecanonpi ece.

14 Unkan oyate kin owasin wicakico, hehan hewicakiya; Owasin anamagoptan po, qa okalniga po.

15 Wicašta tankan tanhan taku mahen iyaye cin takudan yušica okihi śni; tuka tona mahen tanhan hinape cin wicašta yušice cin hena ee.

16 Tuwe noge winahon yukan hecinhan he nahon kta.

17 Unkan wicota wicehna tanhan ti mahen iyaye çehan, wonspewicakiye cin wiyacinpi kin he on wiwangapi.

18 Unkan hewicakiya; Niš eya oyakalnigapi śni he. Taku kašta tankan tanhan wicašta mahen iyaye cin he yušape kta okihi śni e idukcanpi śni he.

19 Hena cante kin en i śni, tuka tezi mahen, qa hehan tankan elpeyapi, hecen woyute owasin yucetupi.

20 Unkan heya; Taku wicašta kin etanhan hinanpe cin he wicašta kin yušapa ece.

21 Mahentanhan, wicacante kin etanhan wicotawacin šica hiyu; wawicihalhapi, wiinalmanpi, tinwicaktepi,

22 Wamanonpi, waicucupikte, wošice, wohnaye, wowihalha, ištašica, wayašicapi, wahanici-dapi, witkotkokapi;

23 Dena taku šice cin owasin mahentanhan hiyu, qa wicašta yušape cin hena ee.

24 Unkan hetanhan najin hiyaye ça, Turos qa Sidon makoce opapun kin en i, qa tipi wanji timahen iyaya; unkan tuwedan sdoneye kte śni cin, tuka analmanpi kta okihipi śni.

25 Winohinca wan cunwintku cistinna woniya šapa yuhe cin he nahon qehan, en hi qa siha kin en makata elpeiciya.

26 He Hellenes winohinca kin heca, Surophenikiya oyate kin etanhan; unkan taku wakan šica cunwintku kin etanhan hinanpe ši kta e icekiya.

27 Tuka Jesus heciya; Wicacinca kin hena tokaheya wotapi kta; wicacinca aguyapi tawapi kin icupi, qa šunka wicaqupi kta he hecetu śni.

## WICOWOYAKE 8.

28 Unkan iye waayupte ça heciya; Han, Itancan; tuka wahnawotapi kin ihukuya hoksiyopa yuśnapi kin śunka yutapi ece.

29 Unkan heciya; Wicoie kin de on ekta hda wo, taku wakan śica nicunksi etanhan hinanpa ce.

30 Unkan iye ti kin ekta ki, hehan taku wakan śica tankan iyaye ça, cunwintku ohehdepi kin akan wanka e wanhdaka.

31 Unkan ake Turos makoce kin elipeye ça, Sidon opta, Dekapolis makoce kin cokaya omanni, qa Galile mde kin ekta ki.

32 Unkan wicaśta wan noge tpa qa ia okitpani he en ahipi, qa nape ahnake kta icekiyapi.

33 Unkan wicota etanhan isnana icunonpa aya, qa nape noge ohna iyeye ça, tagośa qa on ceji yutan:

34 Hehan maħpiya ekta etonwe ça comnihdazi qa heciya; Ephatha, yuħdokapi nunwe, eyapi kin he kapi.

35 Unkan echankeya noge yuħdokapi, qa ceji ikan kin yukcapi, qa hdaheya ia.

36 Hehan he tuwedan okiyake śni wicaśi; tuka taku ewicakiye cin on etanhan sanpa nina oyakapi ece.

37 Qa nina yuśinyayapi qa heyapi; Taku owasin tanyan econ ece; noge tpapi kin winahonwicakiye ça, nakun ia okitpani iewicakiya ece.

## WICOWOYAKE 8.

1 Unkan anpetu kin hena en nina wicota hinca, qa takudan yutapi śni, hehan waonspewicakiye cin wicakico qa hewicakiya;

2 Wicota kin onśiwicawakida, wanna yamni can mici unpi, qa taku yutapi takudan yuhapi śni.

3 Qa wote śni hde wicawaśi kinhan, okinni tahepi ihpayapi kta; hunħi tehan tanhan hipi nakaes.

4 Unkan waonspewicakiye cin ayuptapi; Makoce hewotahedan kin den, tokiya tanhan dena aguyapi imnahan yute wicakiyapi kta he.

5 Unkan, Aguyapi kagapi tona duhapi he, eya iwicawanga. Unkan is, Śakowin, eyapi.

6 Unkan oyate kin maka akan iyotanke wicaśi; qa hehan aguyapi śakowin qon icu, yawaśte qa yuśpaśpa qa waonspewicakiye cin wicaqu, iyoopta wicakupi kta; unkan is oyate kin wicakipamnipi.

7 Nakun hogan tonana yuhapi; hena yawaśte qa wicakupi kta, keya.

8 Hecen wotapi qa imnanpi; unkan aguyapi oyaptapi kin etanhan makanopiye śakowin pahipi.

9 Tona wotapi kin hena kekto-pawinge topa ecetu; hehan hde wicaśi.

10 Hehan echankeya wata wan en opa, waonspewicakiye cin om, qa Dalmanutha makoce kin ekta i.

11 Unkan Pharisee kin en hipi, qa iyutanyan wiwangapi, qa maħpiya eciyatanhan wowapetokeca kida.

12 Unkan iye cante ekta comnihdazi qa heya; Tokeca wicoicage kin de wowapetokeca akita he. Awicakehan heciciyapi; Wicoicage kin de wowapetokeca takudan qupi kte śni.

13 Hehan elpewicaye ça wata kin en okipe ça akasanpa hda.

14 Unkan aguyapi icupi kta akiktonjapi, qa wata ohna aguyapi wanjidan sanpa yuhapi śni.

15 Hehan wahokonwicakiye ça

heya; Wanyaka po, qa on napohiyapi Pharisee tawapi qa Herod tawa kin he kokipa po.

16 Hecen iye iyakitedan hdo-kinicapi qa heyapi; Aguyapi unhapi šni, heon etanhan heya ce.

17 Jesus he sdonya hehan hewicakiya; Tokeca aguyapi duhapi šni on ayakinicapi he. Hinahin oyakahnigapi šni qa wudukcanpi šni he. Hinahin cante aotpasniyanpi he.

18 Išta niyukanpi wandakapi šni, qa noge niyukanpi ešta nayahonpi šni, qa yeksuyapi šni he.

19 Aguyapi zaptan wicašta kektopawinge zaptan wicawakipamni, hehan oyaptapi kin makanopiye ohnaka tona yapahipi he. Akenonpa, eyapi.

20 Hehan šakowin qa kektopawinge topa, hehan oyaptapi makanopiye ohnaka tona iyacupi he. Unkan, Šakowin, eyapi.

21 Hehan hewicakiya; Tokeca oyakahnigapi šni he.

22 Unkan Bethseda en hi. Hehan ištągonga wan en ahipi, qa yutan kta e icekiyapi.

23 Unkan ištąonge cin napata yuze a otonwe kin tankan aya; qa išta kin en atagoša hehan nape kin akan ehnaka, qa taku wanyaka hecinhan he iwanga.

24 Unkan wankan etonwe a heya; Wicašta wanwicamdaka, mani unpi, can kin iyececa.

25 Hehan ake nape kin išta akan ehnaka, qa ake wankan etonwekiya; unkan hehan yucetupi, qa taku owasin tanyan wanyaka.

26 Hehan iye ti ekta hde ši, qa heya; Otonwe kin en ye šni wo, qa otonwe kin en tuwedan okiyake šni wo.

27 Unkan Jesus hetanhan Ke-

sareya Philippi otonwe kin hena ekta iyaya, waonspewicakiye cin om. Unkan tahepi waonspewicakiye cin heya iwicawangaga; Matuwe, wicašta keyapi he.

28 Unkan ayuptapi; Johannes baptem wicaqu kin; qa wanjikji; Elias; qa wanjikji; Wicašta wokcan wanji *he niye*, eyapi.

29 Unkan hewicakiya; Qa niye matuwe kehapi he. Unkan Inyan waayupte a heciya; Messiya he niye.

30 Unkan he tuwedan okiyake šni wicaši.

31 Hehan wowicakiyaka, Wicašta Cinhintku kin taku ota kakije kta; wicašincapi qa wošnapı kagapi, wowapi kagapi ko heyata iyeyapi kta, qa ktepi kta; qa anpetu yamni iyohakam kini kta.

32 Unkan hena taninyan ohdaka. Hehan Inyan icu qa iyokišni.

33 Tuka ihduhomni qa waonspewicakiye cin awicašonwan, hehan Inyan iyopeye a heya; Satan miheyata ya wo; taku Wakantanka tawa kin awacanni šni, tuka wicašta akantu taku tawa kin.

34 Unkan oyate kin waonspewicakiye cin om wicakico qehan, hewicakiya; Tuwe kašta omape kta hecinhan, waipičida kta, qa cansusbeca kiçin kta, qa mihakam u kta.

35 Tuwe wiconi tawa tehinda kinhan he toki ehpekiye kta; tuka tuwe miye on qa wotanin wašte kin on wiconi toki ehpekiye cinhan, he qe wiconi hduhe kta.

36 Qa wicašta wan maka kin de ocowasin ohiya ešta, qa iye nagi kin toki ehpekiye cinhan, taku on iwašte kta he.



## WICOWOYAKE 9.

37 Qa taku e wicašta nagi kin tokiopekiye kta he.

38 Heon etanhan tuwe, wicoicage wiinañman qa wahtani sa kin de en, miye qa mioie kin on istece cinhan, tohan Wicašta Cinhintku kin iye Atkuku towitan hduha, ohnihde wakan kin om u kinhan, wicašta kin he on istece kta ce.

## WICOWOYAKE 9.

1 Hehan hewicakiya ; Awicakehan heciciyapi ; den najinpi etanhan wanjikji wiconțe utapi šni itokam, Wakantanka tokiconze wowašake on hi wanyakapi kta.

2 Unkan anpetu šakpe iyohakam Jesus, Inyan, qa Jakob, qa Johannes iwicacu, qa icunonpa paha wan tehanwankantu kin ekta awicaya ; qa wicitokam yutokecapi :

3 Tawokoyake kin wiyatpatpa, ska linca, wa iyececa ; maka akan wayuska kin tuwedan iyececen ska kaga okihi šni.

4 Unkan hen Elias qa Moses en ihdutaninpi ; qa hena Jesus kici wohdag yukanpi.

5 Hehan Inyan waayupte qa Jesus heciya ; Itancan, den unyakonpi he wašte ; ito wakeya yamni ti unkiagapi kta ; wanji niye on, qa wanji Moses, qa wanji Elias unkiagapi kta.

6 Taku eye kta sdonkiye šni ; nina yušinyayapi nakaš.

7 Unkan mahpiya wan aohanziwicaya ; qa mahpiya kin eciyatanhan wicaho wan tanin qa heya ; Micinkši waštewakidake cin he dee, he anagoptan po.

8 Hehan echankeya ihdukšan etonwanpi qehan, wicašta tuwedan wanyakapi šni, Jesus isnana kici unpi.

9 Unkan paha kin etanhan apamahde kupi icunhan waho-konwicakiya, taku wanyakapi kin tuwedan okiyakapi kte šni, Wicašta Cinhintku kin ŧapi etanhan kini šni hehayan.

10 Unkan wicoie kin he awacinpi, qa ŧapi etanhan kini eyapi kin he taku kapi hecinhan he ikiciwangapi.

11 Unkan heya iwangapi ; Tokeca e Elias tokaheya hi kta ce, wowapi kagapi kin eyapi he.

12 Unkan awicayupte qa heya ; Awicakehan Elias tokaheya hi kta, qa taku owasin yuecetu kta ; qa Wicašta Cinhintku kin token taku ota kakije kta, qa heyata iyeyapi kta e wowapi en kagapi qon, he nakun owicakiyaka.

13 Tuka heciciyapi ce ; Awicakehan Elias wanna hi ; unkan token cinpi kin ecen ecakiconpi, wowapi en kagapi qon iyececa.

14 Unkan waonspewicakiye cin en hdi qehan, wicihdukšan wicota linca wanwicayaka ; qa wowapi kagapi kin wiwicawangapi.

15 Unkan oyate kin iyulpa wanyakapi qehan nina yušinyayapi, qa ekta inyang yapi qa okiyapi.

16 Unkan wowapi kagapi kin, Taku e on wiwicanungapi he, eya iwicawanga.

17 Unkan wicota etanhan wanji ayupta ; Waonspekiye, micinkši woniya ie šni kin heca yuhe cin he cicahi.

18 Qa tukten eyaku eca yuhdehdeca ece ; hecen i minitaga au, qa hi hdakinskinza, qa hianyan ece ; unkan waonspewicakiye cin hena tankan ehpeyapi kta kewicawakiya, tuka oki-tpanipi.

19 Unkan waayupte qa hewicakiya ; Wicoicage wicada šni,

tohanyan cicipi waun kta; tohanyan iyowinciciyapi kta he. En makau po.

20 Hehan en kahipi. Unkan wanyag iheye cin hecehna woniya kin yuhdehdeca; qa makata ehpeye ça, i minitaga au paptanptan iyeiciya wanka.

21 Unkan atkuku kin heya iwanga; Tohantanhan hececa he. Unkan is; Hoksiyoqopa ehantanhan, eya.

22 Qa ota petan ehpeye ça, minin ehpeya, ihangye kta e heon; tuka nis taku oyakihi kinhan, onsiunkida po qa ouunkiya po.

23 Jesus heciya; Wicada oyakihi kinhan; tuwe wicada kin he on taku owasin okihipica ce.

24 Unkan hecehnana hoksidan atkuku kin hotanin qa ceya heya; Itancan wicawada; wicawada sni kin he niye omakiya wo.

25 Jesus oyate kin en inyang hiyupi wanwicayaka, hehan woniya sapa iyopeye ça heciya; Woniya ia okitpani qa noge tpa, tankan hinanpe ça, icimana en ye sni wo, he miye e econ ciisi ce, eya.

26 Unkan hotanin qa nina yuhdehdeca, qa tankata hinanpa; unkan wicašta ta iyececa, hecen, Wanna ta ce, wicota eyapi.

27 Tuka Jesus napata yuze ça yuwankan icu; unkan najin hiyaya.

28 Unkan tin hiyu qehan, waonspewicakiye cin nahmana iwangapi; Tokeca unkiye tankan ehpeya unkokihipi sni he.

29 Unkan hewicakiya; Ocaje kin de wote sni cekiyapi kin ecedan on tankan hiyu kta okihi ece.

30 Hehan hetanhan yapi qa Galile iyoopta iyayapi; qa tuwedan sdonye kte sni cin.

31 He icunhan waonspewica-

kiye cin wowicakiyaka qa; Wicašta Cinhintku kin wicašta napepi kin en wicaqupi, unkan ktepi kta; qa ktepi iyohakam anpetu iciyamni hehan kini kta ce, ewicakiya.

32 Tuka wicoie kin he okañni-gapi sni, qa on iwangapi kta kkipapi.

33 Unkan Kapernaum en hi; qa ti mahen yanka hehan wiwicawanga; Canku ohna taku e on ayakinicapi he.

34 Tuka inina yukanpi; canku ohna wanji tukte iyotan tankapi kta e heon hdokinicapi.

35 Unkan iyotanke ça akenon-papi kin wicakico qa hewicakiya; Wicašta wan tokaheya un kta cin kinhan, hee ehake un kta, qa owasin wowidagyapi kta.

36 Hehan hoksiyoqopa wan icu, qa wicacokaya ehna; qa nape ohna eyaku, hehan hewicakiya;

37 Tuwe hoksiyoqopa dececa wanji, micaje on tin hiyuye cinhan, miye tin hiyumayan ece; qa tuwe tin hiyumaye cin he miye sni, tuka tuwe u masi kin he tin hiyuya ece.

38 Hehan Johannes ayupte ça; Waonspekiye, wicašta wan nicaje on taku wakan sica tankan ehpeya wanunyakapi, he unkihakam u sni; unkan unkihakam u sni kin on etanhan teunkindapi ce, eya.

39 Tuka Jesus heya; Tehindapi sni po; wicašta tuwe micaje on wicohan tanka econ kinhan, he ituya mayašice kta okihi sni.

40 Tuwe unkizapi sni kinhan, he unkipi un ece.

41 Tuwe micaje on miniyatke ohna mini datkanpi kta nicupi kinhan, Messiya niyuhapi kin heon, he wokajuju toki ehpekiye kte sni, awicakehan eciciyapi.

42 Qa tuwe dena cikeistinpi-dan wacinmayanpi kin wanji walitanikiye cinhan, tahu en inyan wiyutpan wan iyakaškapi qa miniwanca kin en elipeyapi unkanś, he wašte kta tuka.

43 Qa ninape walitaniniye cinhan hdaksa wo ; nape ksa wiconi kin en yai kinhan hee wašte kta, qa nape napin hduha Wakansica ti, peta icimana kasnipi kte śni kin en iyohpeniyanpi kte śni.

44 Hen wamduška tawapi kin te kte śni, qa peta kin kasnipi śni ece.

45 Nakun nisiha walitaniniye cinhan hdaksa wo ; hunište wiconi kin en yai kinhan, he wašte kta, qa siha nom hduha Wakansica ti peta icimana kasnipi kte śni kin en iyohpeniyanpi kte śni.

46 Hen wamduška tawapi kin te kte śni, qa peta kin kasnipi śni ece.

47 Nakun ništa walitaniniye cinhan hduśdoka wo ; išta wanjidan hduha Wakantanka tokiconze kin en de cinhan, hee wašte kta, qa išta napin hduha Wakansica ti peta kin en iyohpeniyanpi kte śni.

48 Hen wamduška tawapi kin te kte śni, qa peta kin kasnipi śni ece.

49 Wicašta otioyohi peta on skuyeyapi kta, qa wošnapi otioyohi miniskuya on skuyeyapi kta.

50 Miniskuya kin he wašte ; tuka miniskuya kin skuye śni aye cinhan taku e on skuyeyapi kta he. Miniskuya ihduha po, qa wookiye kiciyuha po.

## WICOWOYAKE 10.

1 Hetanhan najin hiyaye ça, Jordan akasanpatanhan, Juda

makoce kin en hi : unkan ake oyate kin en witaya kata iheya ; qa econ ece qon he iyecen ake wovicakiyaka.

2 Unkan Pharisee kin en hipi qa wiwangapi, Wicašta tawicu elipeye kta iyececa hecinhan, he iyutanyanpi.

3 Unkan waayupte ça hewicakiya ; Moses token econ niśipi he.

4 Unkan ; Moses kpaganpi wuwapi kage ça elipeye kta iyowinyan ce, eyapi.

5 Unkan Jesus waayupte ça hewicakiya ; Cante nitehipi kin heon Moses woope kin he nicagapi.

6 Tuka wicoicage otokaheya tanhan Wakantanka hena wicawinyan ahna wicakaga :

7 Heon etanhan wicašta wan atkuku hunku ko elipewicaye kta, qa tawicu en iyaihdaške kta :

8 Qa henaowa wicacełpi wanjidan kta ce. Hecen hetanhan nonpapi śni, tuka wicacełpi wanjidan.

9 Heon taku Wakantanka yuonkonwanjidan kin he ihnuhan tuwe yujuju kinhan.

10 Unkan ti mahen yukanpi, hehan waonspewicakiye cin he akta wiwangapi.

11 Unkan hewicakiya ; Tuwe winohinca elipekiye ça wanji tokeca yuze cinhan, he wawicahapi ecakicon ece.

12 Qa winohinca wan hihnak u elipeye ça wanji tokeca hihhaye cinhan, he nakun wawicahapi econ ece.

13 Hehan hokśiyooqopa en awicahipi, wicayutan kta heon ; tuka waonspewicakiye cin tona awicaupi kin iyowicakipiśni.

14 Tuka Jesus he wanyaka, hehan nina iyokiśice ça hewica-



kiya; Hoksíyoqopapi en maupi kta iyowinwicakiya po, qa tehindapi šni po; tona dececapi kin Wakantanka tokiconze kin eepi ce.

15 Awicakehan heciciyapi; Tuwe Wakantanka tokiconze kin hoksíyoqopa iyecen icu šni kinhan he mahen ye kte šni.

16 Hehan poskin wicayuzá, qa nape awicaputake ça wicaya-wašte.

17 Unkan canku kin ohna iyaye çehan, wanji inyang u, qa en canpeška makehde inajin, qa wiwanga; Waonspekiye wašte, wiconi owihanke wanice cin he ohimiçiyé kta e on taku ecamon kta he.

18 Unkan Jesus heciya; Tokéca wašte emayakiya he; tuwedan wašte šni; Wakantanka išnana.

19 Woahope kin sdonyaya; Wawicihalapi econ šni wo, Tinwicakte šni wo, Wamanon šni wo, Woitonšni oyake šni wo, Wawicaki šni wo, Niyate nihun kici wicahduonihan wo.

20 Unkan waayupte ça heciya; Waonspekiye, dena owasin homakšiyopa ehantanhan ecamon ece.

21 Hehan Jesus atonwe çehan waštekidake ça heciya; Taku wanji ninica; hde ça taku duhe cin wiyopeya, qa walhpanicapi kin wicacu wo, kinhan malhipiya ekta wowijice duhe kta; hehan ku, can susbeca kiçin, qa mihakam u wo.

22 Unkan oie kin he on iyokišica, qa cante šica hda; taku ota yuha nakaes.

23 Unkan Jesus ihdukšan etonwe ça waonspewicakiye cin hewicakiya; Tona watonpike cin hena Wakantanka tokiconze kin en yapi kte cin he tehika ce.

24 Unkan oie kin on waonspewicakiye cin yušinyayapi. Tuka Jesus ake waayupte ça hewicakiya; Hoksíyoqopa, tona wowijice wacinyanpi kin hena Wakantanka tokiconze kin en yapi kte cin he tehike hinca.

25 Wicašta wijica Wakantanka tokiconze kin en ye kta he tehika, qa kamel wan tahnšpaciqadan ohdoka ohna ye kte cin he aoptetu.

26 Unkan heon nina yušinyayapi qa heciciyapi; Hehan tuwe ni kta he.

27 Jesus awicatonwe ça heya; Wicašta ekta he okihipica šni, tuka Wakantanka ekta hecece šni; Wakantanka ekta taku owasin okihipica ece.

28 Hehan Inyan heciya; Iho, unkiye taku owasin elipeunyanpi, qa nihakam unyakonpi.

29 Jesus waayupte ça heya; Awicakehan heciciyapi, tuwe, miye qa wotanin wašte kin on, tipi qa hunkawanjitku, qa tawinohitin, qa atkuku, qa hunku, qa tawicu, qa cinca, qa makoce elipeye cinhan;

30 Nakaha wiconi kin de en opawinge akihde icu kta; tipi, qa hunkawanjitektupi, qa tawinohitin, qa hunkupi, qa cincapi, qa makoce ko, wošitkihdapi iyahna; qa wiconi u kte cin he en wiconi owihanke wanica yuhe kta.

31 Tuka wicota tokaheya kin hena ehake unpi kta, qa ehake unpi kin hena tokaheyapi kta.

32 Hehan canku ohna Jerusalem ekta yapi; unkan Jesus wicitokam ya; qa iyepi qeš ihakam upi, inihanpi qa kopehdapi. Unkan akeš akenonpapi kin iwicacu, qa taku akipe kte cin hena kohan owicakiyaka:

33 Iho, Jerusalem ekta itan-

wankanhde unyanpi ; qa Wicašta Cinhintku kin wošnapı kagapi, wowapi kagapi ko napepi kin en wicaqupi kta ; unkan hena te yacopi kta, qa Ikcewicašta kin iyoopta wicaqupi kta :

34 He qe ihahapi kta qa kapsinsintapi kta, qa atagošapi kta, qa ktepi kta ; unkan anpetu icıyamni kinhan ake kini kta.

35 Hehan Jakob qa Johannes, Zebede cinhintkupi, en hipi qa heciyapi ; Waonspekiye, taku uncinpi kin he ecen ecaunyeconpi kta uncinpi.

36 Unkan, Taku e ecaciconpi kta yacinpi he, ewicakiya.

37 Unkan heciyapi ; Nitowitan kin en, wanji nietapa qa unma nicatka tanhan unkiyotankapi kta e unqu po.

38 Tuka Jesus hewicakiya ; Taku yadapi kin sdoniyakiyapi šni. Wiyatke etanhan mdatke kte cin he niš yatkan oyakihipi he ; qa baptem miye maqupi kte cin he on niš eya niçupi kta oyakihipi he.

39 Unkan, Unkokihipi ce, eciyapi. Unkan Jesus hewicakiya ; Awicakehan wiyatke etanhan mdatke cin niš etanhan datkanpi kta ; qa baptem maqupi kin he is nakun niçupi kta ;

40 Tuka mietapa qa micatka tanhan iyotankapi kin wicaqupi kte cin he miye mitawa šni ; tuka tona wiyeya wicakicihnakapi kta.

41 Unkan wikcemna kin he nahonpi qehan, Jakob qa Johannes nina canniyewicayapi.

42 Tuka Jesus wicakico qa hewicakiya ; Oyate kin ekta tona itancan unpi kin wowidagwicayapi ece ; qa tona tanka unpi kin hena oyate wicayuhapi ece.

43 Tuka niyepi ekta hecece

kte šni ; tuka tuwe iyotan tanka yaunpi kta hecinhan, he ookiye duhapi kta :

44 Qa tuwe tokaheya yaunpi kta hecinhan, he owasin wowidagyapi kta.

45 Wicašta Cinhintku kin hee kaeš waokiyapi kta hi šni, tuka waowicakiye kta, qa wicota opewicakitonpi kta on wiconi tawa ešpeye kta on hi.

46 Unkan Jeriko en hipi ; qa Jeriko etanhan oyate ota qa waonspewicakiye cin om hdinanpa, hehan Bartimeus, Timeus cinhintku, išttagonge ciqon he canku icahda wada iyotanka.

47 Unkan he Jesus Nazareth etanhan hee nahon qehan, hotanin qa heya ; Jesus, Dawid Cinhintku, onšimakida wo.

48 Unkan wicota iyokipišni, inina un kta ; tuka iye iyotan hotankakiya heya ; Dawid Cinhintku, onšimakida wo.

49 Unkan Jesus owanji najin qa kicopi kta, keya ; hecen išttagonge cin kicopi qa heciyapi ; Cante wašte wo, najin wo, wanna nico ce.

50 Unkan iye šina ešpeya najin hiyaye ça Jesus en hi.

51 Unkan Jesus waayupte ça heciya ; Taku ecacicon kta yacin he. Išttagonge cin ; Itancan, watonwe kta, eciya.

52 Unkan Jesus heciya ; Hda wo, wacinyaye cin he asninyan ce. Unkan hecehnana tonwe ça canku ohna Jesus ihakam ya.

## WICOWOYAKE 11.

1 Unkan wanna Jerusalem ikıyedan hipi, Bethphage qa Bethani hetu, Oliwe Paha kin en, hehan waonspewicakiye cin nom ye wicaši ;

2 Qa hewicakiya ; Otonwe iyo-

takons yanke cin en ya po; unkan wanna en yaipi kinhan, hehan šukcinca wan, tohinni wicašta akan iyotanke šni, he iye-yayapi kta; yukcapi qa aku po.

3 Qa tuwe, Taku on hecanonpi he, eniciyapi kinhan, Itancan kin cin ce, eya po. Unkan hecehnana au nišipi kta.

4 Unkan ekta iyayapi, qa canku nonpa ipaweñ wanka, tiyopa wan en šukcinca kin kaška najin iyeyapi; hecen kiyukcapi.

5 Unkan hen najinpi kin wanjikji, Tokeca šukcinca kin dukcapi he, ewicakiyapi.

6 Unkan Jesus econ wicaši qon he ohna ewicakiyapi: hecen iyowinwicakiyapi.

7 Hehan šukcinca kin Jesus kahipi; qa tawokoyake akan ehna-kapi; unkan iye akan iyotanka.

8 Unkan wicota canku ohna tawokoyake kin owinšyapi; qa apa can kin etanhan adetka kaksapi, qa canku ohna eñpeyapi.

9 Unkan tona tokaheyapi qa tona ihakam upi kin hena hotaninpi qa heyapi; Osanna, tuwe Itancan caje on u kinhan, he yawaštepi ce.

10 Dawid ateunyanpi tokiconze Itancan caje kin on u kin he yawaštepi: Osanna iyotan tehan wankantu.

11 Unkan Jesus Jerusalem en ye ça, tipi wakan kin en iyaya; qa wanna taku owasin ekta etonwe ça, htayetu aya, hehan akenonpapi kin om Bethani e- kta kihda.

12 Unkan ihanñanna Bethani etanhan kupi, hehan wotektelha.

13 Qa itehan suken can wan ape yuke cin he wanyaka, he en hi, okinni en waskuyeca iyeye kta; tuka en hi qehan takudan iyeye šni, ape cecdan; suken icage kta hinañinke šni.

14 Unkan Jesus waayupte ça heciya; Detanhan tuwedan waskuyeca enitanhan yute kte šni, owihanke wanica. Unkan waonspewicakiye cin he nañonpi.

15 Hehan Jerusalem en hipi; unkan Jesus tipi wakan kin en i, qa tona tipi wakan kin ohna wiyopeyapi qa wopetonpi kin hena tankan iyewicaya, qa mazaska tokiyopeyapi ahna econpi kin ahdapšinyan eñpeya, qa wakiyedan iyopeyapi can akan iyotankapi hena koya:

16 Qa tipi wakan kin ohna tuwe cega yuhe kta iyowinwicakiye šni.

17 Unkan wowicakiyake ça hewicakiya; Wati kin he oyate owasin on wocekiye tipi eciyapi kta ce, eya wowapi en kagapi šni he; tuka niye wamanon sa otipi kin yakagapi ce.

18 Wošnapi kagapi qa wowapi kagapi kin he nañonpi, unkan token ihangyapi kta akitapi; kokipapi, wicašta owasin ta-woonspe kin on yušinyayapi nakaés.

19 Unkan wanna htayetu hehan otonwe kin etanhan tankan iyaya.

20 Unkan ihanñanna en hiyayapi hehan suken can kin wanna hute hehanyan šnija e wanyakapi.

21 Unkan Inyan he kiksuye ça heciya; Itancan, wanyaka wo, suken can dašice ciqon he wanna šnija.

22 Unkan Jesus waayupte ça hewicakiya; Wakantanka wacinyanpi kin he yuha po.

23 Awicakehan heciciyapi; Tuwe paha kin de, Tokan iyaye ça miniwanca kin en iyohpaya wo, eciye ça, cante kin en ce-ñunhda šni, qa taku tona eye cin hena hecetu kta e wicada



kinhan; he taku eye cin hena ecen yuhe kta.

24 Heon etanhan heciciyapi; Ceyakiyapi eca taku tona yacini kin hena iyacupi e wicada po, kinhan hena duhapi kta.

25 Unkan cekiya nayajinpi kinhan, tuwe taku on yeksuyapi kinhan kicicajuju po; hecen Ateyayapi mahpiya ekta yanke cin he wayahitanipi kin nicicajujupi kta.

26 Qa nis wayecicajujupi sni kinhan, nakun Ateyayapi mahpiya ekta yanke cin wayahitanipi kin nicicajujupi kte sni.

27 Unkan ake Jerusalem en hdipi; qa tipi wakan kin ohna mani un qehan, wošnapı kagapi wowapi kagapi wicalincapi koya en hipi;

28 Qa heciyapi; Taku wowašake on dena taku kin ecanon he; qa tuwe dena econ niši, qa hecen ecanon he.

29 Unkan Jesus waayupte ça hewicakiya; Miš eya taku wanji iciwangapi kta, amayupta po, kinhan wowašake tukte e on dena ecamon kin ociciyakapi kta.

30 Johannes baptem wicaqu qon wicohan kin he mahpiya eciyatanhan, qa iš wicašta eciyatanhan, unma tukte he; amayupta po.

31 Unkan hdokinicapi qa hekiciyapi; He mahpiya eciyatanhan, unkeyapi kinhan, hehan; Tokeca wicayadapi sni he, eye kta.

32 Tuka, He wicašta akantu eciyatanhan, unkeyapi kinhan, oyate kin kowicunkipapi; wicašta owasin Johannes wicašta wokcan kin heca kecinpi.

33 Unkan waayuptapi qa Jesus heciyapi; Sdonunyanpi sni. Unkan Jesus waayupte ça hewicakiya; Miš eya wowašake tukte

e on dena ecamon kin he nakun ociciyakapi kte sni.

## WICOWOYAKE 12.

1 Hehan wiyacinpi on wowicakiyaka; Wicašta wan hastanhanka iyuwı wojupi wan oju, qa ohomni natake ça, miniša iyuškiye wan en qe ça, cowahe tehan wankantu wan kaga; qa kicanyanpi kte cin owicaqu, qa makoce wan tokeca ekta icimani iyaya.

2 Qa wanna iyehantu qehan taokiye wan kicanyanpi kin ekta ye ši, kicanyanpi kin etanhan hastanhanka ojupi kin waskuyeca icu kte cin heon etanhan.

3 Unkan he yuzapi, qa apapi, qa cokadan hde šipi.

4 Unkan ake taokiye wanji tokeca ekta ye ši; tuka e qe inyan on kininpi, qa pa kalhdecapi, qa tehiya kuwapi hde šipi.

5 Unkan ake wanji tokeca ekta ye ši; qa he qe ktepi: unkan nakun wicota, hunh awicapapi qa hunh wicaktepi.

6 Hehan cinhintku wanjidana waštekidake cin he hinahin hduha; unkan he ehake ekta ye ši, qa; Micinkši yuonihanpi kta ce, eya.

7 Tuka kicanyanpi kin hekiciyapi; Tawa kte cin he dee; iho po, unktepi kta; hecen he unkitawapi kta ce.

8 Unkan hecen yuzapi qa ktepi, qa wojupi kin etanhan tankan ehpoyapi.

9 Heon hastanhanka ojupi yuhe cin he taku econ kta he. En hi qa kicanyanpi kin hena ihangwicaye kta, qa hastanhanka ojupi kin wicašta tokeca owicaqu kta.

10 Wowapi kin de dawapi sni he; Ticagapi inyan wan ehpe-

yapi qon he oise en pa icaga ce.

11 He Itancan kin econ, qa unkiſtapi kin en taku wowinihan.

12 Hehan yuze wacinni, tuka oyate kin kowicakipapi; wiya-cinpi kin de iye wicaka e heya sdoniyapi. Unkan eſpeya ki-ldapi.

13 Hehan Pharisee qa Herodian etanhan wanjikji ekta ye wicaſipi; taku eye cin on yuzapi kta.

14 Unkan hena en hipi qehan heciyapi; Waonspekiye, iewicayaka qa tuwedan koyakipe ſni sdonunyanpi; wicaſta tancan ekta eyatonwe ſni ece, tuka awicakehan Wakantanka tacanku kin odaka ece; Kesar wamnayanpi qupi kta iyececa he.

15 Unqupi kta, qa iſ unqupi kte ſni he. Tuka iye wohnye hduhapi sdonye a hewicakiya; Tokeca iyutanmayayapi he. Kaſpapidan wanji makau po, wanmdake kta ce.

16 Unkan kahipi. Hehan hewicakiya; Wicite qa wowapi kin de tuwe tawa he. Unkan, Kesar tawa ce, eciyapi.

17 Hehan Jesus waayupte a; Kesar taku tawa kin kicu po; qa Wakantanka taku tawa kin kicu po, ewicakiya. Unkan heon iniuhanpi.

18 Hehan Saddukee kin, piya iwicacage kte cin wanica keyapi, hena etanhan en hipi; qa wiwangapi qa heyapi;

19 Waonspekiye, Moses wowapi unkiſtagapi, wicaſta wan tawicu eſpeya e a, cinca nice cinhan, sunkaku winohinca kin he hduze kta, qa cincu qon cinca kicage kta ce.

20 Hunkawanjinkiciyapi ſakowin; unkan tokapa kin winohinca wan yuze a, cinca codan a.

21 Hehan iyokihe kin he hduze a nakun a, qa cinca nica; unkan iyamni kin iſ nakun.

22 Unkan ecen ſakowinpi kin hduzapi, qa cinca nicapi: eha-ke winohinca kin iſ eya a.

23 Hecen piya iwicacage cin en inajinpi kinhan, wanji tukte tawicuyapi kta he: ſakowin hduzapi tuka.

24 Unkan Jesus waayupte a hewicakiya; Wowapi wakan kin sdonyayapi ſni, qa nakun Wakantanka towaſake kin, heon yanunipi.

25 Wicone etanhan piya wicoicage kinhan tawicu tonpi ſni qa hihnaku yuhapi ſni; tuka mahipiya ekta ohnihde unpi kin iyececapa.

26 Unkan tona api kin hena piya icagapi kta, on Moses tawowapi kin en dawapi ſni he; can opamna etanhan Wakantanka okiye a heya; Abraham Wakantanka tawa, qa Isaak Wakantanka tawa, qa Jakob Wakantanka tawa kin he miye ce.

27 Wicaſta api kin Wakantanka tawapi ſni, tuka ni unpi kin Wakantanka tawapi: heon etanhan ſogya yanunipi.

28 Hehan wowapi kagapi wanji en hi, qa akinicapi kin naon, qa tanyan awicayupta iyukcan heon etanhan, Woahope tokaheya kin tukte e he, eya iwan-a.

29 Unkan Jesus ayupta; Israel naon po, Jehowa Wakantanka unkitawapi kin he Itancan wanji-an, woahope owasin tokapa kin hee ce.

30 Unkan Jehowa Wakantanka nitawa kin he nicante ocowasin on, qa ninagi ocowasin on, qa nitawacin ocowasin on, qa nitowaſake ocowasin on,

### WICOWOYAKE 13.

wašteyakidake kta ce; woahope tokaheya kin hee.

31 Qa inonpa kin he he iyececa; Nikiyedana un kin he niye inihdacin wašteyadake kta. Woahope dena isanpa tanka wanica.

32 Unkan wowapi kage cin he heciya; Han, Waonspekiya, wowicake ecen eha, Taku wakan wanjidan, qa icunonpa tannan wanica.

33 Qa wicacante ocowasin on, qa wicotawacin ocowasin on, qa wicanagi ocowasin on, qa wicowaśake ocowasin on wašte-dakapi, qa wicikiyedana unpi kin wiciye ihdacin waštewicadapi kin, peta on wośnapi qa ikce wośnapi owasin, he isanpa tanka ece.

34 Unkan he wacinksamya ayupta Jesus wanyaka, hehan heciya; Wakantanka tokiconze kin itehan yaun śni. Unkan hetanhan tuwedana sanpa wiwanga tawaŋenye śni.

35 Hehan Jesus tipi wakan kin ohna wowicakiyaka icunhan waayupte ɕa heya; Wowapi kagapi kin Messiya he Dawid Cinhintku ce, tokeca heyapi he.

36 Dawidiye qe Woniya Wakan on heya; Itancan kin Itancan mitawa heciya; Mietapa ekta iyotanka wo, tona tokaniyanpi kin hena siha oahe nitawa kin wakage kta hehanyan.

37 Heon etanhan Dawid iye qe Itancan eciya; hecen token cincaya he. Unkan oyate ikceka kin wiyuśkinyan nahonpi.

38 Unkan wowicakiyaka icunhan hewicakiya; Wowapi kagapi kin kowicakipa po, hena wokoyake hanskaska kiɕun waśtedakapi, qa wopeton tipi kin ohna owicakiyapi kta nakun:

39 Qa omniciye tipi kin en oi-

yotanke tokapapi, qa wotapi kin en oyanke waštešte kin:

40 Hena e wiwazica tipi kin temyapi, qa ihdutaninpi on wocekiye hanska eyapi ece: hena woyaco iyotan tanka yuhapi kta.

41 Unkan Jesus mazaska opiye kin iyotakons iyotanka, qa token oyate kin mazaska opiye kin en, mazaska ehpeyapi kin he wanyaka. Unkan wicota wijicapi kin hena odota en ehpeyapi.

42 Unkan wiwazica wahpanica wan en hi, qa mazaśa onśpadan nom en ehpeya, he mazaśa wanjidan yawapi.

43 Unkan waonspewicakiye cin hena wicakico qa hewicakiya; Dena owasin mazaska opiye kin en ehpeyapi, tuka wiwazica wahpanica kin de owasin isanpa en ehpeya, awicakehan eciciyapi.

44 Dena owasin taku ota tonpi kin eciyatanhan en ehpeyapi ece; tuka iye qe nice cin etanhan taku yuhe cin ocowasin en ehpeya, on ni kte cin ocowasin.

### WICOWOYAKE 13.

1 Unkan tipi wakan kin etanhan kinanpa hehan waonspewicakiye cin wanji heciya; Waonspekiya, inyan tankinyanyan kin dena, qa tipi kagapi kin dena wanyaka wo.

2 Unkan Jesus waayupte ɕa heciya; Tipi tankinyanyan kin dena owasin wandaka he. Inyan wanji inyan itakihna wanke kte śni, owasin jujawahe kta.

3 Unkan Oliwe Paha kin akan iyotanka, tipi wakan kin iyotakons, hehan Inyan qa Jakob qa Johannes qa Andrew nahmana wiwangapi;

4 Tohan hena hecetu kta he, qa dena owasin iyecetu kta e



wowapetokeca tukte e hecinhan, unkokiyaka po.

5 Unkan Jesus waayupte ça hewicakiya ; Iwanihdaka po, òkinni tuwe nihnayampi kta.

6 Wicota micaje on hipi qa ; He miye ce, eyapi kta, qa wicašta ota wicahnayanpi kta.

7 Unkan tohan wicokicize qa kiczapi kta oyakapi kin nayahonpi kinhan, nihinciyapi šni po : hena hecetu kta, tuka owihanke kin hinahinke šni.

8 Oyate wan oyate tokeca on najin kta, qa wokiconze wan wokiconze tokeca on ; qa tuktekten maka škanškan yuke kta, qa wicaakihan qa wicokicize yuke kta. Dena wicoiyokišice tokaheya kin ec.

9 Tuka iwanihdaka po ; omniciye tanka kin en aniyampi kta ; qa omniciye tipi kin ohna nicaštakapi kta ; qa miye on wicašta itancanpi wicaštayatapi ko en aniipi kta, owicayakapi kta heon.

10 Tuka tokaheya wotanin wašte kin he oyate owasin owicakiyakapi kta.

11 Tuka tohan aniyampi qa wicancipui kinhan, itokam taku ehapi kta awacinpi šni po, qa on cante šicapi šni po ; tuka wihiyayedan oape kin he en taku ničupi kin he ohna eya po ; eye kte cin he niyepi šni, tuka Woniya Wakan kin hee kta.

12 Hunkawanjinkiciyapi wiconče en kicičupi kta, qa wicašta wan iye cinca nakun ; qa wicacinca inajinpi kta qa hunkakewicayapi kin tewicayapi kta.

13 Unkan miye on owasin šicenedapi kta ; tuka tuwe owihanke kin hehayan ope cinhan he ni kta.

14 Tuka tohan wošice woihangye, Daniel wicašta wokcan cajeyate ciqon, tukten najin

kta iyecece šni, hen wandakapi kinhan, tuwe yawa kinhan okahnige kta, hehan tona Juda makoce kin en unpi kin he kin ekta najicapi kta :

15 Qa tuwe tipi akan yanke cin he kun ku, qa timahen tanhan takudan ehdaku kte šni :

16 Qa nakun tuwe magata un kinhan, wokoyake ehdaku kta on hdicu kte šni.

17 Tuka anpetu kin hena en tona ihdušakapi qa hokšiyooqopa azinwicakiyapi kin hena tehiya unpi kta.

18 Unkan waniyetu icunhan nayapapi kte šni e icekiya po.

19 Anpetu kin hena en wicokakije yuke kta, tokaheya Wakantanka taku kage cin ehan tanhan, qa dehayan takudan iyecece šni, qa nakun tokata ekta iyecece kte šni.

20 Unkan Itancan kin anpetu kin hena yuptecedan šni kinhan, wicacehpi takudan ni kte šni ; tuka wicakalnigapi tona wicakalnige cin hena on anpetu kin hena yuptecedan.

21 Unkan hehan tuwe ; Iho, Messiya hen yanka ce, qa is ; Kan yanka ce, eniciyapi ešta, wicadapi šni po.

22 Messiya itonpišni qa wicašta wokcan itonpišni kin heca ica-gapi kta, qa wowapetokeca taku wowinihan ko econpi kta, okihipica unkanš wicakalnigapi kin hena eepi kaes wicahnayanpi kta tuka.

23 Tuka iwanihdaka po ; iho, itokam hena ociciyakapi.

24 Tuka anpetu kin hena en, wicokakije kin iyohakam, anpetu wi kin aotpasyapi kta, qa hanyetu wi kin iyoyanpa kte šni ;

25 Qa mahpiya wicanhpi kin hinhpaye kta, qa mahpiya ekta wowašake kin yuhuhuzapi kta.

26 Unkan hehan Wicašta Cinhintku kin wowašake tanka wowitzan ko hduha małpiya šapa akan u wandakapi kta.

27 Unkan hehan obnihdewicaye cin hena ye wicaši kta, qa tate ouye topa kin etanhan, maka ihanke kin etanhan qa małpiya ihanke kin hehanyan, wicakalnige cigon hena witaya wicakpabi kta.

28 Suken can kin etanhan wiyacinni kin de okaliniga po: Can intpa kin hinałin wankadan, qa etanhan ape icage cinhan, hehan mdoketu wanna ikiyedana sdonayayapi ece.

29 He iyececa, niš tohan dena owasin iyecetu wandakapi kinhan, wanna ikiyedana, tiyopa kin etu, e sdonya po.

30 Awicakehan heciciyapi, wicoicage kin de tokan iyaye šni, ecen dena owasin econpi kta.

31 Małpiya maka ko tokan iyaye kta, tuka mioie kin hena tokan iyaye kte šni.

32 Tuka anpetu kin he, qa wihiyeyedan oape kin he tuwedana sdonye šni, małpiya obnihde kin heepi kaeš, qa nakun Cinhintku-yapi kin; tuka Ateyapi kin ecedana sdonya.

33 Iwanihdaka po, wakta unpi qa cekiya po; tohan iyehantu kte cin sdonayayapi šni nakaeš.

34 Wicašta wan icimani ye kte cin, tipi ełpeye qa taokiyewicaye cin taku econ wicaši, otoiyohi wicołan wicaqu, qa tiawan-yake cin he awanyake ši, he iyececa.

35 Heon etanhan waktaya un po; tipi ohna itancan kin tohan hdi kta sdonayayapi šni, łitayetu, qa hanye cokaya, qa anpaohotonna hoton, qa iš hanłanna kinhan.

36 Okinni ihnuhanna hdi kinhan ništinmapi iyeniyanni kta.

37 Unkan taku eciciyapi kin he owasin ewicawakiya ece, Waktaya un po.

## WICOWOYAKE 14.

1 Anpetu nonpa iyohakam hehan woacakšni qa aguyapi napohiyapi šni: Unkan wošnapi kagapi wowapi kagapi ko token hnayan yuzapi kta akitapi, ktepi kta e heon.

2 Tuka heyapi; Wošnapi anpetu kin hehantu kte šni; okinni oyate kin owodutaton kta.

3 Unkan Bethani etu, Simon lepros ececa qon he ti kin en wota iyotanka, hehan winohinca wan inyan opiye wan wihdi waštemna tełike hinca he yuha hi, qa opiye kin yulidoke qa iye pa kin akaštan.

4 Unkan hen wanjikji cante mahen iyokipipi šni qa heyapi; Tokeca wihdi waštemna kin hecen yutakunipi šni he.

5 Wihdi waštemna kin de kašpapi opawinge yamni sanpa iyopeyapi qa wałpanica wicaqupi kta tuka. Hecen winohinca qon icaptapi.

6 Unkan Jesus heya; Ayuštan po; tokeca nagiyeyayapi he. Wicołan wašte wan ecamicon.

7 Wałpanicapi kin ohinniyan wicayahduhapi, qa tohan yacinni kinhan tanyan ecawicayeconpi kta oyakihipi; tuka miye ohinniyan mayaduhapi šni.

8 Taku okihi kin ecen econ; mitancan łapi kte cin on itokam sdaye kta on hi.

9 Awicakehan heciciyapi; Maka kin owancaya tukten wotanin wašte kin de oyakapi kinhan, winohinca kin de nakaha taku econ kin he oyakapi kta, wokiksuye kta e heon.

10 Unkan Judas Iskariot, ake-

nonpapi kin wanji ee, woŋnapi kagapi kin ekta ya, he hnayan wicaqu kta heon.

11 Unkan he nañonpi qehan wiyuŋkinpi, qa mazaska qupi kta keciyapi. Unkan token tanyan hnayan wicaqu kta he akita.

12 Unkan aguyapi napohye ŋni anpetu tokaheya en woŋna ktepi ece kin hehantu, waonspewicakiye cin heciyapi; Tukten woacaksin woŋnapi yate kta wiyeya eunhnakapi kta yacin he.

13 Unkan waonspewicakiye cin nom ye wicaŋi, qa hewicakiya; Otonwe kin en ya po, kinhan wicaŋta wan mini ohna wakiŋkotpa wan qin itkonicipapi kta, he ihakam ya po.

14 Qa tukte en tin kihde cinhan, tipi tawa kin heciya po; Waonspekiye cin heya ce; Wankan tipi kin tukten waonspewicawakiye cin om woŋnapi kin wate kta tukte e he.

15 Unkan wankan tipi wan tanka, tanyan yuŋtanpi qa wiyeya yanka, nicipazopi kta; hen wiyeya eunkicihnaka po.

16 Unkan waonspewicakiye cin iyayapi, qa otonwe kin en ipi, qa token ewicakiye cin hecen iyeyapi; unkan woŋnapi kin wiyeya ehnakapi.

17 Unkan wanna htayetu hehan akenonpapi kin om en hi.

18 Unkan wota iyotankapi icunhan Jesus heya; Awicakehan heciyapi; Mici wayatapi kin wanji wiyopemayayapi kta.

19 Hehan iyokiŋŋica hinhdapi, qa otoiyoŋi heciyapi; He miye he; qa ake wanji, He miye he, eyapi.

20 Unkan hewicakiya; Akenonpapi kin etanhan wanji wakŋŋica ohna mici oputkan kin hee ce.

21 Wicaŋta Cinhintku kin awi-

cakehan token wowapi en kagapi qon he iyecen iyoopta ya, tuka wicaŋta kin tuwe Wicaŋta Cinhintku kin wiyopeye cinhan, he wotehi yuhe kta; wicaŋta kin he tohinni tonpi ŋni unkanŋ waŋte kta tuka.

22 Unkan wotapi icunhan Jesus aguyapi icu, yawaŋte, qa kiyuŋpa, qa wicaqu, qa heya; Icupi qa yuta po; mitancan kin he dee.

23 Nakun wiyatke kin icu; qa yawaŋte hehan wicaqu. Unkan owasin etanhan yatkanpi.

24 Unkan hewicakiya; Wicotakuye teca kin en, mawe kin he dee, wicota on papsonpi.

25 Awicakehan heciyapi; Detanhan wiyuwi waskuyeca etanhan icimana mdatke kte ŋni, anpetu wan en Wakantanka tokiconze kin en teca mdatke kte cin hehayan.

26 Unkan odowan wan ahiyayapi hehan Oliwe Paha kin ekta iyayapi.

27 Hehan Jesus hewicakiya; Hanyetu kin de miye on iyulpa niŋhicanpi kta; kaken wowapi en kagapi qon, Waawanhdake kin he awape kta, hecen taŋinca wanunyanpi kin mdecakanpi kta ce.

28 Tuka ake wakini iyohakam, Galile ekta nitokam imdamde kta.

29 Tuka Inyan heciya; Owasin hiŋcakanpi eŋta, miye qe ecamon kte ŋni.

30 Unkan Jesus heciya; Awicakehan heciya; Anpetu kin de, hanyetu kin de en, anpaohottona nonpa hoton ŋni, ecen yamni akihde anamayakiŋbe kta.

31 Hehan iyotan nina kitan ŋinca; Cicimaŋa eŋta anaciciŋbe kte ŋni. Iyulpa nakun iyecen eyapi.



32 Unkan wojupi wan en ipi, Gethsemane eciyapi; hehan waonspewicakiye cin hewicakiya; Den iyotanka po, icunhan cewakiye kta.

33 Unkan Inyan qa Jakob qa Johannes hena iwicacu, hehan inihan qa nina iyokišica hinnda;

34 Qa hewicakiya; Minagi nina iyokišice hinca, maŕe kta iyeececa; den yukanpi qa waktaya un po.

35 Unkan hetanhan kitan ecinyan iyoopta ye ca, makata ihpaye ca cekiya, okihipica kinhan, wihiyayedan oape kin he tokan iyaye kta.

36 Unkan heya; Abba, Ate, niye ekta taku owasin okihipica; wiyatke kin de emiciyaku wo; tuka miš taku wacin kin hee kte šni, taku yacin kin he hecetu kta.

37 Hehan en hdi, qa ištinnmapi iyewicaya, unkan Inyan heciya; Simon ništinnma he; wihiyayedan oape wanjidan kiktahan yaun kta oyakihi šni he.

38 Kiktahan unpi qa cekiya po; okinni taku wawiyutanyan un kin en yaipi nun ce; wicnagi kin he awicakehan wicada, tuka wicacehpi kin wašake šni.

39 Unkan ake iyaye ca cekiya, qa wicoie un qon hena ake ecen eya.

40 Unkan ake en hdi qehan, ake ištinnmapi iyewicaya, išta hbapi hinca, unkan token ayutpapi nun tanin šni.

41 Unkan iciyamni en hdi, qa hewicakiya; Ištinnma po qa ozičiya po; wanna henakeca, wihiyayedan oape kin wanna iye-hantu; wanyaka po, Wicašta Cinhintku kin wahtanipi sa napipi kin en hnayan wicaqupi.

42 Najin po, unyanpi kta; iho, tuwe mahnaye cin he wanna kiyedan u ce.

43—Unkan ecahankeya, iahan icunhan, Judas hi, akenonpapi kin wanji ee, qa kici wicota hinca, mazasagye can oŕoza ko yuhapi, wošnapi kagapi, wowapi kagapi, qa wicahincapi kin etanhan upi.

44 Unkan tuwe hnayan wicaqu kte cin he iwaktawicaye ca; Tuwe i iwaputake cinhan hee kta; yuzapi qa tanyan akiyahda po, eya.

45 Unkan en hi qehan, ecahankeya en ye ca, Itancan, Itancan, eciye ca, i itputaka.

46 Hehan nape ahnakapi qa yuzapi.

47 Unkan wanji en najinpi kin mazasagye ehdaku, qa wošnapi kagapi itancan taokiye wanji ape ca noge bašpa.

48 Unkan Jesus waayupte ca hewicakiya; Wamanon sa takpe hipi iyeececa, mazasagye can oŕoza ko yuha mayaduzapi kta on yahipi he.

49 Anpetu eca tipi wakan kin ohna ocipapi qa waonspekiya waun, tuka mayaduzapi šni; tuka wowapi wakan kin yuecetupi kta.

50 Hehan owasin ehpeya najicapi.

51 Unkan koška wan ihakam ya, tancodan un tuka miniŕuha ska tancan iyakipemni. Unkan koškapi kin hena yuzapi:

52 Hehan miniŕuha ska kin he ehpeya, qa tancodan kihda.

53 Unkan Jesus wošna kagapi itancan kin ekta ayapi; qa hen wošnapi kagapi, wicahincapi, wowapi kagapi ko owasin mnicapi.

54 Unkan Inyan itehan ihakam u, qa wošna kagapi itancan ti kin en hi; qa ookiyewicayapi kin om iyotanke ca peta kin en cosičiya.

55 Unkan wośnapi kagapi qa omniciye ocowasin tuwe Jesus on taku oyakapi kta odepi, ktepi kta e heon, tuka takudan iyeyapi śni.

56 Wicota itonśniyan woyakapi, tuka taku oyakapi kin ocitkonze śni.

57 Hehan wanjikji inajinpi, qa itonśniyan taku iyaonpapi, qa heyapi;

58 Unkiye, Tipi wakan nape on kagapi kin de ihangwaye kta, qa anpetu yamni hehan wanji tokeca nape codan kagapi kin he wakage kta ce, eya naunhonpi ce.

59 Tuka is eya taku oyakapi kin ocitkonze śni.

60 Hehan wośna kagapi itancan kin wicacokaya inajin, qa Jesus iwange ça; Dena taku iyanionpapi kin takudan adupte śni he, eya.

61 Tuka iye inina un qa takudan ayupte śni. Ake wośna kagapi itancan kin wiwange ça heciya; Messiya, Iyotan Wašte Cinhintku kin he niye he.

62 Unkan Jesus heya; He miye; qa Wicašta Cinhintku kin wowaśake etapa eciyatanhan iyotanke ça, mahpiya śapa akan u wandakapi kta ce.

63 Hehan wośna kagapi itancan kin wokoyake hdupote ça heya; Taku on woyakapi sanpa uncinpi kta he.

64 Wayaśice cin he niye nayahonpi: token idukcanpi he. Unkan owasin, te kta iyececa, yacopi.

65 Hehan wanjikji atagośapi qa ite ogekicitonpi, qa apapi qa; Wokcan wo, eciyapi. Unkan ookiye unpi kin is eya nape on apapi.

66 Unkan Inyan ihukuya tipi kin ohna yanka; hehan wośna

kagapi itancan winyan wowidagwicaye cin wanji en hi;

67 Qa Inyan petiśkan yanka wanyake çehan en etonwe ça heya; Qa niś eya Jesus Nazareth kici yaun qon.

68 Tuka anakihbe ça heya; Taku ehe cin he sdonwaye śni, qa nakun owakalinige śni ce. Hehan tankan ohanzi hdepi kin ekta iyaya: unkan anpaohotonna wan hoton.

69 Unkan ake wikośka wan wanyake ça, tona en najinpi kin hewicakiya; De is nakun he-tanhan.

70 Unkan is ake anakihman. Hehan kitan ecinyan iyohakam tona en najinpi kin ake Inyan heciyapi; Awicakehan niś henitanhan; Galile wicašta heni-ca; qa iyae cin he iyececa ce.

71 Tuka iye wayaśice ça taku wakan cajeyata; Wicašta kin de cajedatapi kin ecaca sdonwaye śni ce, eya.

72 Hehan inonpa anpaohotonna kin hoton. Unkan hehan Inyan Jesus taku eciye ciqon; Anpaohotonna nonpa hoton śni, yamni akihde anamayakihbe kta ce, wicoie kin he kiksuya. Unkan he awakicin hehan ceya.

## WICOWOYAKE 15.

1 Unkan wanna anpao, hehan wośnapi kagapi qa wicahincapi, wowapi kagapi ko omniciye ocowasin om he aiapi, qa Jesus kaśkapi, qa ekta ayapi qa Pilate qupi.

2 Unkan Pilate wiwanga; Juda oyate Wicaštayatapi kin he niye he. Unkan Jesus ayupte ça, Niye ecen eha ce, eya.

3 Unkan wośnapi kagapi kin taku ota iyaonpapi; tuka takudan ayupte śni.

4 Unkan Pilate ake wiwange ça; Takudan adupte śni he; iho, taku ota iyanionpapi ce, eya.

5 Tuka Jesus takudan ayupte śni; hecen Pilate yušinyaya.

6 Wośnapi kin de ekta wica-kaškapi wanji wicakiciyukca ece, wanji tukte cinpi kinhan.

7 Unkan wanji Barabbas eciyapi, he tona om inajin qon kaškapi yanka, he inajinpi qehan nakun tinwicakte.

8 Unkan oyate kin, token econ ece qon he iyecen ecawicakicon kta, panyehan keciyapi.

9 Tuka Pilate awicayupte ça; Juda Wicaštayatapi kin he ciciyukcapi kta yacinpi he.

10 Wośnapi kagapi kin winawizipi on kahipi e sdonya.

11 Tuka wośnapi kagapi kin oyate kin wahokonwicakiyapi, Barabbas he wicakiyukca kta e heon.

12 Unkan Pilate ake awicayupte ça; Hehan tuwe Juda Wicaštayatapi eyakiyapi kin he token ecamon kta yacinpi he, ewicakiya.

13 Unkan ake panyehan heyapi; Icipawehi okatan wo.

14 Hehan Pilate hewicakiya; Tokeca, taku śica econ kin tukte e he. Unkan hehan iyotan nina; Icipawehi okatan wo, panyehan eyapi.

15 Unkan Pilate oyate kin iyokipiwicaye kta cin, heon Barabbas wicakiciyukca, qa Jesus kapsinsinta hehan icipawehi okatanpi kta wicaqu.

16 Unkan akicita kin tipi wan tanka, Pretorium eciyapi, he ekta ayapi; qa wicobe ocowasin wicakicopi.

17 Unkan śina duta wan inkiyapi, qa wapaha wan wapepeka on kazontapi qa unkiyapi.

18 Qa hehan okiyapi, Iho, Juda Wicaštayatapi kin.

19 Qa cedi tanka wan on pa kin en apapi, qa atagośapi, qa canpeška makehde inajinpi, qa ohodapi.

20 Unkan hecen iħaħapi, hehan śina duta kin ikicicupi, qa iye tawokoyake qon ake kiçunki-yapi. Hehan icipawehi okatanpi kta e ekta ayapi.

21 Unkan Simon, Kurene wicašta, en hiyaya, he Alexander qa Ruphus atkuku kin, makoce kin etanhan u kin he can susbeca tawa kin kicicinkiyapi.

22 Unkan Golgotha owanka kin en ahipi, he, Wicapahu makoce, eyapi kin he kapi.

23 Unkan miniša pejihuta icahiyapi kin he yatke kta e qupi; tuka wicada śni.

24 Unkan wanna icipawehi okatanpi, hehan tawokoyake qon kicipamnipi, qa on oeconna econpi, wicašta otioyohi taku icupi kta.

25 Unkan wanna wihiyayedan oape yamni, hehan icipawehi okatanpi.

26 Unkan taku iyaonpapi wowapi iwankam owapi kin, JUDA WICAŠTAYATAPI KIN, hee.

27 Unkan kici wamanon sa nom icipawehi owicakatanpi, wanji etapa eciyatanhan, qa unma catka eciyatanhan.

28 Hecen wowapi kagapi qon yuecetupi; Qa waħtanipi sa om yawapi ce, eya.

29 Unkan tona en hiyayapi kin hena yaścicapi, poptanptanpi qa heyapi; Iho, tipi wakan kin ihangyaye kta, qa anpetu yamni ake piya yakage kta:

30 Ito, niçiya wo, qa cansušbeca kin etanhan kun ku wo.

31 Nakun wośnapi kagapi kin iħaħapi, qa wowapi kagapi om iye iyakitedan hekiciyapi; Wi-



cašta tokeca niwicaya ece, tuka iye atayedan niŋciye kta okihi ŋni.

32 Messiya Israel Wicaštaya-tapi kin, ito cansusbeca kin etanhan kun hdicu kta, hecen wanunyakapi qa wicaundapi kta. Unkan tona kici icipaweŋ owicakatanpi qon is eya ihahapi.

33 Unkan wihiyayedan oape isakpe, hehan maka kin owancaya otpaza, oape inapcinwanka hehanyan.

34 Qa wihiyayedan oape inapcinwanka, hehan Jesus hotankakiya panyehan; Eloï, Eloï, lama sabakthani, eya: Wakan-tanka mitawa, Wakantanka mitawa, tokeca ehpemayaya he, eyapi kin he kapi.

35 Unkan en najinpi wanjikji he nahonpi qehan heyapi; Iho, Elias kipan.

36 Unkan wanji inyang ye ça, mini iyuhepe wan miniskuya en oputkan, qa can icam yatkekiye kta, qa heya; Hinnakahan po, Elias kun eyaku kta on hi kinhan wanunyakapi kta.

37 Unkan Jesus hotankakiya hotanin, qa taniya hiyuya.

38 Unkan tipi wakan cokaya ozanpi qon he owangya okinahdece ça, wankan tanhan qa kun ihanke kin aiyahdeya.

39 Unkan akicita opawinge wicayuhe cin iyotakons najin, he hecen pan qa taniya hiyuya wan-yaka, hehan heya; Awicakehan wicašta kin de Wakantanka Cinhintku kin hee.

40 Nakun winohinca itehan tanhan wanyag yukanpi; Mary Magdalene, qa Mary, Jakob cistinna qa Joses hunku kin, qa Salome, hena opapi.

41 Galile en un qon he ehan ihakam unpi qa okiyapi ece kin hena eepi, qa nakun winohinca

toktokeca kici Jerusalem en hipi qon.

42 Unkan wanna hitayetu, Ihduwiyeyapi kta anpetu, anpetu wakan kin itokam anpetu kin hee, heon,

43 Joseph, Arimathea etanhan, woepe aiekiyapi owotanna, qa nakun Wakantanka tokiconze kin ohinniyan ape un kin he u, qa waditagya Pilate en ye ça, Jesus tancan kin kida.

44 Unkan wanna ta hecinhan Pilate yušinyaya; heon akicita opawinge wicayuhe cin he kico, qa wanna wanakaja tanhan ta hecinhan he iwanga.

45 Unkan akicita opawinge wicayuhe cin he ecen okiyaka, hehan tancan kin Joseph qu.

46 Unkan he minihuha ska wašte opeton, qa tancan kin kun eyaku, qa minihuha ska kin iyapemni, qa wicahapi ohdoka wan imnija en kagapi, he en ohnaka, qa inyan tanka wan wicahapi ohdoka i kin en eonpa.

47 Unkan Mary Magdalene qa Mary Joses *hunku* kin hena tukten hnakapi kin he wanyakapi.

## WICOWOYAKE 16.

1 Unkan anpetu wakan kin wanna owihanke, hehan Mary Magdalene, qa Mary Jakob *hunku*, qa Salome hena tancan kin sdayapi kta on pejihuta waštemna aupi:

2 Unkan anpetu tokaheya hanhanna hinca, wicahapi ohdoka kin en hipi, wanna wi hinanpa behantu.

3 Unkan hekiciyapi; Tuwe wicahapi ohdoka i kin etanhan inyan kin yutokan iyeunkiciciyapi kta he.

4 Unkan ekta etonwanpi, hehan inyun, inyan kin wanna yutokan iyeyapi; he tanka hinca.

5 Unkan wicahapi ohdoka kin mahen ipi, hehan koška wan etapa eciyatanhan iyotanka, woyakoyake ska hanska koyaka, he wanyakapi; unkan yušinyayapi.

6 Tuka iye hewicakiya; İhnuhan niyušinyayapi kinhan; Jesus Nazareth etanhan, icipaweli okatanpi qon he oyadepi; wanna ihduekicetu; den wanke šni; tukten hnakapi qon he wanyaka po.

7 Tuka niš hda po, qa waonspeciwicakiye cin, qa Inyan nakun, nitokam Galile ekta ye kta, heciya wanyahdakapi kta, eniciyapi qon iyececa, he owicakiyaka po.

8 Unkan hecen koyahanna hdicupi, qa wicahapi ohdoka kin etanhan najica kihdapi; nina cancanpi qa yušinyayapi; qa tuwedan takudan eciyapi šni, inihanpi nakaes.

9 Unkan anpetu wakan anpetu tokaheya hanhanna hinca, *Jesus* ihduekicetu hehan, Mary Magdalene, etanhan taku wakan šica šakowin ehpekiciye ciqon, he tokaheya en taniničiya.

10 *Hehan* iye hde ca, tona om un qon iyokišicapi qa ceya yukanpi kin owicakiyaka.

11 Unkan hena, wanna kini, qa he wanyaka keya ohdoka nahonpi ešta, wicadapi šni.

12 Hehan iyohakam etanhan wicašta nom makoce ekta ici-

mani yapi, hehan icunhan en taniničiya.

13 Hena unmapi kin hoši wicakakipi, tuka nakun wicadapi šni.

14 He iyohakam akewanjipi wota iyotankapi icunhan en taniničiya, qa wacetunhdapi qa cante sutapi on iyopewicaya; kini iyohakam tona wanyakapi kin heepi kaeš wicawicadapi šni heon.

15 Unkan hewicakiya; Maka kin owancaya ya po, qa wicašta otoiyohe wotanin wašte kin owicakiyaka po.

16 Tuwe wicada qa baptem qupi kinhan he ni kta; qa tuwe wicada šni kinhan he yacopi kta.

17 Qa tona wicadapi kin hena wowapetokeca dena yuhapi kta; Micaje kin on taku wakan šica tankan ehpeyapi kta; wicaceji tokeca on iapi kta;

18 Sintehda yuwankan icupi kta; qa pejihuta šica yatkanpi ešta etanhan itokecapi kte šni; wayazankapi kin nape awicahnakapi kta, kinhan asnipi kta ece.

19 Hecen Itancan kin owicakiya, hehan mahpiya ekta eyakupi, qa Wakantanka etapa eciyatanhan kiyotanka.

20 Unkan hena iyayapi, qa owancaya woyakapi; qa Itancan kin wicohan tanka econwicakiye cin on wicoie kin yuecetu ece. Amen.

# LUKAS

## WOTANIN WAŠTE TAWA.

### WICOWOYAKE 1.

1 Taku tona ceṭunhdašniyan wicaundapi kin hena wicota hdaheya oyag utapi;

2 Tona otokahe ehanfanhan išta on wanyakapi qa wicoie oyakapi ece kin hena token un-kokiyakapi qon he iyececa:

3 Heon etanhan miš eya, taku kin hena owasin otokahe hinca ehantanhan tanyan owakalinige cin on, Taku Wakan waštedaka iyotan wašte, hena hdaheya wo-wapi cicage kta iyomakipi.

4 Hecen taku onspeniciyapi qon hena wicakapi e tanyan sdonyaye kta.

5 Herod Juda wicaštayatapi taanpetu kin en wawayušna wan Zacariyas eciyapi, Abia optaye kin hetanhan; qa tawicu kin iš Aaron cunwintkupi kin etanhan; unkan he Elisabeth eciyapi.

6 Hena sakim Wakantanka itokam owotanpidan, qa Itancan tawoahope qa wicoope tawa kin owasin omanipi, iyaonpepica šni unpi.

7 Unkan Elisabeth hokšin yuhe šni un, qa hecen cinca nicapi; unkan sakim wanna kanpi.

8 Unkan iye optaye kin ohna wošna wicoħan kin Wakantanka itokam econ eca,

9 Tipi wakan Itancan tawa kin timahen iyaya eca, waazintonpi econ šipi ece, wošna wicoħan econpi kin eciyatanhan.

10 Unkan waazintonpi icunhan,

oyate kin owasin itankan cekiya hiyeya.

11 Unkan Itancan taohnihde wan en taniniĉiya, qa wahna azintonpi kin etapa tanhan hinajin.

12 Unkan Zacariyas he wanyake ĉehan, wacin iyokišice ĉa wakokipe hinca.

13 Tuka ohnihde wakan kin heciya; Wakokipe šni wo, Zacariyas; wocekiye nitawa kin nahonpi; qa nitawin Elisabeth hokšidan wan niciyuhe kta, unkan he Johannes eya cašyakiton kta.

14 Qa he on wowiyuškin wopida ko duhe kta, qa tonpi kin on wicota iyuškinpi kta.

15 Qa iye Itancan kin itokam tanka kta; qa miniša miniwakan ko takudan yatke kte šni; qa hunku ikpi kin etanhan Woniya Wakan kin on ojudan kta.

16 Unkan iye Israel cinca kin wicota Itancan Wakantanka tawapi kin ekta wicayahomni kta.

17 Qa Elias toksape qa towašake kin yuha itokam ye kta, qa atewicayapi cincawicayapi kin kici cante wicayuokonwanjidan, qa wanahonpi šni kin hena owotanna unpi wicoksape kin ekta wicayuhomni kta; qa oyate wan Itancan on ihduštanpi kin wiye-ya kicihnake kta e heon etanhan.

18 Unkan Zacariyas ohnihde wakan kin heciya; Wanna wimacahinca, qa mitawin wanna kan; hecen taku on de sdonwaye kta he.



## WICOWOYAKE I.

19 Unkan ohnihde wakan kin waayupte ɕa heciya; Gabriel, Wakantanka itokam najin kin he miye; qa ociciye ɕa, wotanin wašte kin de sdonyeciciye kta e u mašipi.

20 Unkan iho, mioie kin tohan iyehantu kinhan yučetupi kte cin he wicayada šni kin he on, tohayan yučetupi šni kin hehanyan, ie šni, qa ia okitpani yaun kta ce.

21 Unkan oyate kin Zacariyas ape hiyeye, ɕa tehan tipi wakan kin ohna yanke cin on etanhan inihanpi.

22 Unkan tankan hdicu qehan, owicakiye kte cin okitpani: unkan namwicakicawin, qa ie šni un; on etanhan tipi wakan kin ohna taku wakan wanji wanyaka e iyukanpi.

23 Unkan wicošan econ ece kin anpetu kin wanna ihunnikiya, hehan iye ti kin ekta kihda.

24 Unkan anpetu kin hena iyohakam tawicu Elisabeth hokšin itpihnaka; unkan wi zaptan hehanyan inahbe, ɕa heya;

25 Anpetu kin en, Itancan kin wicašta kin taku i en mahdepi qon he emiciyaku kta on ahimatonwe ɕehan, decen ecamicon ce.

26 Unkan wi isakpe kin en, Gabriel ohnihde wakan kin Wakantanka etanhan u šipi; Galile ekta, otonwe wan Nazareth eciyapi kin hetu;

27 Wikoška wan wicašta wan Joseph eciyapi, Dawid wicowazi tawa kin etanhan, yuze kte cin he ekta; unkan wikoška kin Mary eciyapi.

28 Unkan ohnihde wakan kin he en hi qa heciya; Wiyuškin wo, wašteya yaun kin; Itancan kin niciun, winohinca owicapeya niye niyawaštepi ce.

29 Unkan he wanyake ɕehan, oie kin on inihan, qa okiyapi kin de taku kta hecinhan he awacin un.

30 Unkan ohnihde wakan kin heciya; Mary, wikope šni wo; Wakantanka ekta wowašte iye-yaya.

31 Qa iho, hokšin itpiyahnake ɕa hokšidan wan yaton kta, qa JESUS eya ɕašyakiton kta.

32 Iye tanka kta, qa Iyotan Wankantu kin Cinhintku kin eciyapi kta; qa atkuku Dawid tohe kin Wakantanka Itancan kin hduhekiye kta.

33 Qa Jakob ti kin he ohninyan idake kta; qa wokiconze tawa kin okiciwihanke kte šni ce, eya.

34 Hehan Mary ohnihde wakan kin heciya; Wicašta sdonye šni waun kin heon, de token on iyecetu kta he.

35 Unkan ohnihde wakan kin waayupte ɕa heciya; Woniya Wakan kin en niu kta, qa Iyotan Wankantu towašake kin aohanziniye kta, qa hecen taku wakan wan yaton kte cin he Wakantanka Cinhintku kin eciyapi kta.

36 Unkan inyun, Elisabeth icepansiyaye cin, he wakanka tuka is eya wanna hokšin itpihnaka ce, qa hokšin yuhe sni eciyapi qon, he wanna wi kin de isakpe.

37 Wakantanka ekta taku okihipica šni wanica ce.

38 Unkan Mary heya; Itancan ookiyemaye cin wanmayaka we; mioie kin iyecen ecamiconpinunwe. Hehan ohnihde kin elipeya kihda.

39 Unkan anpetu kin hena en Mary inajin, qa koyahanna hoški makoce kin, Juda otonwe wan ekta iyaya:

40 Qa Zacariyas ti kin en tin iyaye, ça Elisabeth okiya.

41 Unkan Elisabeth Mary ia nahon qehan, itpi mahen hoksiyoqopa kin shehanhan; hehan Elisabeth Woniya Wakan kin ojudan :

42 Qa hotankakiya hotanin, qa heya; Winolinca opeya niye niyawaštepi, qa niitpi kin etanhan icage kte cin he yawaštepi ce.

43 Qa Itancan mitawa hunku kin ekta mahi kte cin de token kapi he.

44 Inyun, iyae cin noge iyohpemaye cehan, hecehnana miipti mahen hoksiyoqopa kin wowiyskin on shehanhan.

45 Unkan tuwe wicada qon he yawaštepi: Itancan kin taku eciye cigon hena ecen yustanpi kta ce, eya.

46 Unkan Mary heya; Minagi kin Itancan kin yatan;

47 Qa mitaniya kin he Wakan-tanka Wanikiya mitawa kin on iyuskin ece.

48 Taakiye kuya un kin ekta ahimatonwan on etanhan inyun, detanhan wicoicage kin owasin yawaštepi emakiyapi kta ce.

49 Tuwe wašake cin he taku hinca ecamicon; unkan caje kin wakan ce.

50 Tona kokipapi kin hena wicoicage qa wicoicage kin onsiwicakida ece.

51 Iye isto kin on wowašake hdutanin; witantanpi kin hena taku cante mahen wacinyuzapi kin en wicayuomdeca.

52 Wašaksakapi kin oyanke etanhan kun hdicuwicaye ça, kuya unpi qon hena wankan wapa awicaya.

53 Wotektehdapi kin hena taku waštešte on imnahanwicaye,

ça wijicapi kin is cokakadan tokan yewicaši.

54 Iye towaonsida kiksuye cin on taokiye cin Israel he iciya ece.

55 Hunkakewicunyanpi owicakiye cigon iyececa, Abraham iye cinca kin om, owihanke wanica.

56 Unkan wi yamni ecetu hehanyan Mary Elisabeth kici un, qa hehan iye ti ekta kihda.

57 Elisabeth cinca ton kte cin wanna iyehantu; unkan hoksidan wan ton.

58 Unkan ikiyeddan unpi kin hena, icapanwicaye cin koya, Itancan kin nina onsikida nahonpi; hecen kici iyuskinpi.

59 Unkan anpetu isahdogan qehan, hoksiyoqopa kin baldayapi kta on hipi; unkan atkuku Zacariyas caje kin he icajeki-yapi.

60 Unkan hunku kin waayupte ça heya, Hiya; tuka Johannes eciyapi kta.

61 Unkan heciyapi; Takuwicayaye cin tuwedan hecen eciyapi šni ce.

62 Unkan atkuku kin is token eya cajeyate kta hecinhan, he iyuteya iwangapi.

63 Unkan is wowapi akan kagapi wan da, qa; Johannes he caje kin ee ce, eya owa. Unkan owasin inihanpi.

64 Unkan hecehnana i kin yukawapi, qa ceji kin kiyuskapi; unkan ie, ça Wakantanka yatan.

65 Unkan oksan tipi kin owasin wikopapi: unkan iapi kin dena owasin Juda hoški kin owancaya yaotaninpi.

66 Unkan tona nahonpi kin owasin cante mahen awacin unpi, qa heyapi; De taku hoksiyoqopa kta he. Unkan Wakan-tanka nape kin he kici un.

## WICOWOYAKE 2.

67 Hehan atkuku Zacariyas Woniya Wakan ojudan, qa wockan qa heya ;

68 Itancan Wakantanka Israel tawa kin he taoyate kin wanna wicahiyohi, qa opewicakiton, on etanhan yawaštepi nunwe :

69 Taokiye Dawid ti kin en wanikiyapi he wan yuwankan eunkicihdepi ce :

70 Maka kin tokaheya icage cin ehantanhan, wicašta wokcan wakan tawa ipi kin eciyatanhan, oie kiton kin hena iyecetu :

71 Hecen tokaunyanpi qa unkiyušepi kin hena napepi kin etanhan niunkiyapi kta ;

72 Wowaonšida hunkakewicunyanpi cajewicakiyate ciqon, he eceɓ econ kta, qa wokiyapi wakan tawa kin he kiksuye kte ;

73 Abraham ateunyanpi kin he taku wakanyan eciye ciqon he hee kta ce ;

74 Decen ionšunkidapi kta, tona tokaunyanpi nape kin etanhan unkiyušpapi kinhan, woko-kipe codan ohoundapi kta,

75 Iye itokam, wicoowotanna qa wicoecetu kin en, tohanyan unnipi kin hehanyan.

76 Qa niye, hokšiyogopa, Wicašta wokcan Iyotan Wankantu tawa kin eniciyapi kta ; Itancan tacanku kin wiyeya yecage kta on ite kin itokam de kta ;

77 Taoyate woahitani wicakicicajujupi kin eciyatanhan wanikiyapi sdonyapi kte cin he wicayaqu kta ;

78 Wakantanka unkitawapi canteunkiyapi kin heon etanhan ; qa heon wankan tanhan anpao kin hiyounhipi ce ;

79 Hecen otpaza qa wiconte ohanzi kin ehna iyotankapi kin hena iyoyamwicaye kta ; qa unsihapi kin woikiye canku kin ohna unkiyapi kta ce, eya.

80 Unkan hokšiyopa kin icage, ɓa tawacin kin wašaka aya ; unkan Israel en taniniçiye kte cin hehanyan, makoskan en-ece un.

## WICOWOYAKE 2.

1 Unkan anpetu kin hena en, Kesar Augustus, maka kin owancaya wicašta owicawapi kta, wakiconza.

2 Kurenios Suria en wicaštayatapi yanke cin he ehan tokaheya owicawapi kin de yušanpi.

3 Unkan owasin toketken tonwanyanpi qon owicawapi kta e ektakta kipi.

4 Unkan Joseph, Dawid ti qa wicowazi tawa kin hetanhan, heon is eya, Galile en Nazareth otonwe kin etanhan ye ɓa, Bethlehem Dawid totonwe kin ektaki ;

5 Mary tawicuye kte cin he kici owapi kta ; he wanna cinca ton kta ikiyedana.

6 Unkan hen yukanpi kin icunhan, anpetu en cinca ton kte cin wanna iyehantu.

7 Hecen cinhintku tokapa kin ton, qa šina on hduskite ɓa, wahunyanpi en wotapi wan en ohnaka ; timahen owicakan šni heon etanhan.

8 Unkan makoce kin he en tahincaska awanwicayakapi kin heca hanyen optaye tawapi kin awanwicahdakapi.

9 Unkan iho, Itancan taohnihde wan en wicahi, qa Itancan tawookitanin kin ohomni iyojanjanwicaya ; unkan nina wikipapi.

10 Unkan ohnihde wakan kin hewicakiya ; Wikopapi šni po ; iho, wopida tanka wootanin wašte oyate kin owancaya ecen ye kte cin, he eca hoši cicahipi ce.

11 Anpe dehan Dawid totonwe



kin en Wanikiya wan nicitonpi, Messiya Itancan kin he hee.

12 Qa on sdonayayapi kte cin he dee; Hoksiyoqopa kin sina on yuskiskitapi qa wanunyanpi en wotapi wan ohna wanka iye-yayapi kta ce.

13 Unkan ihnuhanna malhipiya ekta unpi kin wicota ohnihde wakan kin kici hiyeya, Wakan-tanka yatanpi qa heyapi;

14 Iyotan wankantu ekta Wakantanka wowitan yuha nunwe, maka akan wookiye qa wicašta ekta wicokiciyuwašte.

15 Unkan malhipiya ohnihde kin hena ehpeya wicakiyahdapi qehan, wicašta tahincaska awanwicayakapi kin hekiciyapi; Wanna Bethlehem ekta unyanpi, qa taku hiyohi Itancan unko-kiyakapi kin de wanunyakapi kta ce.

16 Hecen koyahanna upi, qa Mary Joseph kici, qa hoksiyoqopa kin wanunyanpi en wotapi wan ohna wanka iyeyapi.

17 Unkan wanyakapi qehan, hoksiyoqopa kin on iapi nahonpi qon, he owancaya yaotaninpi.

18 Unkan tahincaska awanwicayakapi taku yaotaninpi kin he tona nahonpi kin owasin yušin-yayapi.

19 Tuka Mary wicoie kin dena owasin cante mahen okihnake ça awakicin un.

20 Unkan tahincaska awanwicayakapi kin hena kihdapi, qa taku nahonpi qa wanyakapi kin on Wakantanka yaonihanpi qa yatanpi; taku owicakiyakapi qon he iyececa.

21 Unkan wanna anpetu isa-hdogan, hoksiyoqopa bahidayapi kta hehan JESUS eciyapi; nahahin itpihnakapi sini he ehan malhipiya ohnihde kin hecen caš-ton.

22 Unkan Moses woope kage cin iyecen, anpetu en ihdukašote kte sini hena wanna henakeca, hehan Itancan kin qupi kta e Jerusalem ekta hdoupi.

23 Itancan woope tawa kin en owapi qon iyececa; Tona toka-papi, wica eca, otoiyohe Itancan kin ekta wakan eciyapi kta ce.

24 Qa nakun wawayušnapi kta, token Itancan toope kin en eyapi qon he iyececa; Wakiyedatawanjidan, qa is wakiyedancinca nonpa ce.

25 Unkan iho, Jerusalem en wicašta wan Simon eciyapi; he wicašta owotanna qa cekiya ece kin heca, qa Israel Wokicanpte kin ape un; unkan Woniya Wakan kin kici un.

26 Unkan he te sini itokam Itancan Messiya tawa kin he wanyake kta, Woniya Wakan kin okiyaka.

27 He Woniya kin on tipi wakan kin en tin hiyu; unkan hun-kakewicaye cin hoksiyoqopa Jesus, wicoope kin eciyatanhan ecakiconpi kta e en hdoupi;

28 Hehan adoksohan yuze, ça Wakantanka yawašte, qa heya;

29 Mayuha, nitaokiye kin wannawookiye yuha iyayeyaye kta;

30 Wowanikiye nitawa kin he miišta kin on wanmdaka ce;

31 Oyate kin owasin wicitokam wiyeya yehnake cin he;

32 Ojanjan wan oyate kin aobjanjanwicaye kte cin, qa nitao-yate Israel wookitanin kin, he hee ce, eya.

33 Unkan taku eciyapi kin hena on hunku qa Joseph yušinyayapi.

34 Unkan Simon wicayawašte, qa hunku Mary heciya; Inyun, Israel en wicota hicahanpi, qa ake inajinpi kte cin on hoksiyopa kin de ehdepi, qa nakun

### WICOWOYAKE 3.

wowapetokeca ienhdepi kte cin ee kta ;

35 Qa nakun mazasagye wan on nitaniya kin canipapi kte ; qa hecen wicacanteoze ota yuotaninpi kta ce, eya.

36 Unkan waayate wanji Anna eciyapi, Phanuel cunwintku, qa Aser wicowazi kin etanhan ; he wanna wakanka hinca, qa hihnaton kin etanhan waniyetu šakowin hehanyan hihnaku kici un :

37 Qa he wanna wiwazica, waniyetu wikcemna šahdogan sanpa topa ecetu, qa tipi wakan kin en ece un, qa wote šni unpi wocekiye eya ahna on ohoda ece.

38 Unkan he hehantudan hin en u, qa is eya Itancan kin yatan, qa Jerusalem en tona opewicakitonpi kin ape unpi kin hena owasin Jesus cajewicakiyata.

39 Unkan Itancan wicoope tawa kin owasin eceken yuštanpi qehan, Galile en iye otonwe tawapi Nazareth he ekta kihdapi.

40 Unkan hokšiyopa kin icage, ça woniya kin en wašaka aye, ça wicoksape kin on ojudan ; unkan Wakantanka towašte kin he kici un.

41 Woacakšin wotapi eca, hunkakewicaye cin waniyetu towanakeca Jerusalem ekta ipi ece.

42 Unkan Jesus wanna waniyetu akenonpa, hehan wotapi wicohan kin iyececa, Jerusalem ekta ipi.

43 Unkan anpetu kin yuštanpi qehan, hdicupi, tuka hokšiyopa Jesus hekta Jerusalem en yanka ; tuka hunku Joseph kici he sdonyapi šni.

44 Tuka ptaya hdapi kin en opa kecinpi, hecen anpetu wan-

jidan iyooptapi, qa takuwicayapi kici sdonkiciyapi ko wicehna okidepi.

45 Qa iyeyapi šni, hehan Jerusalem ekta ake icicawin akin ipi.

46 Unkan yamni can, hehan tipi wakan kin en waonspekinyapi kin wicacokam waanawicagoptan, qa wiwicawanli yanka iyekiyapi.

47 Unkan wacin ksape cin, qa waayupte cin tona nahonpi qon owasin inihanpi.

48 Unkan wanhdakapi qehan yušinyayapi ; qa hunku kin heciya ; Cinš, tokeca decen unko-yakihandapi he ; iho we, niyate kici wacin iyokišinya ocide ce.

49 Unkan hewicakiya ; Tokeca omayadepi he : Atewaye cin wicohan tawa kin he ito owecipe kta kecannipi šni he.

50 Unkan taku ewicakiye cin he okahnigapi šni.

51 Hecen om hde, ça Nazareth ekta ki, qa anawicakigoptan un. Unkan hunku kin wicoie kin dena owasin cante mahen yuha un.

52 Unkan Jesus sanpa ksape ça hanska icaga ; qa Wakantanka wicašta ko ekta waštadakapi.

### WICOWOYAKE 3.

1 Unkan Tiberius Kesar wicaštayatapi un waniyetu iakezaptan, Pontius Pilate Juda en itancan, Herod Galile en itancan, qa iye sunkaku Philip Itureya qa Trakonitos en itancan, qa Lusanius Abilene en itancan ;

2 Qa Annas Kaiaphas kici wošna kaga itancanpi qon he ehan, he-wotahedan ekta, Johannes Zacariyas cinhintku kin Wakantanka oie kin hiyohi.

3 Unkan he Jordan kahda ma-koce kin owancaya en u, qa woahitani kajujupi kta on iyopeiçiyapi baptem wicaqupi kin he oyaka:

4 Wicašta wokcan Isaya oie wowapi kin en owapi qon he iyececa; Wicaho wan tuwe makotahedan ekta heya niyan; Itancan tacanku kin wiyeya kicaga po, ocanku tawa kin kiciyuowotan po:

5 Kaksiza owasin ojuyapi, qa heyaka paha ko owasin kahukun iyeyapi kta, qa pakšíksán kin hena yuowotanpi, qa ocanku tahtage cin hena yumdayapi kta ce;

6 Qa wicacełpi kin owasin Wakantanka wowanikiye kin wanyakapi kta ce.

7 Unkan wicota baptem wicaqu kte cin en ahi kin hena hewicakiya; Wamduška wicoicage kin, tuwe wocanniye u kte cin etanhan nape niłipi be.

8 Hecen iyopeiçiyapi iyececa waskuyeca icalıya po, qa, Abraham ateunyanpi ce, cante mahen ecinpi šni po; miye heciçiyapi; Wakantanka inyan kin dena etanhan Abraham cinca kicage kta okihi.

9 Unkan is eya onspe kin wana can hute kin en ehnapapi; heon etanhan can kin tona waskuyeca wašte aicage šni kin hena owasin kawankapi qa petan eliçeyapi ece.

10 Unkan oyate kin, Hehan unkiye token econkupi kta he, eya iwangapi.

11 Waayupte ça hewicakiya; Tuwe onlıdołda nonpa yuhe cinhan, he tuwe nice cin unma qu kta; qa tuwe woyute ton kinhan, is eya ecen econ kta ce.

12 Hehan wamnayanpi kin is nakun baptem wicaqu kta on en

hipi qa heciyapi; Waonspekiye, unkiye token econkupi kta he.

13 Unkan hewicakiya; Wakiçonçzapi kin isanpa kicapi šni po, eya.

14 Unkan akicita kin is eya wiwangapi qa heciyapi; Qa unkiš token econkupi kta he. Unkan hewicakiya; Wicašta kin tuwedan wakokipe kicagapi šni, qa tuwedan oitonšniyan taku iyaonpapi šni po; qa wokajuju niçupi kin he on cante wašte po.

15 Unkan oyate kin owasin wakta hiyeya, qa wicašta owasin Johannes on awacinpi, he Messiya kin hee, qa is hee šni hecinhan;

16 Hehan Johannes waayupte ça owasin hewicakiya; Awicakehan mini on baptem ciçupi; tuka wanji mikapeya wašaka u, he iye tahanpe hankpan kin weciyuške kta iyemacece šni; he qe Woniya Wakan peta ko on baptem niçupi kta.

17 He iye wicaduge nape ohna hduhe, ça owanka tawa kin tanyan hduska kta; qa aguyapi su kin he tpahi, qa canwohnaka kin en okihnake kta; tuka ha kin e peta kasnipica šni wan on hulnahye kta ce, eya.

18 Unkan wahokonwicakiyecin en taku toktokeca nakun ota oyate kin owicakiyaka.

19 Unkan Herod wicašta itancan kin, iye sunkaku tawicu Herodias hee on, qa taku šica Herod econ kin owasin on iyopeya;

20 Hecen taku owasin sanpa akicage ça, wicakaška tipi kin en Johannes kaška hnaka.

21 Unkan oyate kin owasin baptem wicaqupi, qa Jesus is eya baptem qupi, qa cekiya u qehan, mahpiya kin yuzamnipi;

22 Qa Woniya Wakan kin wakiyedán kałiya tantonyan kun u,



## WICOWOYAKE 4.

qa en iyahan; unkan mahpiya eciyatanhan wicaho wan hiyu, qa heya; Micinksi waštewakidake cin he niye; niye on iyo-makipi linca.

23 Unkan Jesus iye wanna waniyetu wikcemna yamni kta, Joseph cinhintku kin hee kecinpi, he Heli etanhan,

24 He Matthat etanhan, he Lewi etanhan, he Melki etanhan, he Janna etanhan, he Joseph etanhan,

25 He Mattathias etanhan, he Amos etanhan, he Naum etanhan, he Esli etanhan, he Nagge etanhan,

26 He Maath etanhan, he Mattathias etanhan, he Seme etanhan, he Joseph etanhan, he Juda etanhan,

27 He Joanna etanhan, he Resa etanhan, he Zorobabel etanhan, he Salathiel etanhan, he Neri etanhan,

28 He Melki etanhan, he Addi etanhan, he Kosam etanhan, he Elmodam etanhan, he Er etanhan,

29 He Jose etanhan, he Eliezer etanhan, he Jorim etanhan, he Matthat etanhan, he Lewi etanhan,

30 He Simeon etanhan, he Juda etanhan, he Joseph etanhan, he Jonan etanhan, he Eliakim etanhan,

31 He Melea etanhan, he Menan etanhan, he Mattatha etanhan, he Nathan etanhan, he Dawid etanhan,

32 He Jesse etanhan, he Obed etanhan, he Booz etanhan, he Salmon etanhan, he Naasson etanhan,

33 He Aminadab etanhan, he Aram etanhan, he Esrom etanhan, he Phares etanhan, he Juda etanhan,

34 He Jakob etanhan, he Isaak etanhan, he Abraham etanhan, he Thara etanhan, he Nacor etanhan,

35 He Seruk etanhan, he Ragu etanhan, he Phalek etanhan, he Eber etanhan, he Sala etanhan,

36 He Kenan etanhan, he Arphaksad etanhan, he Sem etanhan, he Nowa etanhan, he Lamek etanhan,

37 He Mathusala etanhan, he Enok etanhan, he Jared etanhan, he Maleleel etanhan, he Kanan etanhan,

38 He Enos etanhan, he Seth etanhan, he Adam etanhan, he Wakantanka etanhan.

## WICOWOYAKE 4.

1 Unkan Jesus Woniya Wakan kin ojudan, Jordan eciyatanhan hdi; qa Woniya kin makotahe-dan ekta iyayeya;

2 Anpetu wikcemna topa hehanyan Wakansica wawiyutanyan. Unkan anpetu kin hena en takudan yute sni; tuka hena ihunniyan hehan wotektehda.

3 Hehan Wakansica heciya; Wakantanka Cinhintku kin he niye hecinhan, inyan kin de aguyapi icage kta, keya wo.

4 Unkan Jesus waayupte ca heciya; Aguyapi ecedan on wicani kte sni; tuka Wakantanka oie kin owasin on *wicani* kta ce, eya owapi ce.

5 Hehan Wakansica paha wan tehanwankantu ektâ aye ca, wancake maka wokiconze kin owasin kipazo.

6 Unkan Wakansica heciya; Wicowašake kin de wicookitanin ko owasin ciçu kta; hena owasin yuhemakiyapi, qa tuwe wacin kinhan waqu kta.

7 Heon etanhan nis mitokam

makata ehpeničiye cinhan, owasin nitawa kta ce.

8 Unkan Jesus waayupte a heciya ; Satan, mitapetepa tanhan ya wo : Itancan Wakantanka nitawa kin, he iye itokam makata ehpeničiye kta, a iye isnana ahoyape kta ce, eya owapi ce.

9 Hehan Jerusalem ekta ahi, a tipi wakan inkpa kin akan ehde, a heciya ; Wakantanka Cinhintku kin he niye hecinhan, hetanhan kun ehpeiciya wo.

10 Kaken wowapi en kagapi qon ; Ohnihdewicaye cin hena niye on econ wicaši, niyuhapi kta ;

11 a napepi kin ohna yuwankan niyuzapi kta ; a hecen tukten inyan kin en siha ibonito kte šni, eya owapi ce, eya.

12 Unkan Jesus waayupte a heciya ; Itancan Wakantanka nitawa kin he iyutanyaye kte šni ce, eya owapi qon.

13 Unkan Wakanšica wowiyutanye kin owasin yušan qehan, tona can ehpeya kihda.

14 Hehan Jesus Woniya towašake kin yuha Galile en hdi ; unkan ihdukšan makoce wanke cin owancaya he oyakapi.

15 Unkan omniciye tipi tawapi kin ohnahna waonspekiya ece, hecen owasin yuonihanpi.

16 Unkan Nazareth en icaliyapi qon he ekta hdi ; a econ ece kin he iyecen, anpetu wakan icunhan, omniciye tipi kin en tin iyaye a, wowapi yawa kta inajin.

17 Unkan Isaya wicašta wokecan tawowapi kin qupi. Unkan wowapi kin yumdaye ehan, decen owapi kin iyeya ;

18 Itancan Woniya tawa kin he akan maun ; heon wahpanicapi kin wotanin wašte kin owi-

cawakiyake kta e sdamakiya ; tona cante psakawahanpi kin asniwicawaye kta on u maši ; wayaka unpi kin wicakiyuškapi kta, a ištagogapi kin ake tonwanpi kte cin omdake kta ; tona kahdehdecapi kin hena wicawakiyuške kta ;

19 a Itancan omaka oiyokipi tawa kin omdake kta ce.

20 Unkan wowapi kin ecen eyaku, a ookiye kin he kicu, a iyotanka. Unkan omniciye tipi kin ohna hiyeye cin owasin opahitapi.

21 Unkan hehan hewicakiya ; Anpetu kin de ninogepi kin en wowapi kin de yuecetupi ce.

22 Unkan owasin yaotaninpi, a wowaonšida oie iye i kin etanhan inanpe cin on yušinyayapi ; a heyapi ; Joseph cinhintku kin he dee šni he.

23 Unkan hewicakiya ; Awicakehan iapi kin de ecen emayakiyapi kta ; Niye pejihuta wicašta kin, asniičiya wo : Kapernaum ekta token ecanon naunhonpi kin, makoce nitawa kin den nakun ecen econ wo.

24 Unkan heya ; Awicakehan heciciyapi ; Wicašta wokcan tuwedan iye tamakoce kin en iyo-winkiyapi šni ece.

25 Tuka awicakehan heciciyapi ; Elias taanpetu kin en, waniyetu yamni sanpa wi šakpe hehayan mahpiya kin natakapi ; a makoce kin owancaya wicakihan hince ciqon he ehan, Israel en wiwazica ota.

26 Tuka hena wanjidan Elias ekta ye šipi šni ; Sidon en Sarepta otonwe kin en, winohinca wiwazica wan heceedan ekta ye šipi.

27 Nakun Elisha wicašta wokecan ni un qehan, lepros eecca wicota Israel en unpi, tuka hena

wanjidan yuskapi śni, Naeman Suriya wicašta kin hecedan ce.

28 Unkan omniciye tipi ohna hiyeye ciqon hena nahonpi qehan, owasin śihdapi hinca ;

29 Qa najin hiyayapi qa otonwe kin itankan iyayeyapi, qa paha akan otonwe hdepi kin he matete ekta ayapi, qa kun elpeyapi kta.

30 Tuka iye wicacokaya tanhan iyoopta iyaye ça kihda.

31 Qa Galile en Kapernaum otonwe kin he ekta hi, qa anpetu wakan eca waonspewicakiya ece.

32 Unkan waonspewicakiye cin on inihanpi ; oie kin he wowaśake kicica nakaes.

33 Unkan omniciye tipi kin ohna wicašta wan wakan śica śapa woniya kin yuha ; qa he hotankakiya hoyeya ;

34 Qa heya ; Hanta wo, Jesus Nazareth, niye qa unkiye taku unkicicapi he ; ihangunya-yapi kta yahi he ; Wakantanka Taku Wakan Wanji tawa kin he niye e sdonciya ce.

35 Unkan Jesus kiśice ça heciya ; Inina un, qa wicašta kin etanhan tankan hinapa wo, eya. Unkan wakanśice cin wicašta qon wicacokam elpeye qehan, etanhan tankan hinapa ; tuka ksuweye śni.

36 Unkan owasin inihanpi, qa iyakitedan hekiciyapi ; De taku oie kin ; wicookihi wicowaśake ko on woniya śape cin econ wicaśi eca, tankan hinanpapi ece.

37 Unkan ihdukśan makoce wanke cin owancaya he oyakapi .

38 Unkan omniciye tipi kin etanhan hdicu, qa Simon ti kin en tin iyaya. Unkan Simon kunku kin he tancan wicakata ececa hinca ; hecen on cekiyapi.

39 Unkan en inajin, qa tancan kata kin he kiśica ; unkan asni hinhda : qa hecehnana najin hiyaye ça, owicakiya.

40 Unkan wi iyaya hehan, woyazan ocaje ota on wicayazan tona wicayuhapi kin hena en awicahipi ; unkan otioyohi nape awicahnake ça asniwicaya.

41 Qa wakan śica is eya ota wicota etanhan hinanpapi, qa heya niyanpi ; Wakantanka Cinhintku Messiya kin he niye ce. Unkan iye wicakiśice ça, Messiya hee sdonyapi kin he, eyapi kta iyowicaki śni.

42 Unkan wanna anpao hinape qehan tokan iyaye, ça makotahe-dan ekta ya ; unkan oyate kin odepi, qa *yanke cin* ekta ahi, qa elpeya iwicayaye kte cin iyapaptapi.

43 Unkan hewicakiya ; Wakantanka tokiconze kin otonwe toktokeca nakun ohna omdake kta ; heon etanhan u maśipi ce.

44 Hecen Galile omniciye tipi kin hena ohnahna woyaka ece.

## WICOWOYAKE 5.

1 Unkan oyate kin Wakantanka oie kin nahonpi kta e aohdu-teyapi qehan, Geneseret mde kin icahda inajin.

2 Qa mde kin en wata nonpa wanka wanyaka ; tuka hokuwapi kin is wanna tokan iyayapi, qa ho kin hdujajapi.

3 Unkan wata unma Simon tawa kin he en ope ça, kitanna canan wapa iyayeye kta cin. Hehan en iyotanke ça, wata kin etanhan oyate kin waonspewicakiya.

4 Unkan wanna ayaştan qehan Simon heciya ; Mini śbe kin ekta iyaye ça ho kin minin iyolpeya wo.



5 Unkan Simon waayupte, ça heciya; Waonspekiye cin, han-yetu osan hitaunnipi, qa takudan unktepi šni; tuka nioie kin on ho kin iyohpewaye kta ce.

6 Unkan heconpi qehan, hogan utkanna yuzapi; unkan ho kin papsakapi.

7 Unkan tawašitkupi wata unma en opapi qon hena nam-wicakicawinpi, en upi qa owicakiyapi kta. Unkan en hipi qa wata napin ojukiyapi, hecen iyujimnana hiyeya.

8 Unkan Šimon Inyan he wan-yake çehan, Jesus hupahu kin en makata ełpeiciye ça heya; Itancan, ełpeya imayaya wo, wicašta walitani sa hemaca ce.

9 He iye qa tona om un qon hena hogan yuzapi kin on etanhan owasin inihanpi.

10 Unkan Jakob qa Johannes Zebede cinhintku kin hena oza, Simon tawašitkuwicaya, is eya inihanpi. Unkan Jesus Šimon heciya; Wikope šni wo, detanhan wicašta kin wicaduze kta ce.

11 Unkan wata qon hutata ahdihunipi qehan, owasin ełpekiyapi, qa iyahna yapi.

12 Unkan otonwe wan en un qehan, iho, wicašta wan lepros ececa linca, he Jesus wanyake çehan, ite makipuskin ełpeiciye ça, cekiyeye ça heya; Itancan, ya-cin kinhan mayaduska kta oyakih.

13 Unkan nape yekiyeye, ça yutan, qa heya; Wacin ce: ska un wo, eya. Unkan wancake lepros ececa qon asni hinhd.

14 Unkan tuwedan okiyake šni ši; tuka wawayušna kin ekta ye ça wanyagiçiyeye kta, qa wayuskapi kta on token Moses econ wicaši qon he ecen econ kta, keya; hecen wowicakiyake kta.

15 Tuka heon iyotan tankaya wicołhan kin he oyakapi; hecen wicota en mniciyapi, nahonpi kta, qa wayazankapi wicayuhapi kin asniwicayeye kte cin heon.

16 Hehan icunonpa makotahe-dan wan ekta ye ça wocekiyeye.

17 Unkan anpetu wan waonspewicakiya icunhan, Pharisee qa wicoope onspekiye cin hena, Galile otonwe kin owasin, qa Juda qa Jerusalem etanhan, en ahi kin hena en iyotankapi; unkan Itancan towašake kin asniwicayeye kta e en un.

18 Unkan iho, wicašta wan řařake cin he owinja ohna wicašta yuha upi: qa timahen ayapi qa itokam ehnakapi kta akitapi.

19 Tuka wicota kin on token en aipi kte šni wanyakapi qehan, tipi akan inajinpi, qa akalipe yuřidokapi eciyatadhan cokaya Jesus itokam kun hiyuyapi.

20 Unkan wacinyanpi kin he wanyake çehan, heciya; Wicašta, wayalitani kin nicicajujupi ce.

21 Unkan wowapi kagapi qa Pharisee kin is waakinicapi qa heyapi; De tuwe e taku řica decen eya he. Tuwe woalitani kajuju kta okihi he; Wakantan-ka ecedan okihi.

22 Tuka tawacinpi kin Jesus iwicayukan, hehan waayupte ça hewicakiya; Taku e cante mahen ayakinicapi he:

23 Wayalitani kin nicicajujupi ce; qa is, Najin qa mani wo, eyapi kte cin unma tukte wařakadan he.

24 Tuka Wicašta Cinhintku kin he is maka akan woalitani kajuju kta okihi sdonyayapi kta; hehan řařake cin he heciya; Najin qa nitowinja ehdaku qa

yati kin ekta hda wo, eciciya ce, eya.

25 Unkan wancake wicitokam najin hiyaye, ça akan wanke ciquon he ehdaku, qa iye ti kin ekta hde, ça Wakantanka yatan.

26 Unkan owasin inihanpi, qa Wakantanka yatanpi; qa wikipapi hince, ça heyapi; Wicolian nakaka toktokeca wanunyakapi ce, eyapi.

27 Unkan taku kin dena iyohakan hetanhan ye, ça wamnayanpi kin heca wanji Lewi eciyapi, wamnayanpi oyanke kin en iyotankehan yanka e wanyaka; qa, Miyahna u wo, eciya.

28 Unkan taku owasin elipeye ça, najin hiyaye ça, ihakam iyaya.

29 Unkan Lewi iye ti kin en wohanpi tanka kicaga; unkan wamnayanpi kin is wicota, qa toktokeca nakun en opeya wotapi kta iyotankapi.

30 Tuka wowapi kagapi wicayuhapi qa Pharisee kin hena waonspewicakiye cin wicakigepi, qa heyapi; Tokeca e wamnayanpi qa wahtanipi sa om wayatapi qa wadatkanpi ecê he.

31 Unkan Jesus waayupte ça hewicakiya; Tona zanipi kin hena pejihutawicašta cinpi šni, tuka wayazanpi kin.

32 Owotanpidan kin hena iyopeiciyapi kta e wicakico wahi šni, tuka wahtanipi sa.

33 Unkan heciyapi; Tokeca e Johannes waonspewicakiye cin hena ijehan wote šni unpi qa wocekiye eyapi he, qa Pharisee tawapi kin is eya; tuka nitawa kin wotapi qa wayatkanpi ece.

34 Unkan hewicakiya; Hihnaton ti kin cinca kin hena tawicunton kin he is owicapeya un kin icunhan wote šni wicayakiyapi kta oyakihipi he.

35 Tuka anpetu kin u kta, en tawicu ton kin he ewicakiciyakupi kta; hehan anpetu kin hena en wote šni unpi kta.

36 Unkan wiyacinpi wan owicakiyaka: Wicašta tuwedan šina teca onšpa šina tanike cin en akihdagye šni ece; heconpi kinhan teca qon is yuhdeca ece, qa onšpa teca etanhan kin he tanike cin kicica šni ece.

37 Qa nakun wicašta tuwedan miniša teca ojuha tanike cin en okaštan šni ece; heconpi kinhan miniša kin skepe kta, qa ojuha kin atakuni kte šni.

38 Tuka miniša teca kin he ito ojuha teca en ohnakapi kta; qa sakim yutehanpi ece.

39 Is eya wicašta tuwedan miniša tanika wanna yatke ça, hehan hinnakaha teca cin šni; Tanike cin eeš wašte ce, eya ece.

## WICOWOYAKE 6.

1 Unkan anpetu wakan inonpa tokaheya, hehan wojupi kin ehna iyaya; unkan waonspewicakiye cin is wahuwapa yuksapi, napopabagapi, qa yutapi.

2 Hehan Pharisee kin wanjikji hewicakiyapi; Tokeca e anpetu wakan kin en taku iyowinwicakiyapi šni kin he eca ecen ecanonpi he.

3 Unkan Jesus awicayupte ça heya; Dawid token econ qon hee kaeš tohinni dawapi šni he; iye qa tona om un qon wotektedhapi qehan.

4 Wakantanka tipi tawa kin en tin iyaye, ça aguyapi taninyan ehnakapi, qa wawayušnapi kin iye isnana hetanhan yutapi kte cin iyowinwicakiyapi qon, he icu, qa yute, ça om unpi qon hena is eya hetanhan wicaqu.

5 Unkan hewicakiya; Wicašta

Cinhintku kin is nakun anpetu wakan kin Itancan ce.

6 Unkan anpetu wakan tokeca wan omniciye tipi kin en tin iyaye, ça waonspekiya: unkan wicašta wan nape etapa kin snija e en yanka.

7 Unkan wowapi kagapi qa Pharisee kin hena anpetu wakan icunhan asniye kta hecinhan he iwanyakapi, taku iyaonpapi kta akitapi.

8 Tuka iye tawacinpi kin sdonwicaya, qa wicašta nape snije cin he heciya; Najin qa cokaya inajin wo. Unkan najin hiyaye ça en inajin.

9 Unkan Jesus hewicakiya; Miš ito taku wanji iciwangapi kta; Anpetu wakan icunhan taku wašte, qa is taku sica econpi kta he; wanikiyapi, qa is wačeyapi kta, unma tukte hecetu he, eya.

10 Unkan itanihdukšan owasin awicatonwe çehan, wicašta qon heciya; Nape kin hdukatın wo. Unkan ecen econ; qa nape kin unma kin iyecen iyekicetu.

11 Unkan šihdapi hince, ça iye iyakitedan Jesus token ecakiconpi kta hecinhan he iwohdakapi.

12 Unkan anpetu kin hena en Jesus paha wan ekta wocekiye eya i; qa hanyetu osan Wakan-tanka cekiya un.

13 Unkan wanna anpa qehan, waonspewicakiye cin wicakico, qa etanhan akenonpa wicahdaluige ça, Wahošiyapi, ewicakiya.

14 Simon he Inyan nakun eya cašton, qa he sunkaku kin Andrew, Jakob qa Johannes, Philip qa Bartholomew;

15 Mattheos qa Thomas, Jakob Alpheus cinhintku, qa Simon nakun Zelotes eciyapi;

16 Qa Judas Jakob sunkaku, qa Judas Iskariot, nakun wiyopeye kte cin hee.

17 Hehan hena om kun hdicu, qa makomdaya en hdinajin; unkan waonspewicakiye optaye kin, qa Juda owancaya qa Jerusalem, qa mde kahdaya Turos qa Sidon, henakiya etanhan wicota hınca, hena ia nañonpi, qa tona wayazankapi kin asniwicayapi kta e en ahi:

18 Nakun tona woniya šapa on kakijapi kin hena; unkan asniwicayapi.

19 Unkan wicota kin iyuhpa yutanpi kta akitapi; etanhan wowašake hiyu qa owasin asniwicaya ece kin heon etanhan.

20 Unkan waonspewicakiye cin awicatonwe, ça heya; Niwahpanicipi kin niš niyawaštepi ce; Wakantanka tokiconze kin he niye nitawapi.

21 Dehan wotektayahdapi kin niš niyawaštepi ce; imnahannianpi kta. Dehan yaceyapi kin niš niyawaštepi ce; iyahapi kta.

22 Tohan wicašta šicenidapi, qa yuiyog iyayenianpi, qa iennihdepi, qa Wicašta Cinhintku kin on nicajepi kin taku sica iyecen tankan ehpeyapi kinhan, niyawaštepi ece.

23 Anpetu kin he en wiyuškinpi, qa wopida on škehanhan po; iho, mañpiya ekta wokajuju tanka duhapi; atewicayapi kin is eya iyecen wicašta wokcanpi wicakuwapi qon.

24 Tuka winijicapi kin niš wotehi niciyankapi ece; wicocante wašte kin he wanna yahduhapi.

25 Winipipi kin niš wotehi niciyankapi ece; wotektayahdapi kta. Dehan iyahapi kin niš wotehi niciyankapi ece; wašinya-hdapi qa yaceyapi kta.



26 Tohan wicašta owasin tanyan eniciyapi kinhan, wotehi niciyankapi ece; atewicayapi kin hecen wicašta wokcan iton-śni wicakuwapi qon.

27 Tuka nañon dukanpi kin heciciyapi ce, Tokaniyanpi kin hena cantewicakiya po, qa śice-nidapi kin hena tanyan ecawicakicon po;

28 Niyaścapi kin wicayawašte po, qa wawicansiya nicuwapi kin hena wocekiye ewicakiciya po.

29 Qa tuwe iyoha sani kin en anipe cinhan unma eciyatanhan kipazo wo; qa tuwe śina inicicu kinhan, onħdoħda kin nakun teħinda śni wo.

30 Wicašta otoiyoħi taku nicida kin qu wo; qa tuwe woyuha nici kinhan, ake kica śni wo.

31 Qa wicašta kin token ecaniconpi yacinpi kin, he iyecen ecawicakicon po.

32 Tona waštenidapi kin hena-na waštewicayadapi kinhan, wopida tukte e duhapi kta he: waħtanipi sa kin eepi kaeś tona cantewicakiyapi kin is itkom cantewicakiyapi ece.

33 Qa tona tanyan ecaniconpi kin henana tanyan ecawicayeconpi kinhan, wopida tukte e duhapi kta he; waħtanipi sa kin is iyecen econpi ece.

34 Qa ake niçupi kta kecannipi kin henana owicayaqupi hecinhan, wopida tukte e duhapi kta he; waħtanipi sa kin is waħtanipi sa owicayupi ece, iyacinyan wicakicupi kta heon.

35 Tuka niś tona tokaniyanpi kin cantewicakiya po, taku wašte econpi qa owicaqu po, ake taku niçupi kta kecinpi śni po; kinhan wokajuju tanka duhapi kta, qa Iyotan Wankantu kin he cinca yaunpi kta: he iye

tona pida śni qa śicapi kin cantewicakiya ece.

36 Hecen Niyatepi kin is token waonsida kin niś eya he iyecen waonsida po.

37 Wayacopi śni po, kinhan niyacopi kte śni: owawicakiyepi śni po, kinhan owaniciyepi kte śni: wicakicicajuju po, kinhan nicicajuju kta:

38 Wicaqu po, kinhan niçupi kta; wiyutapi wašte, paotinzapi, paipuskicapi qa apaśboka, hecen wicašta kin maku kin en niçupi kta. Wiyutapi on widutapi kin hee on winiciyutapi ece e kta.

39 Unkan wiyacinpi wan owicakiyaka: Iśtagonge cin iśtagonga napata yus aya okihi he: napin ośkokpa kin en iyohpayapi kte śni he.

40 Waonspekiyapi kin he waonspekiye cin itokapa śni; tuka tuwe yuśtanpi kin otoiyoħi waonspekiye tawa kin iyecece kta.

41 Qa tokeca nisunka iśta kin ohna sukaza yanke cin he wandaka; tuka niye niśta kin ohna cankaga wanke cin he wanyahdake śni he.

42 Qa, Misunka, sukaza iśta ohna niyanke cin he ito ciciyuśdoke kta ce, token nisunka eyakiye kta he, qa icunhan niye niśta kin ohna cankaga wanke cin he wanyahdake śni. Wanyakihbe cin, niś tokaheya cankaga iśta ohna niwanke cin he ito tokan ehpeya wo; qa hehan hinakaha nisunka iśta kin ohna sukaza yanke cin he yeciyuśdoke kta mdesya wandake kta ce.

43 Can wanji wašte kin waskuyeca śica icahye śni; qa nakun can wanji śice cin he waskuyeca wašte icahye śni.

44 Can kin otoiyoħi waskuyeca tawa kin on sonyapi ece: wicašta kin taspanhu kin etanhan

suken pahipi *śni*, qa *is* eya tokahu kin etanhan hastanhanka pahipi *śni*.

45 Wicašta wašte kin he cante woyuha wašte kin etanhan taku wašte icaħya ece; qa wicašta *šice* cin he cante woyuha *šice* cin etanhan taku *šice* icaħya ece: wicacante taku iyakiçuya ohnaka kin he etanhan i kin eciyatanhan enapeya ece, eya.

46 Unkan tokeca, Itancan, Itancan, emayakiyapi ece, qa taku epe cin ecen ecanonpi *śni* he.

47 Tuwe ekta mahi, qa mioie naħon, qa ecen econ kin he tuwe kicica hecinhan he ito ociciyakapi kta.

48 Wicašta wan tipi kaga; unkan temahentu *maka* qe, ça oahemde kin imnija wan akan ehde: unkan minitan aye çehan, wakpa kin tipi kin he en nina kaduza, tuka kahuhuze kta okitpani, imnija akan ehdepi nakaes, he iyececa.

49 Tuka tuwe naħon tuka ecen econ *śni* kinhan, wicašta wan oahemde codan maka akan tipi kage cin he iyececa; unkan he en wakpa kin nina kaduza, qa hecehnana hinhpaya; qa tipi kin he woatakunišni tanka.

#### WICOWOYAKE 7.

1 Unkan oyate naħon hiyeje cin en iapi kin dena owasin wanna ecen yaštan qehan, Kapernaum en i.

2 Unkan akicita opawinge wicayuhe cin wanji taokiye wan teħinda kin he wayazanke ça wanna te kta.

3 Unkan he wanna Jesus on naħon qehan, Juda hunkayapi kin hena ekta ye wicaši, u kta qa taokiye kin asniye kte cin he icekiya.

4 Unkan hena Jesus ekta hipi qehan, awicakehan cekiyapi, qa, Hecakiconpi kte cin wicašta kin he iyececa ce;

5 Unkoyatepi kin cantewicakiye ça, omniciye tipi wanji wanna unkiçagapi ce, eyapi.

6 Unkan Jesus hena om hda. Unkan wanna tipi kin itehan *śni* qehan, akicita opawinge wicayuhe ciqon he *is* kodawicaye cin hena ekta yewicaši, qa heciya; Itancan kin, nagiyeciye *śni* wo, wati kin en tin yahidu kte cin iyemacece *śni* ce:

7 Heon etanhan miye ekta ciu kta nakun iyececa miçida *śni*: tuka oie kin ecen eya wo, kinhan mitaokiye kin asni kta.

8 Miš eya wicašta wicookihi ihukuya hnakapi kin hemaca, qa mihukuya akicita wicamduha; qa wicašta kin de, Ya wo, ewakiya eca, ya ece; qa wanji tokeca, U wo, *ewakiya* eca, u ece; qa mitaokiye kin, Decon wo, *ewakiya* eca, ecen econ ece, eya.

9 Unkan Jesus hena naħon qehan, on yušinyaye ça, ihduhomi, qa oyate ihakam unpi kin hewicakiya; Israel hee kaeš en wowacinye hinsko tanka kin iyewaye *śni*, eciciyapi ce.

10 Unkan ye wicašipi qon icicawin tiyata kipi qehan, ookiye wayazanke cin he wanna asni iyeyapi.

11 Unkan ianpetu qehan otonwe wan Nain eciyapi kin en i; unkan waonspewicakiye cin etanhan ota qa oyate ota hena kici yapi.

12 Unkan otonwe tiyopa kin he ikiyedana wanna ehan i qehan, inyun, wicašta wan ta tankan aupi; hunku kin wiwazica heca, qa cinhintku hecedan. Unkan otonwe kin etanhan wicota opapi.

13 Unkan he Itancan kin wan-yake cehan, onśida qa heciya; Ceye śni wo.

14 Unkan canakiyuhapi kin en u, qa yutan. Unkan akiyuhapi qon is owanji najinpi. Unkan heya; Koška, bosdan yanka wo, eciciya ce, eya.

15 Unkan te ciqon iyotanke, ça ia. Unkan hunku kin kicu.

16 Unkan owasin nina wikopapi, qa Wakantanka yatanpi qa heyapi; Waayate wanji tanka unkiyopeyapi icaga ce, qa Wakantanka taoyate kin wanna wicahiyohi ce, eyapi.

17 Unkan Juda *makoce* qa okšan makoce wanke cin owancaya he yaotaninpi.

18 Unkan Johannes waonspe-wicakiye cin dena taku kin owasin okiyakapi.

19 Hehan Johannes waonspe-wicakiye cin nom wicakico, qa Jesus ekta ye wicaśi, qa heya; Tuwe u kte ciqon he niye, qa is wanji tokeca unkaepi kta he.

20 Unkan wicaśta kin hena wanna ekta hipi qehan, heyapi; Johannes baptem wicaqu ece qon he niye ekta unkuśipi, qa, Tuwe u kte ciqon he niye he, qa is tuwe tokeca unkaepi kta he, eya ce.

21 Unkan hehantudan hinca wayazankapi, qa makośica ececapi, qa woniya śikśica ececapi, hena wicota asniwicaya; qa istagongapi kin heca ota tonwewicaya.

22 Hehan Jesus waayupte ça hewicakiya; Hda po, qa taku wandakapi qa nayahonpi kin hena Johannes okiyaka po: Ista-gongapi kin hena tonwanpi, qa huśtepi kin is manipi, qa lepros ececapi kin is wicayuskapi, qa nogetpapi kin is wanahonpi, qa tapi kin is kiniwicakiyapi, qa

waħpanicapi kin is wootanin wa-šte kin he owicakiyakapi.

23 Qa tuwe miye on śinhda śni kin he yawaštepi ce.

24 Unkan Johannes wahośiya-pi tawa kin wanna kihdapi, hehan Johannes on oyate kin he-wicakiya; Taku e makotahedan ekta wanyag yaipi he. Cedi hu wan tate kahuhuze cin heca he.

25 Tuka taku e wanyag yaipi he. Wicaśta wan wokoyake panpanna koyake cin heca he. Iho, tona wašteya wakoyakapi, qa tanyan nipi kin hena wicaśtayatapi tipi kin en unpi ece.

26 Tuka taku e wanyag-yaipi he. Wicaśta wokcan he. Han, eciciyapi, qa wanji wicaśta wokcan isanpa tanka.

27 Iho, wahośiya mitawa kin he niite itokam ye waśi, nito-kam canku wiyeya nicicage kta ce, eya owapi qon he dee.

28 Qa miye heciciyapi; Wino-hinca eciyatanhan wicatonpi kin wicaśta wokcan tuwedan Johan-nes baptem wicaqu qon isanpa tanka śni: tuka Wakantanka to-kiconze kin en tuwe iyotan ci-stinna kin he he kapa ce.

29 Unkan oyate kin qa wa-mnayanpi kin tona nahonpi owasin Wakantanka yaowotanpi, Jo-hannes baptem wicaqu kin en opapi.

30 Tuka Pharisee kin, wicoope aiapi kin om, Wakantanka wa-hokonwicakiye cin en iyapa-to-icayapi, Johannes baptem wicaqu śni nakaes.

31 Unkan Itancan kin heya; Wicaśta wicoicage kin de taku e imdacin kta he; qa taku iye-cecapi he.

32 Śiceca iciyopekiciyapi kin en iyotankapi, qa hoyekiciyapi qa heyapi; Unniciyajopi, tuka wayacipi śni; waśinunnicihdapi,



tuka yaceyapi šni ce, eyapi kin he iyececepi ce.

33 Johannes baptem wicaqu qon he aguyapi yute šni, qa miniša yatke šni u; unkan, He taku wakan šica yuha ce, ehapi.

34 Wicašta Cinhintku kin he wote ça wayatke hi; unkan ehapi; Wan, wicašta wan wote sa, qa miniša yatke sa, wamnayanpi qa wahtanipi sa takodawicaya ece.

35 Tuka Woksape iye cinca kin owasin on yaowotanpi ece.

36 Unkan Pharisee wanji kici wote kta e cinkiya. Hecen Pharisee ti kin en tin iyaye ça, wote kta iyotanka.

37 Unkan iho, otonwe kin en winolinca wahtani sa kin heca, he, Pharisee ti kin en wota iyotanka sdoneyе çehan, inyan opiye ihеpi ohna yuha en hi;

38 Qa tapetepa tanhan siha kin en ceya najin, qa išta minihanpe kin on siha kiciyujaja, qa paha kin on kicipakinta ca, siha kin ikiciputake, ça ihеpi qon on sda-kiciyiya.

39 Unkan Pharisee kico qon he wanyake çehan, cante mahen awacin qa heya; Wicašta kin de wicašta wokcan unkanš, yutan kin he tuwe qa taku winolinca kin sdoneyе kta tuka; he wahtani sa kin heca.

40 Unkan Jesus waayupte ça heciya; Simon taku eciciye kta mduha ce. Unkan is, Waon-spekiya, katinyan eya wo, eya.

41 Wicašta wan wicašta nonpa oicazo wicaqu: unma kin kašpapi opawinge zaptan iyohiye šni, qa unma kin is wikcemna zaptan.

42 Unkan taku on hdajujupi kte cin yuhapi šni qehan, wancake sakim wicakicicajuju ce. Hecen unma tukte iyotan wašte-

dake kta hecinhan, he omakiyaka wo.

43 Simon waayupte ça; Tuwe ota kicicajuju hee nace epca ce, eya. Unkan, Tanyan idukcan ce, eciya.

44 Hehan winolinca qon ekta ihduhomni, qa Simon heciya; Winolinca kin de wandaka he: Yati kin en wahi, unkan mini on siha *wahdujaja* kta mayaqu šni; tuka iye kin išta minihanpe kin on siha mayujaja, qa paha kin on pakinta.

45 I imayaputake šni; tuka winolinca kin de wahi kin ehan-tanhan siha imaputaka ayaştan šni.

46 Pa kin wihti on sdamayaye šni; tuka winolinca kin de ihеpi on siha sdamayan ce.

47 Hecen on heciyiya ce, Wahtani kin hena ota ešta kicieajujupi; he nina waştedaka nakaes: tuka tuwe waniqadan kicicajujupi kin he iwaştedan waştedaka ece.

48 Hehan winyan qon heciya; Niohan šice cin hena nicicajujupi ce.

49 Unkan tona kici wota iyotankapi kin hena hehan cante mahen heyapi; De tuwe e woahtani nakun kajuju he.

50 Unkan winolinca qon heciya; Wacinyaye cin he niniyan ce; wookiye on hda wo.

## WICOWOYAKE 8.

1 Unkan he iyohakam, otonwe tankinkinyan otonwe cikiciqadan ko, owasin iyaza un, qa wootanin wašte Wakantanka tokiconze ahna yaotanin. Unkan ake-nonpapi kin kici unpi:

2 Qa winolinca wanjikji taku wakan šica yuhapi qa wayazankapi, *tuka* asniwicayapi, Mary

he Magdalene eciyapi, he etanhan wakan síca sákowin hinanpapi qon hee ;

3 Qa Joanna, Cuza Herod waa-wanyagkiye ciqon he tawicu, qa Susanna, qa nakun toktokeca ota, hena woyuha yuhapi kin on okiyapi ece.

4 Unkan wicota mniciyapi, qa otonwe otoiyo hi etanhan en ahi qehan, wiyacinpi on wowicakiyaka :

5 Woju heca wan taku su kin oju iyaya. Woju, unkan apa canku icahda hinhpaya ; unkan naatinzapi, qa mahpiya okinyanpi kin temyapi.

6 Unkan apa immija wan ahinhpaya ; unkan uye çehan, spaye sni on wancake snija.

7 Unkan apa wapepeka ehna-hna hinhpaya ; unkan wapepeka opeya uye, ça aotinsya.

8 Unkan apa is maka wašte ahinhpaya ; unkan uye, ça opawingege suton, eya. Unkan hena hecekcen eye çehan, heya niyan ; Tuwe noge winahon yukhan hecinhan, ito nahon kta ce, eya.

9 Unkan waonspewicakiye cin wiwangapi, qa heciyapi ; Wiyacinpi kin de toketu he.

10 Unkan heya ; Niyepi Wakantanka tokiconze woanañbe kin hena oyakalinigapi kta nicupi ; tuka token kin is wiyacinpi ece : hecen etonwanpi keş wanyakapi kte sni, qa wanañonpi keş okalinigapi kte sni ce.

11 Wiyacinpi kin he dee : Su kin he Wakantanka oie kin ee.

12 Canku icahda qon he tona nahonpi kin heepi ; hehan wakan síce cin en hi, qa wicoie kin cantepi kin etanhan eyaku ece, awacinpi qa niwicayapi kte sni heon.

13 Tona wicoie nahonpi eca

iyuškinyan icupi ece kin hena immija akan un qon hena ee ; hena hutkan nicapi, qa cistiye-dan wicadapi, tuka taku iyutanwicayapi hehan ayuñtanpi ece.

14 Qa tona wanna nahonpi, qa hehan tokiya yapi, qa wiconi kin de woawacin kin, qa wowijice, qa wowiyuşkin kin, hena on aotinzapi, qa hecen tanyan sutonpi sni kin hena wapepeka ehna hinhpaye ciqon eepi ce.

15 Tuka tona wanna wicoie nahonpi eca, cante wašte qa owotanna mahen yuha unpi, qa wacintankaya sutonpi kin hena maka wašte akan un qon hena eepi ce, eya.

16 Wicašta kin tuwedan petijanjan wan ideye, ça wakşica wan iyahdapşinyan elpeye sni, qa nakun owinja wan ohdateya ehna ke sni ece ; tuka petijanjan ihupa akan ehde ece : hecen tona en ipi kinhan, ijanjan kin wanyakapi kta.

17 Taku anañmanpi qa yuotainpi kte sni wanica ; qa nakun taku yutaninşniyan hnakapi qa yutaninyan eyakupi kte sni wanica ce.

18 Heon token nayahonpi hecinhan itonpa po ; tuwe wayuhe cin he nakun qupi kta ; qa tuwe wayuhe sni kin he taku yuha kecin kin hee ikicicupi kta ce, eya.

19 Hehan hunku qa hunkawanjitku kin hena en hipi, qa wicota kin on ikiyedani upi kta okihipi sni.

20 Unkan okiyakapi qa heyapi ; Nihun qa nihunkawanji tankan najinpi, qa wannihdake kta cinpi ce.

21 Unkan waayupte, ça hewicakiya ; Wakantanka oie nahonpi, qa ecen econpi kin dena ina qa mihunkawanji eepi ce, eya.

22 Unkan anpetu kin hena wanji en, waonspewicakiye cin om wata wan en opa; qa hewicakiya; Mde kin akasanpa unyanpi kta ce. Hecen canan eyaya.

23 Tuka śina watopekiyapi icunhan iye iştinma: unkan tate iyumni wan mde kin en u; qa mini ojudan yakonpi, hecen ŧapi kta kokipapi.

24 Hehan en hipi qa yuhicapi qa heyapi; Itancan, Itancan, untakunipi śni. Unkan najin hiyaye a, tate qa mini taja ko kiśica: hecen ayuştan, qa amda-kedan tanka.

25 Unkan hewicakiya; Wacin-yayapi kin tukte e he. Unkan iś wikopapi, inihanpi qa hekiciyapi; De taku wicaśta he; tate mini kici ee kaeś okiya eca, anagoptan ece.

26 Unkan Galile itakasanpa Gadarene tamakocepi kin en ipi.

27 Unkan lien ihe ehan, wicaśta wannakaja tanhan wakanśica yuhe, a wokoyake koyake śni, qa tuktedan tipi oti śni, tuka wicaśta hnakapi kin en ece un kin, heca wan otonwe kin eciyatanhan itkokipa.

28 He Jesus wanyake ehan, hoyeye a itokam makata ehpечиye a hotankakiya heya; Jesus Wakantanka Iyotan Wankantu Cinhintku kin, token unyakon kta he. Ceciciya ce, Kakiśmaye śni wo.

29 Taku wakan śape cin wicaśta kin etanhan hinanpe śi heon etanhan. He ijehan yuza ece; unkan mazaicicalihha wicaśke ko on kaśka hnakapi; tuka wicaśke kin yupsapsake a, wakanśice makotahedan ekta iyayeya ece.

30 Unkan Jesus wiwange a heya; Token eniciyapi he.

Unkan, Wicota, eya: taku wakan śica ota tan mahen ipi kin heon etanhan.

31 Unkan ośbe kin ekta ye wicaśi kte śni, keya icekiyapi.

32 Unkan he kin en kukuśe ota optaye wan won unpi; hecen en iwicayayapi kte cin he iyowinwicakiye kta keya cekiyapi; unkan iyowinwicakiya.

33 Hecen wakanśice cin wicaśta kin etanhan tankan hinapapi, qa kukuśe kin en iwicayayapi; unkan optaye maya hinca wan en apamahde nina hin naśdog iyayapi, qa mde kin en ivolhpечиyapi, qa minin ŧapi.

34 Unkan taku econpi kin he kukuśe wo wicaqupi qon wanyakapi qehan, nakipapi, qa otonwe qa makoce kin ekta ohdag kipi.

35 Unkan taku econpi qon he wanyag ai, qa Jesus ekta ahi, qa wicaśta wakanśica etanhan hinapapi qon he ogeton, qa tawacin ekicetu, qa Jesus siha kin en iyotankahan yanka wanyakapi; unkan wikopapi.

36 Tona wanyakapi qon iś eya wicaśta wakan śica yuhe eiqon token asniyanpi kin he owicakiyakapi.

37 Hehan ihdukśan Gadarene tamakocepi kin owancaya taku econpi qon he nalionpi qehan, owasin nina wikopapi oti etanhan cekiyapi, qa token yeśipi. Unkan wata kin en okipe, a icicawin kihda.

38 Unkan wicaśta etanhan wakan śice cin hinanpapi qon he kici un kta keya cekiya. Tuka Jesus hde śi, qa heya;

39 Niye yati kin ekta hde, a Wakantanka taku hinca ecanicon kin he yaotanin wo, eya. Unkan kihde, a Jesus taku hinca ecakicon qon he otonwe owancaya ohdaka.



## WICOWOYAKE 9.

40 Unkan Jesus hdi qehan, oyate kin iyowinkiyapi; owasin ape hiyeya nakaes.

41 Unkan iho, wicašta wan Jairus eciyapi kin he en u, omniciye tipi itancan kin wanji hee; unkan he Jesus siha kin en makata ehpeiciye ça, iye ti kin ekta u kta icekiya.

42 He cunwintku wanjidan, wanna waniyetu akenonpa eectu; unkan is wanna te kte wanka. Tuka ekta ye cin hepiya oyate kin aohduteyapi.

43 Unkan winohinca wan waniyetu akenonpa hehanyan we au, qa taku yuha owasin pejihutawicašta on wanna hdusota; tuka hecen tuwedan asniye kta okihi sni;

44 Hee tapetepa tanhan u, qa tawokoyake opapun kin yutan: unkan hecehnana we au qon he anapta.

45 Unkan Jesus heya; Tuwe mayutan he. Unkan owasin anakihmanpi qehan, Inyan qa tona kici unpi qon heña heyapi; Waonspekiye cin, wicota kin aohduteniyanpi, qa aotinsniyanpi; heca esta, Tuwe mayutan he, eha ce.

46 Unkan Jesus heya; Tuwe mayutan; wowašake ematanhan hiyu kin he sdonwakiya ce.

47 Unkan winohinca qon wanna inalibe sni e wanhdake cehan, cancanyan u, qa itokam makata ehpeiciye, ça oyate kin owasin wicitokam, taku on yutan, qa token wancake asniyanpi kin he okiyaka.

48 Unkan heciya; Cuns, cante wašte wo; wacinyaye cin he asniniyan ce: wookiye on hda wo.

49 Unkan Jesus iahan icunhan, omniciye tipi idaka ti kin eciyatadhan tuwe u, qa heciya; Wa-

onspekiye cin nagiyeye sni wo; nicunksi wanna ta ce, eya.

50 Tuka Jesus he nahon qehan, waayupte ça heciya; Wikope sni wo; awicakehan wicada wo, kinhan niyanpi kta ce.

51 Unkan tipi kin en tin hiyu qehan, tuwedan tin ye kta iyowinkiyeye sni; Inyan, qa Jakob, qa Johannes, qa wikoška atkuku hunku kici henana en ipi.

52 Unkan owasin aceyapi qa wašinhdanda enapeyapi ece. Tuka heya; Ceyapi sni po; te sni, tuka istinma ce.

53 Unkan wanna ta sdonyapi kin heon wowihayapi.

54 Unkan owasin tankan iyayewicaye, ça napata yuze, ça kipan qa heya; Wikoška najin wo, eya.

55 Unkan nagi kin kiyohpaya, qa hecehnana najin hiyaya: hehan wo qu wicaši.

56 Unkan hunkakeku kin inihanpi: tuka taku econ kin he tuwedan okiyake sni wicaši.

## WICOWOYAKE 9.

1 Unkan waonspewicakiya akenonpapi kin hena wicakico, qa wowašake wookihi ko, wakanšica owasin on, qa wowayazan asniyanpi kta hecen wicaqu.

2 Qa Wakantanka tokiconze kin oyakapi kta, qa wayazankapi kin asniwicayapi kta ye wicaši.

3 Qa hewicakiya; Icimayanipi kte cin on cansagye, qa wojuhadan, qa waneya, qa mazaska takudan eyakupi sni po; qa nakun onhdohda nomnom yuhapi sni po.

4 Qa tukte tipi wan en yaipi kinhan, hen ece yukan po, qa hetanhan iyoopta ya po.

5 Qa tuwe kašta iyowinniciyapi sni kinhan, otonwe kin he inayapapi kinhan, nisihapi watuše-

kšeca onistakapi kin hee kaes katata po, he owicayake kta ce.

6 Unkan iyayapi, qa otonwe iya-za yapi, qa wootanin wašte oya-kapi, qa owancaya waasniyanpi.

7 Unkan taku econ kin owasin, Herod wicaštayatapi kin nahon; qa hehan token cante yuza nun tanin šni; apa Johannes wicon-  
te kin etanhan kini keyapi kin heon etanhan :

8 Qa apa iš, Elias hi ce, eyapi; qa apa tokeca iš, Wannakaja waayatapi qon hena etanhan wanji kini ce, eyapi.

9 Unkan Herod heya, Johannes pa bawaksa ce: tuka de tuwe e on taku decekceca nawahon he. Unkan wanyake kta cin.

10 Unkan wahošiyapi kin hena wanna hdipi qehan, taku token econpi kin owasin okiyakapi. Unkan ewicahdaku qa nahman-  
na icunonpa makotahedan wan ekta i, he otonwe wan Bethsaida eciyapi kin ahankeya.

11 Unkan oyate kin sdonyapi qehan, ihakam eyaya: unkan iyo-  
winwicakiye ça, Wakantanka tokiconze kin he iwowicakiyake ça, tona asniyanpi cinpi kin hena asniwicaya.

12 Unkan wanna litayetu aye cehan, akenonpapi kin upi, qa heciyapi, Wicota kin tokan ye-  
wicaši wo; hecen otonwe qa ihdukšan makoce wanke cin hena ektakta yapi, qa taku yu-  
tapi oiçidepi, qa iwankapi kta ce; den makotahedan unyakon-  
pi heon etanhan.

13 Tuka hewicakiya; Niye wo wicaqu po. Unkan heyapi; A-  
guyapi zaptan qa hogan nonpa henana unhapi; oyate denakeca woyute opewicakiciton unyanpi  
šni kinhan.

14 Wicašta kektopawinge za-  
ptan ecetupi. Unkan waonspe-

wicakiye cin hewicakiya; Wi-  
kcemna zaptanptan ptaptaya iyo-  
tang wicakiya po, eya.

15 Unkan ecen econpi, qa owa-  
sin iyotang wicakiyapi.

16 Hehan aguyapi zaptan qa hogan nonpa qon hena icu; qa mahpiya ekta etonwan, qa ya-  
wašte, qa yušpašpa, qa waonspe-  
wicakiye cin wicaqu; qa iye oya-  
te kin wicitokam ewicakicihna-  
kapi kta.

17 Unkan wotapi qa owasin wipipi; unkan onšpašpa iwicaki-  
ciyaye cin hena pahipi, makano-  
piye akenonpa.

18 Unkan išnana wocekiye eya un qehan, waonspewicakiye cin hena kici unpi: unkan wiwica-  
wange ça heya; Miye matuwe oyate kin keyapi he.

19 Unkan waayuptapi qa, Jo-  
hannes baptem wicaqu qon; qa apa iš, Elias; qa apa tokeca iš; Wanakaja waayatapi qon hena etanhan wanji kini ce, eyapi ce, eyapi.

20 Unkan hewicakiya; Tuka niye matuwe kehapi he. Unkan Inyan waayupte ça heya; Wa-  
kantanka etanhan Messiya kin.

21 Unkan nina owicakiye, ça wicašta kin tuwedan okiyake šni wicaši;

22 Qa heya; Wicašta Cinhin-  
tku kin taku otakiya on ito iyo-  
tanhan iyekiye kta, qa wicašta tokapapi, qa wawayušnapi itan-  
canpi, qa wowapi kagapi kin he-  
na heyata iyeyapi, qa țeyapi kta ce: unkan anpetu iyamni kin-  
han kini kta ce, eya.

23 Unkan owasin hewicakiya; Tuwe miyahna u wacin kinhan, waipiiçida, qa anpetu otoiyo-  
hi cansusbeca kin kiçin, qa miya-  
hna u kta.

24 Tuwe kašta wiconi kin hdu-  
he wacin kinhan, togehpekiye

kta ce; tuka tuwe kašta miye on wiconi kin togelipekiye cinhan, hee hduhe kta ce.

25 Wicašta togelipeciya, qa is tokan ehpeyapi hecinhan, maka kin ocowasin ohiciya esta, taku ecin on tanyan un kta he.

26 Tuwe miye qa mioie kin on istece cinhan, hee on Wicašta Cinhintku kin istece kta, tohan iye towitan, qa Atkuku tawa qa taohnihde wakan tawapi kin hduha u kinhan.

27 Tuka awicakehan heciya-pi; Den najinpi kin apa Wakantanka tokiconze kin tohanyan wanyakapi sni kin hehanyan tapi kte sni.

28 Unkan wicoie kin dena iyohakam anpetu shadogan ecetu, hehan Inyan, qa Johannes, qa Jakob, hena ewicayaku, qa cekiyekta paha wan ekta i.

29 Unkan cekiya icunhan ite kin tokeca hinnda, qa tawokoyake kin ska qa wiyatpatpa.

30 Unkan iho, wicašta nonpa kici wohdakapi, Moses qa Elias hena eepi.

31 Hena wokitaninyan hinajinpi, qa iye iyaye kte cin, Jerusalem ekta hdustan kte cin he iwohdakapi.

32 Tuka Inyan qa om un kin hena nina istinmapi; unkan kiktapi qehan wookitanin tawa kin he wanyakapi, qa nakun wicašta nonpa kici najinpi kin hena.

33 Unkan hena ehpeya kihdapi icunhan, Inyan Jesus heciya; Itancan, den unkanpi kte cin he waste; ito wakeya yamni un-kagapi kta, wanji niye, qa wanji Moses, qa wanji Elias, hecen unnicicagapi kta; taku eye cin he sdonkiye sni.

34 Hena hecen eya icunhan, mahpiya soka wan u, qa aohanziwicaya. Unkan mahpiya soka

kin en hiyayapi hehan nina wikipapi.

35 Unkan mahpiya qon etanhan wicaho wan hinape, ca heya; Micinksi wastewakidake cin he dee ce: he anagoptan po.

36 Unkan wicaho qon yastan qehan, Jesus ishana en najin. Unkan iye inana unpi, qa taku wanyakapi qon anpetu kin hena en wicašta kin tuwedan okiyakapi sni.

37 Unkan ianpetu qehan, paha qon eciyatanhan wanna en hdipi qehan, oyate ota itkokipapi.

38 Unkan iho, wicota kin etanhan wicašta wanji hoyekiye ca heya; Waonspekiye cin, ceciciya ce, micinksi kin atonwan wo; micinca hecedan:

39 Unkan iho, woniya wan yuza eca, ihnuhana sicahowaya ece; qa yuhdehdeca, qa hecen minitaga apasdiya, qa onsiya kuwa, qa kitan se ayustan ece.

40 Unkan waonspewicayakiye cin cewicawakiye, ca napeye wicawasi; tuka okitpanipi, eya.

41 Unkan Jesus waayupte ca heya; Wicoicage wicada sni qa tawacin tehika, tohanyan cicipi waun kta, qa iyowinciciyapi kta he: nicinksi kin den au wo.

42 Unkan u kin hepiya, wakanšice cin makata ehpeye, ca yuhdehdeca. Unkan Jesus woniya šape cin kišice ca, hokšidan kin asniye ca, atkuku kin kieu.

43 Unkan Wakantanka towašake hince cin on owasin inihanpi. Tuka Jesus taku token econ kin on owasin inihanpi icunhan, waonspewicakiye cin hewicakiya;

44 Wicoie kin dena ninogepi kin en iyohpayapi kte; Wicašta Cinhintku kin wicašta napepi kin en wicakupi kta.



45 Tuka iapi kin he okañnigapi ñni, qa anawicakihmanpi, hecen iyukcanpi ñni: unkan wicoie kin on iwangapi kte cin itonpapi.

46 Unkan hehan wanji tukte iyotan tankapi kte cin he hdo-kinicapi.

47 Unkan cante ekta hdokini-capi kin he Jesus wanyake cehan, hoksiyoqopa wan icu qa iye iyokihe ehde ;

48 Qa hewicakiya ; Tuwe kašta hoksiyopa kin de micaje on eyaku kinhan, he miye e emayaku ; qa tuwe kašta miye emayaku kinhan, he umaši kin hee eyaku ece ; hecen niyepi owasin wanji tukte nicistinpidan kinhan, hee tanka kta ce, eya.

49 Unkan Johannes waayupte ça heya ; Itancan, tuwe nicaje on taku wakan šica napewicaya wanunyakapi, qa den ounpapi ñni kin on etanhan teunhindapi.

50 Unkan Jesus heciya ; Tehindapi ñni po : tuwe unkipajinpi ñni kin he unkicicapi ece.

51 Unkan anpetu en wankan eyakupi kte cin wanna kiyedan aya, hehan Jerusalem ekta ye kta e ite kin hdsuta ;

52 Qa wahošiyapi kin heca tokata ye wicaši. Unkan iyayapi, qa taku wiyeya kicihnakapi kta e Samariya wicašta tonwanyanpi kin wanji en ipi.

53 Unkan Jerusalem ekta ye kta sece cin on etanhan iyowin-kiyapi ñni.

54 Unkan waonspewicakiye cin, Jakob qa Johannes he wanyakapi qehan, heyapi ; Itancan, Elias econ qon he iyecen unkiye, małpiya eciyatanhan peta kun u, qa hułnałwicaye unšipi kta yacin he.

55 Tuka ihduhomni qa wica-

kišice, ça heya ; Tawacin toniketupi kin sdonyakiyapi ñni ce.

56 Wicašta Cinhintku kin wicašta řewicaye kta on hi ñni, tuka niwicaye kta heon hi ce, eya. Unkan otonwe wan tokeca ekta iyayapi.

57 Unkan canku ohna yapi icunhan, tuwe heciya ; Itancan kin, tokiya kašta de cinhan ciyahna mde kta ce, eya.

58 Unkan Jesus heciya ; Šun-gidan kin wašun tonpi, qa małpiya okinyanpi kin hołpi yuhapi, tuka Wicašta Cinhintku kin iye pa kin tukten iwanke kte cin ee kaeš hduhe ñni ce.

59 Unkan wanji tokeca heciya ; Miyahna u wo. Tuka heya ; Itancan, tokaheya ate wehe mde kte cin he iyowinmakiya ye.

60 Jesus heciya ; Tona řapi kin řa wicayuhapi kin hena ito wicakihapi kta ; tuka niye qe ye ça Wakantanka tokiconze kin he oyaka wo.

61 Unkan wanji tokeca nakun heya ; Itancan, ciyahna waun kta ; tuka ito tokaheya wahde, ça wati kin ohna un kin tanyan wehnake kte cin he iyowinmakiya wo.

62 Unkan Jesus heciya ; Wicašta kin tuwe małiyumdu wana yuze, ça hehan hinakaha hakikta kinhan, he Wakantanka tokiconze kin en ope kta iyecece ñni ce.

## WICOWOYAKE 10.

1 Unkan taku kin hena iyohakam, Itancan kin toktokeca wickemna šakowin cajewicayate, ça iye otonwe tona ekta ye kte cin, qa tokiya kašta ekta ye kte cin, hena kohan ektakta nomnom yewicaši.

2 Qa hecen ewicakiya ; Awicakehan woksapi kin tanka, tuka

litanipi kin e tonana ce; he on etanhan woksapi Itancan kin, he iye litanipi kin heca woksapi kin en yewicaši kte cin he icekiya po.

3 Ya po; iho, tahincaska šun-  
ktokeca ehna unpi he iyecen ye  
cišipi.

4 Mazaska opiye, qa wojuhadan, qa hanpa hena hduhapi šni po: qa tahepi wicašta tuwedan okiyapi šni po.

5 Qa tukten tipi wan en tin idadapi kinhan, tokaheya, Wookiye tipi kin den un nunwe, eya po.

6 Unkan wookiye cinhintku kin en un kinhan wookiye nitawapi kin en iyahe kta: tuka hecece šni kinhan, ake en nihdipi kta.

7 Qa tipi kin he en ece un po, taku ničupi kin yuta qa yatkan dukanpi kta; tuwe litani kin he wokajuju kicupi ece e kta: Tipi iyaza yapi šni po.

8 Qa tukten otonwe wanji en yaipi, qa iyowinniciyapi kinhan, taku nitokam enicihnakapi kin he ece yuta po.

9 Qa wayazanka en unpi kin hena asniwicaya po, qa, Wakan-tanka tokiconze kin he kiyedan nihiyohipi ce, ewicakiya po.

10 Qa tukte otonwe wanji en yaipi qa iyowinniciyapi šni kinhan, otonwe kin he canku kin en hdicupi qa heya po;

11 Nitotonwepi watusėkšeca ountkapapi kin hee kaeš itkom unnicicatatapi ce; tuka Wakan-tanka tokiconze kin he kiyedan nihiyohipi kin sdonya po.

12 Tuka heciyapi ce, Anpetu kin he en otonwe kin he tehiya un kte cin he Sodom aoptenya un kta ce, eya.

13 Korazin woteli niciyanka ce; Bethsaida woteli niciyanka ce; niyepi kin en wicohan tanka

econpi kin hena Turos qa Sidon en econpi unkanš, wanakaja wahinske ojuha caħota ahna en iyotanka iyopeiçiyapi kta tuka.

14 Tuka wayacopi kin ekta niye tehiya yaunpi kte cin he Turos Sidon kici aoptenya unpi kta.

15 Qa niye Kapernaum, yuwankan maħpiya ekta aniyampi kin, kuya wakanšica ti kin ekta iyaye niyanpi kta ce, eya.

16 Tuwe ananigoptanpi kin, he miye e anamagoptan; qa tuwe wahtenidapi šni kin, he miye e wahtemada šni; qa miš tuwe wahtemada šni kin, he umaši kin hee wahteda šni ece, eya.

17 Unkan wikcemna šakowinpi qon wopidaya hdipi, qa heyapi; Itancan, nicaje kin eciyatanhan wakanšicapi kin iyepi kaeš ananigoptanpi ece.

18 Unkan hewicakiya; Maħpiya kin eciyatanhan wakanhdi iyecen Satan hinħpaya wammdaka ce.

19 Iho, wowašake ciçupi, hecen wamduška sintelida ko ayahampi kta, qa toka token wašakapi ešta isanpa yaunpi kta; hecen takudan ksuweniyanpi kte šni.

20 Tuka wakan šice cin hena ananigoptanpi kin heon wiyuškinpi šni po; tuka maħpiya ekta caje oniwapi kin hee on wiyuškin po, eya.

21 Unkan he ehan Jesus cante mahen iyuškin, qa heya; Ate, maħpiya maka ahna on Itancan, niye taku kin dena ksapapi, qa wayupikapi kin hena anawicayakiħbe, ça hokšiyooqopa kin heca sonyewicayakiye cin, he pidamayakiya ce; han, Ate; niye hecen iyonicipi kin heon etanhan.

22 Atewaye cin he taku owasin yuhemakiya; qa Cinhintkuyapi

kin he tuwe kin tuwedan sdoney  
 śni, Ateyapi kin heceyedani; qa  
 Ateyapi kin is tuwe kin, Cinhin-  
 tkuyapi kin iye qa tona owica-  
 kiyake kte cin henana sdoneyapi  
 ece.

23 Unkan waonspewicakiye  
 cin ekta ihduhomni, qa nahma-  
 na heya; Taku wandakapi kin  
 hena wicišta tona wanyakapi  
 kin hena yawaštepi ece.

24 Qa heciciyapi; Waayatapi  
 kin wicaštayatapi ko ota taku  
 wandakapi kin hena wanyag  
 cinpi, tuka wanyakapi śni; qa  
 taku nayañonpi kin he nañon  
*cinpi*, tuka nañonpi śni, eya.

25 Unkan inyun, wicoope aiapi  
 kin heca wanji najin hiyaye, ça  
 wawiyutanye, ça heciya; Wa-  
 onspekiye cin, token ecamon qa  
 owihanke wanin wiconi ohimi-  
 çiye kta he.

26 Unkan heciya; Wicoope kin  
 en token owapi he; token dawa  
 ece he.

27 Unkan waayupte, ça heya;  
 Itancan Wakantanka nitawa kin  
 he nicante kin ocowasin, qa ni-  
 nagi ocowasin, qa nitowaśake  
 ocowasin, qa nitawacin ocowasin  
 on wašteyadake kta; qa niye  
 inihdacin kin he iyecen nikiye-  
 dan un kin wašteyadake kta  
 ce.

28 Unkan heciya; Tanyan  
 waadupta; hecen econ wo, kin-  
 han yani kta ce.

29 Tuka iye ihdaowotanna wa-  
 cin, qa Jesus heciya; Unkan  
 mikiyedani un kin he tuwe he.

30 Unkan Jesus ayupte ça heya;  
 Wicašta wan Jerusalem etanhan  
 Jeriko ekta iyaya; qa wama-  
 nonpi sa awicakipa, hena tawo-  
 koyake kin kipi, qa apapi, qa te  
 icakiś ehpeya kihdapi.

31 Unkan ehantudan wawayu-  
 śna wanji canku kin he ohna

hiyaya; qa he wanyake çehan  
 iyoopta iyaya.

32 Unkan Lewite heca wanji  
 is eya ehan i qehan, atonwe ça  
 iyoopta iyaya.

33 Unkan Samariya wicašta  
 wanji icimani un, he wanke cin  
 en hi; qa wanyake çehan on-  
 śida;

34 Qa en i, qa kaşujapi kin pa-  
 ĩte ça wihdi miniśa ko en oka-  
 śtan; hehan iye taşunke kin  
 akan yankekiye ça, owote tipi  
 wan en ahi, qa awanyaka.

35 Unkan ihanñanna iyoopta  
 ye kta, hehan kaşpapidan nom  
 ehdaku, qa tipi tawa kin qu, qa  
 heciya; Tanyan yuha wo, qa  
 dena sanpa tona on dusote cin-  
 han, tohan waku kinhan ciçu  
 kta ce.

36 Iho, hena yamnipi kin, wa-  
 manonpi sa awicakipe ciqon  
 wanji tukte ikiyidan un idukean  
 he.

37 Unkan, Wanji onśida qon  
 hee ce, eya. Hehan Jesus he-  
 ciya; Ye ça, iyecen econ wo.

38 Unkan hetanhan iyoopta  
 iyayapi, hehan ontonwe wan en  
 i; unkan winohinca wan Mar-  
 tha eciyapi, he iye ti kin en  
 kico.

39 Unkan he tankaku kin, Ma-  
 ry eciyapi kin he Jesus siha kin  
 en iyotanke ça, oie kin nañon  
 ece.

40 Tuka Martha wicoħan ota  
 on token cante yuza tanin śni;  
 heon en hi qa heya; Itancan,  
 mitanka ehpeyaye ça miśnana  
 taku ota ecamon ece kin niś ekta  
 ewacanni śni he; heon etanhan  
 omakiye kta keciya ye.

41 Tuka Jesus waayupte ça  
 heciya; Martha, Martha, taku  
 ota yakicanda wacanni, qa on  
 nagiyeniçiya ece:

42 Tuka taku wanjidani cinpi-



ca ; unkan Mary taku wašte kin he kalniga, he icimana kipi kte šni ce.

## WICOWOYAKE 11.

1 Unkan tukten cekiya un, qa ayaštan qehan waonspewicakiye cin wanji heciya ; Itancan, wocekiye eya onspeunkiya po, Johannes waonspewicakiye cin onspewicakiye ciqon he iyececa.

2 Unkan hewicakiya ; Ceyakiyapi kinhan kaken eya po ; Ateunyanpi mahipiya ekta nanke cin, nicaje wakandapi nunwe : Nitokiconze kin u kte : Mahipiya ekta nitawacin econpi kin he iyececa maka akan econpi nunwe.

3 Anpetu otoiyo hi anpetu woyute unqu po.

4 Qa waunhtanipi kin unkicicaju miye, unkiš tona šicaya ecaunkiconpi wicunkicicajupi kin he iyececa. Qa taku wawiyutanyan un kin en unkayapi šni po ; tuka taku šice cin etanhan eunhdaku po.

5 Unkan hewicakiya ; Niyepi kin wanji tuwe kodayayapi, qa hanye cokaya ekta yaipi, qa heyakiyapi ; Koda, aguyapi yamni omaqu wo :

6 Mitakoda wanji icimani hi, tuka taku itokam ewahnake kta takudan mduhe šni ce.

7 Hehan iye timahen tanhan waayupte, qa heye kta ; Nagiyemaye šni wo ; tiyopa wanna natakapi, qa micinca om mahen imunka ; hecen nawajin qa ciçu kta owakitpani ce.

8 Heciciyapi ; He kodaya on etanhan najin qa qu kte šni qe yaš, nina kitan kin heon etanhan, najin qa tona cin kinhan qu kta ce.

9 Nakun heciciyapi ; Da po, kinhan niçupi kta ; akita po,

kinhan iyeyapi kta ; katoto po, kinhan niciyuhdokapi ece e kta.

10 Tuwe da eca he icu ece ; qa tuwe akita eca he iyeya ece ; qa tuwe katoto eca he kiciyuhdokapi ece e kta.

11 Cinca niyukanpi kin, wanji tukte cinhintku aguyapi kida kinhan, inyan wan qu kta he ; qa is hogan wan da kinhan, hogan on wamduška wan qu kta he.

12 Qa is witka wanji da kinhan sintehda wan qu kta he.

13 Hecen niš nišicapi kin, nicincapi taku waštešte wicayaqupi kte cin he onnispepi echantanhan, is iyotan mahipiya Ateyayapi kin tona Woniya Wakan kidapi kinhan wicaqu kta ce, eya.

14 Hehan wakan šica wanji tankan iyayeya, unkan ia okitpani. Unkan wakan šice cin wanna tankan hinape qehan, ia okitpani qon hehan ia ; hecen oyate kin inihanpi.

15 Tuka apa heyapi ; Beelzebub wakan šica itancan kin he eciyatanhan wakan šica napewicaya ece.

16 Qa apa toktokeca is iyutanyanpi kta on mahipiya eciyatanhan wowapetokeca kidapi.

17 Tuka tawacinpi kin sdonwicaye qa hewicakiya ; Wokiconze kin tona iye iyakitedan kicipajinpi kin hena atakuni šni ece ; qa tipi wanji iye icipajin kinhan he jujuwahan ece.

18 Qa Satan is iye icipajin kinhan tokiconze kin he token ecin ecen he kta he. Beelzebub eciyatanhan wakan šica napewicawaya ece, kehapi kin heon etanhan.

19 Unkan miye Beelzebub eciyatanhan wakan šica napewicawaya echantanhan, niye nicinca-

pi kin hena tuwe eciyatanhan napewicayapi he; hecen iyepi kin niciyukanpi kta.

20 Tuka miye Wakantanka napsukaza on wakan śica nape-wicawaya ehantanhan, Wakan-tanka tokiconze kin awicakehan nihiyohipi ce.

21 Wicašta wan waśake ça wipe ton ti awanhdake cinhan, hecen woyuha tawa kin tanyan hiyeya ece.

22 Tuka wanji ikapeya waśake cin he takpe hi, qa ktedan kinhan, tawiye wacinkiyeye cion he owasin ekiciyaku, hehan taku tawa qon pamni ece.

23 Tuwe micica śni kin he makipajin; qa tuwe miciwapahi śni kin he wayumdeca ece.

24 Woniya śapa kin wicašta wan etanhan hinanpa eca makoce puze cin en ece un, qa oziiciye kta akita; tuka takudan iyeye śni kinhan, hehan heya; Wati etanhan wahinawape cion he ake ekta wahde kta ce.

25 Unkan en hdi eca, wanna kahintapi qa ayuco yuštampi iye-kiya ece.

26 Hecen tokiya ye ça, woniya toktokeca iye kin isanpa wica-štapiśni śakowin ewicayaku, qa hena en yapi, qa otipi: hecen wicašta kin he otokahe kin isanpa oehake kin he śica ece.

27 Unkan hena heceken eya icunhan, wicota kin etanhan winolinca wan ho wankan yeye ça heciya; Wicitpi etanhan inicage cin he, qa aze dazoke cin hena yawaštapi ce.

28 Tuka iye heya; Han, tuka tona Wakantanka oie kin nahonpi, qa ecen econpi kin hena is iyotan wicayawaštapi ce.

29 Unkan oyate kin wanna en himniciyapi qehan, hewicakiya; Wicoicage kin de śica; wowa-

petokeca akitapi, tuka wowa-petokeca takudan wicaqupi kte śni; Jonas waayate cion wowa-petokeca tawa kin heceedan.

30 Ninewe oyate kin Jonas wowapetokeca yuhapi qon, he iyecen wicoicage kin de Wica-šta Cinhintku kin wowapetokeca yuhapi kta.

31 Woyaco kin ekta itokaga wicaštayatapi winolinca qon he wicoicage kin de itkom nawicajin, qa wicayaco kta; he iye maka owihanke tanhan Solomon toksape kin nahon hi; unkan iho, wanji Solomon isanpa tanka den un ce.

32 Woyaco kin ekta Ninewe wicašta kin hena wicoicage kin de on inajinpi kta, qa yacopi kta; he iye Jonas wowicakiyake cin on iyopeiciyapi; unkan inyun, wanji Jonas isanpa tanka den un ce.

33 Tuwedan petijanjan wan ideya eca nahimana ehde śni, qa is ohna wiyutapi kin iyahdapśin-yan hnake śni; tuka petijanjan ihupa wan akan ehde ece; qa hecen tona en hipi kinhan ojanjan kin wanyakapi kte.

34 Wicatancan iyoyanpa kin wicišta kin hee: heon etanhan ništa kin hecetu kinhan, nitancan kin is eya iyoyanpa ojudan ece; tuka ništa kin he śica eca, nitancan kin is eya ocowasin otpaza ojudan ece.

35 Hecen iyoyanpa en niun kin he otpaze kte śni e wakta wo.

36 Heon nitancan kin ocowasin iyoyanpa ojudan, qa tuktedan otpaze śni ehantanhan, petijanjan wan yehya ide iyoyamniyan kin he iyecen ocowasin iyoyanpa ojudan kta ce.

37 Unkan heya icunhan Phari-see wan kico: hecen en i, qa wote kta iyotanka,

38 Unkan wote śni itokam ihdujaja śni kin he Pharisee qon wanyake çehan, inihan.

39 Unkan Itancan kin heciya ; Niye Pharisee kin, miniyatkan waksica ko akapatanhan duskapi ece ; tuka mahen tanhan wawicakipi wicoħan śica ko onijupidan ece.

40 Winitkotkopike cin, akapatanhan un kin he tuwe kaga hecinhan, he is mahen un kin nakun kage śni he.

41 Tuka taku duhapi kin etanhanhan wicaqu po ; kinhan taku owasin niciskapi kta ece.

42 Tuka Pharisee kin niyepi wotehi niciyankapi ece ; ceyakata, wacanga, walıpe wašte-mna ko owasin etanhan iwikcemnamna wicayaqupi ece ; tuka wicoħan owotanna Wakantanka waštedakapi ko, hena acayakšinpipi ece ; dena e is ecen ecanonpi kta, qa unma qon oyakaptapi kte śni tuka.

43 Pharisee kin niyepi wotehi niciyankapi ece ; omniciye tipi kin en oyanke waštešte kin hena wašteyadakapi ece, nakun wopeton tipi kin ekta yaonihan-yan oniciyapi kin.

44 Wowapi kagapi qa Pharisee, wanaicilħmanpi kin, wotehi niciyankapi ece ; wicašta hnakapi tanin śni hiyeye ça wicašta kin sdoneye śni āmanipi kin he nicecapi ece.

45 Unkan hehan wicoope aiapi kin heca wanji waayupte, ça heciya ; Waonspekiye cin, hecen eha eca, unkiš eya ienunyahdepi ece.

46 Unkan heya ; Wicoope aiapi kin niš eya wotehi niciyankapi ece ; waqinpi qinpi tehika wicašta qinwicayakiyapi ece qa niyepi kin napsukaza wanjidanon waqinpi kin dutanpi kte śni.

47 Wotehi niciyankapi ece ; wicašta wokcan wicahnakapi kin hena niye yakagapi, qa niyatepi kin hena wicaktepi qon.

48 Atewicayayapi ohanyanpi qon iyowinwicayakiyapi e awicakehan nihduotaninpi ; he iye hena wicaktepi e wicakapi, qa niye wicašta hnakapi kin wicayecagapi ece.

49 Heon is eya Wakantanka toksape kin heya ; Waayatapi qa wahošiyapi heca ekta yewicawaši kta ce ; unkan apa wicaktepi, qa onsiya wicakuwapi kta ;

50 Hecen maka kagapi kin ehantanhan wicašta wokcanpi we paponpi kin he owasin wicoicage kin de iwicawangapi kta ;

51 Abel we kin hetanhan, qa Zacariyas tipi wakan wahna wošnapi kin okitahedan awihnuni qon he we kin iyahdeya : Awicakehan heciyapi, He wicoicage kin de etanhan iwicawangapi kta ce.

52 Niye wicoope aiapi kin wotehi niciyankapi ece ; niš wosdoneye iyuhdoka yutokan edakupi, qa niye ohna idadapi śni, qa tona ohna iyayapi kte cin hena anawicayaptapi ece.

53 Unkan hena hecekcen ewicakiya icunhan, wowapi kagapi qa Pharisee kin taku ota eyeki-yapi kta e nina ħin nagiyeyapi :

54 Taku iyaonpapi kta akitapi, heon taku i kin etanhan inanpe kta on hmunkapi kta iyapepi.

## WICOWOYAKE 12.

1 Unkan wicota ħinca en ahimniciya, hecen akicihanpi ece, hehan waonspewicakiye cin hewicakiya ; Tokaheya Pharisee kin on napolıyapi tawapi kin he



itonpa po, he wanaičihmanpi kin hee ce.

2 Taku akaħpetonpi qa yuzamnipi kte śni wanica; qa nakun taku anaħmanpi qa yuotaninpi kte śni wanica ce.

3 Hecen otpaza ehna taku token ehapi kin he anposkantuya nahonpi kta; qa onahibe tipi kin ohna wicanoge kin en token ehapi kin he tipi akan ieyanpahapi kta.

4 Qa kodamayayapi kin, niś heciyapi; Wicatancan ktepi qa sanpa takudan okihipi śni kin hena kowicakipapi śni po.

5 Tuka tuwe koyakipapi kte cin he ito kanyehan ociciyakapi kte: Tuwe wicakte, qa hehan wakanśica tipi kin en elipewicaya okihi kin he eca kokipa po; han, Hee kokipa po, eciciyapi ce.

6 Zitkadan zaptan mazaśadan nonpa iyopewicayapi śni he: heca eśta Wakantanka hena wanjidan kaeś akiktonje śni.

7 Tuka niyepi kin paha ee kaeś owasin niyawapi ece. Heon etanhan wikopapi śni po; zitkadan ota isanpa niyawapi ece.

8 Qa nakun heciyapi ce; Tuwe kaśta wicaśta kin wicitokam miye mayaotanin kinhan, Wicaśta Cinhintku kin Wakantanka taohnihde kin hena itokam he yaotanin kta.

9 Tuka tuwe wicaśta kin wicitokam amakta śni kinhan, Wakantanka taohnihde kin hena itokam, he aktapi kte śni.

10 Qa tuwe kaśta Wicaśta Cinhintku kin itkom wicoie wanji eciye cinhan, kicicajupupi kte; tuka tuwe Woniya Wakan waośtehda kinhan, kicicajupupi kte śni.

11 Tohan omniciye tipi kin en anihipi kinhan, qa wicaśtayatapi

wowaśake ko ekta, taku qa token aduptapi kta, qa taku ehapi kte cin awacinpi śni po.

12 Woniya Wakan kin he iye iyehantudan ħin taku ehapi kta iyececa he onspeniciyapi kta ce.

13 Unkan wicota kin etanhan wanji heciya; Waonspekiye cin, misunka woyuha hanke micu kta, keciya wo.

14 Unkan heciya; Wicaśta kin, niwankam wiyukcan qa wapamni kte cin tuwe makaga he.

15 Unkan hewicakiya; Iwanihdaka po, qa wakonpi kin kokipa po; wicaśta nipi kin he taku iyakiçuya tonpi kin he en un śni ece.

16 Hehan wiyacinpi wan owicakiyake ça heya; Wicaśta wijica wan tamaga kin taku ota icahya.

17 Unkan cante mahen he awacin qa heya; Token ecamon kta he; waskuyeca mitawa kin tukten wehnake kte cin mduhe śni ce.

18 Hehan heya; Kaken ecamon kta; wopiye wahdujuju kta, qa tankinkinyan wakage kta; qa hena ohna taku imicicaga woyuha mitawa ko owasin ewaju kta.

19 Qa minagi kin hewakiye kta; Minagi, taku ota yehnake cin he waniyetu ota oiyahde kta ce; ito oziicīye, ça wote, ça wayatke, ça wiyuśkin wo, eya.

20 Tuka Wakantanka heciya; Winitkotkoke cin, hanyetu kin de ninagi kin inicicupi kta; hecen wayehnake cin hena hehan tuwe tawa kta he.

21 Tuwe woyuha kihnaka, tuka Wakantanka ekta wijice śni kin he he kicica ce, eya.

22 Unkan waonspewicakiye cin hewicakiya; Hecen on hecici-

yapi ce, Yanipi kin on taku yatapi kte cin, qa is tancan kin taku kodakapi kte cin, hena on nagiyeci-yapi s̄ni po.

23 Wicani kin he woyute kin isanpa ece; qa wicatan can kin is wokoyake isanpa ece.

24 Kangi kin hena iwicayukan po; he iye wojupi s̄ni qa woksapi s̄ni, qa dotopiye woha ko nicapi: unkan Wakantanka hena wo wicaqu ece. Wahupakoza kin isanpa niyawapi s̄ni he.

25 Qa niyepi wanji awacannipi kin on wicišpa wanjidan kaeš nihduhanskapi oyakihipi he.

26 Hecen taku iyotan cistinna kin he oyakihipi s̄ni ehantanhan, unma kin on tokeca ecin nagiyeci-yapi he.

27 Mnahcahca kin he token icaga ece kin he iyukan po; htani s̄ni qa nakun wakahmun s̄ni; tuka heciyapi ce, Solomon token okitanin ešta, dena wanji iyecen wakoyake s̄ni.

28 Hecen Wakantanka peji anpedehan magata hiyeya, qa heyakecinhan petan ehpeyapi kin hee kaeš wokoyake qu ehantanhan, kitanna wicayadapi kin, niš iyotan wokoyake niçupi kte s̄ni he.

29 Qa taku yatapi qa datkanpi kte cin he ihnihdapi s̄ni po; qa nakun waceṭunhdaya wacin yuzapi s̄ni po.

30 Maka oyate kin hena owasin hecen ihnihdapi ece; qa niye taku kin hena yacinpi kin Ateyayapi kin s̄nya ece.

31 Tuka Wakantanka tokiconze kin hee tokaheya ihnihda po, kinhan dena owasin koya niçupi kta.

32 Optaye cistinna kin, wiko-papi s̄ni po; wokiconze kin hee niçupi kta e Ateyayapi kin iyokipi ece.

33 Taku yatonpi kin wiyopekiya po, qa wicaqu po. Woyuha kukaka aye kte s̄ni, mahpiya ekta woyuha owihanke kte s̄ni hena icicaga po; heciya wamanon sa kiyedan u s̄ni, qa wamduškadan wayapote s̄ni ece.

34 Woyuha tukten niciyankapi hecinhan, is̄ eya nicantepi kin en un ece e kta.

35 Ipiyag kiton yaunpi kta, qa petijanjan nitawapi ideyahan un kta;

36 Qa niš wicašta wicayuhe cin kiciyuzapi kin eciyatanhan hdi kta ape hiyeye cin hena iyecen un po; tohan hdi qa tiyopa hdatoto kinhan wancake kiciyuhdokapi kta.

37 Wicayuhe cin hdi kinhan, ookiye kin tona wakta unpi iyewicakiye cin, hena wicayawaštep̄i; awicakehan heciyapi ce, Wicayuhe cin iye ipiyagkiton, qa ookiye kin hena wote kta iyotangwicakiye, ça u, qa owicakiye kta ce.

38 Hecen inonpa waktapi kin en, qa is̄ iyamni waktapi kin iyehan hdi, qa ecen iyewicaye cinhan, ookiye kin hena wicayawaštep̄i ece.

39 Qa de s̄nya po, tipi tawa kin wamanon sa tohan hi kta s̄nya unkanš, wakta un qa tipi kin kiciyuhdokapi kte cin anapte kta tuka.

40 Heon etanhan niš eya wiyeya un po; Wicašta Cinhintku kin tohan awacannipi s̄ni kinhan hehan u kta ce.

41 Unkan Inyan hehan heciya; Itancan, wiyacinpi kin de unkišnana unkoyakidakapi, qa is̄ owasin wicayaka he.

42 Unkan Itancan kin heya; Ookiyewanji waawanyagkiyapi kin he wayupike, ça okiksape cinhan, yuhe cin tiwahe kin yu-

hekiye kta, qa hecen iyehanyan wo wicaqu ece e kte cin he tuwe he.

43 Itancan tawa kin ku, qa taokiye wanji hecen econ yanka wanhdake cinhan, hee yawašte-pi ece.

44 Awicakehan heciciyapi ; Taku token tawaye cin he owasin yuhekiye kta ce.

45 Tuka ookiye kin he cante maben, Itancan kin tehan hdi kte šni ecin ; qa wicaookiye qa winyanookiye kin hena awicape, ça wote, ça wayatke, ça witkoi-çiye cinhan,

46 Ookiye kin he anpetu wan yuhe cin hdi ape šni, qa sdonkiye šni hehan hdi, qa kicakse, ça wacetunhdapi kin hena owicapeya oonyekiye kta.

47 Qa ookiye wanji yuhe cin tawacin kin sdonya, tuka wiyeya içihnake šni, qa tawacin kin okiçiye šni kinhan, he ota apapi kta.

48 Tuka tuwe sdonye šni kinhan, he is apapi kte cin iyecen ohanyan esta tonana apapi kta ce. Tuwe taku ota qupi kinhan, hee taku ota iwangapi kta ; qa wicašta kin tuwe taku ota yuhekiyapi ca, he iyotan ota kicapi ece e kta.

49 Maka akan peta iyayewaye kta wahi ; qa token wacanmi he, wanna ideyapi esta.

50 Tuka baptem wanji on baptem maqupi kta ; qa he tohanyan yuŝtanpi šni hehanyan a-oŝismayanpi ce.

51 Maka akan wookiye wicaqu wahi kecannipi he. Hiya, tuka wicayumdecapi kin is ee kta, eciciyapi ce.

52 Detanhan tipi wanjidan ohna zaptan yukanpi kta, qa yuomdecapi kta, yamni nonpa om, qa nonpa yamni om kicipajinpi kta.

53 Wicašta wan iye cinhintku kin kipajin kta, qa cinhintku kin is atkuku kin ; hunku kin cunwintku kin kipajin kta, qa cunwintku kin is hunku kin ; nakun kunku kin takošku kin, qa takošku kin is kunku kin kipajin ece e kta, eya.

54 Unkan nakun oyate kin hewicakiya ; Wiyolipeyata tanhan mahpiya wanji wankan u wandakapi eca, wancake, Magaju kta ce, ehapi : unkan ecetu ece.

55 Qa itokaga tate uya eca, Odidita kta ce, ehapi : unkan ecen hiyohi ece.

56 Wanaçilmanpi kin, niš mahpiya ite kin maka ko iyukcan oyakihipi ; tuka tokeca e nakaha kin idukecanpi šni he.

57 Han, niye cinka tokeca e taku owotanna kin idukecanpi šni he.

58 Tohan tuwe icazoniçiye cin kici wicoope awanyake cin ekta de cinhan, tahepi niyuškapi kte cin akite linca wo : okinni he wayaco kin ekta aniye kta, qa wayaco kin is akicita kin ekta niçu kta, qa hecen kaška nihnakapi kta.

59 Mazašadan ehake hince cin he tohanyan yecu šni hehanyan hetanhan yahdicu kte šni, eciciya ce, eya.

### WICOWOYAKE 13.

1 Unkan hehan en opapi kin wanjikji, Pilate token Galile wicašta heca we kin iye woŝnapi tawapi kin kici icicahiye ciqon, he okiyakapi.

2 Unkan Jesus waayupte ca hewicakiya ; Galile wicašta kin decen ecawicaonpi kin heon etanhan Galile wicašta owasin isanpa hena walitanipi sa kecannipi he.



3 Hiya; tuka niye nihduecepti s̄ni ehantanhan, niś eya owasin iyecen nitakunipi kte s̄ni, eciciyapi ce.

4 Qa iś Siloam conkaśke akeśahdogan awicahinlipaye, a wicakte qon, wicaśta owasin Jerusalem en unpi qon henana iyotan wicoħan śicapi, kecannipi he.

5 Hiya; tuka niye nihduecepti s̄ni ehantanhan, niś eya owasin iyecen nitakunipi kte s̄ni, eciciyapi ce, eya.

6 Unkan wiyacinpi kin de nakun owicakiyaka; Wicaśta wan hastanhanka iyuwi maga tawa kin en suken can wanji oju; unkan en waskuyeca ode hi, tuka takudan iyeye s̄ni.

7 Hehan hastanhanka iyuwi maga kicanye cin he heciya; Can kin de ekta omaka yamni wanna waskuyeca ode wahi, tuka ongedan iyewaye s̄ni ece; kawanka wo; tokeca ecin maka yuśagya han he.

8 Unkan waayupte, a heciya; Itancan kin, omaka kin de nakun ayuśtan wo, ecen ohomni maka waqe, a tacesdi en ewahnake kta;

9 Okinni waskuyeca icalıye kta; tuka wanice cinhan, hinakaha hehan yahdawanke kta ce.

10 Unkan anpetu wakan icunhan omniciye tipi wan ohna waonspewicakiya yanka :

11 Unkan iho, winoħinca wan waniyetu ake śahdogan hehanyan woniya waśake s̄ni kin yuha, tancan kin wanna pako icu, qa tokadan ihduowotanna s̄ni.

12 Jesus he wanyaka, unkan kico qa heciya; Winoħinca waniyazanke cin etanhan niciyuskapi ce.

13 Hehan nape kin ahnaka, un-

kan wancake owotanna icu, qa Wakantanka yaonihan.

14 Unkan anpetu wakan icunhan Jesus waasniyan kin on etanhan omniciye tipi idake cin he canteptanyan; hecen waayupte, a oyate kin hewicakiya; Wicaśta kin ģitanipi kte cin anpetu śakpe yukan ce; hecen anpetu kin hena en u po, qa asniyanpi kta ce; tuka anpetu wakan icunhan upi s̄ni po, eya.

15 Unkan Itancan kin waayupte a heciya; Wanaicıħbe cin, niyepi otoiyohi, anpetu wakan, tatanka qa iś sonsonna nitawapi kin yakiduskapi qa miniyatkekiya adapi s̄ni he.

16 Unkan winoħinca kin de Abraham cunwintkuwicaye cin wanji ee, Satan iho, waniyetu ake śahdogan hehanyan kaśka hnaka, he iś anpetu wakan icunhan kiyuskapi kte s̄ni iyececa he.

17 Unkan hena hecen eye ceħan, kipajinpi qon owasin ištecapi; unkan wokitaninyan taku econ qon hena owasin on oyate owasin iyuskunpi.

18 Hehan heya; Wakantanka tokiconze kin he taku iyececa he; qa taku e imdacin kta he.

19 Sinape sukaza wanji iyececa, he wicaśta wan icu, qa maga tawa kin en iyohpeya; unkan icage, a can tanka aya; unkan maħpiya okinyanpi kin adetka kin en iyahanpi ece.

20 Unkan ake heya; Wakan-tanka tokiconze kin he taku e imdacin kta he.

21 On napohiyapi kin he iyececa, he winoħinca wan icu, qa wotpanpi wiyutapi yamni en anahman, hecen ocowasin napogan ce.

22 Unkan otonwe qa otonwe ciqadan iyaza ye a, waonspekkiya; qa Jerusalem etkiya ya.

23 Unkan tuwe heciya; Itancan, niwicayapi kte cin hena tonananpidan he. Unkan hewicakiya;

24 Tiyopa cistiyedan kin he ohna dapi kta nina akita po: wicota ohna yapi akitapi kta, tuka okihipi kte šni, eciciyapi ce.

25 Tipi tawa kin tohan wanna najin hiyaye, ça tiyopa kin ecen ikikeu, qa itankan nayajinpi, qa tiyopa yakatotopi, qa; Itancan, Itancan, unkiciyuhdoka miye, ehapi; qa iye waayupte ça, Tonitanhanpi kin sdonwaye šni ce, eniciyapi kta;

26 Hehan niš hehapi kta; Nanke cin en wauntapi, qa wanyatkanpi ece; qa niš ocanku unkitawapi kin ohnahna waonspeyakiye cigon.

27 Tuka iye heye kta; Tonitanhanpi kin sdonwaye šni, eciciyapi ce; woowotanna šni eanonpi ece kin owasin mitantanhani iyaya po.

28 Abraham, qa Isaak, qa Jakob, qa wicašta wokcan owasin Wakantanka tokiconze kin en opapi tohan wandakapi, qa niyepi kin tankan iyayeniyampi kinhan, wicaceya hihdakokokapi ko yuke kta.

29 Wiyohiyampata, wiyolipeyata, waziyata, itokaga, hena kiya eciyatanhan au, qa Wakantanka tokiconze kin en iyotan kapi kta ce.

30 Unkan iho, ehake yakonpi kin hena tokaheyapi kta; qa tokaheyapi kin hena iš ehake yakonpi kta ce, eya.

31 Unkan anpetu kin he en Pharisee kin wanjikji ekta hipi qa heciyapi; Detanhan ye ça tokan iyaya wo; Herod nikte kta cin.

32 Unkan hewicakiya; Yapi

qa šungidan kin he heciya po; Iho, anpetu kin de qa nakun heyakecinhan, wakan šica napewicawaye ça, wayazankapi kin asniwicawaye kta, qa anpetu iciyamni kinhan mayuštampi kta ce.

33 Takomni anpetu kin de, qa heyakecinhan, nakun iyokihe kin he en mawani kta iyececa; ecaš Jerusalem itankan wicašta wokcan wanji te kte pica šni.

34 Jerusalem, Jerusalem, wicašta wokcan kin hena wicayakte, qa niye ekta u wicašipi qon hena inyan on wicayakininpi ece; eca ijehan anpaohotonna wan lupahu oħdateya cinca wicaptahi ece kin he iyecen niye nicinca kin wicacicipahi kta, tuka yacinpi šni.

35 Iho, yatipi kin otiwota eħpeniciyapi: qa, Tohanyan tuwe Itancan caje on u kin he yawaštepi nunwe, ehapi šni hehanyan wanmayadakapi kte šni, awicakehan eciciyapi ce.

#### WICOWOYAKE 14.

1 Unkan Pharisee itancan wanji ti kin en anpetu wakan icunhan wote kta tin iyaya; unkan Pharisee kin awanyag kuwapi.

2 Unkan iho, wicašta wan dropsi ececa kin he itokam yanka.

3 Hehan Jesus waayupte ça, wicoope aiapi kin, qa Pharisee kin hena hewicakiya; Anpetu wakan icunhan waasniyanpi kte cin iyowinwicakiyapi he.

4 Tuka inina unpi. Hehan wicašta qon eyaku, qa asniye, ça hdeši;

5 Qa waayupte, ça hewicakiya; Niyepi kin wanji tatanka qa iš šonšonna yatonpi, qa anpetu wakan icunhan makohdoka wan

ohinlipaye cinhan, wancake hdi-cuyakiyapi s̄ni naceca he.

6 Unkan hena on ayuaptapi kta okitpanipi.

7 Unkan wicakicopi kin wiya-cinpi wan owicakiyaka, oyanke tokapa ece kañigapi kin he wanyake çehan; qa hewicakiya;

8 Tuwe tohan kiciyuzapi kin ekta nicopi kinhan, oyanke tokapa kin en iyotanke s̄ni wo; okinni nikapeya kinihanpi wanji kicopi kta;

9 Kinhan, sakim nicopi kin he u, qa, Wicašta kin de kiyukan wo, eniciye cinhan, hehan hiñakaha woñištenya oyanke hakakta kin hee ekta idotanke kta ce.

10 Tuka nicopi kinhan ye, ça oyanke hakakta kin en iyotanka wo; hecen nico kin he tohan u kinhan, Koda, wankan wapa ya wo, eniciye kta; hecen om wota idotanke cin hena niyuonihanpi kta.

11 Tuwe kašta ihduwankantu kinhan, hee yuhukun iyayeyapi kta ce; qa tuwe ihduhukuye cinhan, hee yuwankantuya ayapi ece e kta.

12 Unkan hehan kico qon he heciya; Tohan wiyotanhan wotapi, qa is̄ hitayetu wotapi yakage cinhan, kodawicayaye, ça nihunkawanji, qa takuwicayaye cin, qa nikiyedani wijinya unpi kin, hena wicakico s̄ni wo; is̄ ake okinni nicopi, qa hecen nicicajujupi kta.

13 Tuka wotapi wan yakage cinhan, wañpanicapi, qa huha ksawahanpi, qa huštepi, qa istagongapi kin, hena wicakico wo;

14 Kinhan niyawaštepi kta ce; hena nicicajujupi kta okitpanipi nakaes̄, owotanpidan kinipi kte cin ekta nicicajujupi kta ce, eya.

15 Unkan opeya wota yankapi

kin etanhan wanji hena hecen eya nahon qehan, heciya; Wakankanka tokiconze kin en tuwe aguyapi yute kta hecinhan hee yawaštepi ce.

16 Unkan hehan heciya; Wicašta wan hitayetu wotapi wan tanka kage, ça wicota wicakico:

17 Qa wotapi kta wanna iye-hantu, hehan taokiye wan wicakicopi qon hewicakiye kta ye s̄i; U po, wanna taku owasin wiyeya hiyeya ce.

18 Unkan owasin okonwanjidan ihdatokanpi. Tokaheya kin he heciya; Makoce onspa opewaton, qa he wanhdag mde kta iyececa; ceciciya ce, micunni wo.

19 Unkan wanji tokeca heya; Tatanka tazaptan opewaton, qa iwicahdute mde kta; ceciciya ce, micunni wo.

20 Unkan wanji tokeca heya; Winohinca wan mduza, hecen wau owakitpani ce.

21 Unkan hecen ookiye qon he ku, qa heyapi kin yuhe cin ecen okiyaka. Unkan hinakaha tipi tawa kin s̄ihda, qa taokiye qon heciya; Koyahan wo, qa otowwe canku kin ekta ye, ça wañpanicapi kin, huha ksawahanpi, huštepi, istagongapi kin, hena den awicau wo, eya.

22 Unkan ookiye qon heya; Itancan kin, ehe cin he wanna ecen econpi, tuka nahahin okan ce, eya.

23 Unkan Itancan kin ookiye qon heciya; Ocanku hince cin, qa mahinatake ektakta ye, ça uwicakiya wo, hecen wati kin ojudan kta.

24 Heciciya ce; Wicakicopi qon wanjidan kaeš̄ wowah̄e cin etanhan onspadan yutapi kte s̄ni ce, eya.

25 Unkan wicota hinca kici



yapi; hehan ihduhomni qa hewicakiya;

26 Tuwe ekta mahi, qa atku-ku, hunku, tawicu, cinca, sunka-ku, tawinohtin kin, hena, qa iye ni kin hees koya siccekida sni ehantanhan, waonspewicawakiye cin wanji ee kta okitpani ce.

27 Qa tuwe kašta cansusbeca kin kicin, qa miyahna u sni ehantanhan, waonspewicawakiye cin wanji ee kta okitpani ce.

28 Niyepi kin wanji conkaške yakagapi kta kecannipi ehantanhan, ito tokaheya idotankapi, qa yahduŝtanpi kte cin iyena yatonpi hecinhan, he iyahdukecanpi sni he.

29 Hecanonpi sni kinhan, okin- ni oahemde kin he wanna eyahnakapi, qa yahduŝtanpi kte cin oyakitpanipi kinhan, tona wan- yakapi kinhan owasin iniŝapi, qa heyapi kta;

30 Wicašta kin de taku kage kta, tuka hduŝtan kta okihi sni ce.

31 Qa nakun wicaŝtayatapi wan wicaŝtayatapi tokeca azuye kte cinhan, ito tokaheya iyotanke, qa iye kektopawinge wikcemna wicayuhe cin hena on, tuwe ke- ktopawinge wikcemna nonpa yuha takpe u kin he itkokipa okihi kta hecinhan, he ihdukan sni naceca he.

32 Qa is, unma kin hinahin ite- han un, tuwe ekta ye ŝi, qa wo- kiyapi kida naceca.

33 Iho, he iyecen niyepi kin tuwe taku yuhe cin owasin tpa- gan sni ehantanhan, waonspewi- cawakiye cin wanji ee kta oki- tpani ce.

34 Miniskuya he wašte; tuka miniskuya woskuye kin en un sni ehantanhan, taku ecin on skuya kagapi kta he.

35 Maga qa watuŝekŝeca paha

kin unmana on wašte sni; tuka tankan ehpeyapi ece. Tuwe noge winahon yukan hecinhan, nahon kta ce.

### WICOWOYAKE 15.

1 Unkan hehan wamnayanpi qa walitanipi sa, hena owasin nahonpi kta e on en ahi.

2 Unkan Pharisee kin wowapi kagapi ko ikapapi qa heyapi; Wicašta kin de walitanipi sa iyowinwicakiye qa om wota eee.

3 Hehan wiyacinpi kin de owi- cakiyake qa heya;

4 Niyepi kin etanhan wicašta wanji tahinca wanunyanpi opa- winge wicayuhe qa, wanjidan kitanin sni kinhan, wikcemna nacinwanka sanpa nacinwan- ka kin hena makotahedan en awicayuŝtan, qa tanin sni qon he tohanyan iyeye sni hehanyan okide sni naceca he.

5 Qa tohan iyeye cinhan, wi- yuŝkinyan hiyete akan akionpa ece.

6 Qa wanna tiyata ki eca, ko- dawicaye qa, ikiyedani tipi kin hena witaya wicakico, qa hewi- cakiya; Miciiyuŝkin po, tahinca wanunyanpi wan makitanin sni qon he wanna iyewakiya ce.

7 Heciciyapi ce; he iyececa, walitanipi sa wanjidani iyopeiçi- ya eca, mahpiya ekta wiyuŝkin- pi ece e kta, wicašta owotanna qa walitanin on iyopeiçiyapi kta iyeceçapi sni wikcemna nacin- wanka sanpa nacinwanka on iyecen wiyuŝkinpi kte sni.

8 Qa nakun winohinca tuwe kaŝpapidan wikcemna yuhe, qa wanji togehpekiye cinhan, he- cen petijanjan ideye, qa tipi kin kahinte, qa tohan iyekiye sni kin hehanyan okide sni naceca he.

9 Qa tohan wanna iyeye cinhan, kodawicaye cin, qa ikiyedan tipi kin hena witaya wicakico qa hewicakiya; Miciiyu-škin pe, kašpapidan toki ehpewakiye ciqon he wanna iyewakiya ce.

10 He iyecaca wahtanipi sa wanjidan iyopeiçiya eca, on Wakantanka taohnihde kin wicito-kam wiyuškinpi ece, eciciyapi ce.

11 Unkan heya; Wicašta wan cinhintku nonpa.

12 Unkan hakakta kin he atkuku kin heciya; Ate, woyuha mitawa kte cin he micu wo. Unkan woyuha kin akipam wicacu.

13 Unkan iyohakam anpetu tonana hehan cinhintku hakakta qon he taku owasin witaya tpa-hi, qa itehanyan makoce wan ekta icimani iyaya: qa hen šica-ya oħanyanpi kin on taku yuhe cin hdutakuni šni.

14 Unkan wanna owasin hdu-sote çehan, makoce kin he en wicaakiħan tanka icaga; hehan iye wicakiš un.

15 Qa makoce kin hen unpi kin wanji ekta ye ça kici yanka: unkan he kukuše wo wicacu kta e maga kin ekta ye ši.

16 Unkan omnica kukuše yu-tapi kin hee etanhan wipiiçiyewacin; tuka tuwedan takudan qu šni.

17 Unkan içiksuye çehan heya; Ookiye opetonpi heca aguyapi iyakiçuya yuhapi kin tona ate wicayuha hwo; qa miye e wotektehdapi on atakuni šni amayan ce.

18 Ito nawajin qa ate ekta wadhde kta, qa hewakiye kta; Ate, maħpiya kin en, qa niye nakun nitokam wawahtani:

19 Qa detanhan cincamayaye

kta iyemacece šni; wicašta ope-wicayaton kin he iš wanji iyecaca makaga wo, epe kta ce.

20 Unkan najin hiyaye ça atkuku kin ekta hda. Tuka nahahin itehan atkuku wanhdake ça on-šikida, qa ekta inyang ye ça, poskin hduze ça i itputaka.

21 Unkan cinhintku kin heciya; Ate, maħpiya kin en qa niye nitokam wawahtani; qa detanhan cincamayaye kta iyemacece šni ce.

22 Tuka atkuku taokiye kin hewicakiya; Šina iyotan wašte kin he aupi qa inkiya po; qa mazanapeupe wan nape kin en iyekiya po, qa hanpa ohekiya po:

23 Qa ptejicadan cemyapi kin he den aupi qa kte po; wauntapi qa unkiyuškinpi kta ce:

24 Micinkši kin de ta, tuka kini; tanin šni, tuka iyeyapi ce, eya. Unkan hinnakaha wiyuškinpi.

25 Tuka cinhintku tokapa qon he magata un; unkan ti kiyedan ku hehan dowanpi qa wacipi naħon.

26 Unkan ookiye wanji kipan, qa token he kapi hecinhan he iwanga.

27 Unkan heciya; Nisunka hdi; unkan ni un, qa zaniyan hdi kin on etanhan niyate ptejicadan cemyapi qon he kikte ce, eya.

28 Unkan hecen šiħda, qa tin kihde wacin šni: hehan atkuku kin tankan hiyu, qa cekiya.

29 Unkan waayupte ça atkuku kin heciya; Wanyaka wo, wanna waniyetu ota ociciye ça tohinni noiie kawape šni; hececa ešta kodawicawaye cin om wimduškin kta e tacincadan wan tohinni mayaqu šni.

30 Tuka niçinkši witkowiŋpi kin om woyuha nitawa kin tem-

niciye cin de hdi ca, wancake ptejicadan cemyapi kin he yeci-caŕa ce, eya.

31 Unkan heciya; Cinś, ohin-niyan mici yaun, qa taku mitawa kin he iyulpa nitawa.

32 Nisunka kin de ŕa, unkan kini; tanin śni, unkan iyeyapi kin, on etanhan ito cante unwa-štepi, qa unkiyuśkinpi kte cin he hecetu ce.

### WICOWOYAKE 16.

1 Hehan waonspewicakiye cin hewicakiya; Wicašta wijica wanji waawanyake wan yuha; unkan he yuhe cin woyuha tawa yutakuni śni ce, keya okiyakapi.

2 Hehan kico qa heciya; Taku eniciyapi kin de toketu he; waawandake cin ito ohdaka wo; wanna waawandake cin aduŕtan kta ce.

3 Unkan waawanyake cin can-te mahen heya; Token ecamon kta he; waawanmdake cin he mayuhe cin imicicu; mahqapi kin owakitpani, qa timatayapi kin he imašteca.

4 Taku ecamon kte cin he sdonwakiya, heon tohan waa-wanmdake cin he etanhan he-yata iyemayanpi kinhan, tipi kin en tin hiyumayanpi kta ce.

5 Unkan hecen yuhe cin tona ikiczopi qon owasin wicakico, qa tokaheya kin he heciya; Ma-yuhe cin tona nahalin yecu śni he.

6 Unkan, Wihdi iyutapi opa-winge ce, eya. Unkan heciya; Koyahanna wowapi nitawa kin ehdaku, qa iyotanke, a wikcemna zaptan e okiwa wo.

7 Unkan wanji tokeca hehan heciya; Qa niś tona nahalin yecu śni he. Unkan, Aguyapisu iyutapi opawinge ce, eya. Unkan

heciya; Wowapi nitawa kin ehdaku, qa wikcemna ŕahdogan e okiwa wo.

8 Unkan yuhe cin waawanya-ke owotanna śni kin yaonihan, okiksamya econ kin heon etanhan: maka kin de cincapi kin iwicacage cin en iyoyanpa cinca kin isanpa ksapapi ece.

9 Unkan miś heciyapi; Wo-yuha owotanna śni kin on tawa-ŕitku icicaga po; hecen tohan niye oniĕhipi śni kinhan, iye tipi owihanke kte śni en tin hi-yuniciyapi kta ce.

10 Tuwe taku iyotan cistinna on wicaka hecinhan, hee taku ota nakun on wicaka ece; qa tuwe taku iyotan cistinna kin on owotanna śni hecinhan, hee taku ota kin nakun on owotanna śni ece.

11 Hecen woyuha owotanna śni kin he on wicayakapi śni ehantanhan, wicake cin he tuwe ecin yuheniciyapi kta he.

12 Qa wicašta tokeca taku tawa kin on wicayakapi śni ehantanhan, niye nitawapi kin hee tuwe ecin niĕupi kta he.

13 Ookiye kin tuwedan yuhe cin nonpa en wowidagiĕiye kta okihi śni; wanji ŕicedake kta, qa unma iś waŕtedake kta; qa iś wanji en iyaihdaŕke kta, qa unma kin iś ekta ewacin kte śni. Wakantanka qa mammon napin en wowidagniĕiyapi kta oyakhipi śni ce.

14 Unkan Pharisee kin wakan-pi kin, hena owasin nahonpi; qa wowihayapi.

15 Unkan hewicakiya; Wica-šta kin wicitokam ihdaowotanpi-dan kin he niyepi; tuka Wakan-tanka nicante ozepi kin he sdon-niyanpi ce: ecaeś wicašta ekta taku takudapi hince cin hee Wa-kantanka waliteda śni ece.



## WICOWOYAKE 17.

16 Wooke qa wicašta wokcan kin hena Johannes hehanyan; tuka hetanhan Wakantanka to-kiconze kin oyakapi ece, qa owasin en opapi kte hinca.

17 Mahpiya maka ko tokan iyaye kte cin he aoptetu, qa wooke oowa wanjidan kaeš yu-ecetupi kte šni kin hee tehiika ce.

18 Tuwe tawicu ehpekiye ça wanji tokeca yuze cinhan, hee wawicilahapi econ ece: qa hihnaku ehpeye ciqon he tuwe yuze cinhan he wawicilahapi econ ece.

19 Wicašta wanji wijica, he wokoyake stan qa minihuha zimzipedan ece koyaka, qa anpetu otoyohi wiyuškinyan un.

20 Nakun wicašta wałpanica wan Lazaros eciyapi, he tatiyopa kin en ahionpapi, tancan owancaya lidihdi;

21 Qa wicašta wijica wahna wotapi tawa kin etanhan ošnašna hinłpaye cin hena yunkiya-pi kta cin. Tuka šunka kin en ahi, qa lidihdi kin sdipapi.

22 Unkan wałpanica kin he řa; qa mahpiya ohnihde kin Abraham maku kin ekta ayapi. Wicašta wijica qon is eya řa, qa hapi.

23 Unkan wakanšica tipi kin en kakiš yanke řehan, wankan etonwe, ça tehan tanhan Abraham wanyaka; qa maku kin ohna Lazaros yanka.

24 Unkan heya niyan; Ate Abraham, onšimakida qa Lazaros u ši wo, napsukaza inkpa kin mini en oputkan qa ceji makasni kta; oide kin de ohna makakija ce.

25 Tuka Abraham heya; Cinš, yani qon he ehan taku waštešte yahduha, qa Lazaros taku šikšica yuha, he kiksuya wo; tuka

nakaha iye kicanptapi qa niye kakišniyanpi.

26 Qa nakun unkiyotahedan kaksiza wan tanka yanka; hecen tona deciya tanhan niye ekta ye wacinpi keš okitpanipi ece; qa nakun heciya tanhan den ekta unhipi kta okitpanipi ece.

27 Hehan heya; Heon ate, ceciciya ce, ate ti kin ekta ye yaš kta;

28 Misunka zaptan, hena wovicakiyake kta; is eya okinni wokakije kin de en upi nun ce.

29 Abraham heciya; Moses qa wicašta wokcan kin hena yuhapi; hena is anawicagoptanpi ešta šni.

30 Tuka heya; Hiya, ate Abraham; tuka řapi kin eciyatanhan wanji ekta wicai unkanš, ihdu-ecetupi kta tuka.

31 Unkan heciya; Moses qa wicašta wokcan kin hena anawicagoptanpi šni ehantanhan, řapi kin eciyatanhan wanji kini qeyaš, nakun wicadapi kte šni ce, eya.

## WICOWOYAKE 17.

1 Hehan waonspewicakiye cin hewicakiya; Wałtaniyapi kin u kte šni pica šni; tuka tuwe eciyatanhan hena u kinhan, hee wotehi kiciyanka ece.

2 Dena cikeistinpidan kin tuwe wanji wałtaniye cinhan he inyan wiyukpan wanji tahu kin en napingiyapi, qa miniyowanca kin oiyohpeyapi unkanš, eeš wašte kta tuka.

3 Iwanihdaka po. Nisunka šicaya ecanicon kinhan kišica wo, qa iye iyopeiřiye cinhan, kici-cajuju wo.

4 Qa šakowin akihde anpetu wanjidan šicaya ecanicon, qa šakowin akihde anpetu wanji-

dan niye ekta ihduhomni, qa, Iyopemiciya ce, eniciye cinhan, hecen yecicajuju kta ce, eya.

5 Unkan wahošiyapi kin Itancan kin heciyapi; Wacinunyanpi kin unkiyusanpa miye.

6 Unkan Itancan kin heya; Sinape sukaza wan iyecen wacinyayapi kinhan, sukamin can kin de, Hute ihdamna qa miniwanca kin en huicihde wo, eyakiyapi kta, kinhan ananigoptanpi kta tuka.

7 Tuka niyepi kin wanji tukte taokiye wan yuha, mahyumdu qa is wanunyanpi wihanwicakiya un, qa tokešta maga kin eciyatanhan hdi kinhan, Iho wo, ye ca wota iyotanka wo, eciye kta he.

8 Qa is kaken, Woyute wiyeya micihnake ca, ipiyagkiton qa omakiya wo; qa mis tohan wawate ca wandatke cinhan, iyohakam nis ito wayate ca wadatke kta ce, eciye kte šni he.

9 Hecen ookiye kin he taku econ šipi kin ecen econ kin, on etanhan wopida eciye kta he. Hepece šni ce.

10 Nis eya iyecen taku token econ nisipi kin, owasin ecen duštanpi kinhan, heya po; Ookiyewakamna šni kin heuncapi; taku econkupi kta iyecece cin hecedan econkupi ece.

11 Unkan Jerusalem ekta ye cehan, Samaria qa Galile cokayayoopta iyaya.

12 Qa otonwe wan en i qehan, wicašta wikcemna lepros ececapi itkokipapi, qa itehan hinajinpi:

13 Qa ho wankan iyeyapi qa heyapi; Jesus, Itancan, onšun-kida miye.

14 Unkan wanwicayake cehan, hewicakiya; Wawayušnapi kin ekta wicaya po, qa wan-

yagičiya po. Unkan ekta yapicunhan akisnipi.

15 Unkan wanji wanna asni sdotkiye cehan, ihdamna, qa hotankakiya Wakantanka yaonihan;

16 Qa siha kin en ite makipuskin elpeiciye ca, wopida eciya: unkan he Samaria wicašta kin heca.

17 Unkan Jesus waayupte ca heya; Wikcemna asniwicayapi šni he: tuka napeinwanka kin hena tokiya unpi he.

18 Wakantanka yaonihan kta hdipi kin tuwedan iyeyapi šni, oyate tokeca etanhan kin de isnana ce.

19 Hehan heciya; Najin qa hda wo; wicayada kin he asni-niyan ce.

20 Unkan Pharisee kin is Wakantanka tokiconze kin he tohan hiyohi kta hecinhan, he iwangapi qehan, waayupte ca hewicakiya; Wakantanka tokiconze kin he wowanyake on hi kte šni.

21 Nakun, Iho, dee ce, qa iho, kae ce, eyapi kte šni: Wanyaka po, Wakantanka tokiconze kin he mahen niunpi ece.

22 Hehan waonspewicakiye cin hewicakiya; Anpetu wan hiyohi kta, Wicašta Cinhintku kin anpetu tawa kin wanji wandakapi kte šni.

23 Qa, Iho dee, qa iho kae ce, eniciyapi kta; tuka wiciyahna yapı šni po, qa owicapapi šni po.

24 Wakanhdi malpiya ihukuya tokiyatanhan wiyatpa u, qa malpiya ihukuya unma ekta iyahde ece kin he Wicašta Cinhintku anpetu tawa kin en iyecece kta.

25 Tuka ito tokaheya taku ota on iyotanhan iyekiye kta, qa

wicoicage kin de on heyata iye-yapi kta ce.

26 Unkan Nowa taanpetu qon en token unpi qon, Wicašta Cinhintku taanpetu kin en he iye-cece kta.

27 Nowa wata kin en okipe ciqon anpetu kin hehanyan wotapi, qa wayatkanpi, tawicutonpi, qa hihnatonpi ece; unkan minitan u, qa owasin owihankewicaya.

28 Qa nakun Lot anpetu tawa qon en is eya iyececa, wotapi, qa wayatkanpi, wopetonpi qa wiyopeyapi, wojupi qa ticagapi ece:

29 Tuka Lot Sodom etanhan tankan hinape ciqon anpetu kin hee hinca en mahpiya kin eciyatanhan peta, mazakan noge iyuwintapi kin ahna hinhe, qa owasin owihankewicaya.

30 Wicašta Cinhintku kin yuotaninpi kte cin he iyecece kta ce.

31 Anpetu kin he en tuwe tipi akan yanke qa tawahpaya timahen hiyeye cinhan, kun ku qa ehdaku kte šni; qa tuwe magata un kinhan, is eya taku hekta un kin ekta ihdamna kte šni.

32 Lot tawicu qon he kiksuya po.

33 Tuwe wiconi tawa kpatan cin kinhan, he toki ehpekiye kta; qa tuwe wiconi tawa toki ehpekiye cinhan, hee hduhe kta.

34 Heciciyapi ce; Hanyetu kin he en wicašta nom owinja wanjidan akan wankapi kta; wanji icupi kta, qa unma kin is ehpeyapi kta.

35 Winyan nonpa akiptan wotpan unpi kta; wanji icupi kta, qa unma kin is ehpeyapi kta.

36 Wicašta nom magata unpi kta; wanji icupi kta, qa unma kin is ehpeyapi kta ce.

37 Unkan waayuptapi qa heciyapi; Itancan, tukte etu he. Unkan hewicakiya; Tukten wicatančan wanka eca, hen wamdi kin kawitaya immiciyapi ece e kta.

## WICOWOYAKE 18.

1 Unkan wicašta kin ohinniyany wocekiye eyapi kta, qa iyakicunnipi kte šni e on wiyacinpi wan owicakiyaka;

2 Qa heya; Otonwe wan en wiyukčan wanji Wakantanka kokipe šni, qa nakun wicašta wicakinihan šni.

3 Unkan otonwe kin he en wiwazica wan, he wiyukčan kin ekta hi qa, Makipajin kin he tomicicon ye, eya.

4 Unkan tokaheya econ wacin šni; tuka ocim cante mahen heya; Wakantanka kowakipe šni, qa nakun wicašta kin wicawakinihan šni qeyaš;

5 Wiwazica kin de nagiyemaye cin on etanhan ito towecicon kta; okinni ohinni hecetu u kinhan wacin iyokišinmaye kta naceca ce.

6 Unkan Itancan kin heya; Wiyukčan owotanna šni ie cin he nahon po.

7 Unkan Wakantanka tona wicakahnige, qa anpetu hanyetu ko cekiyapi kin, hena tehan towicakicon šni qeyaš, ocim econ kte šni he.

8 Ihnuhanna towicakicon kta, eciciyapi ce. Tuka Wicašta Cinhintku kin he tohan hi kinhan, maka akan wacinyanpi iyeye kta he.

9 Unkan apa iye ohan owotanna icidapi, qa token kin walte-wicadapi šni kin, hena wiyacinpi kin de owicakiyaka.

10 Wicašta nonpa tipi wakan kin ekta cekiya ipi; unma kin



Pharisee heca, qa unma ís wamnyanpi kin heca.

11 Unkan Pharisee kin ísnana najin, qa kaken wocekiye eya; Wakantanka, wicašta tokeca iyemacece śni, wawicakipi sa, oħan owotanpidan śni, wawicihalıhıpi econpi sa, qa wannaye cin dee kaeś iyemacece śni heon wopida eciciya.

12 Anpetu wakan okitahedan nonpa akıhanmiçiyeye ça taku mduhe cin owasin etanhan iwıkcemnamna kin wicawaqu ece.

13 Unkan wannaye cin ís itehanyan inajin, qa íšta ee kaeś wankan mahpiya kin ekta ikikeu śni; tuka maku kin ohna aıçipe, ça heya; Wakantanka onśımakida wo, wawalıtani sa.

14 Wicašta kin de yuwotanpidan tiyata kihda, qa unma qon hee śni, eciciyapi ce: Qa tuwe ihduwankantuya kinhan, he yuhukun iyeyapikta; qa tuwe ihduhukuye cinhan, hee yuwankan ayapi kta ce.

15 Unkan hokśıyoqopa kin nakun wicayutan kta e en awicahipi tuka waonspewicakiye cin he wanyakapi qehan, wicakiścıcapı.

16 Tuka Jesus wicakico, qa heya; Hokśıyoqopa kin ekta mahipi kte cin iyowinwicakiya po, qa telındapi śni po; Wakan-tanka tokiconze kin he hececapı etanhan ece.

17 Wowicake ecıyatanhan heciciyapi; Tuwe hokśıyoqopaiyecıca Wakantanka tokiconze kin icu śni kinhan, he tokadan en ope kte śni çe.

18 Unkan wicašta ihdawa wanji wiwange ça heya; Waonspewicakiye wašte, token ecamon, qa owıhanke wanin wiconi ohimiçiyeye kta he.

19 Unkan Jesus heciya; Toke-

ca e wašte emayakiya he; tuwedan wašte śni; Wakantanka hecedan wašte.

20 Woahope kin hena onnispe; Wawicihalıhıpi ecanon kte śni; Tin wıçayakte kte śni; Wamanon kte śni; Woitonśniyan wodake kte śni; Niyate nihun kici wıçahduonıhan wo.

21 Unkan heya; Macistina ehantanhan hena owasin ahowapace.

22 Unkan Jesus hena naħon qehan heciya; Nahanħın taku wanji iyotpani yaun; taku yaton kin owasin wıyopekiye çawalıpanicapı kin wıçakıpanni wo, kinhan mahpiya ekta woyuha duhe kta ce; hehan u qa mıhakam un wo.

23 Unkan he naħon qehan nina iyokiścıca; wijice ĩınca nakaeś.

24 Unkan nina wacin iyokiścıce cin he Jesus wanyake çehan, heya; Wowijice tonpi kin hena Wakantanka tokiconze kin en yapi kte cin he telıke ĩınca.

25 Wicašta wijica wan Wakan-tanka tokiconze kin en ye kte cin he telıka, qa kamel heca wanji tahınspacıqadan ohıdoka kin ohna ye kte cin hee kaeś aoptetu ce.

26 Unkan tona he naħonpi kin hena heyapi; Hehan tuwe ni kta he.

27 Unkan heya; Wicašta kin ekta taku econpica śni kin, he Wakantanka ekta econpica ece.

28 Unkan Inyan heya; Iho, unkiś taku owasin untpaganpi, qa niyahna unyakonpi ce.

29 Unkan hewicakiya; Awıcakehan heciciyapi ce, Wicašta kin tuwe ti kin, qa hunkakewıçaye cin, qa hunkawanjıtku, qa tawıcu, qa cinca, hena wanji Wakantanka tokiconze kin onkpagan kinhan,

30 Hee dehan nakaha taku

sampa ota yuhe kta, qa wiconi u kte cin he en wiconi owihanke wanica yuhe kta ce.

31 Unkan akenonpapi kin ewicayaku qa hewicakiya; Iho, Jerusalem ekta unyanpi, qa wicašta wokcan Wicašta Cinhintku kin on token owapi qon owasin yucetupi kta.

32 Oyate tokeca napepi kin en wicaqupi kta; hecen ištenyapi, qa wawicanksiya kuwapi, qa atagošapi kta;

33 Qa kapsinpsintapi qa teyapi kte; unkan anpetu iyamni kinhan kini kta ce, eya.

34 Unkan ecaca okašnigapi šni, qa oie kin de anawicakihmanpi, qa taku oyakapi kin sdonyapi šni.

35 Unkan Jeriko ikiyedan wanna u qehan, wicašta wan ištagonge canku icahda wada yanka.

36 Unkan wicota ahiyaye cin he nañon qehan, he token kapi hecinhan he iwicawanga.

37 Unkan, Jesus Nazareth etanhan kin he hiyaya ce, eya okiyakapi.

38 Unkan hotankakiya heya; Jesus Dawid Cinhintku kin onšimakida wo.

39 Unkan tokahanpi kin hena iyokipi šni, inina yanke kta; tuka heon iyotan, hotankakiya heya; Jesus Dawid Cinhintku kin onšimakida wo.

40 Unkan Jesus inajin qa aupi kta kewicakiya. Unkan wanna kiyedan u qehan, wiwange ça,

41 Token ecacicon kta yacin he, eya. Unkan iye, Itancan, watonwe kta, eya.

42 Unkan Jesus heciya; Tonwan wo, wacinyaye cin he ninyan ce.

43 Unkan wancake tonwe ça iyahna hiyu, qa Wakantanka

yaonihan: unkan oyate kin he wanyakapi qehan, owasin Wakantanka yatanpi.

## WICOWOYAKE 19.

1 Unkan Jeriko en i, qa iyoopte iyaya.

2 Unkan iho, wicašta wan Zakeus eciyapi, wamnayanpi itancan kin wanji hee, qa wijica.

3 Unkan Jesus tuwe kin hecinhan he wanyag akita; tuka tancan ptecedan, hecen wicota kin on tokadan okihi šni.

4 Unkan tokata inyang ye ça sukamin can wanji adi, wanyake kta e heon, hen hiyaye kta nakaes.

5 Unkan Jesus wanna ehan i qehan, wankan etonwe ça wanyaka, qa heciya, Zakeus koyahanna kun hdicu wo, anpetu kin de yati kin en ito manke kta ce.

6 Unkan koyahanna kun ku, qa iyuškinyan iyowinkiya.

7 Unkan he wanyakapi qehan owasin ikapapi qa heyapi, Wicašta wan walhani sa he kici wote kta iyaya ce.

8 Unkan Zakeus najinhan najin qa Itancan kin heciya; Itancan wanyaka wo, woyuha mitawa kin hanke walhpanicapi kin wicawaqu ece; qa tuwe oitonšniyan taku iwecicu kinhan, topa akihde wecu kta ce.

9 Unkan Jesus heciya; Anpetu kin de wanikiyapi tipi kin de hiyohi; Abraham cincaye cin wanji hee nakaes.

10 Wicašta Cinhintku kin taku atakuni šni qon, he akite ça niye kta e heon hi ce, eya.

11 Unkan hena nañonpi qehan nakun wiyacinpi wan owicakiyaka; wanna Jerusalem ikiyedandan un, qa Wakantanka toki-

conze kin ecadan u kta kecimpi kin heon etanhan :

12 Qa heya ; Wicašta ihdawa wan makoce itehan wan ekta iyaya, wokiconze icu qa ku kta.

13 Unkan taokiye wikcemna wicayuhe cin, hena wicakico, qa mazaska tkeutapi wikcemna wicaqu, qa hewicakiya ; Tohan-yan wahdi šni hehanyan un po.

14 Tuka taoyate kin walite-dapi šni, qa tuwe iyahna yešipi, qa heyapi ; Wicašta kin de un-kidakapi kta uncinpi šni ce.

15 Unkan wokiconze kin icu qa hdi qehan, taokiye mazaska wicaqu qon hena wicakicopi kta keya ; wopetonpi kin on tona wanna hdamnanpi hecinhan, he sdonye kta.

16 Unkan tokaheya kin he u, qa heya ; Itancan kin, mazaska nitawa qon, he wanna mazaska wikcemna kamna ce.

17 Unkan heciya ; Han, ookiye niwašte ; taku tonana on wacin-yepica yaun, heon etanhan ito otonwe wikcemna idaka wo.

18 Unkan iyokihe kin he u, qa heya ; Itancan kin, mazaska nitawa qon, he wanna mazaska zaptan kamna ce.

19 Unkan iš eya heciya ; Niš otonwe zaptan idaka wo.

20 Unkan wanji tokeca u, qa heya ; Itancan kin, wanyaka wo, mazaska nitawa wanapin ohna yuha waun, he dee :

21 Wicašta nišake cin heon kocicipa ce ; taku eyahnake šni kin, he ece edaku ; qa woyaju šni kin he ece duksa ce, eya.

22 Unkan heciya ; Nii kin eci-yatanhan ciyaco kta, ookiye winicaštašni ; wicašta mašake cin he sdonyaya ; taku ewehnake šni kin he ece emdaku, qa wowa-ju šni kin hee mduksa ece.

23 Hecen tokeca mazaska mi-

tawa kin he iciyopekiciyapi kin en ade šni he ; kinhan wahdi kin ekta mitawa kin oicage ahna weca kta tuka ce.

24 Hehan hen najinpi kin hena hewicakiya ; Mazaska kin he ikicicupi qa tuwe mazaska wikcemna yuhe cin hee qu po.

25 Unkan heciyapi ; Itancan kin, he wanna mazaska wikcemna yuha ce.

26 Tona taku yuhapi kin hena owasin nakun wicaqupi ece e kta ; qa tuwe taku yuhe šni kinhan, taku yuhe cin hee kaeš ekiciyakupi kta ece, eciciyapi ce.

27 Tuka tokamayanpi iwicawada-ke kta cinpi šni qon hena den awicaupi qa mitokam wicakte po, eya ce.

28 Unkan hena hecen eye ce-han, tokata ye ça Jerusalem ekta itawankanhdé iyaya.

29 Qa Bethphage qa Bethani, paha wan Oliwe eciyapi kin, he wanna ikiyedan ehan i qehan, waonspewicakiye cin etanhan nonpa ye wicaši ;

30 Qa heya ; Otonwe iyotakons wanke cin he ekta ya po ; qa tokaheya en yaipi kinhan šukcincadan wan iyeyayapi kta, wicašta tuwedan tohinni akan iyotanke šni ; he kiyuškapi qa aku po.

31 Qa, Tokeca yakiduškapi he, tuwe eya iniwangapi kinhan, niš hehan, Itancan kin cin ce, eyakiyapi kta.

32 Unkan ye wicaši qon hena iyayapi, qa token ewicakiye cin ecen iyeyapi.

33 Unkan šukcincadan kiyuškapi icunhan, tuwe tawapi kin hena hewicakiyapi ; Tokeca yakiduškapi he.

34 Unkan, Itancan kin cin ce, eyapi.



## WICOWOYAKE 20.

35 Unkan Jesús kahdipi; qa wokoyake tawapi kin súkcinca kin aihpeyapi, qa Jesus akan yankekiyapi.

36 Qa ye cin tahepi canku ohna wokoyake kin hdumdayapi.

37 Unkan ikiyedan Oliwe paha kin apamahde iyayapi kin hehan wanna i qehan, waonspewicakiya wicota owasin, wicowaśake wicoľan wanyakapi qon owasin on etanhan hinakaha iyuskinpi, qa hotankakiya Wakantanka yatanpi,

38 Qa heyapi; Wicaśtayatapi tuwe Itancan caje kin on u kin he yawaśtepi ce; maľpiya ekta wookiye, qa iyotan wankantu ekta wowitan un nunwe.

39 Unkan Pharisee wicota en opapi qon apa heciyapi; Waonspekiye cin, waonspewicayakiye cin wicakiśica wo.

40 Unkan waayupte a hewicakiya; Dena inina unpi kinhan, inyan kin wancake howaye kta ce, eciciyapi ce.

41 Unkan wanna ikiyedan u, qa otonwe wanyake ehan, aceye, a heya;

42 Niye kin anpetu nitawa kin de en taku on wookiye duhe kte cin sdonyakiya unkanś: tuka wanna icimana iśta on wanyahdake kte śni.

43 Anpetu kin hiyonhipi kta, tona tokaniyanpi kin nihdukśan maka qapi, qa okśan niyankapi kta, qa ohomni ohinnian anapte nanijinpi kta:

44 Qa makata eľpeniyanpi kta, nicinca en niunpi kin hena koya; qa inyan nonpa icitakihna wanke śni eľpeniyanpi kta; anpetu en taku waśte nihiyohipi kin he sdonyakiye śni heon etanhan.

45 Unkan tipı wakan kin en tin iyaye, a tona ohna wiyope-

yapi, qa wopetonpi qon, hena tankan eľpewicaya;

46 Qa hewicakiya; Tipi mitawa kin he wocekiye tipi, eya owapi qon; tuka niye owamanonpi kin heca yakagapi ce.

47 Unkan anpetu iyohi tipi wakan kin ohna waonspekiya. Tuka wawayuśnapi itancanpi, qa wowapi kagapi, qa oyate kin en wicaśta ihdawapi kin, hena eyapi kta akitapi;

48 Tuka token econpi kta takudan iyeyapi śni; oyate kin owasin oie kin naľonpi kta cinpi ece.

## WICOWOYAKE 20.

1 Unkan anpetu kin hena wanji en tipi wakan kin ohna oyate kin waonspewicakiye, a wootanin waśte kin he oyake ehan, wawayuśnapi itancanpi, qa wowapi kagapi, qa wicahincapi kin, hena ekta ahi,

2 Qa okiyapi, qa heciyapi; Tukte wicookihi on dena decen ecanon hē; qa wicookihi kin de tuwe e niu hecinhan, unkokiyyaka po.

3 Unkan waayupte a hewicakiya; Miś eya taku wanji iciwangapi kta; he amayupta po:

4 Johannes baptem wicaqu qon he maľpiya eciyatanhan, qa iś wicaśta kin eciyatanhan, unma tukte he.

5 Unkan iye iyakitedan iapi, qa heyapi; Maľpiya kin eciyatanhan ce, unkeyapi kinhan, Tokeca wicayadapı śni he, eye kta:

6 Tuka, Wicaśta kin eciyatanhan, unkeyapi kinhan, oyate kin inyan on unkininpi kta; Johannes wicaśta wokcan kin heca kecinpi.

7 Unkan ayuptapi, qa tokiyatanhan un kin sdonyapi śni, keyapi.

8 Unkan Jesus hewicakiya ; Miś eya wicookihi tukte en dena ecamon kin nakun ociciyakapi kte śni ce.

9 Hehan wiyacinpi kin de oyate kin owicakiyaka : Wicaśta wan hastanhanka iyuwi maga wan oju, qa maḥkicanyanpi kin heca owicaqu, qa makoce iṭehan wan ekta tehan yanka.

10 Unkan wanna iyehantu qehan, taokiye wanji hastanhanka iyuwi maga waskuyeca kin etanhan qupi kta e, maḥkicanyanpi qon ekta yeśi ; tuka maḥkicanyanpi qon kaśtakapi, qa cokadan hdeśipi.

11 Unkan ake taokiye wanji tokeca yeśi ; unkan iś eya kaśtakapi, qa śikśicaya kuwapi, qa cokadan hdeśipi.

12 Unkan akeś iyamni wanji yeśi ; unkan iś eya taopi, qa tankan eḥpeyapi.

13 Hehan hastanhanka iyuwi maga tawa kin heya ; Token ecamon kta he. Micinkśi waśtewakidake cin, hee yewaśi kta ce ; okinni he wanyakapi kinhan yuonihanpi kta.

14 Tuka maḥkicanyanpi kin he wanyakapi qehan, iye iyakitedan iapi, qa heyapi ; Tawaye kte cin he dee ce ; iho po, unktepi kta ; hecen unkiye tawaunyanpi kta ce.

15 Hecen hastanhanka iyuwi maga itankan eḥpeyapi, qa ktepi. Heon etanhan hastanhanka iyuwi maga tawa kin token ecawicakicon kta he.

16 Ito ku kta, qa maḥkicanyanpi kin hena owihankewicaye, ça hastanhanka iyuwi maga kin he token wicaqu kta ce, eya. Unkan he naḥonpi qehan, Hece-tu śni ce, eyapi.

17 Unkan awicatonwe cehan heya ; Hecen wowapi en kagapi

qon he token kapi he ; Tipi kagapi kin inyan heyata iyeyapi qon hee wanna oise en itancan icaga ce :

18 Qa tuwe inyan kin he ahinḥpaye cinhan kaḥuḥugapi kta ; qa iś inyan kin tuwe ahinḥpaye cinhan, hee pamdu kta ce.

19 Unkan wawayuśnapi itancanpi, qa wowapi kagapi kin, hena he ehan iyahpayapi kta cinpi ; tuka oyate kin kowicakipapi ; wiyacinpi oyake cin he iye wicaka e iyukcanpi.

20 Unkan awanyag kuwapi, qa wanjikji iye owotanna konzapi kin hena iwanyakapi kta e ekta ye wicaśipi ; hecen oie kin iyahpayapi, qa wicaśta itancan towaśake qa tawacin kin en qupi kta.

21 Unkan hena wiwangapi, qa heyapi ; Waonspekiye cin, niye tanyan iyae, ça waonspeyakiya ece ; qa tuwedan en eyatonwe śni ; tuka Wakantanka ocanku tawa kin he awicakehan onspewicayakiya e sdonunniyanpi ce :

22 Iho, Kesar wamnayanpi kin unqupi, qa iś unqupi kte śni, unma tukte hecetu he.

23 Unkan wayupiya hnaye wacinpi kin he iwicayukan, qa hewicakiya ; Tokeca iyutanmayayapi he.

24 Kaśpapidan wanji makipazo po. Akan owapi qa wakagapi kin de tuwe tawa he. Unkan ayuptapi qa ; Kesar tawa ce, eyapi.

25 Unkan hewicakiya ; Heon Kesar taku tawa kin hena Kesar kicu po ; qa Wakantanka taku tawa kin Wakantanka kicu po.

26 Unkan oyate kin wicitokam oie kin iyahpayapi kte cin okitpanipi, qa waayupte cin he on inihanpi, qa inina hiyeya.

27 Hehan Sadukee ake wica-

## WICOWOYAKE 21.

kini kta wanica keyapi kin hena wanjikji en hipi ; wiwangapi,

28 Qa heyapi ; Waonspekiye cin, Moses kaken wowapi unki-cagapi ; Tuwe cincu tawicu ton qa cinca nica ecen te cinhan, iye sunkaku tawicu qon hduze ça cincu cinca icalikiciye kta ce.

29 Unkan hecen hunkawanjin-kiciyapi šakowin : unkan tokapa kin tawicu ton, qa cinca nica ecen ta.

30 Unkan iyokihe qon he hehan hduza ; tuka cinca nica ecen ta.

31 Unkan iyamni qon hduza ; qa šakowinpi qon owasin hecen hdzupapi, qa ecen tapi ; unkan cinca nicapi.

32 Unkan ehake winohinca is eya ta.

33 Iho, hecen wicakini kte cin ekta šakowin hdzupapi qon, hena tukte wanji tawapi kta he, eyapi.

34 Unkan Jesus waayupte, ça hewicakiya ; Maka kin de cinca kin tawicutonpi, qa hihnatonpi :

35 Tuka tona makoce kin he en opapi kte cin, qa wicate cin etanhan kinipi kta iyececa wicadakapi kin hena tawicu tonpi šni, qa hihnatonpi šni ece.

36 Qa nakun ake tapi kta okihipi šni ; tuka hena mahpiya ohnihde kin om akiyececapi ece, qa wicakini kin he hena cinca kin on etanhan Wakantanka cincawicaya ece.

37 Unkan wicate cin hena kiniwicakiyapi kta, Moses hee kaes can yuhaka ekta niciyaotaninpi ; Abraham Wakantanka tawa, qa Isaak Wakantanka tawa, qa Jakob Wakantanka tawa, Itancan kin eciye ciqon he ehan.

38 Tona tapi kin hena Wakantanka tawapi šni, tuka ni unpi kin hena : owasin iye ekta ni unpi ece.

39 Unkan wowapi kagapi kin wanjiksi hehan heciyapi ; Waonspekiye cin, tanyan eha ce.

40 He iyohakam tuwedan sanpa wiwanga tawatenye šni.

41 Unkan hewicakiya ; Token on Messiya Dawid Cinhintku kin eciyapi he.

42 Odowan wowapi kin en Dawid iye hinca heya ; Itancan kin Itancan mitawa kin heciya ; Mietapa kin ekta iyotanka wo,

43 Ecen tokaniyanpi kin hena nisiha oahe wicawakage kta ce.

44 Hecen Dawid Itancan eciya hecinhan, token on cinhintku kta he.

45 Unkan hehan oyate owasin nahon hiyeye cin en, waonspewicakiye cin hewicakiya ;

46 Wowapi kagapi kin itonwicapa po ; he iye šina hanskaska in omanipi, qa iciopekiciyapi kin en owicakiyapi, qa omniciye tipi kin oyanke tokapa, qa wotapi kin en ohehdepi tokapa kin, hena heceken cinpi :

47 Qa wiwazica tipi tawapi kin temyapi ; qa ihdutaninpi kta on wocekiye hanska eyapi ece ; hena is iyotan woyaco tanka iyahdeiciyapi kta ce.

## WICOWOYAKE 21.

1 Unkan wankan etonwe, ça wicašta wijicapi kin womnaye opiye kin en taku wicakupi kin ehpeya ayapi wanyaka.

2 Unkan wiwazica wanji walpanica kin is mazašadan nonpa en ehpeya e wanyaka.

3 Unkan heya ; Awicakehan heciyapi, Wiwazica walpanica kin de isnana ota en ehpeya ce.

4 Dena owasin taku iwicakiciyaye cin hee Wakantanka taku qupi kin en ehpekiyapi ece ;



tuka iye taku ton śni, etanhan taku on ni kte cin ocowasin en elipeya ce.

5 Unkan apa is tipi wakan kin inyan waštešte, qa taku wicaqupi kin on ayucopi kin, he cajeyatapi qehan, heya ;

6 Anpetu hiyohi kta, en taku wandakapi kin dena inyan nonpa icitakhna wanke śni elipeyapi kta ce.

7 Hehan wiwangapi, qa heya-pi ; Waonspekiye cin, tohan kinhan hena hecetu kta he ; qa hena hecetu kte cin wanna iye-hantu kinhan, taku on sdonyapi kta he.

8 Unkan heya ; Ibnuhan nihnan-yanpi kinhan ; wicota micaje kin on upi qa, He miye ce, qa wanna ecadan iyehantu kta ce, eyapi kta : tuka wicihakam yapi śni po.

9 Tuka okicize owodutatonpi ko cajeyatapi nayahonpi kinhan, nihinciyapi śni po ; ito tokaheya hena hecen hiyohi kta iyececa, tuka owihanke kin hinyahinke kte śni ce.

10 Hehan hewicakiya ; Oyate wan oyate tokeca azuye kta, qa wokiconze wan wokiconze tokeca on inajin kta :

11 Qa otakiya maka kin nina skanskan, qa wicaakihan, qa makošiksice, qa wowanyake wokokipe, qa malpiya kin eciyatanhan wowapetoktokeca, hena heceken yuke kta ce.

12 Tuka taku kin dena owasin itokaptu, micaje kin on etanhan iyanihpayapi, qa śicaya nicuwapi, qa omniciye tipi, kaška wicahnakapi tipi ko en aniyampi, qa wicaštayatapi wicašta iwicadakapi kin ko wicitokam aniyampi kta ce :

13 Unkan hecen on oniyakapi ece e kta.

14 Hecen icantekiçun po ; token waaduptapi kte cin he kanyehan awacimpi śni po :

15 Wicai wicoksape ahna ciçupi kta, hecen tokaniyanpi kin tuwedan taku iennihdepi kte śni, qa iyakapeniyampi kte śni.

16 Tuka hunkake wicayayapi, qa hunkawanjin wicayayapi, qa takuwicayayapi, qa koda wicayayapi kin, hena e wiyopeniyampi kta ; qa apa teniyampi kagapi kta ce :

17 Qa micaje kin on etanhan owasin niciyušepe kta.

18 Tuka paha wanjidan kaeš awinitukapi kte śni ce.

19 Wacinnitankapi kin on nicantepi kin hduha po.

20 Jerusalem ihduškan ozuye yankapi wandakapi kinhan, ihangyapi kte cin he wanna kiyadan e sdonya po.

21 Hehan tona Juda makoce kin en unpi kinhan, he kin ekta najicapi kta ; qa tona cokaya en unpi kinhan tankan inapapi kta ; qa okšan makoce wanke cin tona en yakonpi kinhan, ekta hdicupi kte śni.

22 Tokiçonpi anpetu kin hena ee ; hecen taku token owapi qon hena owasin ecen yušanpi kta ce.

23 Tuka anpetu kin hena en tona ihdušakapi, qa tona hokšin azinwicakiyapi kin hena wotehi wicakiciyanke kta ; maka kin akan wokakije tanka kta, qa wocanniye oyate kin de en awicaun kta.

24 Qa mazasagye ope kin on wankahanpi kta ; qa oyate kin owasin ektakta wayaka awicahdapi kta ; qa Ikcewicasta kin Jerusalem naatinzapi kta, ecen Ikcewicasta kin taku iyewicakihantu kta ce.

25 Anpetu wi, qa hanyetu wi,

qa wicanlipi kin hena ekta wwapetokeca yuke kta ; qa maka akan oyate kin yazanhdapi kta, qa wicotoketu tanin sni ; qa minwanca otaja ko sa wanke kta.

26 Wicašta kin kopa, qa maka akan taku hiyohi kte cin he ape hiyeye cin, hena on cante toki wicayanka tanin kte sni ece ; małpiya wowaśake kin hena huhuzahe kta heon.

27 Hehan Wicašta Cinhintku kin małpiya śapa wan akan, wowaśake qa wookitanin tanka hduha u wandakapi kta.

28 Unkan dena decen aye cinhan, hehan wankan etonwanpi, qa pa yuwankan icu po ; openicitonpi kin he wanna kiyadan u ce, eya.

29 Unkan wiyacinpi wan owicakiyaka : Suken can, qa can kin owasin, hena wanyaka po ;

30 Canwapa palia eca, mdoke-tu wanna ikiyedan, niye cinka wandakapi, qa sdoniyayapi ece.

31 Iho he iyececa, taku kin dena iyecetu wandakapi kinhan, Wakantanka tokiconze kin he wanna ikiyedan un e sdonya po.

32 Awicakehan heciciyapi, Wicoicage kin de tokan iyaye sni, ecen dena owasin iyecetu kta ce.

33 Małpiya kin maka ahna tokan iyaye kta, tuka mioie kin e tokan iyaye kte sni ce.

34 Unkan itonięipa po ; okinni tukten wotapi, qa witkopi, qa wiconi kin de awacinpi kin, hena on nicantepi kin niyuśakapi kta naceca ; qa hecen sdoniyakiyapi sni ecen anpetu kin he nihiyohipi kte.

35 Maka ite kin akan yakonpi kin owasin wohmuke wan iyeccen wicahiyohi kta ce.

36 Heon ohinniyan wakta po, qa cekiya po ; hecen taku hiyohi kte cin dena owasin icunom ida-

dapi, qa Wicašta Cinhintku kin itokam nayajinpi kta iyececa niyawapi kta ce.

37 Unkan anpetu icunhan tipi wakan kin ohna waonspekiya un ; qa hanyetu hehan tankan hdicu, qa paha wan Oliwe eciyapi kin he en yanka.

38 Unkan hanhanna hinca oyate kin owasin oie nañonpi kta e tipi wakan kin en ahi.

## WICOWOYAKE 22.

1 Unkan aguyapi napohiyapi sni yutapi woacakśin eciyapi kin, he wanna ecadan iyehantu kte.

2 Unkan wawayuśnapi itancanpi, qa wowapi kagapi kin, hena token econpi, qa ťeyapi kte cin he akitapi ; tuka oyate kin kowicakipapi.

3 Unkan akenonpapi kin etanhan, wanji Judas Iskariot eciyapi kin he Satan tancan mahen iyaya.

4 Unkan he ekta ye ca, wawayuśna itancanpi, qa akicitá itancanpi kin hena om wohdaka, token econ qa wicaqu kte cin heon.

5 Unkan iyuśkinpi, qa maza-ska qupi kta keciyapi.

6 Hecen wicada, qa wicota kin en unpi sni icunhan wicaqu kta akita.

7 Unkan aguyapi napohiyapi sni anpetu en woacakśin ktepi kte cin wanna hehantu.

8 Hehan Inyan qa Johannes ye wicaśi qa heya ; Ya po, woacakśin untapi kte cin he wiyeya unkičhnaka po.

9 Unkan heciyapi ; Tukten wiyeya unhnakapi kta yacin he.

10 Unkan hewicakiya ; Otonwe kin en yaipi kinhan, wicašta wan wakiśkokpa mini ohnaka yuha itkoniciyapi kta ; iho, iye

tukten tin kihde cinhan, iyahna ya po.

11 Qa tipi tawa kin heciya po ; Waonspekiye cin heniciya ce ; Wotapi tipi ohna woacaksin kin he waonspewicawakiye cin om wate kte cin he tukte e he.

12 Kinhan, wankan tipi wan tankaya, qa ayucopi e nicipazopi kta ; hen wiyeya hnaka po, eya.

13 Unkan iyayapi, qa token ewicakiye cion ecen iyeyapi ; qa woacaksin wiyeya hnakapi.

14 Unkan wanna iyehantu qehan, en iyotanka, qa wahošiyapi akenonpapi kin nakun.

15 Unkan hewicakiya ; Makakije kte cin he itokamya woacaksin kin de untapi kte cin nina wacin qon.

16 Qa heciciyapi ce ; Tohan Wakantanka tokiconze kin ekta yuacetupi šni kin, behanyan detanhan ake wate kte šni ce, eya.

17 Unkan miniyatkan kin he icu, qa wopida eye ça heya ; De icupi qa kicipamni po :

18 Qa heciciyapi ce ; Wakan-tanka tokiconze kin he tohan hiyohi šni kin, behanyan hastanhanka iyuwi waskuyeca kin etanhan mdatke kte šni ce, eya.

19 Unkan aguyapi kin icu, qa wopida eye, ça yušpašpa, qa wicaqu, qa heya ; Mitancan niyepi on qupi kin he dee ce ; decen miksuya econ po.

20 Unkan miniyatkan kin is eya wotapi iyohakamya wicaqu, qa heya ; Mawe niyepi kin on papsonpi kin, en okodakiciye teca kin, miniyatkan kin he dee ce.

21 Tuka iho, wiyopemaye kte cin he nape kin wahna wotapi kin akan miciun.

22 Unkan Wicašta Cinhintku kin token kiconzapi qon ecen ye

kta e hecetu ; tuka tuwe he wiopeya hecinhan he wicašta kin wotehi kiciyanka ce.

23 Unkan hinakaha iye iyakitedan tukte wanji hecon kte cin he ikiciwanh yeyapi.

24 Unkan tukte wanji iyotan yawapi kte cin he nakun hdokinicapi.

25 Unkan hewicakiya ; Oyate kin wicaštayatapi wicayuhapi kin hena is iwicadakapi, qa tona wicookihiya owicakihanyanpi kin hena ohanwaštepi, ewicakiyapi ece.

26 Tuka niš henicecapi kte šni ; tuka niyepi kin ekta tukte wanji tokapa kinhan, hee hakakta kin iyecece kta ce.

27 Wota yanke cin, qa wayutankiyapi kin, hena unma tukte iyotan tanka he. Tuwe wota yanke cin hee šni he. Tuka miš wayutankiyapi kin he iyeccen cicipi waun ce.

28 Wawiyutanmayanpi kin en kici maunpi kin he niyepi :

29 Heon Atewaye cin he wokiconze wan maqu kin he iyecen cicipi :

30 Qa hecen wokiconze mitawa kin en, wahna wotapi mitawa kin ekta wayatapi, qa wadatkanpi kta ; qa wicaštayatapi oyanke kin heca akan idotankapi kta, qa Israel wicoun akenonpapi kin wicadacopi kta ce.

31 Hehan Itancan kin heya ; Simon, Simon, iho, Satan niyuhe ça, aguyapi su iyecen niyucan kta e cin tuka ce.

32 Tuka wacinyaye cin he iyotpani kte šni e wocekiye eciciya ; qa tohan niš niyuhomnipi kinhan, nihunkawanji wicahduwašaka wo, eya.

33 Unkan heciya ; Itancan, wicokaške wiconče ko en nici mde kta wiyeya waun ce.



34 Unkan heya ; Simon, anpetu kin de anpaohotonna hoton śni, ecen yamni akihde sdonmayaye cin he anayakiħbe kta, eciciya ce.

35 Unkan hewicakiya ; Mazaska ojuha, qa wujuhadan, qa hanpa, hena codan yeciśipi qon he ehan, taku wanjidan kaes ini-ci-yotpanipi he. Unkan, Taku-dan śni ce, eyapi.

36 Hehan hewicakiya ; Tuka nakaha tuwe mazaska ojuha ton kinhan, ehdaku kta ; qa wujuhadan nakun : qa tuwe mazasagye nice cinhan, wokoyake tawa kin wiyopekiye, a wanji opeton kta.

37 Taku wowapi en kagapi qon, Wicoħan śica econpi kin om yawapi ce, eyapi kin he miye en yuacetupi kta, eciciyapi : Unkan dena miye on ecen econpi kta ce.

38 Unkan heciyapi ; Itancan, wanyaka wo, den mazasagye nonpa ce. Unkan, Henakeca ce, ewicakiya.

39 Unkan tankan hdicu, qa Oliwe paha kin ekta i ece qon, he ake ekta ya ; unkan waonspe-wicakiye cin is iyahna yapi.

40 Unkan wanna ehan i qehan, hewicakiya ; Wowiyutanye kin en idadapi kte śni e cekiya po.

41 Hehan wicicunonpa inyan ekta ehpeyapi kin hehanyan ecen i, qa canpeška makeħde inajin qa cekiya,

42 Qa heya ; Ate hecen nitawacin kinhan, miniyatkan kin de tokan imiciyaye kta ; tuka miye mitawacin kin hee śni, niye nitawacin kin hee ecen econpi nunwe.

43 Hehan malipiya eciyatanhan ohnihde wan en hi qa yu-waśaka.

44 Unkan nina ħin yazanħda

qehan, iyotan wokitanyan cekiya ; qa temni kin he we ośbuye tankinkinyan makata ħinħpaya se ececa.

45 Unkan cekiye cin hetanhan wanna najin ħiyaye, a waonspewicakiye cin en wicahdi qehan, wacin iyokiśicapi kin on iħtinmapi iyewicaya.

46 Qa hewicakiya ; Tokeca niħtinmapi he : najinpi qa cekiya po ; hecen wowiyutanye kin en yaipi kte śni.

47 Hena hecen eya icunhan, iħo, wicota, qa akenonpapi kin etanhan wanji Judas eciyapi kin, he wicitokam u, qa Jesus i ipu-take kta e ikiyedani ħiyu.

48 Tuka Jesus heciya ; Judas, Wicaśta Cinħintku kin i iputakapi wan on wicayaqu he.

49 Unkan kici unpi qon hena, taku toketu kte cin wanna wanyakapi qehan heciyapi ; Itancan, mazasagye on waaunpapi kta he.

50 Unkan wanji wawayuśna itancan taokiyeye wanji ape, a etapa kin eciyatanhan noge kin kaśpa.

51 Unkan Jesus waayupte a, Hehanyan iyowinmakiya wo, eye a noge yutan, qa asniyan.

52 Hehan Jesus wawayuśna itancanpi, qa tipi wakan kin en itancanpi, qa tokapapi en au qon, hena hewicakiya ; Mazasagye can ko yuha wamanon sa wan tatpe yapi se iyecen yahipi he.

53 Anpetu iyohi tipi wakan kin ohna opeya ciunpi qon ehan, tuwedan nape kin itkom ħiyumayakiyapi śni ; tuka dehan nakaha kin he niye nitawapi, qa otpaza wowaśake kin, eya.

54 Hehan yuzapi qa ayapi, qa wawayuśna itancan ti kin ekta aipi. Unkan Inyan itehan iħakam u.

55 Unkan itankan tipi kin en cokaya cetipi, qa ptaya iyotankapi qehan, Inyan is eya wicehna iyotanka.

56 Tuka petkahda iyotankehan yanke cin, hehan wikoška wan wanyake ça, opahte ça heya; Wicašta kin de is eya he kici un tuka ce, eya.

57 Unkan anakihbe, ça, Winohinca, he tuwe kin sdonwaye šni ce, eya.

58 Unkan iecadan wanji tokeca wanyake ça heya; Niš eya henitanhan ce. Unkan Inyan heya; Wicašta, hematanhan šni ce.

59 Unkan iyohakam wihiyayedan oape wanji ecetu, hehan wanji tokeca yaatinze ça heya; Galile wicašta kin de heca, on etanhan awicakehan is eya he kici un tuka ce.

60 Unkan Inyan heya; Wicašta, token ehe cin he sdonwaye šni ce. Unkan hecehnana, iahan icunhan, anpaohotonna kin hoton.

61 Unkan Itancan kin ihduhomi, qa Inyan atonwan. Hehan Itancan kin, Anpaohotonna hoton šni kin itokam yamni akihde anamayakilbe kta ce, eye ciqon, oie kin he Inyan kiksuya.

62 Hehan Inyan tankan kihde ça nina hin ceya.

63 Unkan wicašta Jesus yus unpi kin hena ilahapi qa apapi.

64 Qa ite kin akahpetonpi hehan, ite kin ohna apapi, qa heya iwangapi; Tuwe anipa hecinhan ito iyukcan wo.

65 Qa taku toktokeca ota itkom waostehdaya eciyapi.

66 Unkan wanna anpaohotonna qehan, oyate kin en tona tokapapi, qa wawayušna itancanpi, qa wawapi kagapi kin, hena mniciyapi, qa omniciye kin en aupi;

67 Qa heyapi; Messiya he niye hecinhan unkokiyaka po. Unkan hewicakiya; Ociciyakapi ešta wicayadapi kte šni.

68 Qa wiciwangapi ešta amayaduptapi kte šni, qa amayadustanpi kte šni.

69 De iyohakam Wicašta Cinhintku kin Wakantanka towašake etapa kin eciyatanhan iyotanke kta ce, eya.

70 Unkan owasin heyapi; Hecen Wakantanka Cinhintku kin he niye he. Unkan, He miye kehapi ce, ewicakiya.

71 Unkan heyapi; Iye i kin eciyatanhan unkiyepi hinca wana naunhonpi ce; hecen tokeca ecin sanpa wayaotaninpi unko-depi kta he.

### WICOWOYAKE 23.

1 Unkan wicota kin owasin najin hiyayapi, qa Pilate kapyapi.

2 Hehan hinnakaha wiyaonpapi, qa heyapi; De oyate kin owicayusiće, ça Kesar wamnyanpi qupi kin he telinda iyeunyanpi; qa iye Messiya Wicaštayatapi kin heca keiciya ce, eyapi.

3 Unkan Pilate wiwange ça heya; Juda Wicaštayatapi kin he niye he. Unkan ayupte, ça, Niye ecen eha ce, eya.

4 Hehan Pilate wawayušna itancanpi qa oyate kin hena hewicakiya; Wicašta kin de on taku šica iyewaye šni ce.

5 Unkan hecen iyotan wohitipike ça heyapi; Oyate kin owodutatonwicaya ece, qa Galile etanhan Juda makoce kin owancaya dehan oiyahdeya waonspekkiya ece.

6 Unkan Pilate Galile eyapi nañon qehan, wicašta kin he

Galile wicašta kin heca hecinhan he iwicawanga.

7 Unkan Herod taoyate kin hetanhan e Pilate sdonya, hehan Herod ekta iyayeya; he qe wanna Jerusalem en un.

8 Herod Jesus wanyake çehan nina iyuşkin; taku ota on nañon kin heon wanakajatanhan wanayaka cin; qa wowapetokeca wanji econ wanyake kta kecin.

9 Hehan iapi ota un wiwanga; tuka takudan ayupte şni.

10 Unkan wawayuşna itancanpi, qa wowapi kagapi kin, hena inajinpi, qa wohitiya wiyaonpapi.

11 Unkan Herod ozuye wicašta wicayuhe cin om takuda şni, qa ihaña kuwa, qa şina wan ayucopi in kiye, ç ake Pilate ekta iyayeya.

12 Unkan anpetu kin he en Herod Pilate kici kiciyuwaştepi; he itokamya tokakiciyapi.

13 Unkan Pilate wawayuşna itancanpi, qa itancanwicakiyapi, qa oyate kin hena witaya wicakico qehan, hewicakiya;

14 Wicašta kin de oyate kin owicayuşice cin wan iyecen mayakahipi; unkan iho nitokam iwanmdaka, tuka taku iyayaonpapi kin hena on, taku şica wicašta kin de en takudan iyewaye şni.

15 Qa nakun Herod hee kaes, ekta aye cişipi; unkan iho, te kte cin iyecece cin takudan eca-kiconpi şni.

16 Hecen wakapsinsinte, ç a wakimduške kta ce, eya.

17 Wotapi kin he icunhan wicašta wanji wicakiciyuške kta e heon.

18 Unkan owasin okonwanjidan heya niyanpi; De token aya wo; qa Barabbas hee unkiciyuşka miye.

19 He qe otonwe kin en woki-

pajin kage, ç a tinwicakte on etanhan kaşka wicahnakapi tipi kin en ohnakapi.

20 Pilate Jesus kiyuşke wacin kin heon ake iyecen ewicakiya.

21 Tuka howayapi qa heyapi; Icipaweli okatan wo, icipaweli okatan wo.

22 Unkan iyamni hewicakiya; Tokeca, tukte ecin taku şica econ he. On etanhan te kte cin iyececa takudan iyewaye şni; hecen wakapsinsinte, ç a wakimduške kta ce, eya.

23 Unkan hotankakiya kitanpi, icipaweli okatanpi kta e he kapi. Unkan iye hopi kin, wawayuşna itancanpi kin om iyakapeyapi.

24 Hecen token cinpi kin he iyecen Pilate kiconza.

25 Qa tuwe cinpi kin wokipajin kage, ç a tinwicakte qon, hee wicakiciyuške; tuka iye tawacinpi kin en Jesus wicaqu.

26 Unkan token yus ayapi qehan, Kurene wicašta wan Simon eciyapi makoce kin eciyatanhan u kin he yuzapi, qa cansusbeca kin he Jesus ihakam qin kta e aihpeyapi.

27 Unkan oyate kin wicota hınca winohınca ko iyahna yapi, qa waşihda aceyapi.

28 Tuka Jesus ekta ihduhomni qa hewicakiya; Jerusalem cunwintkupi kin, miye amaceyapi şni po; tuka niyepi qa nicinapi kin aiciceya po.

29 Iho, anpetu hiyohi kte cin hena en heyapi kta; Hokşin yuhapi şni, qa wicitpi tohinni cincaton şni, qa aze tohinni azinpi şni kin hena yawaştepi ce.

30 Hehan hinnakaha he kin, Unkahinhpaya po, qa paha kin, Unkalpa po, eciyapi ece e kta.

31 Qa can teca kin en decen



econpi kinhan, can śeca kin en token econpi kta he, eya.

32 Unkan wicaśta tokeca nonpa, ohan śicapi kin, hena wica-ktepi kta e kici awicayapi.

33 Unkan tukten Wicapahu eciyapi kin wanna ehan ipi qehan, hen icipaweli okatanpi, qa nakun wicohan śica econpi qon hena, unma iye etapa eciyatanhan, qa unma kin is catka tanhan.

34 Hehan Jesus heya; Ate, wicakicicajuju wo; taku tokonpi kin sdonkiyapi śni ce. Unkan tawokoyake kin kicipamnipi, qa oeonna econpi.

35 Unkan oyate kin opaħta najin hiyeya: Qa itancanwicakiyapi kin is eya hena om iħahapi qa heyapi; Wicaśta tokeca niwicaya ece qon; iye atayedan niicīya eħta śni, Messiya Wakantanka hdaħnige cin hee hecinhan.

36 Unkan akicita kin is eya iħahapi, en au, qa miniskuya kipazopi;

37 Qa heyapi; Juda wicaśtayatapi kin he niye hecinhan, niicīya wo.

38 Unkan iwankam wowapi kin de, Helenes qa Roma qa Hebrew iapi heħakiya en owapi; **JUDA WICAŚTAYATAPI KIN HE DEE CE.**

39 Unkan ohan śicapi en owicakatanpi qon wanji śicaya owakiye ĉa heya; Messiya he niye hecinhan niicīya wo, qa unkiś nakun.

40 Tuka unma kin waayupte ĉa kiśice ĉa heya; Wakantanka koyakipe śni he; wicayacopi okonwanjidan kici en yaun:

41 Qa unkiye kin en he owotanna; taku econku eciyatanhan unkakipa ece; tuka iye qe taku śica takudan econ śni ce.

42 Unkan hehan Jesus heciya;

Itancan, wokiconze nitawa kin en yaku kinhan, miksuya wo.

43 Unkan Jesus heciya; Anpetu kin de en wowašte makoce kin en mici yaun kta ce, awicakehan eciciya.

44 Wanna wihiyayedan oape śakpe hehantu; unkan makoce kin owancaya aotpaza, napeinwanka apa hehanyan.

45 Qa anpetu wi kin otpaza icu, qa tipi wakan kin en minihuha ozanzan hiyeye cin he cokaya okinaħdeca.

46 Unkan Jesus hotankakiya hoyekiye ĉehan, hehan heya; Ate, ninape kin en minagi kin owehnaka ce. Unkan hecen eye ĉehan ĉa iyaya.

47 Unkan akicita opawinge wicayuhe cin he token econpi qon he wanyake ĉehan, Wakantanka yaonihan, qa heya; Awicakehan wicaśta owotanna he de heca ce.

48 Unkan oyate kin witaya he wanyag ahi qon, hena owasin token econpi qon hena wanyakapi qehan, maku kin ohnahna aicipapi, qa kihdapi.

49 Unkan tona sdonyapi qon hena owasin itehan injinpi, qa winohinca Galile etanhan iħakam upi qon hena taku kin dena wanyakapi.

50 Unkan iho, wicaśta wan Joseph eciyapi, wahokonwicakiya ece kin heca, wicaśta wašte qa owotanna;

51 He iye kin wakiconzapi qa oħanpi qon wicawicada śni: Arimathea, Juda totonwepi kin wanji hee etanhan; is eya Wakantanka tokiconze kin he ape un.

52 He Pilate ekta ye ĉa Jesus tancan kin kida.

53 Unkan kun eyaku, qa minihuha ska opazunte, ĉa imnija kaħdokapi wicaśta hħakapi wan

en ohnaka; he itokam tuwedan en ohnakapi šni.

54 Unkan anpetu en ihduwiye-yapi ece kin he hee, qa anpetu wakan kin wanna ikiyedani.

55 Unkan winohinca Galile etanhan kici upi qon hena iha-kam iyayapi, ohna hnakapi kin he, qa tancan kin token hnakapi kin hena wanyakapi.

56 Qa hetanhan kihdapi, qa pejihuta waštemna ihapi ko wi-yeya ehnakapi. Hehan woa-hope kin eciyatanhan anpetu wakan kin okihpapi.

## WICOWOYAKE 24.

1 Unkan anpetu wakan en an-petu tokaheya, hanhanna hinca, hehan wicašta hnakapi kin ekta, pejihuta waštemna wiyeya ehna-kapi qon hena yuha en upi; qa toktokeca nakun owicapapi.

2 Unkan wicašta hnakapi kin etanhan inyan kin wanna token iyeyapi e wanyakapi:

3 Qa mahen ipi, tuka Jesus I-tancan tancan kin he iyeyapi šni.

4 Unkan token iyukcanpi nun tanin šni qehan, iho, wicašta nonpa wokoyake wiyatpatpa un-pi icahda nawicajimpi.

5 Unkan kokipapi, qa ite kin makipuskin elipeiçiyapi qehan, hewicakiyapi; Tokeca e çapi kin wicehna ni un kin ayakitapi he.

6 Den un šni; tuka kini ce. Nahanhin Galile en un qon ehan token eniciyapi qon he ki-ksuya po:

7 Wicašta Cinhintku kin wica-šta šica napepi kin en wicaqupi kta, qa icipaweli okatanpi kta; tuka anpetu iyamni kinhan kini kta ce, eya ce.

8 Unkan hecen eye ciqon he kiksuyapi.

9 Unkan wicašta hnakapi kin

etanhan kihdapi, qa akewanjipi-dan unmapi ko hena owasin owicakiyakapi.

10 Unkan wahošiyapi kin hena hecen owicakiyakapi qon, Mary Magdalene, qa Joanna, qa Mary Jakob hunku kin, qa toktokeca om unpi qon hena eepi.

11 Unkan oiapi kin ikcekeceya hitunkakanpi kin iyececa da-kapi, qa wicawicadapi šni.

12 Hehan Inyan najin hiyaye ça wicašta hnakapi kin ekta in-yang iyaya; qa en eyokasin qe-han minihuha wokoyake kin išnana ehnakapi wanyaka; he-han hdicu qa cante mahen taku econpi kin on inihyan awacin un.

13 Unkan iho, anpetu kin he en, iyepi kin etanhan wicašta nonpa otonwe wan Emmaus eci-yapi kin he ekta yapi, Jerusalem etanhan maka iyutapi wikcemna šakpe ecetu.

14 Unkan taku hiyohi kin dena owasin on wohdakapi.

15 Unkan wohdakapi, qa iyu-kan awacinpi icunhan, Jesus iye hinca kiyedan u, qa om wi-caya.

16 Tuka išta on iyekiyapi kte šni wicayapi.

17 Unkan hewicakiya; Wicoie kin dena tukte e he, mayanipi icunhan woyahdakapi qa iyo-kišin yaunpi kin.

18 Unkan unma Kleophas eci-yapi kin he waayupte ça heciya; Jerusalem en yaun šni ece, de-han en taku hiyohi kin dena sdonyaye šni he.

19 Unkan hewicakiya; Hena taku he. Unkan heciyapi; Je-sus Nazareth etanhan kin on, he wicašta wokcan, wicohan wicoie ko on wašaka, Wakantanka qa oyate kin owasin wicitokam.

20 He wawayušna itancanpi qa

itancanwicunkiyapi kin hena te kta kiconzapi qa icipawehi okatanpi.

21 Tuka Israel opewicakiton kte cin hee unkiš unkecinpi tuka; unkan heconpi kin ehan-tanhan wanna anpetu kin de iyamni.

22 Nakun unkanpi kin etanhan winohinca wanjikji hanhanna linca wicašta hnakapi kin ekta ipi, qa inihanunyanpi:

23 Iye tancan kin iyeyapi šni qehan, hdicupi qa ohnihde wakan kin heca wanwicayakapi, qa hena he ni un keyapi ce, eya unkokiyakapi.

24 Hehan om unkanpi kin wanjikji wicašta hnakapi kin ekta ipi, qa winohinca oyakapi qon iyececa linca iyeyapi: tuka iye kin wanyakapi šni ce.

25 Unkan hewicakiya; Witkottokapi qa wicašta wokcan taku oyakapi qon hena owasin wicada cante hunkapi šni kin:

26 Messiya dena decekcen ito kakije ca wowitan tawa kin en hde kte cin he hecetu šni he.

27 Unkan hecen Moses e tokaheya, qa hehan wicašta wokcan owasin, taku iye kin on wowapi en kagapi qon hena owasin owicakiyaka.

28 Unkan otonwe ekta yapi qon he wanna ikiyedat ehan ipi qehan, iye sanpa ye kta se ececa.

29 Tuka iyakapeyapi, qa heyapi; Unkičipi un wo, wanna hitayetu aya, qa anpetu kin wanna owihanke kta. Unkan om un kta e ti mahen iyaya.

30 Unkan om wota yanke cehan, aguyapi eyaku, qa yawaste, qa yuštašpa, qa wicaqu.

31 Hehan išta kin wicakiciyukawapi, qa iyekiyapi: unkan atanin šni iyaya.

32 Unkan hekiciyapi; Canku

kin ohna wounkiyakapi qa wowapi wakan kin unkičiyuzamnipi qon he ehan cante unkata šni he.

33 Unkan wihiyayedan oape kin he en najin hiyayapi, qa Jerusalem ekta hdapi, qa akewanji tona om unpi ko hena witaya yukanpi iyewicayapi;

34 Qa heyapi; Ehanqon Itancan kin kini, qa Simon en tanin-ičiya ce.

35 Hehan iye canku kin ohna tokenketu, qa aguyapi yuštašpa kin on iyekiyapi qon, hena hecekcen owicakiyakapi.

36 Unkan hena hecen eyapi icunhan, Jesus iye linca wicacokaya hinajin qa hewicakiya; Wookiye ničipi un nunwe.

37 Unkan inihanpi, qa kokipapi, qa wanagi wanyakapi kecinpi.

38 Unkan hewicakiya; Tokeca e iyonicišicapi he; qa tokeca cante mahen taku cešunyahdapi he.

39 Minape misiha ko, de miye hinca e wanmayaka po; mayutanpi qa iyukcan po; cešpi huhu waton wandakapi kin wanagi kin iyecen ton šni ece.

40 Unkan hecen eye cehan, nape siha ko wicakipazo.

41 Unkan wowiyuškin on wicadapi šni, qa hinyahin inihanpi, hehan hewicakiya; Den taku yutapi duhapi he.

42 Unkan hogan pasnonpi onšpa tuhmaga canhanpi ahna qupi.

43 Unkan icu, qa wicitokam yuta.

44 Qa hewicakiya; Nahahin om ciunpi qon ehan, wicoie ocičiyakapi qon he dee ce; Moses wicoope tawa, qa wicašta wokcan, qa odowan kin, henakiya en miye on taku token owapi qon owasin ecen yuštampi kta iyececa ce, eya.



## WICOWOYAKE 1.

45 Unkan hehan tawacinpi kin wicakiciyuzamni, qa hecen owapi kin okañigapi kte.

46 Unkan hewicakiya; Hecen owapi, qa Messiya hecen kakije ca, anpetu iyamni kinhan ake kini kte ciqon, he hecetu:

47 Qa hecen iye caje kin on ihduccetupi qa woahitani kajuju-pi kin, oyate kin owasin en oyakapi kta, Jerusalem en tokaheya kta.

48 Qa taku kin dena oyakapi kte cin he niyepi ce.

49 Unkan iho, Ate taku iwahowicaye ciqon he niyepi kin en uwakiye kta; tuka tohanyan wankantanhan wowaśake yuhe-

niciyapi śni kin hehanyan Jerusalem otonwe kin en ece yukan po.

50 Hehan tankan awicaya, Bethani hehanyan; unkan nape wicakiyuwinta qa wicayawaśte.

51 Unkan wicayawaśte icunhan, yutokan ewicakiciyakupi, qa wankan malipiya kin ekta ayapi.

52 Unkan iye ohodapi, qa woyuwuśkin tanka yuha Jerusalem ekta kipi:

53 Qa ohinniyān tipi wakan kin ohna ece yukanpi, Wakan-tanka yatanpi qa yawaśtepi ece. Amen.

## JOHANNES

### WOTANIN WAŚTE TAWA.

#### WICOWOYAKE 1.

1 Otokahe ekta Wicoie kin hee; Wicoie kin he Wakan-tanka kici un, qa Wicoie kin he Wakantanka kin ee.

2 He otokahe ekta Wakan-tanka kici un.

3 Iye eciyatanhan taku owasin kagapi; qa taku kin tokan tanhan takudan kagapi śni.

4 Iye kin en wiconi; qa wiconi kin he wicaśta iyoyamwicaye cin hee.

5 Iyoyanpa kin hee otpaze cin en omdesya un, tuka otpaze cin he iyowinkiyē śni.

6 Wicaśta wan Wakantanka eciyatanhan u śipi, he Johannes eciyapi.

7 He wayaotanin hi, Iyoyanpa kin oyake kta; hecen iye eciyatanhan owasin wicadapi kta.

8 Iyoyanpa kin he iye śni, tuka iyoyanpa kin he yaotanin kta e u śipi.

9 Iyoyanpa wicakapi hince cin hee, wicaśta otoiyoħi wicoicage kin en u iyoyamye cin hee.

10 He wicoicage kin en un, qa iye wicoicage kin kaga, tuka wicoicage kin sonyapi śni.

11 Tona tawa kin hena ekta wicahi, tuka tawawicaye cin hena iyowinkiyapi śni.

12 Tuka tona iyowinkiyapi kin hena Wakantanka cinca wicaya yakonpi kta e okiħi wicaya, tona iye caje wicadapi kin hena.

13 Hena wicawe eciyatanhan śni, qa wicaceħpi tawacin kin eciyatanhan śni, qa nakun wicaśta tawacin kin eciyatanhan śni, tuka Wakantanka eciyatanhan wicatonpi.

14 Unkan Wicoie kin he wica-

## JOHANNES.

cehpi kagapi, qa unkiyepi kin en oonyan; qa wootanin tawa kin wanunyakapi, wootanin kin he Atkuku eciyatanhan isnana icaga tawa kin he iyececa; wo-waonsida wowicake ko ojudan.

15 Johannes he yaotanin, qa heya niyan; Tuwe mihakam u kte cin he mitokam yawapi ce, epe ciqon he dee; he mitokam un nakaes.

16 Unkan wojudan tawa kin etanhan unkiye owasin unki-cupi, qa he wowaeste wicowaeste kin on.

17 Wooke kin he Moses wicaqu; tuka wicowaeste wowicake ko hena Jesus Messiya eciyatanhan u.

18 Tuwedan tohinni Wakan-tanka wanyake sni; tuka Cin-hintku isnana icaga Atkuku maku ohna un kin he sdoney unkiyapi.

19 Unkan Johannes woyake ciqon he dee; Jerusalem etanhan Juda oyate Wošnapi kagapi Lewi wicašta ko ekta ye wicašipi qa, Tuwe niye he, eciyapi.

20 Tuka Johannes ohdake ca anakihebe sni, tuka ohdaka; Messiya kin he miye sni ce.

21 Unkan wiwangapi; Nituwe he; Eliyas he niye he. Unkan, He miye sni ce, eya. Wicašta wokcan kin he niye he, eciyapi. Tuka, Hiya, eya.

22 Hehan, Ecin tuwe niye he, eciyapi: tona deciya unkušipi hecinhar hoši wicunkakipi kta e heunniciyapi; Token onihdaka he.

23 Unkan heya; Jehowa tancanku kin owotanna kicaga po, tuwe hewoskan eyanpaha un kin he miye ce, Isaya wicašta wokcan eye ciqon iyececa.

24 Unkan tona en u wicašipi qon hena Pharisee etanhanpi.

25 Unkan wiwangapi qa heciyapi; Hecen tokeca e baptem wicayaqu he; Messiya he niye sni, qa Eliyas he niye sni, qa wicašta wokcan kin he niye sni hecinhan.

26 Johannes awicayupte ca heya; Miye mini on baptem wicawaqu ece: tuka wanji naya-jinpi kin cokaya najin tuka sdon-yayapi sni;

27 Tuwe mihektam u kte ciqon, tuka mitokam yawapi kin hee; tahanpe kin wakiyusdoke kta esta owakihi sni ce.

28 Hena taku kin Bethabara, Jordan akasanpatanhan, econpi, he en Johannes baptem wicawaqu.

29 Anpetu iyokihe hehan Jesus etkiya u kin Johannes wanyake ca heya; Tacinca Wakantanka tawa, oyate walitanipi kin tokan ehpeye kte cin he wanyaka po.

30 Tuwe on hepe ciqon he dee; Wicašta wan mihakam u kte cin he mitokam yawapi; he mitokam un nakaes.

31 Qa miš eya he sdonwaye sni; tuka Israel oyate kin ekta yuotaninpi kta e heon mini on baptem wicawaqu wahi ce.

32 Unkan Johannes wayaotanin qa heya; Woniya kin he wakiyedan kaliya malpiya eciyatanhan kuntkiya u wanmdaka, unkan he en hiyanka.

33 Unkan he tuwe kin sdonwaye sni, tuka mini on baptem wicawaqu maši qon he omakiyaka; Tohan malpiya kin eciyatanhan Woniya kin kuntkiya ye ca, tuwe iyahde wandake cinhan he iye Woniya Wakan on baptem wicawaqu kta.

34 He wanmdaka e on mdaotanin; Wakantanka Cinhintku kin hee.

## WICOWOYAKE 2.

35 Ake ihanhanna hehan Johannes waonspewicakiye cin nom om en najin :

36 Qa Jesus omani wanyake cehan heya ; Iho, Tacinca Wakantanka tawa kin he dee ce.

37 Unkan waonspewicakiya nom ie cin he nahonpi, qa Jesus ihakam yapi.

38 Hehan Jesus ihdamna, qa ihakam upi wanwicayake ça he-wicakiya ; Taku ayakitapi he. Unkan, Itancan, Waonspekiye eyapi kin he kapi, tukten yati he, eciyapi.

39 Upi qa wanyaka po, ewicakiya. Unkan kici hdapi, qa tukte en ounye cin he wanyakapi, qa anpetu ihunniyan kici yukanpi : wanna oape wikcemna behantu.

40 Nom Johannes ia nahonpi qa Jesus ihakam yapi qon, Andrew Simon Inyan sunkaku kin he unma ee.

41 He cincu Simon tokaheya iyeye ça heciya ; Messiya, he Sdayapi eyapi kin, iyeunyanpi ce :

42 Qa Jesus ekta ai. Unkan Jesus wanyake cehan heya ; Simon Jona cinhintku kin he niye : Kephas eniciyapi kta, he Inyan eyapi kin hee.

43 Ihanhanna kin hehan Jesus Galile heciya ya, unkan Philip wanyake ça heciya ; Mihakam u wo.

44 Philip Bethsada hetanhan, nakun Andrew Inyan kici he otonwe tawapi.

45 Philip Nathanael akipa, qa heciya ; Moses wope en owa qon, qa wicašta wokcanpi kin nakun, he wanna iyeunyanpi, Jesus Nazareth etanhan, Joseph cinhintku kin hee.

46 Unkan Nathanael heciya ; Nazareth etanhan taku wašte u

okihi kta he. U qa wanyaka wo, Philip eciya.

47 Jesus Nathanael en u wanyake ça he on heya ; Wanyaka po, Israel wicašta hinca wan he dee, wicahnaye wanin un ce.

48 Nathanael heciya ; Tokiyatanhan sdonmayaya he. Jesus ayupte ça heciya ; Philip nico qon he itokam can ihukuya nayajin qon hen wanciyaka.

49 Nathanael ayupte ça heciya ; Itancan, Wakantanka Cinhintku, Israel oyate Wicaštayatapi kin he niye.

50 Unkan Jesus ayupte ça heciya ; Can ihukuya nayajin wanciyaka epa, unkan heon wicayada he. Dena taku isanpa tanka wandake kta ce.

51 Unkan heciya ; Wowicake, wowicake eciyatanhan heciciyapi, Tokata mahiyya kin yuzamnipi, qa Wakantanka taokiyen kin wankantkiya yapi, qa ake kuntkiya upi, qa Wicašta Cinhintku kin en himniciyapi wandakapi kta ce.

## WICOWOYAKE 2.

1. Anpetu iciyamni kin hehan Galile makoce en otonwe wan Kana eciyapi hen kiciyuzapi omniciye kagapi ; unkan Jesus hunku kin en opa.

2 Jesus nakun waonspewicakiye cin om kiciyuzapi kin en kicopi.

3 Unkan miniša wanna hena-keca hehan, Jesus hunku kin heciya ; Miniša takudan yuhapi šni ye.

4 Unkan Jesus heciya ; Winohinca hetanhan iwamayatokiya he ; nahanhin iyemicihantu šni ce.

5 Unkan hunku kin wayutan wicakiyapi, He tokehin eniciya-



pi owasin ecen ecom, ewicakiya.

6 Inyan wakiškokpa šakpe en han, ohna Juda oyate ihdujajapi kta e hdepi; otoiyo hi wiyutapi nom yamni kipi.

7 Wakiškokpa kin mini ojudan okaštan po, ewicakiya. Unkan ojugjudan okaštanpi.

8 Hehan, Onge etanhan icupi qa omniciye itancan kin he kanya po, Jesus ewicakiya. Unkan kayapi.

9 Unkan omniciye kin en itancan kin onge yatkan uta, he mini tuka miniša icahyapi, qa he tokiyatanhan kin sdonye šni, tuka wayutan wicakiyapi mini akupi qon hena sdonyapi, unkan itancan kin tawicu ton qon kico;

10 Qa heciya, Wicašta eca miniša wašte tokaheya yatke wicakiya ece; qa tohan wicašta wipipi hehan taku aoptetu kin; tuka niye miniša wašte hinea dehanyan yehnaka ce, eya.

11 Galile makoce kin hen, Kana otonwe he en, Jesus toka taku wapetokeca econ, qa towitan hdutanin; unkan hecen waonspewicakiye cin wicadapi.

12 He iyohakam Kapernaum ekta apamahde iyaya, iye qa hunku qa sunkaku qa waonspewicakiye cin hena koya om; unkan anpetu tonana hen yakonpi.

13 Unkan Juda oyate woacakšın wošnapi tawapi kin wanna ikiyedani; heon Jesus Jerusalem ekta itanwankan hde iyaya.

14 Unkan tipi wakan kin en wicašta kin eya, tatanka, tahinca, wakiyedani ko wiyopewicakiyapi, qa maza ska tokiyopekiyapi kin en iyotankapi e wanwicayaka;

15 Qa icapsinte cikciqadan yu-

gaga wan kage çehan, tipi wakan kin etanhan owasin tankan iyewicaya, tahinca tatanka ko; qa mazaska tokiyopekiyapi qon is kada iyeya, qa can wahna wotapi kin he nakun paahda- pšinyan elpeya.

16 Qa wakiyedani wiyopeyapi kin is, Dena owasin tankan iyeya po, qa, Ate ti kin de wopeton tipi kagapi šni po, ewicakiya.

17 Unkan waonspewicakiye cin wowapi en kagapi qon he kiksuyapi, Yati owakiye cin he mayapota ce.

18 Hehan Juda oyate ayuptapi qa heciyapi; Tokiya tanhan he oyakihi qa hecanon he.

19 Unkan Jesus waayupte ça, Tipi kin de ibangya po, qa anpetu iciyamni kinhan ake ekicetuwaye kta, ewicakiya.

20 Waniyetu wikcemna topa qa sam šakpe hehanyan tipi kin de kagapi qa yušanpi qon, niye nakaha anpetu iyamnina ekicetu yaye kta he, Juda oyate kin eciyapi.

21 Tuka tipi eye cin he iye tancan kin he ka e heon etanhan heya.

22 Heon wiconte etanhan ihduekicetu, hehan hecen ewicakiye ciquon he waonspewicakiye cin kiksuyapi; unkan wowapi wakan qa Jesus taku ewicakiye cin hena koya wicadapi.

23 Unkan Jerusalem en woacakšın wošnapi kin icunhan, taku wapetokeca econ kin hena wicota wanyakapi qehan iye caje kin on wicadapi.

24 Tuka Jesus owasin sdonwicaye cin heon etanhan wacinwicaye šni.

25 Qa wicašta on tuwedani wa- yaotanin kta cin šni; iye atayedani wicašta taku en un kin sdonya, heon etanhan.

## WICOWOYAKE 3.

1 Wicašta wan Pharisee etanhan Nikodemos eciyapi, Juda oyate itancanpi kin he wanji ee;

2 Hanyetu wan Jesus yanke cin en i qa heciya; Itancan, waonspekiye Wakantanka eciyatanhan u kin henica sdonunniyanpi; taku wapetokeca ecanon ece kin tuwedan hecen okihi śni, Wakantanka kici un śni kinhan.

3 Unkan Jesus ayupte ca heciya; Wowicake, wowicake eciyatanhan heciciya, Wicašta kin wankantanhan teca nien tonpi śni kinhan Wakantanka tokiconze kin wanyaka okihi kte śni.

4 Wicašta kin kan ehantanhan token ecin teca ni en tonpi kta he. Ake hunku tezi kin mahen kihde ça ake teca ni en tonpi kta he token okihi kta he, Nikodemos eciya.

5 Unkan Jesus ayupte; Wowicake, wowicake eciyatanhan heciciya, Wicašta kin mini qa Woniya kin on tonpi śni kinhan Wakantanka tokiconze kin en tin iyaya okihi kte śni ce, eya.

6 Tuwe wicacełpi on tonpi kin he wicacełpi, qa tuwe Woniya kin eciyatanhan tonpi kin he woniya.

7 Wankantanhan nitonpi kta ce, eciciye cin heon ihnuhan niuśinyaye cin.

8 Tateyanpa kin tokiyatanhan cin eca eciyatanhan ipogan ece, qa oqo kin he nayahon, tuku tokiyatanhan u, qa tokiya ye cin he sdonyaye śni. Wicašta Woniya kin eciyatanhan tonpi kin owasin hecetu.

9 Nikodemos ayupte ça heciya; Hena token okhipica he.

10 Jesus ayupte ça heciya; Israel en waonspekiye cin heni-

ca, tuka dena oyakahnige śni he.

11 Wowicake, wowicake eciyatanhan heciciya; Taku sdonunyanpi kin hena unkeyapi ece, qa taku wanunyakapi kin dena unkoyataninpi, tuka wounyataninpi kin ayaktapi śni.

12 Taku maka kin detanhan ociciyakapi kin wicayadapi śni ehantanhan, małpiya kin ekta taku ociciyakapi kinhan hee token wicayadapi kta he.

13 Nahahin tuwedan małpiya kin ekta i śni, tuwe małpiya kin eciyatanhan kuntkiya u, qa hi kin he Wicašta Cinhintku kin hee, nahahin nakun małpiya kin ekta yanka.

14 Nakun hewoskan wanmduška Moses wankan ehde qon he iyecen Wicašta Cinhintku kin wankan ehdepi kta.

15 Heon tuwe awacin kinhan owihanke kte śni, qa owihanke wanin wiconi yuhe kta.

16 Wakantanka oyate kin cantewicakiya, heon Cinhintku isnana icage cin wicaqu, qa tuwe awacin kinhan owihanke kte śni, tuka owihanke wanin wiconi yuhe kta.

17 Wakantanka Cinhintku kin wicoicage kin en u śi kin, heon oyate kin wicayaco kta e hecon śni; tuka iye on oyate kin nipi kta e hecon.

18 Tuwe he wacinye cinhan he yacopi kte śni; tuka tuwe wacinye śni kinhan he wanna yacopi; Wakantanka Cinhintku isnana icage cin he caje kin wacinye śni kin heon etanhan.

19 Wicayacopi kin he kaketu; Oyate kin iyoyanpa en wicahiyohi, tuka wicašta kin otpaza e waštedakapi, qa iyoyanpa e cinpi śni, wicolian śicapi kin heon.

20 Tuwe taku śica econ kin he

iyoyanpa síce daka, qa iyoyanpa ikiyedan u síni, ohan iyopeyapi kte cin heon.

21 Tuka tuwe wowicake eciyatanhan ohanye cin he iyoyanpa kin en u, ohan yuotaninpi kta, Wakantanka eciyatanhan ohanye cin heon.

22 Hena iyohakam Jesus waonspewicakiye cin om Juda makoce kin en i; qa en om un, qa baptem wicaqu.

23 Unkan he icunhan Johannes ís eya Enon Salim ikiyedan baptem wicaqu, hen mini ota kin he etanhan. Unkan baptem wicaqupi kta e etkiya aye.

24 Hehayan hinyahin Johannes kaskapi síni.

25 Hehan taku hdokinicapi, Johannes waonspewicakiye cin wanjikji qa Juda wicašta om, wicayujajapi kin he icahtagya.

26 Unkan Johannes ekta ipi qa heciyapi; Itancan, Jordan wakpa akasanpa tanhan tuwe kici yaun qa daotanin qon he, iho, wanna baptem wicaqu, unkan owasin en ece iyoptapi.

27 Unkan Johannes waayupte ça heya; Wicašta kin mahpiya eciyatanhan taku qupi síni ehan-tanhan takudan iye cinka icu okihi kte síni ece.

28 Messiya kin he miye síni, tuka itokam u masipi ce, epe ciqon he niye sdonyayapi.

29 Tuwe tawicu ton kin he hihna yanpi kin hee, tuka hihna yanpi takodaku kin en taninyan anagoptan najin, qa hihna yanpi ho kin nahon kin heon iyuskin ece. Heon etanhan wowiyuskin mitawa kin wanna yuecetupi ce.

30 Iye kin nina sanpa icage kta, tuka miye yuhukun amaye kta.

31 Tuwe wankan tanhan hi kin

he taku owasin iwankam ounye. Tuwe maka etanhan hi kin he maka etanhan, qa maka kin iye-cenya oie kiton. Tuwe mahpiya kin eciyatanhan hi kin he taku owasin on iyotan.

32 Qa taku wanyake ça taku nahon kin he owasin yaotanin ece; tuka taku yaotanin kin tuwedan wicada síni.

33 Taku yaotanin kin he tuwe wicada kinhan Wakantanka wicake cin he yutanin ece.

34 Wakantanka tuwe u síni kin he Wakantanka oie oyaka; Wakantanka Taniya kin iyuta qu síni, ocowasin qu.

35 Atkuku kin Cinhintku waštekidake ça, taku owasin iye nape kin en qu:

36 Hecen tuwe Cinhintkuyapi kin wacinye cinhan owihanke wanin wiconi kin wanna yuha; tuka tuwe wacinye síni kinhan, he wiconi wanyake kte síni, tuka Wakantanka tocanniye kin wanna akan un.

#### WICOWOYAKE 4.

1 Jesus waonspewicakiya ota icicage ça baptem wicaqu, Johannes econ qon sam iyeya, Pharisee kin hecen nahonpi, he Itancan kin sdonya.

2 Tuka Jesus iye atayedan baptem wicaqu síni, waonspewicakiye cin hena heconpi.

3 Hehan Juda makoce kin ayu-ştan, qa Galile heciya ake ekta hda.

4 Qa Samariya he en acankuye kta iyececa.

5 Hecen otonwe wan Sukar eciyapi Samariya makoce en, Joseph en ounye kta e Jakob atkuku qu qon he ikiyedan, he ekta hi.

6 Jakob miniyowe tawa kin he



etu; Jesus mdokite hda, qa miniyowe kin he ahankeya iyotanka. Anpetu kin he en wiyotanhe cin hehantu.

7 Samariya oyate etanhan winohinca wan mini huwe hi; unkan Jesus, Mini maqu wo, eciya.

8 He icunhan waonspewicakiye cin otonwe kin ekta taku yutapi opeton iyayapi.

9 Winohinca Samariya oyate etanhan qon hecen eya, Juda wicašta kin henica, Samariya oyate kin hematanhan, he tokeca e mini mayakida he. Juda oyate Samariya oyate kici takudan ikicitukapi wanice ciqon.

10 Jesus ayupte ça heciya; Wakantanka taku wicaqu kin he, qa, Mini maqu wo, eniciye cin he tuwe kin sdonyaya unkanš, niye yakida kta, kinhan mini wiconi kin niçu kta tuka ce.

11 Itancan, mini kin de temahentuya hiyeya qa takudan on edaku kte šni; tokiya tanhan mini wiconi kin duha he, winohinca kin eciya.

12 Jakob ateunyanpi miniyowe kin de unqupi, qa etanhan iye mini yatkan, qa cinca qa tawanunyanpi ko, he *hecon* tuka niye iniyotan he.

13 Unkan Jesus ayupte ça heciya; Tuwe mini kin de etanhan yatke cin nakun ipuza kta;

14 Qa tuwe mini waqu kte cin etanhan yatke cin icimana ipuza kte šni. Tuka mini waqu kte cin he owihanke wanin wiconi iyahdeya kaduze kta, eya.

15 Unkan winohinca kin heciya; Itancan, mini kin he etanhan maqu ye, hecen imapuza kte šni, qa nakun icimana mini kin de huwe wahi kte šni, eya.

16 Unkan, Nihihna kico ya

wo, qa den kici hi wo, Jesus cciya.

17 Tuka winohinca kin waayupte ça heciya; Mihihna kin wanica ce. Nihihna wanica kehe cin he hecetu e ecen eha ce;

18 Nihihna zaptan, tuka nakaha hihnayaye cin de nitawa šni; hecen ehe cin he wicayaka ce, Jesus eciya.

19 Hehan winohinca kin heciya; Itancan, wicašta wokcan kin henica imdukan;

20 Hunkake wicunyanpi paha kin de en ohodapi ece; tuka niye, Jerusalem he en wicašta ohodapi ece e kta, kehapi ce.

21 Unkan Jesus heciya; Winohinca, wicamada wo, anpetu wan u ce, paha kin de en, qa Jerusalem nakun en, Ateyapi kin ohoyadapi kte šni.

22 Niye taku ohoyadapi kin sdonyayapi šni; unkiye taku ohoundapi kin sdonunyanpi ece. Juda oyate kin eciyatanhan wanikiyapi kin u ce.

23 Tuka anpetu u kin he wannahiyohi, tona wowicake eciyatanhan ohodapi kin hena woksape wowicake eciyatanhan Ateyapi kin ohodapi kta. Ateyapi kin he tona hecen ohodapi kte cin akita ece.

24 Woksape kin he Wakantanka kin ce; qa tona ohoda kinhan hena woksape wowicake eciyatanhan ohoda kta.

25 Hehan winohinca kin heciya; Messiya Sdayapi eyapi kin hi kta, tohan hi kinhan taku kin owasin unkokiyakapi kta e sdonwaya.

26 He miye e ociciya ce, Jesus eciya.

27 He icunhan waonspewicakiye cin en hdipi, qa winohinca kin kici okiciciya un kin heon yušinyayapi. Tuka wanjidan;

Taku ayakita he; qa, Tokeca kici iyaa he, eyapi s̄ni.

28 Hehan winohinca kin wakiškokpa ehpeya kihde ca, otonwe kin ekta ki, qa wicašta kin hewicakiya;

29 Wicašta wan taku ecamon qon owasin omiciyake cin he ito wanyag u miye. He Messiya kin ee s̄ni he.

30 Hehan otonwe kin etanhan enanpa, qa yanke cin en ai.

31 He icunhan waonspewicakiye cin cekiyapi qa, Itancan, wota wo, eciyapi.

32 Tuka iye hewicakiya; Taku yutapi sdonyayapi s̄ni kin heca wate kta e mduha ce.

33 Heon, Tuwe taku yutapi kahi he, wonspewicakiye cin ekiciyapi.

34 Tuka Jesus hewicakiya; Tuwe u maši kin he tawacin kin ecen ecamon kta, qa iye tohan kin weciyuštan kte cin he taku wate cin ee.

35 Ehake wi topa kinhan taku mnaunyanpi kta ce, ehapi. Tuka miš kaken eciciyapi; Wankan etonwanpi qa maga kin wanyaka po, wanna owasin ska qa mnayanpi kin wanna iyehantu.

36 Qa tuwe taku mnaye cin he wokajuju icu ece, qa owihanke wanin wiconi waskuyeca mnayan ece; hecen on tona woju, qa tona mnaye cin napin wiyuškinpi kta.

37 Wanji woju qa wanji mnayan, eyapi qon dee e wicakapi.

38 Niye htayanipi s̄ni tuka wamnayanpi he econ cišipi. Wicašta tokeca htanipi unkan he htanipi kin en niye oyapapi.

39 Winohinca kin, Token ecamon qon owasin omiciyaka ce, eye ciqon heon wicašta Samariya oyate otonwe kin he en ota Messiya hee kin wicadapi.

40 Heon Samariya oyate Jesus en hipi qa cekiyapi, iye tipi kin en un šipi. Unkan nonpa can hen un.

41 Unkan ia nahonpi kin hehan wicota wicadapi.

42 Qa, Taku odake cin he etanhan wicaundapi kin hee s̄ni, unkiš eya naunhonpi, Messiya hee qa oyate wanikiye kte cin hee e sdonunyanpi, winohinca kin eciyapi.

43 Anpetu nonpa iyohakam hehan hetanhan ye ca Galile heciya hda.

44 Jesus iye atayedan hdaotanin, wicašta wokcan kin heca iye tamakoce kin en yuonihanpi s̄ni ece.

45 Unkan Galile ekta ki, hehan Galile wicašta kin iyowinkiyapi, Jerusalem ekta wošnapi kin icunhan taku econ qon owasin wanyakapi kin heon etanhan; iš eya wošnapi kin ekta ipi nakaes̄.

46 Unkan Galile en Kana otonwe kin, mini ikceka miniša icalhye ciqon he ake en hdi. Unkan Kapernaum ekta wicašta itancan wanji cinhintku wazanka:

47 He Jesus Juda makoce kin hetanhan Galile en hi, nahon kin heon ekta ye ca cekiya, cinhintku kin asniye kta e ekta u kta; wanna te kta ikiyedan.

48 Hehan Jesus heciya; Taku wowanyake wowapetokeca ko wandakapi s̄ni keš wicayadapi kte s̄ni ce.

49 Unkan wicašta itancan kin heciya; Itancan, micinksi te s̄ni itokam kun u wo.

50 Tuka Jesus heciya; Hunktiya wo, nicinksi ni ce. Unkan wicašta kin Jesus ie cin wicada, qa ekta hda.

51 Tiyatakiya hda, unkan wi-

## WICOWOYAKE 5.

cašta wowidake wicayuhe cin awicakipa, unkan, Nicinksi kin ni ce, eya okiciyakapi.

52 Wi kin tohan yanka hehan asni aya he, eya iwicawanga. Unkan, Htanihan wiyotanhani kintanna inasdoka, hetanhan tancan kata ayuŝtan ce, eyapi.

53 Unkan atkuku kin tohan Jesus, Nicinksi ni ce, eciye ciqon hehantu e kiksuya. Unkan iye qa tiyohnaka tawa koya wicadapi.

54 Jesus Juda makoce etanhan Galile icicawin en hdi, wowape-tokeca econ kin icinonpa kin he dee

### WICOWOYAKE 5.

1 Hehan iyohakam Juda oyate omniciye wan kagapi he icunhan Jesus Jerusalem he en i.

2 Jerusalem en tahinca wanunyanpi tiyopa kin he en ikiyadan, mini kiwitayapi, Hebrew iapi Bethesda eciyapi, zaptankiya aohanziya hdepi.

3 Hena ohna wicašta wayazanka ota, huŝte, iŝta gonga, Ƨataka ko ota en makan hiyeya, mini ŝkanskan ape hiyeya.

4 Tohan iyehantu eca, mahpiya ohnihde wan mini kin en hi qa ŝkanskanya ece. Tokiya yazan kin owasin tohan mini kin he ŝkanskan eca tuwe tokaheya en iyohpeiçiya eca asni ece.

5 Wicašta wan he en wanka, waniyetu wikcemna yamni sanpa ŝahdogan hehanyan wayazanka.

6 Wicašta kin he makata wanka, wanakaja tanhan wayazanka Jesus wanyaka, qa, Anisni kta yacin he, eciya.

7 Wicašta wayazanke cin heciya; Itancan, mini kin ŝkanskan keŝ tuwedan en iyohpemaye ŝni;

en mde kta keŝ tuwe tokeca mitokam en iyeiçiya ece.

8 Najin, owinja ehdaku qa mani wo, Jesus eciya.

9 Unkan echankeya wicašta kin akisni, qa owinja kin ehdku, qa mani. Unkan anpetu kin he anpetu wakan.

10 Heon etanhan Juda oyate kin wicašta asniyanpi qon heciyapi; Nakaha anpetu wakan; owinja yeçin kin he hecetu ŝni ce.

11 Tuwe asnimaye cin he, Owinja ehdaku qa mani wo, emakiya ce, ewicakiya.

12 Hehan, Wicašta kin, Owinja ehdaku qa mani wo, eniciye cin he tuwe he, eya iwangapi.

13 Tuka wicašta asniyanpi kin he tuwe kin sdonye ŝni: he icunhan wicota hen unpi hecen Jesus icunonpa iyaya.

14 Hehan iyohakam tipi wakan en wicašta kin he Jesus wanyaka, unkan, Wanyaka ye, wanna anisni; icimana wahtani ŝni wo; okinni ake taku wanji ŝica sanpa tanka iyanihde kta ce, eciya.

15 Unkan wicašta kin he kihde ça, Tuwe asniye ciqon he Jesus ee, Juda oyate owicakiyaka.

16 Heon etanhan Juda oyate Jesus kuwa ayapi, qa anpetu wakan kin icunhan hena econ kin heon Ƨeyapi kta e akitapi.

17 Unkan, Ate nahahin htani he etanhan miŝeya htawani, Jesus ewicakiya.

18 Unkan Juda oyate hehan iyotan Jesus Ƨeyapi kta sanpa akitapi, anpetu wakan botica, qa nakun Wakantanka atayedan Ateya keiçiyeye cin, Wakantanka kici akiyecen ihdawa kin, heon etanhan.

19 Unkan Jesus waayupte ça



hewicakiya ; Wowicake, wowicake eciyatanhan heciciyapi, Cinhintkuyapi kin takudan iye cinka econ kta okihi śni ; Ateye cin taku econ wanyaka eca, hehan Cinhintku kin is̄ eya iyeccen econ ece.

20 Ateyapi kin Cinhintku wašte kidake cin heon taku econ kin hena owasin onspekiya ; qa nakun ceś wicoħan dena sanpa tanka onspekiye kta, hecen ininihanpi kta.

21 Ateyapi kin tuwe ƣa keś niye ƣa wiconi wicaqu ece ; he iyecen Cinhintku kin is̄ tona cin kinhan wiconi wicaqu ece.

22 Nakun Ateyapi kin tuwedan yaco śni, tuka woyaco owasin Cinhintku kin qu.

23 Heon etanhan owasin Ateyapi kin token ohodapi hecinhan he iyecen Cinhintku kin ohodapi kta. Tuwe Cinhintku kin ohoda śni kin he Atkuku u śi kin he nakun ohoda śni.

24 Wowicake, wowicake eciyatanhan heciciyapi, Tuwe mioie kin anagoptan, qa u maśi kin he awacin kinhan, owihanke wanin wiconi yuhe kta ; qa woyaco en i kte śni, wanna wiconƣe etanhan wiconi ekta e i.

25 Wowicake, wowicake eciyatanhan heciciyapi, Anpetu wan u qon wanna hi, wicašta ƣa tona Wakantanka Cinhintku ho kin naħon kta ; qa tona naħon kinhan hena ni kta.

26 Ateyapi kin iye cinka wiconi hduha, he etanhan Cinhintku kin is̄ iye cinka wiconi hduhe kta e qu.

27 Qa nakun wowaśake woyaco kin he nakun Cinhintku qu, Wicašta Cinhintku kin e heon etanhan.

28 Ihnuhan hena ininihanpi kin

do ; anpetu wan hi kta ee, wicašta wicaħapi kin owasin iye ho kin naħonpi kta ;

29 Qa hninanpapi kta, tona wašte econpi kin hena wiconi woekicetu ekta ; qa tona taku śica econpi kin hena woyaco woekicetu ekta hiyupi kta.

30 Miye cinka taku ecamon owakitpani ; taku mdaco kin hena taku nawaħon kin heciya tanhan ; qa taku mdaco kin hena hecetu. Miye mitawacin he owakide śni, tuwe u maśi kin he tawacin owade.

31 Miye miħdaotanin kinhan, taku mdaotanin kin he wowicake śni.

32 Wanji tokeca mayaotanin ece ; unkan wayaotanin iye mayaotanin kin he wowicake e sdonwakiya.

33 Johannes ekta ye wicayaśipi ; unkan taku yaotanin kin wowicake kin hee.

34 Tuka wicašta akantu wayaotaninpi kin iwacu śni ; tuka dena on yanipi kta e heciciyapi.

35 He peta ijanjan iyege ƣa okitanin ; unkan iyoyanpa tawa kin on kohanna iyuśkin wacan-nipi.

36 Tuka Johannes sam iyeya tanka wayaotanin mduha ; wicoħan ecamon kta Ate maqu qon hena e ecamon ece ; Ate umaśi e yuotanin kin hena ee.

37 Qa Ateyapi umaśi qon he nakun mahduotanin : He tohinni ho kin nayaħonpi śni, qa itohnake wandakapi śni :

38 Qa oie kin en niunpi śni, tuwe u śi kin he wicayadapi śni, heon etanhan.

39 Wowapi wakan kin en akita po ; heciyatanhan wiconi owihanke wanica duħapi kecannipi ; unkan omayake cin hena ee.

40 Tuka owihanke wanin wi-

## WICOWOYAKE 6.

coni duhapi kta e on miye en mayaupi yacinpi s̄ni.

41 Wicašta ekta mitawootanin kin awecite s̄ni.

42 Tuka Wakantanka wašte-dakapi kin he en niunpi s̄ni e sdonciyapi.

43 Ate cajeyan wahi, tuka iyo-winmayakiyapi s̄ni; tuwe iye caje atayedan hduha hi kin hee iyowinyakiyapi kta.

44 Niye iyakitedan nitawootaninpi kin ayecitapi, qa Wakantanka eciyatanhan wootanin kin ayakitapi s̄ni, he token on wicayadapi kta he.

45 Ate en aciyapi kta e kecan-makinpi s̄ni po; Moses he wacinyayapi qon he iye taku iyanionpapi ce.

46 Moses wicayadapi unkanś miś eya wicamayadapi kta tuka. He miye on wowapi kaga.

47 Tuka iye wowapi kage cin hena wicayadapi s̄ni kinhan, ecin token mioie kin wicayadapi kta he.

## WICOWOYAKE 6.

1 Hena iyohakam Jesus Galile mde kin, he nakun Tiberias mde kin ee, he akasanpa iyaya.

2 Unkan oyate ota ihakam yapi, wicašta wayazanpika en wapetogya ohanyan wanyakapi qon heon etanhan.

3 Unkan Jesus paha wan ekta iyaya, qa waonspewicakiye cin om akan iyotanka.

4 Unkan woacakśin, Juda oyate wośnapi tawapi wan, he wanna ikiyedana ihan.

5 Jesus išta yuwankan ikikeu, qa wicota iye yanke cin en au wanwicayake cehan, Philip heciya; Aguyapi dena yutapi kte cin tokiyatanhan opeuntonpi kta he.

6 He yukcan kta on etanhan

heciya; token econ kte cin he sdonkiya tuka.

7 Hehan Philip ayupte; Kašpapidan opawinge nonpa aguyapi iyopeyapi, qa otoiyohe cikeistinna icupi ešta, nakun iyo-wicahi kte s̄ni ce, eya.

8 Hehan waonspewicakiye cin wanji, Simon Inyan sunkaku, Andrew eciyapi, he nakun heciya;

9 Psin ska aguyapi zaptan qa hogan nom hena den hokśidan wan yuha; tuka wicota qa hena on token hanpica he.

10 Unkan, Wicašta kin iyotanke wicaśi po, Jesus eya. He en peji ota. Wicašta kin hena iyotankapi, unkan kektopawinge zaptan iyecetu.

11 Hehan Jesus aguyapi kin hena icu qa yawakan, qa waonspewicakiye cin wicaqu; unkan waonspewicakiye cin iyotang hiyeye cin wicakipamni; qa nakun hogan tohanyan cinpi kin.

12 Unkan imnanpi hehan waonspewicakiye cin hewicakiya, Oyaptapi kin hena pahi po, hecen takudan atakuni kte s̄ni.

13 Unkan psin ska aguyapi oyaptapi qon he etanhan makanopiye ohnaka ake nonpa pahipi; wotapi etanhan iwicakiciyaye cin hena ee.

14 Taku wapetogya Jesus econ kin oyate kin wanyakapi, qa heon heyapi, Wicašta wokcan itancan oyate en hi kta keyapi qon he wanna dee.

15 Oyate kin Jesus icupi, qa wicaštayatapi kañ wacinpi e sdonkiya, qa paha kin icunonpa akan is̄nana iyaya.

16 Unkan wanna hitayetu hehan waonspewicakiye cin mde kin ektakiya yapi;

17 Qa wata wan en opapi qa

mde kin he opta yapi, Kapernaum heciya i wacinpi. Unkan otpaza tuka nahanhin Jesus ekta wicahi s̄ni.

18 Unkan tateyanpa linca, on etanhan mde kin nina taja aya.

19 Unkan wiyutapi wikcemna nonpa sam zaptan, qa is̄ wikcemna yamni hehayan watopapi, hehan wata kin ikiyedana Jesus mini kin amani u wanyakapi; unkan yuśinyayapi.

20 Tuka, He miye ce, ihnuhan koyakipapi kin do, ewicakiya.

21 Hehan iyokipiya wata kin en iyowinkiyapi; unkan tokiya yapi qon, wata kin kohanna he en ihunni.

22 Ihanhanna hehan oyate mde kin icahda yukanpi kin, hen wata wanica, wanji waonspewicakiye cin en opapi qon heceyedan, qa Jesus waonspewicakiye cin om wata kin en ope s̄ni, tuka waonspewicakiye cin is̄nana iyayapi, he wanyakapi :

23 Tuka Jesus aguyapi yawakan qa yutapi qon he en ikiyadan Tiberias eciyatanhan wata toktokeca en hipi.

24 Oyate kin Jesus waonspewicakiye cin om he en yukanpi s̄ni wanyakapi, unkan oyate kin wata kin hena en opapi qa mde kin opta yapi, Jesus Kapernaum heci un kin he akin yapi.

25 Unkan mde kin akasanpa hen iyeyapi qehan, heciyapi; Itancan tohinni den yahi he.

26 Jesus awicayupte ça heya; Wowicake, wowicake eciyatanhan heciyapi, Omayadepi kin he taku wapetokeca wandakapi kin heon hecanonpi s̄ni, aguyapi innahan yatapi qon e heon.

27 Taku yutapi on wicatakuni s̄ni heon hitanipi s̄ni po; tuka taku yutapi owihanke wanin wiconi hehayan kte cin hee on

hitani po, he Wicašta Cinhintku kin niçupi kta; Wakantanka Ateyapi kin wanna he askamton.

28 Hehan heciyapi; Token econkupi kta, on Wakantanka tohan kin unkoħanyanpi kta he.

29 Jesus waayupte ça hewicakiya; Wakantanka wicoħan tawa kin he dee, tuwe u si kin he wicayadapi kta.

30 Heon etanhan heciyapi; Taku wapetokeca ecanon kin tukte e heon, wanunyakapi qa wicaunnidapi kta; taku yakaga he.

31 Hunkake wicunyanpi kin eya wanna hewoskan manna yutapi qon; Maħpiya eciyatanhan aguyapi yutapi kta e wicaqu ce, eya owapi qon he iyececa.

32 Unkan Jesus hewicakiya; Wowicake, wowicake eciyatanhan heciyapi; Moses aguyapi kin he maħpiya kin eciyatanhan niçupi s̄ni; tuka Atewaye cin he aguyapi wowicake kin maħpiya eciyatanhan niçupi.

33 Aguyapi Wakantanka tawa kin he tuwe maħpiya eciyatanhan kuntkiya u, qa oyate wiconi wicaqu kin hee.

34 Unkan, Eca Itancan, aguyapi kin he ohinniyan unqu po, eciyapi.

35 Tuka Jesus hewicakiya; Aguyapi wiconi kin he miye ce. Tuwe en mau kinhan wotektehda s̄ni un kta; qa tuwe wicamada kinhan ipuza s̄ni un kta.

36 Eya wanna wanmayadakapi, tuka wicamayadapi s̄ni e, eciyapi qon.

37 Ate tona maqu kin owasin miye en mau kta; qa tuwe en mau kinhan tankan iyewaye kte s̄ni.

38 Maħpiya eciyatanhan wahi kin, he mitawacin owape kte s̄ni, tuwe u maši kin he tawacin oweciye kta.



## WICOWOYAKE 6.

39 Atewayaya u maši kin he tawacin kin he dee, tona maqu kin wanjidan toki elpewaye šni, ecen anpetu ihankeya kin piya icalhwaye kta.

40 Tuwe u maši kin he tawacin kin he dee, tona Cinhintku-yapi kin he wanyake ça wicada kin hena owihanke wanin wiconi yuhe kta, qa anpetu ihankeya kin he en piya icalhwaye kta.

41 Heon Juda oyate kin ajijipi ; Aguyapi mašpiya eciyatanhan kun u kin he miye ce, eye ciqon heon etanhan.

42 Qa heyapi ; Jesus Joseph cinhintku qon he dee šni he, atkuku hunku ko sdonwicunyanpi ce : hecen token, Mašpiya eciyatanhan wahi ce, eya okihi he.

43 Heon Jesus waayupte ça hewicakiya ; Niye iyakitedan waajijipi šni po.

44 Tuwedan iye cinka en maukte šni, Ate u maši qon tuwedan en au šni kinhan, qa anpetu ihankeya kin en piya icalhwaye kta.

45 Unkan owasin Wakantanka eciyatanhan onspewicakiyapi kta ce, wicašta wokcan kin en eya owapi qon. Heon tona Ate waonspewicakiye ça anagoptanpi kin hena owasin en maupi kta.

46 Tuwedan Ateyapi kin tohinni wanyake šni, tuwe Wakan-tanka etanhan u kin hecedan Atkuku wanhdaka.

47 Wowicake, wowicake eciyatanhan heciciyapi, Tuwe miye wicamada kinhan, he owihanke wanin wiconi yuhe kta.

48 Aguyapi wiconi he miye.

49 Nihunkakepi kin hewoskan manna yutapi, tuka řapi.

50 Mašpiya eciyatanhan aguyapi hi kin he dee, tuwe etanhan yute cinhan ře kte šni.

51 Aguyapi ni un kin he miye, mašpiya eciyatanhan wahi ; tuwe etanhan yute cinhan owihanke wanin ni kta. Aguyapi wicawaqu kte cin he mixelpi kin ee, he oyate wicani kta e wicawaqu ce, eya.

52 Wicašta kin de iye celpi etanhan unqupi qa untapi kta heye cin, he token okihi kta e heya he, Juda oyate iyakitedan eya hđokinicapi.

53 Hehan Jesus hewicakiya ; Wowicake, wowicake eciyatanhan heciciyapi ; Wicašta Cinhintku kin celpi etanhan yatapi šni, qa we kin datkanpi šni kinhan wiconi takudan en niunpi kte šni.

54 Tuwe mixelpi etanhan yute ça mawe yatke cinhan owihanke wanin wiconi yuha ece, qa anpetu ihankeya kin en piya icalhwaye kta.

55 Mixelpi kin he woyute otancanke, qa mawe kin he woyatke otancanke.

56 Tuwe mixelpi yute ça mawe yatke cin he miči un, qa miš kici waun.

57 Ate u maši kin he ni un, qa Ate on ni waun, he etanhan tuwe mayute cinhan miye on ni un kta.

58 Aguyapi mašpiya eciyatanhan hi kin he dee. Nihunkakepi manna yutapi qon de iyecece šni, he yutapi tuka řapi. Tuwe aguyapi kin de etanhan yute cinhan owihanke wanin ni kta ce, eya.

59 Kapernaum en omniciye tipi kin he ohna waonspekiya icunhan hena hecen eya.

60 Heon etanhan waonspewicakiye cin ota he nañonpi qehan, Wicoie kin de telika ce, tuwe e nañon okihi kta he, eyapi.

61 Unkan Jesus waonspewica-

kiye cin hena heya ajijipi kin, iye atayedan sdoneye ça hewicakiya; Tokeca de iyanipaṭopi he.

62 Wicašta Cinhintku kin wan-kan un qon ake ekta kihde ça, wandakapi kinhan, tokeca kta he.

63 Woniya kin he wiconi kaga ece, wicacehi kin takudan okihi śni. Wicoie eciciyapi kin hena woniya qa wiconi kin hee.

64 Tuka wanjikji he wicayadapi śni. Otokahe ekta tanhan tona wicadapi kte śni, qa nakun tuwe wiyopeye kte cin hena Jesus sdoneya.

65 Unkan heya; He etanhan heciciyapi qon, Tuwedan iye cinka en mau okihi kte śni, tuwe Atewaye cin he qu kinhan heceyedan okihi kta.

66 Hecetu, unkan heon waonspewicakiye cin ota ayuṣtanpi, qa icimana ihakam yapi śni.

67 Hehan Jesus akenonpapi kin, Niś eya yahdapi kta he, ewicakiya.

68 Unkan Simon Inyan ayupte; Itancan, tuwe ekta unyanpi kta he; owihanke wanin wiconi wicoie duhe cin;

69 Qa Messiya Wakantanka ni un Cinhintku kin he niye e wicaundapi qa sdonunyanpi ye, eya.

70 Unkan Jesus awicayupte; Akeninonpapi kin miye cicalnigapi śni he; tuka wanji wakanśica yaunpi ce, eya.

71 Simon cinhintku Judas Iskariyot he ke ça hecen eya. Ake nonpapi kin he etanhan tuka he wiyopeye kte cin ee.

WICOWOYAKE 7.

1 Hena iyohakam Jesus Galile en un; Juda oyate ṭe yapi kta

akitapi heon Juda makoce en un wacin śni.

2 Juda oyate wakeya ohna wotapi ece kin he wanna kiyedan aya.

3 Heon etanhan iye sunkawicaye cin heciciyapi; Detanhan ya wo, qa Juda makoce kin en un wo, hecen waonspewicayakiye cin niohan ecanon ece kin hena wanyakapi kta.

4 Tuwe ihdutanin cin kinhan, taku nahmana econ śni ece. Dena ecanon kta hecinhan, iho oyate kin en ihdutanin wo.

5 Sunkawicaye cin iyepi nakun wicadapi śni.

6 Heon Jesus hewicakiya; Miye anpetu kin hinyanhin iyemichantu śni; tuka niye qe anpetu kin ohinniyan wiyeya niciankapi.

7 Oyate kin śicenidapi okihihi śni, tuka miye e śicemadapi; wicohan tawapi kin hena śica e mdaotanin ece kin heon etanhan.

8 Niye qe woṣnapi kte cin ekta ya po. Miye qe nahahin anpetu iyemichantu śni, heon woṣnapi kin he ekta mde kte śni ce.

9 Hena hewicakiye ça hehan Galile en un.

10 Tuka sunkaku iyayapi kin iyohakam hehan, iś woṣnapi kte cin ekta ya, taninyan ye śni, tuka nahmana ya.

11 Woṣnapi kin icunhan Juda oyate odepi qa, Tokiya un he, eyapi.

12 Qa oyate kin iapi ota on aia-pi. Apa, He wicašta wašte ce, eyapi: qa toktokeca iś, Hiya, oyate kin wicahnayan ce, eyapi.

13 Juda oyate kowicakipapi, heon etanhan tuwedan taku ataninyan eye śni.

14 Woṣnapi kin cokaya hdoipi, unkan Jesus tipi wakan ohua inajin, qa wowicakiyaka.

15 Unkan Juda oyate kin inhanpi qa heyapi; Wicašta kin de tokiya tanhan wowapi kin onspe he; tohinni onspekiyapi šni qon.

16 Unkan Jesus awicayupte ça heya; Wociciyakapi kin de miye etanhan šni, tuwe u maši kin he iye etanhan.

17 Tuwe iye tawacin ecen econ wacin kinhan, woyakapi kin de Wakantanka eciyatanhan hecinhan, qa is miye cinka hena epa hecinhan, sdoney kta.

18 Tuwe iye en oie iciye cinhan he iye towitan okide ece; tuka tuwe is, tuwe uši kin he towitan okicide kinhan, he iye wowicake, qa wicowicaštašni takudan en un šni.

19 Moses woope kin ničupi šni he; tuka tuwedan woope kin ecen ecanonpi šni; taku on țemayayapi kta e ayakitapi he.

20 Oyate kin ayuptapi qa heyapi; Wakan šica niyuhnaškinyan; tuwe e țeniyani akita he.

21 Hehan Jesus waayupte ça hewicakiya; Wicohan wanji ecamon, unkan owasin niyusinyayapi.

22 Moses baħdayapi wicohan kin ničupi; he Moses etanhan šni, tuka hunkakewicayapi kin etanhan; unkan anpetu wakan eca wicašta wan bayeciħdayapi ece.

23 Hecen anpetu wakan eca wicašta wan bakiciħdayapi hecinhan, on Moses woope kage ciqon yujujupi kte šni; wicašta wan anpetu wakan en ocowasin okiziwaye cin heon cantamayahdepi he.

24 Wiyacinyan wayacopi šni po, wokonze e eciyatanhan wayaco po.

25 Hehan Jerusalem etanhan wanjikji heyapi; Tuwe țeyan akitapi kin he dee šni he.

26 Unkan iho, kagi šni ia tuka tuwedan taku eciye šni. Wicašta itancanpi kin awicakehan Messiya kin he dee e sdonyapi he.

27 Tuka wicašta kin de tokiyatanhan u kin sdonunyanpi; tohan Messiya hi kinhan, tokiyatanhan u kin tuwedan sdoney kte šni, eyapi.

28 Hehan Jesus tipi wakan kin ohna waonspekiya icunhan hotankakiya heya; Tuwe miye kin sdonmayayapi, qa tokiya tanhan wau kin he nakun: qa miye cinka wahi šni; tuka tuwe u maši kin he wicaka, ege sdonyayapi šni.

29 Tuka miye he sdonwakiya, he iye etanhan wahi, qa u maši kin hee.

30 Unkan heon ținsa yuze wacinpi, tuka nahahin iyehantu šni kin heon tuwedan nape on yutanpi šni.

31 Unkan oyate kin etanhan wicota he iye kin wicadapi qa heyapi; Tohan Messiya hi kinhan, de taku wapetogya econ kin, he sam iyeya hecon kta he, eyapi.

32 Oyate kin iyakitedan hekiciyapi he Pharisee kin nahonpi; unkan wošna kagapi Pharisee ko, yuzapi kta e on akicita ekta ye wicašipi.

33 Hehan Jesus hewicakiya; Ehake tokata cistiyedan ocipapi waun kta, hehan tuwe u maši kinhan heciya wahde kta.

34 Omayadepi kta, tuka iyemayayapi kte šni; qa tokiya waun kin ekta yaupi kta ešta, oyakitanipi kta.

35 Hehan Juda oyate kin iyakitedan hekiciyapi; Tokiya ye kta he, qa iyeunyanpi unkokihipi kte šni; Helenes oyate kin ehna enanakiya iyayapi kin ekta



ye ca, Helenes wowicakiyake kta he.

36 Omayadepi kta tuka iyemayayapi kte śni, qa tokiya waun kin ekta yaupi kta ešta, oyakitpanipi kta ce, eye cin wicoie kin he toketu he, eyapi.

37 Wośnapi anpetu ehake qa tanka kin en, Jesus najin qa hotankakiya heya; Tuwe ipuza kinhan en mau qa mini yatke kta.

38 Tuwe wicamada kinhan, wowapi wakan eye cin iyececa, iye tanmahen tanhan wiconi mini wakpadan kaduze kta ce.

39 Tuka Woniya, tona iye wacinyanpi kin icupi kte cin hee on hecen eya: he ehan nahāhin Woniya Wakan kin wicaqupi śni, nahāhin Jesus wowitan ehan i śni.

40 Oyate kin etanhan wicota wicoie kin de nahonpi qehan, Awicakehan wicašta wokcan kin he dee ce, eyapi.

41 Toktokeca is, Messiya kin he dee ce, eyapi. Tuka apa is, Messiya Galile etanhan u kta he, eyapi.

42 Dawid wicoicage tawa kin etanhan Messiya hinanpe kta, qa Bethlehem otonwe Dawid en un qon hetanhan u kta ce, wowapi wakan eye śni he.

43 Hetanhan oyate kin akipam wacinkiyuzapi.

44 Qa hunh yuze wacinpi, tuka tuwedan nape on yutan śni.

45 Hehan akicita kin, wośna kagapi Pharisee ko ekta icicawin wicakipi; unkan, Tokeca e ayahipi śni he, ewicakiyapi.

46 Akicita kin awicayuptapi; Wicašta kin tuwedan tohinni wicašta kin de iyecen oie ye śni ce, eyapi.

47 Hehan Pharisee kin is awicayuptapi, Niś nakun nihnyanpi he.

48 Wicašta itancanpi kin wanjikji qa Pharisee ko he wicadapi he.

49 Tuka oyate kin de, woope yukcanpi śni kin hena wahtepi śni ce, eyapi.

50 Nikodemos hanyetu ehan Jesus yanke cin en i qon, he itancanpi kin wanji ee, hewicakiya;

51 Woope unkitawapi kin, wicašta token eye cin nahon śni, qa taku econ kin atayedan sdonye śni itokam, yaco he.

52 Unkan ayuptapi qa heciyapi; Niś Galile henitanhan he: Wawiwange ça wanyaka wo; wicašta wokcan tuwedan Galile etanhan u śni ce.

53 Hehan otoiyohe iye tipi kin ekta kihdapi.

#### WICOWOYAKE 8.

1 Jesus Oliwe Paha kin ekta i.

2 Qa ihanhanna anpao hehan tipi wakan kin en ki, unkan oyate kin owasin en ahi; unkan en iyotanke ça wowicakiyaka.

3 Unkan wośna kagapi Pharisee ko winohinca wan nahma ihduśaka e en kahipi, qa cokata ehdepi;

4 Qa heciyapi, Waonspekiye, winohinca kin de wawicihahapi econ wanka icunhan iyeyapi.

5 Unkan Moses, woope kin en, tona hececa kin inyan on wicakininpi kta, unkekiciyapi qon: tuka niś token ehe kta he.

6 Taku iyaonpapi kte cin he akitapi e heon etanhan he iyutanyan heciyapi. Tuka Jesus patuś inajin, qa nape on maka kin en owa.

7 Unkan kitanyan wiwangapi, hehan Jesus owotanna inajin, qa hewicakiya; Wanji tukte wohtani wanin yaunpi hecinhan,

he tokaheya inyan on kinin kte.

8 Hehan ake patuś inajin qa ake maka kin en owa.

9 He nahonpi, unkan iye tawacin on ihdacopi, heon wanjikjidan tankata kinanpapi, tokaheya wicaśta tanka unpi, qa ecen hakaktapi koya owasin; qa Jesus isnana un ehpeyapi, winohinca cokata hdepi qon he koya.

10 Unkan Jesus ihduowotanana, qa tuwedan wanyake śni, winohinca ecedan ecen najin, unkan heciya, Winohinca, wiyanyonpapi qon owasin toki iyayapi he; tuwedan niyaco śni he.

11 Han, Itancan, tuwedan śni, eya. Miś eya ciyaco śni, hunktiya wo, tokata yeye cin icimana wahitani śni wo, Jesus eciya.

12 Hehan ake Jesus owicakiye qa heya; Oyate iyoyamwicaye cin he miye. Tuwe mihakam u kin he otpaza ehna mani kte śni, iyoyanpa wiconi hee tawa kta.

13 Hehan Pharisee kin heciyapi; Niye atayedan nihdaotanin, heon wadaotanin kin he wowicake śni.

14 Jesus waayupte qa hewicakiya; Miye atayedan mihdaotanin qeyaś mihdaotanin kin he wowicake; tokiya tanhan wahi kin he sdonwakiya, qa nakun tokiya mde kte cin he; qa niyepi kin tokiya tanhan wau, qa tokiya mde cin hena sdonyayapi śni.

15 Wicacehpi eciyatanhan wadacopi; tuka miye qe tuwedan mdaco śni.

16 Tuka nakun wamdaco kinhan, wamdaco kin he wowicake kta; miśnana waun śni, tuka Ateyapi u maśi kin he micium ece.

17 Wicaśta nom waayataninpi

kin he wowicake ce, woope duhapi kin en owapi qon.

18 Miye atayedan mihdaotanin, qa Ate u maśi kin he nakun ma-yaotanin.

19 Unkan, Niyate tukte e he, eciyapi. Jesus is awicayupte, Sdonmayayapi śni, qa nakun Ateyaye cin sdonyayapi śni: Miye kin sdonmayayapi unkanś, Ate is nakun sdonyayapi kta tuka.

20 Tipi wakan kin en mazaska opiye he cin he en, Jesus waonspewicakiya icunhan hena hewicakiya. Heca tuka tuwedan Jesus otan wacinpi śni, anpetu kin nahahin kicibi śni heon.

21 Hehan Jesus ake hewicakiya; Wahde kta, qa omayadepi ecen woahitani ehna niṭapi kta; qa tokiya wahde cin heciya dapi kta eśta oyakitpanipi kta.

22 Unkan Juda oyate kin heyapi; Iye icikte kta he. Tokiya mde cin heciya dapi oyakitpanipi kta ce, eye cin.

23 Hehan iye hewicakiya; Niye kuya tanhan yaunpi; qa miye e wankan tanhan waun; maka kin detanhan yaunpi, tuka miye maka kin dematanhan śni.

24 He etanhan wayahtanipi kin en niṭapi kta ce, eciciyapi. He miye kin wicayadapi śni kinhan wayahtanipi kin ehna niṭapi kta ce.

25 Unkan, Tuwe niye he, eciyapi. Tokag ehan eciciyapi qon he dee, Jesus ewicakiya.

26 Taku ota eciciyapi, qa ciyacopi kta e mduha; tuka tuwe u maśi kin he wowicake; qa taku emakiye cin owasin oya-te kin owicawakiyaka ce.

27 Iye Atkuku kin on hena hewicakiye cin he okahinigapi śni.

28 Hehan Jesus hewicakiya;

Tohan Wicašta Cinhintku kin wankan eyahdepi kinhan, hehan he miye kin sdonyayapi kta, qa miye cinka takudan ecamon šni; tuka Ate taku onspemakiye cin hena ecedan ecen omdaka ece.

29 Tuwe u maši kin he mici un; Ate mišnana amahduštan šni; taku iyokipi ecen ecamon ece, heon etanhan, eya.

30 Hewicakiya icunhan wicota wanna wicadapi.

31 Heon Juda oyate kin etanhan tona Jesus wicadapi kin hena hewicakiya; Mioie kin ohinniyan oyapapi kinhan, awicakehan waonspewicawakiye cin he niyepi kta;

32 Kinhan wowicake kin sdonyayapi kta; qa wowicake kin he niciyuškapi kta ce.

33 Hehan ayuptapi; Abraham towicoun kin unketanhanpi, qa tohinni tuwedan wowidag unyanpi šni; hecen, Niciyuškapi kta ce, ehe cin he token heha he.

34 Jesus awicayupte; Wowicake, wowicake on heciciyapi, Tuwe woahitani econ kin he woahitani en wowidake un ece.

35 Qa wowidake un kin he ohinniyan tipi kin ohna un šni ece; tuka Cinhintku kin hee ohinniyan timahen ounyan.

36 Heon Cinhintkuyapi kin niciyuškapi hecinhan, awicakehan tawaničiyapi kta.

37 Abraham towicoun kin enitanhanpi sdonwaya; tuka te mayayapi yacinpi, mioie kin en niunpi šni, heon etanhan.

38 Taku Ate ekta wamdake cin hena omdaka ece; qa niš niyate ekta taku wandakapi kin hee ecen ecanonpi ece.

39 Hehan ayuptapi qa heciyapi; Abraham he ateyanpi kin ee. Unkan Jesus hewicakiya;

Abraham cinca kin he niyepi unkanš, Abraham oħanye cin he ecen ecanonpi kta tuka.

40 Tuka nakaha temayan ayakitapi, wicašta wan wowicake Wakantanka eciyatanhan nawahon kin he ociciyakapi kin he miye tuka: Abraham e qe hecen econ šni qon.

41 Niyatepi oħan kin hee ecen ecanonpi ece, eya. Hehan heciyapi; Tuwe cinca tanin šni kin heuncapi šni; ate unyanpi wanjidan unhapi, Wakantanka kin hee.

42 Heon Jesus hewicakiya; Wakantanka he ateyayapi unkanš wašte mayadakapi kta tuka; miye kin Wakantanka kin hetanhan wahinape ča wau; qa miye cinka wahi šni, iye kin u maši.

43 He tokeca e iwae cin oyakalinigapi šni he; mioie kin anagoptan wacannipi šni kin heon etanhan.

44 Wakanšica ateyayapi kin henitanhanpi, qa niyatepi tawacin kin ecen ecanonpi yacinpi ece. He otokahe etanhan tinwicakte kin heca, qa wowicake kin en najin šni, wowicake takudan en un šni nakaes. Tohan woitonšni oyaka eca, he iye cinka ohdaka ece; iye kin woitonšni sa, qa woitonšni atkuku kin hee.

45 Tuka miye wowicake eciciyapi kin, heon etanhan wicamayadapi šni.

46 Niyepi kin wanji tukte he wawahtani e duwicakapi he. Qa wowicake epe cinhan, tokeca e wicamayadapi šni he.

47 Tuwe Wakantanka etanhan kin he Wakantanka oie anagoptan. Niye Wakantanka anayagoptanpi šni ece, heon etanhan henitanhanpi šni.



## WICOWOYAKE 9.

48 Hehan Juda oyate kin ayu-  
ptapi qa heciyapi; Samariya oya-  
te henitanhan, qa Wakansica ni-  
yuhnaşkinyan ce, unkeniciyapi  
qon he wicaunkapi ce.

49 Jesus ayupte; Wakansica  
mayuhnaşkinye şni; tuka Ate  
wahduwitan, qa niye wowiştēn-  
mayayapi.

50 Miye mitowitan awecite  
şni; tuka tuwe waakite ça waya-  
co yukan ce.

51 Wowicake, wowicake eci-  
yatanhan heciyapi, Tuwe mio-  
ie kin de yuhe cinhan, tohin-  
ni wiconţe wanyake kte şni,  
eya.

52 Hehan Juda oyate kin he-  
ciyapi; Wakansica niyuhnaşkin-  
yan e dehan iyotan sdonunyanpi.  
Abraham hee kaeş ʔa, qa wokcan-  
pi kin hena nakun ʔapi; tuka ni-  
ye, Tuwe mioie yuhe cinhan to-  
hinni wiconţe ute kte şni ce, eha  
ce.

53 Abraham ateunyanpi kin  
hee kaeş ʔe cin, niye e iniyotan  
he. Wokcanpi kin nakun heepi  
kaeş ʔapi; qa niye nituwe e niçi-  
caga he, eyapi.

54 Unkan Jesus waayupte;  
Miye cinka mihduonihan kinhan,  
mitowitan kin he taku kte şni;  
tuka Atewaye cin he mahduoni-  
han ece; unkan he Wakantanka  
nitawapi, kehapi.

55 Heca ešta tohinni sdonya-  
yapi şni; tuka miye e sdonwa-  
kiya. Qa he sdonwaye şni ce,  
epe cinhan, miş eya niyepi iyecen  
iwaton kte şni; tuka miye sdon-  
waya, heon etanhan oie kin tan-  
yan weciyuha.

56 Abraham ateyayapi qon  
mitaanpetu kin wanyake kta cin  
hinca, unkan he wanyake ça  
iyuşkin ce, eya.

57 Hehan Juda oyate kin heci-  
yapi; Nahahin waniyetu wikce-

mna nizaptan şni, tuka Abraham  
wandaka he.

58 Jesus hewicakiya; Wowi-  
cake, wowicake eciyatanhan he-  
ciyapi; Abraham un qon he  
itokam wanna waun ce, eya.

59 Hececa unkan inyan icupi,  
qa on kininpi kta; tuka Jesus na-  
içilibe ça, tipi wakan etanhan  
wicehna tanhan tankata inanpe  
ça, etoopteya iyaya.

## WICOWOYAKE 9.

1 Jesus ye cin tahepi, wicašta  
wan toka tonpi ehantanhan ton-  
we şni un e he wanyaka.

2 Unkan waonspewicakiye cin  
wiwangapi qa heyapi; Itancan,  
tuwe wahtani he, wicašta kin  
de atkuku, hunku, iyeka, wanji  
tukte wahtani he, on išta gonga  
tonpi he.

3 Jesus waayupte; He iye, qa  
atkuku, hunku, wanji wahtanipi  
on hecece şni; tuka Wakantan-  
ka ohan kin e he ayutaninpi kta  
e heon.

4 Anpetu icunhan, tuwe u maşi  
wicohan tawa kin ecen ecamon  
kta iyececa; hanyetu kin he hi  
kta, he en tuwedan wicohan econ  
okihi kte şni.

5 Tohanyan wicašta opeya wa-  
un kin, oyate iyoyamwicawaya  
ece, eya.

6 Hena heye ça hehan makata  
tagoşa, qa tage on upşija kage  
ça, iştageonge cin išta kin en  
upşija ikiciun;

7 Qa heciya; Siloam miniyo-  
we, yeşipi eyapi kin he kapi, he  
ekta ye ça en ihdujaja wo. Un-  
kan ekta i, qa on ihdujaja qa  
hdi, unkan wawanyaka.

8 Heon itan anog tipi, qa tona  
wicašta iştageonge cin wanyaka-  
pi ece qon hena, Tuwe timata  
iyotang un qon he dee se, eyapi.

9 Wanjikji, He dee ce, eyapi: qa toktokeça is, He de iyececa ce: tuka iye kin, He miye ce, eya.

10 Unkan, Tokiya tanhan de on ništa kin dumdaya he, eciyapi.

11 Unkan iye waayupte ça heya; Wicašta wan Jesus eciyapi kin he upsija kage ça, ista anokatanhan imiciun, qa, Siloam miniowe kin ekta ye ca, mini on ihdujaja wo, emakiya qehan, ekta wai, qa mihdujaja, unkan watonwan, eya.

12 Unkan, Wicašta kin he tukte e he, eciyapi. Sdonwaye šni ce, eya.

13 Wicašta istagonge ciqon he Pharisee kin en wicakaipi.

14 Unkan anpetu wakan icunhan, Jesus upsija kage ça on wicašta kin he ista yukawakiya.

15 Hehan Pharisee kin is ake, token on ista yukawapi hecinhan he iwangapi. Unkan, Upsija e ista kin en imaun qa mihdujaja, unkan watonwan, ewicakiya.

16 Unkan Pharisee kin wanjikji; Wicašta kin he anpetu wakan awacin šni, heon etanhan Wakantanka hetanhan šni, eyapi. Unkan apa, Wicašta wan walitani sa hecinhan, wowapetokeca dececa token econ okihi kta he, eyapi. Hecen on akipam wacinhnakapi.

17 Ake wicašta istagonge ciqon heciyapi; Qa niš token eyakiya he, ista tonweniye cin. Unkan, He wicašta wokcan kin heca ce, eya.

18 Wicašta kin he ista gonga tuka ihnuhana tonwe cin he Juda oyate kin wicadapi šni, heon tuwe ista tonweyeyapi kin atkuku hunku ko wicakicopi;

19 Qa wiwicawangapi qa heya; De nicincapi qa tonwe šni

tonpi kehapi he; qa tokiyatanhan nakaha tonwan he.

20 Atkuku hunku ko waayuptapi qa heyapi; De unkcincapi tonwe šni tonpi he sdonunki-yapi;

21 Tuka nakaha tokiya tanhan on tonwe cin de sdonunyanpi šni. Qa ista yukawa kin de nakun sdonunyanpi šni; is eya hokšike šni kin, iye iwanga po, toketu kin he ecen eye kta ce.

22 Juda oyate kowicakipapi, qa heon etanhan atkuku hunku kici hecen eyapi. Tuwe, Messiya kin hee, taninyan eye cinhan, he omniciye tipi kin etanhan tankan iyeyapi kta, Juda oyate kin wanna wakiconzapi.

23 He etanhan, Iye eš hokšike šni kin, iye atayedan winungapi šni, atkuku hunku kici eyapi.

24 Hehan ake icinonpa wicašta istagonge ciqon he wiwangapi qa heciyapi; Wakantanka woyatan qu wo; wicašta kin he walitani sa sdonunyanpi ce.

25 Iye waayupte ça heya; He walitani sa hecinhan sdonwaye šni; tuka taku wanji sdonwaya; istamagonga tuka nakaha watonwe cin he.

26 Unkan, Taku tokanicon qa on ista kin niyukawa he, ake eciyapi.

27 Unkan awicayupte; Wanna eya keš ociciyakapi, tuka nayahonpi šni; ake icinonpa nayahonpi yacinpi he; niš eya wonspewicakiye cin hen ope nihdawapi kta he, eya.

28 Hehan iwalitedapi šni qa heyapi; Waonspewicakiye cin he wanji niye; tuka Moses wonspewicakiye cin he unkiyepi.

29 Wakantanka Moses he okiya sdonunyanpi, tuka wicašta kin de tokiyatanhan u kin sdonunyanpi šni ce.

30 Unkan wicašta kin he waayupte ça hewicakiya ; Taku wuwinihan kin he dee ; naka išta mayumdaya, tuka tokiyatanhan u kin sdonyayapi šni.

31 Walitanipi sa kin hena Wakantanka anawicagoptan šniece, tuka tuwe Wakantanka yuonihan, qa tawacin okicipe cin, hee Wakantanka anakigoptan e sdonunyanpi.

32 Otokaheya tanhan tuwe wicašta tonwe šni tonpi išta kiyukawa oyakapi kin tuwedan nahon šni ce.

33 Wicašta kin de Wakantanka eciyatanhan šni unkanš takudan okihi kte šni ce, eya.

34 Unkan waayuptapi qa, Woalitani ocowasin ehna nitonpi, tuka waonspeunyakiyapi kta kecanni he, eciyapi ; qa tankan iyeyapi.

35 Tankan iyeyapi kin he Jesus nahon ; qa akipa, unkan, Wakantanka Cinhintku kin wicayada he, eciya.

36 Iye waayupte ça, He tuwe, he, Itancan, wicawada kta ce, eya.

37 Wandake ça he iye e oniciya, Jesus eya.

38 Unkan, Itancan wicawada, eyaya itokam campeška makehde inajin.

39 Unkan Jesus heya ; Oyate kin de ekta wicawahi, wicašta tona tonwe šni kin hena tonwanpi kta, qa tona tonwe cin hena išttagongapi kta, he woyaco kin hduha wahi ce.

40 Unkan Pharisee kicicapi kin hena nahonpi, unkan, Unkiš eya ištaungongapi he, eciyapi.

41 Išttagongapi unkanš woalitani wanin yaunpi kta ; tuka nakaha, Untonwanpi ce, ehapi ; heon woalitani niyukanpi, Jesus ewicakiya.

## WICOWOYAKE 10.

1 Wowicake, wowicake eciyatanhan heciciyapi ; Tuwe tahinca tipi tiyopa ohna tin iyaye šni, tiyopa icunonpa tanhan ti iyolipaye cin he wabotice ça wamanon kin heca.

2 Tuka tuwe e tiyopa eciyatanhan tin iyaye cin hee tahinca tawa wicaye cin ee.

3 Qa iye tiyopa awanyake cin tiyopa kiciyugan ece, unkan tahinca kin he ho kin nahonpi ece ; tahinca tawa kin otoiyohi cajeyan wicakico, qa tankan wicahdoya ece.

4 Unkan tahinca tawa kin tankan awicau eca, wicitokam ya ece ; unkan tahinca kin isihakam yapi ece, ho kin iyekiyapi nakaes.

5 Qa tuwe tokeca kinhan he ihakam yapi kte šni, tuka nakicipapi kta ; tuwe tokeca ho kin iyekiyapi šni, heon etanhan.

6 Wiyacinpi kin de Jesus ecen ewicakiya ; tuka taku owicakiyake cin hena okahnigapi šni.

7 Hehan ake Jesus hewicakiya ; Wowicake, wowicake on heciciyapi, Tahinca tipi tiyopa kin he miye ce.

8 Tona mitokam hipi kin hena owasin waboticapi qa wamanonpi kin hecapi ; tuka tahinca kin anawicagoptanpi šni.

9 Tiyopa kin he miye ; tuwe miye eciyatanhan ti iyolipaye cinhan ni kta ; qa mahen ye ça tankata inanpa eca wato tanyan iyeye kta.

10 Wabotice cin he wamanonpi, tin wicaktepi, waihangyapi henakiya on hi ece ; tuka wiconi yuhapi kta, qa takudan icakije šni unpi kta e heon miye wahi.

11 Waawanhdake wašte kin he miye. Waawanhdake wašte kin



he tahnca kin on wiconi tawa ehpekiya.

12 Tuka tuwe odotapi un, qa waawanhdake kin ee sni, qa tahnca tawa sni kin he sunktokeca en u wanyaka eca, tahnca kin ehpewicaye ca najica ece; unkan sunktokeca iyawicalipaye ca ihangwicaya ece.

13 Odotapi un kin he wodotapi un, qa tahnca kin ihawicakta sni, heon etanhan napa ece.

14 Waawanhdake wašte kin he miye, qa tahnca mitawa kin hena sdonwicawakiya, qa mitawa kin is nakun sdonmakiyapi ece.

15 Ate token sdonmakiye cin he iyecen mis Ate sdonwakiya; qa tahnca kin hena on wiconi mitawa kin ehpewakiya.

16 Qa tahnca toktokeca nakun wicamduha, tahnca tipi kin den un sni: hena nakun awicawahi kta, hecen miho kin nahonpi kta; hetanhan tahnca tipi wanjidan kta, qa waawanhdake wanjidan kta.

17 Wiconi mitawa ehpewakiye ca, ake ewehdaku kte cin heon Ate wašte makidaka.

18 Tuwedan he maki kte sni; qa miye cinka he wicawaqu; he amdustan kte cin owakihi, qa ewehdaku kte cin nakun owakihi; Ate hecen econ masi ce, eya.

19 Akes wicoie kin dena on Juda oyate kin akipam tawacinpi.

20 De taku wakan sica yuha, qa he ihnaškinyan, tokeca e nayahonpi he, wicota eyapi.

21 Tuka apa is, Tuwe wakan sica yuhe cin decen oieye sni ece; taku wakan sice cin he ista gongapi ista wicakiyukawa okihi kta he, eyapi.

22 Wanna Jerusalem en yuwo-

hduze tonpi omniciye kagapi ece qon hehantu; unkan waniyetu.

23 Unkan icunhan tipi wakan ohna, Solomon ohanzi hdepi tawa qon he en Jesus omani.

24 Hehan Juda oyate itan ihdukšan himniciyapi qa heciyapi; Tohanyan wacin akipam yusunyakiyapi he; Messiya kin he niye hecinhan taninyan unkoki-yaka po.

25 Jesus awicayupta; Wanna ociciyakapi tuka wicamayadapi sni qon; Ate caje kin eciyatanhan wicohan ecamon kin hena omayake cin ee.

26 Tahnca tawa wicawaye cin he oyapapi sni, he etanhan wicamayadapi sni, eciciyapi qon he iyececa.

27 Tahnca mitawa kin miho kin nahonpi, qa hena sdonwicawakiya, qa mihakam unpi.

28 Qa owihanke wanin wiconi wicawaqu; qa icimana owihankepi kte sni, qa minape kin etanhan tuwedan wicayušte kte sni.

29 Ate hena maqu kin he taku owasin sam iyeya tanka; qa Ate nape kin etanhan tuwedan wicayušta okihi sni.

30 Miye, qa Atewaye cin unwanjipidan, eya.

31 Hehan Juda oyate ake inyan icupi, on kininpi kta e heconpi.

32 Unkan Jesus awicayupta; Ate eciyatanhan wicohan wašte ota cicipazopi; hena tukte wanji on nakaha inyan on mayakininpi kta he, eya.

33 Juda oyate ayuptapi qa heyapi; Wicohan wašte on unnicininpi kte sni, tuka iapi sica on, qa winicašta tuka Wakan-tanka ničicage cin heon etanhan.

34 Jesus awicayupte; Taku wakan kin henicapi, eciciyapi ce, he woope nitawapi kin en hecen kagapi sni he.

## WICOWOYAKE 11.

35 Hecen tona Wakantanka oie kin en wicahiyohi kin hena taku wakanpi ewicakiya hecinhan, qa wowapi wakan kin he yujujupica šni;

36 Hecen tuwe Ateyapi kin hduwakan qa makata u-ši kin he, Wakantanka Cinhintku kin he miye ce, epe ciqon, heon, 'Taku šica eha ce, token eyakiyapi kta he.

37 Ate ohan kin hena ecen ecamon šni kinhan, wicamadapi šni po.

38 Tuka hecen ecamon kinhan, miye wicamayadapi šni ešta, wicohan kin hena wicada po; hecen Atewaye cin micica, qa miye he wecica, heciyatanhan sdoniyayapi qa wicayadapi kta ce, eya.

39 Heon etanhan nakun ake ŋinsa yuze wacinpi; tuka napepi kin etanhan ihdušpa.

40 Qa ake hetanhan Jordan wakpa kin he en, Johannes baptem wicaqu ece qon he en i, qa en ounyan.

41 Unkan wicota en hipi qa heyapi; Johannes takudan wapetogya ecen econ šni, tuka Johannes wicašta kin de etanhan tona oyake cin owasin wowicake.

42 Unkan hen wicota wicadapi.

### WICOWOYAKE 11.

1 Unkan wicašta wan wayazanka, Lazarus eciyapi, Bethani hetanhan, Mary qa cunku Martha totonwepi kin hee.

2 Mary wihdi waštemna on Itancan kin sdaye ça, paha kin on siha kin kipakinta, Lazarus he hunkawanjitku wayazanke cin hee.

3 Unkan tawinohtinpi kin, Itancan, wicašta wan wašteyadake

ciqon he wayazanka, eya hoši kaipi.

4 Jesus nañon unkan hecen eya, Wowayazan kin he wiconte ekta šni, tuka he Wakantanka towitan kin ee, qa heon Wakantanka Cinhintku kin yuwitanpi kta.

5 Martha iye tankaku, Lazarus kici, Jesus wašte wicadaka.

6 Wayazanke cin nañon, tuka anpetu nonpa ekta ye šni yanka.

7 Hehan Jesus waonspewicakiye cin hewicakiya; Juda makoce kin ekta unbdapi kta.

8 Unkan waonspewicakiye cin heciyapi; Itancan, nahanhin aškatudan Juda oyate kin inyan on nicinipi akitapi, qa ake ekta hde wacanni he.

9 Jesus waayupte; Anpetu wanjidan keš, wihiyayedan oape akenonpa šni he; tuwe anpetu icunhan mani kinhan našna šni ece; maka akan iyoyanpa kin he wanyaka heon.

10 Tuka tuwe hanyen mani kinhan hee našna kta, iyoyanpa takudan en un šni kin heon.

11 Hena hecen eya; qa hehan iyohakam hewicakiya; Lazarus koda unyanpi qon ištınma, ekta mde ça mduhice kta ce.

12 Hehan waonspewicakiye cin, Itancan, ištınma hecinhan he hecetu kta ce, eyapi.

13 He wanna ŋa e Jesus heya; tuka ištınmapi on oziiciya e heya kecinpi.

14 Unkan hehan Jesus taninyan hewicakiya; Lazarus wanna ŋa ce:

15 Qa he icunhan hen waun šni kin heon niyepi en wimduškin, hecen on wicayadapi kta. Ho po, ekta unyanpi kta.

16 Hehan Thomas Didumos eciyapi kin he waonspewicakiye unmapi kin hewicakiya; Ekta unyanpi, qa kici unŋapi kta ce.

17 Unkan Jesus en u qehan, hapi etanhan wanna topa can he sdonya.

18 Jerusalem Bethani ikiyedan, wiyutapi akezaptan ecetu hehanyan.

19 Unkan Martha Mary kici yukanpi en Juda oyate wicota magagaye wicaipi; hunkawanji- tkupi kin heon.

20 Jesus en u Martha nahon, unkan itkokim ya; tuka Mary e timahen iyotanka yanka.

21 Hehan Martha Jesus heciya; Itancan, den yaun unkanś, mi- hunkawanji ƚe kte śni tuka;

22 Tuka detanhan taku Wa- kantanka yakida kinhan, Wa- kantanka niču kta e sdonwaya ce.

23 Nihunkawanji ekicetu kta, Jesus eciya.

24 Eya woekicetu anpetu ihan- keya kin hehan ekicetu kta e sdonwaya, Martha eya.

25 Unkan Jesus heciya; Woe- kicetu qa wiconi kin he miye, tuwe wicamada kinhan toke hin ƚa ešta ni kta.

26 Qa tuwe ni un, qa wicama- da kinhan icimana ƚe kte śni. He wicayada he.

27 Han, Itancan; Messiya Wa- kantanka Cinhintku makata hi kte ciqon he niye e wicawada ce, eciya.

28 Unkan hena hecen eya, he- han hde ƚa, tawinohtin Mary anahbeyahan kico, qa heciya; Itancan kin den un, qa nico ce.

29 He nahon iheya, unkan oħankoya najin hiyaye ƚa ekta ya.

30 Nahanhin Jesus otonwe kin ehan i śni, tuka Martha itkokepi ciqon he en un.

31 Hehan Juda oyate en yukan- pi, qa magagayapi, he icunhan Mary oħankoya najin hiyaye cin wanyakapi qehan, ihakam iya-

yapi qa, Wicašta hnakapi ekta ceye kta e ekta ya, eyapi.

32 Jesus najin kin Mary ehan i, qa wanyake ƚehan, ihukuya canpeška makehde elipeiƚiye ƚa, Itancan, den yaun unkanś, mi- hunkawanji ƚe kte śni tuka, eci- ya.

33 Mary ceye cin he Jesus wanyake ƚa, Juda wicašta kici ipi kin hena nakun ceyapi; un- kan iye atayedan comnihdazi, qa ilniyanyan.

34 Qa tokiya eyahnakapi he, eya. Unkan, Itancan, ekta u qa wanyaka ye, eciyapi.

35 Jesus ceya.

36 Hehan Juda oyate kin he- yapi; Wanyaka po, ehan qon wašte dake hinca ce.

37 Qa wicašta wanjikji, Wi- cašta išta aohduta ee kaes yuka- wa, wicašta kin de ƚe śni unki- ya okihi kta naceca ce, eyapi.

38 Ake Jesus iye atayedan com- nihdazi, qa wicašta hnakapi kin en ya. He imnija oħdoka ohna hnakapi, qa inyan wan- tanka aokaƚinzapi.

39 Inyan kin tokan iyeya po, Jesus eya. Wicašta ƚe cin ta- winohtin Martha heciya, Itan- can, wanna topa can yanka e śicamna.

40 Wicayada kinhan, Wakan- tanka towitan wandake kta ce, eciciye śni he, Jesus eciya.

41 Hehan inyan kin tokan iye- yapi; wicašta ƚa wanke cin etan- han. Unkan Jesus išta yuwan- kan ikikcu, qa heya; Ate ciya- wašte, namayahon kin heon;

42 Qa ohinniyan namayahon kin he sdonwakiya; tuka wicašta hnakapi kin de en mitan okśan najinpi kin de on, he niye u ma- yaši kin wicadapi kta e on hepe.

43 Hecen eye ƚa hehan, Laza- rus nunke cin hetanhan tankata



hninanpa wo, awitukadan hoye-kiya qa eya.

44 Unkan wicašta te cin tankata hninanpa, siha nape ko palitapi, qa ite opemni tonpi kin hena ecehna. Kiyuškapi qa ayuştan po, iyaye kta, Jesus ewicakiya.

45 Hehan Juda wicašta Mary kici ipi qon, hena Jesus taku econ kin he wanyakapi, unkan wicota wicadapi.

46 Tuka wanjikji Pharisee kin ekta wicakipi, qa Jesus taku econ kin owicakiyakapi.

47 Hehan woşna kagapi Pharisee ko mniciyapi qa, Token econkupi he ; wicašta kin de taku wapetokeca ota econ kin, eyapi.

48 Iyowinunkiyapi kinhan wicašta owasin wicadapi kta ; kinhan Roma oyate kin den upi kta, qa otonwe kin de unkasotapi, qa nakun unkitaoyatepi kin hena ko.

49 Hehan wanji Kaiaphas eciyapi waniyetu kin he en woşna kagapi itancan kin hee hewicakiya ; Takudan oyakahnigapi şni.

50 Qa nakun awacannipi şni, wicašta, wanjidan oyate on te cinhan, hecen on oyate kin wicate kte şni, he unkiyepi kin on hecetu kta ce, eya.

51 Iye etanhan on hecen eye şni, tuka omaka kin he en woşna kagapi itancan kin heon, Jesus oyate kin on te kte cin he iyukcanyan heya.

52 Qa oyate kin hecedan şni, tuka Wakantanka cinca omdecahe cin hena owasin wanjidan-kiya kiwitaye kta.

53 Hehan anpetu kin hetanhan witaya akiiapi, teyapi kte cin heon.

54 Heon etanhan Jesus Juda oyate kin wicehna taninyan

omani şni, tuka makoce wan he-woskan ikiyedan wanke, otonwe wan Ephraim eciyapi kin he ekta ya, qa waonspewicakiye cin om he en un.

55 Unkan woacakşin Juda oyate woşnapi kagapi wanna ikiyedan aya ; unkan wanna kayehan oyate ota Jerusalem en kata iheya aya, woacakşin kin itokam piiciyapi kta.

56 Hehan Jesus akitapi, qa tipi wakan kin ohna najinpi icunhan iyakitedan hekiciyapi ; Token idukcanpi he ; woşnapi kin en u kte şni he.

57 Woşna kagapi tankapi qa Pharisee ko wanna wakiconzapi, tuwe Jesus tukten yanka sdonye cinhan, he oyake kta, hecen yuzapi kta.

## WICOWOYAKE 12.

1 Woacakşin kin itokam şakpe can, hehan Jesus Bethani en i, Lazarus wicašta ta, tuka ekicetuyapi en un qon otonwe kin hee.

2 Unkan hen htayetu wotapi wan kicagapi, qa Martha e wapamni ; tuka kici iyotang wotapi kin Lazarus wanji hee.

3 Hehan Mary wiłdi waştemma qa taku ota iyopeyapi, tke utapi wanjidan, he icu qa on, Jesus siha kin sdakiye ça, iye paha kin on siha kipakinta ; unkan ecanma kin tipi kin ojudan.

4 Hehan Simon cinhintku, Judas Iskariot eciyapi, waonspewicakiye cin wanji hee, wiyopeye kte cin hee hecen eya ;

5 He tokeca wiłdi kin he kaşpapidan opawinge yamni iyopeyapi, qa walhanicapi kin wicakupi şni he.

6 He wamanon heca, qa mazaska opiye yuhe ça, ohna mazaska omnayan, heon hecen eya ; wo-

wahpanica kin incantowicahnake cin heon heye šni.

7 Hehan Jesus heya ; Nagiye-ye šni wo ; anpetu wan mahnakapi kte cin he en amayuhe cin hee ce.

8 Tokešta wowahpanica ohinni wicaduhapi kta ; tuka miye e ohinniyan mayaduhapi kte šni, eya.

9 He icunhan hen un kin Juda oyate wicota sdoniyapi ; unkan Jesus ecedan on en hipi šni, tuka Lazarus, wiconę etanhan najinkiye ciqon, he wanyakapi kta on etanhan.

10 Unkan wošna kagapi tankapi Lazarus nakun řeyapi kta aki-tapi :

11 Hee nakun on Juda oyate ota hduheyapapi, qa Jesus wica-dapi.

12 Ihanhanna wicašta ota wošnapi kin en hipi kin hena, Jesus Jerusalem etkiya u nahonpi hehan,

13 Canwapa tanka etanhan canhiaka icupi, qa itkokim yapi, qa panyanhan heyapi ; Hosanna, tuwe Israel Wicaštayatapi, Jehowa caje kin on u kinhan, he yawaštepi nunwe.

14 Unkan Jesus šonšonna cinca wan iyeya, hehan akan iyotanka ; hecen wowapi kagapi qon ;

15 Zion cunwintku ihnuhan koyakipe cin ; iho, Wicaštayatapi nitawa šunka šonšona cinca wan akan yanka u ce.

16 Dena taku kin tokaheya waonspewicakiye cin okalinigapi šni ; tuka Jesus yutanpi hehan hena hecen wowapi en kagapi qon, qa nakun hena ecen ecakicoupi kin, hehan kiksuyapi.

17 Heon oyate kicicapi kin, Lazarus hnakapi tuka kipan, qa wiconę etanhan ekicetuye ci-qon, hena he yaotaninpi.

18 Qa heon oyate kin itkoki-papi, taku wapetokeca tanka kin de econ nahonpi kin heon.

19 Unkan heon etanhan Phari-see kin iyakitedan hekiciyapi ; Wanyaka po, takudan oyakihipi šni ; iho, wicašta owasin he iha-kam iyayapi.

20 Helenes oyate kin etanhan wanjikji wošnapi kin icunhan en ohodapi kta e ekta itanwan-kanhde upi ;

21 Hena eepi Philip, Galile makoce Bethsada otonwe kin etanhan, he en ipi, qa, Itančan, Jesus wanunyakapi uncinpi ce, eciyapi.

22 Philip u, qa Andrew okiyaka ; qa hehan Philip Andrew kici Jesus okiyakapi.

23 Unkan Jesus awicayupte ça heya ; Anpetu wan en Wicašta Cinhintku kin yutanpi kte cin wanna hiyohi.

24 Wowicake, wowicake eciyatanhan heciciyapi ; Aguyapi su kin maka ekta ehpeyapi, ře šni kinhan, išnana un kta ; tuka ře cinhan ota icaheye kta.

25 Tuwe wiconi kin de wašte kida kinhan, toki ehpeye kta ; qa tuwe maka kin den wiconi řice kida kinhan, hee owihan-ke wanin wiconi ekta akpatan kta.

26 Tuwe omakiye kta cin kinhan mihakam un kta ; qa tukten waun hecinhan mitaokiye kin iš nakun hen un kta ; nakun tuwe omakiye kta hecinhan, Ate wicašta kin he yuonihan kta.

27 Wanna minagi kin nagiyeyapi, hecen token epe kta he. Ate, anpetu kin de etanhan emahdaku wo. Tuka heon anpetu kin de en wahi ce.

28 Ate nicaje kin hdutan wo. Unkan mahpiya kin eciyatanhan wicaho wan u qa ; Wanna eya

micaje kin wahdutan, nakun wahdutan kta, eya.

29 Unkan wicašta en najinpi kin he nañonpi qa, He wakinyan hoton, eyapi. Mañpiya ohnihe heca e okiya ce, apa eyapi.

30 Unkan Jesus waayupte ça heya; Wicaho kin de miye make šni, he niye nicapi.

31 Wanna oyate kin wicayacopi; qa wanna maka akan itancan kin tankan ehpeyapi.

32 Qa tohan maka kin detanhan wankan emahdepi kinhan, wicašta kin owasin miye en iwicawacu kta, eya.

33 Wiconte kin tukte on te kte cin he ka e hecen eya.

34 Oyate kin ayuptapi; Wooke kin eciyatanhan, Messiya owihanke wanin un kta ce, eyapi naunñonpi; hecen, Wicašta Cinhintku kin wankan ehdepi kta ce, token on hecen eha he; Wicašta Cinhintku kin he tuwe he.

35 Hehan Jesus hewicakiya; Iyoyanpa kin ehake cistiyedan nicipi un; iyoyanpa duhapi kin icunhan en omani po; otpaze cin iyapašttag niyanpi nun ce; tuwe otpaza icunhan omani kin he tokiya ye cin sdonye šni.

36 Iyoyanpa duhapi kin en iyoyanpa kin he wicada po, hecen on iyoyanpa cinca yaunpi kta ce. Jesus hena hecen eye ça, hehan iyaye ça inañbe wicakiya.

37 Taku wapetokeca ota econ, qa wanyagwicaya, tuka wicadapi šni.

38 Hecen Isaya wicašta wokean taku eye ciqon wanna iyecetu; Itancan, tuwe wounyakapi kin wicada he; qa tuwe en Jehowa ñupahu kin yutaninpi he.

39 Qa heon etanhan wicadapi kta okihipi šni; heon Isaya ake hecen eya;

40 Išta gonge wicaye ça, cante

kin ekta nakun wacinton šni wicaya; hecen išta on wiwanyakapi kte šni, qa cante on takudan yukcanpi kte šni, qa ihdu ecetupi kte šni, qa hecen woki-ziwicawaye šni.

41 Towitan kin he Isaya wan- yake ciqon he ehan hena hecen ekiciya.

42 Hececa tuka itancanpi etanhan wicota wicadapi; tuka Pharisee kin hena on etanhan yaotaninpi šni, omniciye tipi kin etanhan tankan iyewicayapi kta ikopapi heon.

43 Wicašta akantu yaonihanpi kin he iyotan dapi, qa Wakan- tanka wicayaonihan kin he is iyotan dapi šni.

44 Hehan Jesus panyanhan heya; Tuwe wicamada kinhan, he miye wicamada šni, tuka tuwe u maši kin hee wicada ece.

45 Qa tuwe wanmayake cin he nakun tuwe u maši kin he wan- yaka.

46 Miye maka akan iyoyanpa wahi; hecen tuwe wicamada kinhan he otpaza en omani kte šni.

47 Qa tuwe mioie kin nañon, qa wicada šni ešta mdaco šni; wicašta wicayacopi kin heon wahi šni, tuka waniyapi kin hee on wahi.

48 Tuwe amaktašni, qa mioie kin icu šni kinhan he tuwe yaco kte cin hduha; wicoie omdake cin anpetu ihankeya kin en yaco kte cin hee.

49 He miye cinka hecen oie- waye šni; tuka Ate u maši kin he iye econ maši, taku epe kte ça taku omdake kte cin.

50 Qa toope kin he owihanke wanin wiconi e sdonwaya. To- ken epe cin hena, Ate hena he- cen emakiya, heon etanhan he- cen epa ece, eya.



WICOWOYAKE 13.

1 Anpetu en wošnapi ece kin itokam, anpetu qon wanna hi-yohi, he en maka kin detanhan iyaye kta, Atkuku ektakiya hde kta, Jesus sdonkiya, tona maka akan tawa kin waštewicadake cin hena owihanketa waštewicakida.

2 Wotapi ayaštampi hehantu; Judas Iskariot Simon cinhintku kin hee, Jesus wiyopeye kte cin, Wakansica wanna hecen cante ozekiya.

3 Hehan Jesus Atkuku taku owasin tawa kiye ciqon he sdonkiya un, Wakantanka eciyatanhan hi, qa ake Wakantanka ekta hde kta.

4 Hecen wotapi kin etanhan najin, qa šina ekihnaka; qa napipakinte wan icu, qa ipiyaka.

5 Qa hehan mini wakšica en okašan, qa waonspewicakiye cin siha wicakiyujaja, qa napipakinte wan ipiyake ciqon heon siha kin wicakipakinta.

6 Simon Inyan ehan ahi; unkan, Itancan, niye siha mayakidujaja kta he, eciya.

7 Unkan Jesus ayupte ça, Taku ecamon kin de nakaha sdonyaye šni, tuka ihakamya sdonyaye kta, eciya.

8 Icimana siha mayakidujaja kte šni, ake Inyan eciya. Hehan Jesus ayupte; Ciciyujaja šni kinhan takudan on miyecica kte šni, eya.

9 Hehan Simon Inyan heciya; Itancan, siha ecedan šni, tuka minape, mapa koya.

10 Unkan Jesus heciya; Tuwe wanna ihdujaja kin he takudan sanpa cin šni, siha ecedan yujajapi kta, eya wanna ocowasin ska; unkan niye niskapi, tuka iyuhpapi šni.

11 Tuwe wiyopeye kte cin he sdonya, heon etanhan, owasin niskapi šni ce, eya.

12 Unkan siha wicakiyujaja yušan kin hehan šina ehdaku qa hdowin qa iyotanke ça, Taku tokaciconpi kin de sdonyayapi he, ewicakiya.

13 Waonspekiya qa Itancan, emayakiyapi ece; he tanyan ehapi; he miye nakaes.

14 Heon etanhan miš miye Waonspekiya qa Itancan mayaduhapi kin, siha ciciyujajapi kinhan, niš eya otoiyo hi siha yeci-yujajapi kta iyececa.

15 Waonspeciciyapi kin he niš he iyecen ecanonpi kta e hecaciconpi.

16 Ookiye unpi kin he Itancan kin iyakapa šni; qa tuwe u šipi kin he tuwe u ši hecinhan, he is iye kapa šni, wowicake, wowicake eciyatanhan eciyapi.

17 Taku kin dena sdonyayapi hecinhan, ecen ecanonpi kinhan waštaya yaunpi kta.

18 Taku epe cin de niye iyuhpa heciciyapi šni; tona wicawakahnige cin hena sdonwicawakiya; tuka wowapi en kagapi qon yuecetu kta; Tuwe kici aguyapi wata ece kin he miye on siha yuwankan ehdaku ce.

19 Taku kin dena ecetu šni itokam ociciyakapi; hecen tohan iyecetu kinhan, he miye e wicayadapi kta.

20 Tuwe tokiya yewakiye cin tuwe iyowinkiye cinhan, he miye e iyowinmaye; qa tuwe iyowinmaye cinhan, he tuwe u maš kin he iyowinkiya, wowicake, wowicake eciyatanhan eciyapi.

21 Jesus hena hecen eye ça hehan toksape kin ekta iyahdeciya, hdaotanin qa heya; De dukanpi kin etanhan wanji wi-

## WICOWOYAKE 14.

yopemayayapi kta, wowicake, wowicake on eciciyapi ce.

22 Hehan waonspewicakiye cin opakicihta yukanpi, wanji tukte e on heye cin sdonyapi šni.

23 Unkan Jesus waonspewicakiye cin wanji nina wašte kidake ciqon, he eca maku kin en makan iwanka.

24 Heon Simon Inyan he wikipyuta, qa wanji tukte he on heye cin he iwange ši.

25 Hehan he Jesus maku kin en iwanke ça, Itancan, he tuwe he, eya.

26 Jesus ayupte; Wanji tukte lipanyanpi onšpa waqu kinhan hee kta, eya. Hecen onšpa lipanye ça, Judas Iskariot eciyapi Simon cinhintku he qu.

27 Unkan Judas lipanyanpi kin icu, hehan Satan mahen iyaya. Hecen Jesus heciya; Taku eanon kte cin kohanna econ wo.

28 Wahna wotapi kin ihdukšan yukanpi kin, taku on heye cin tuwedan okahnigapi šni.

29 Judas mazaska opiye yuhe cin heon, Jesus wošnapi kta on taku cinpi kin he opeton ši; qa iš, wahpanicapi kin taku wicaqu ši, apa kecinni.

30 Unkan lipanyanpi qon he icu qehan, hecehnana tankan iyaya; wanna hanyetu hehantu.

31 He tankan iyaya, hehan Jesus heya; Wanna Wicašta Cinhintku kin yutanpi, qa nakun iye eciyatanhan Wakantanka iš yutanpi.

32 Qa iye eciyatanhan Wakantanka yutanpi hecinhan, hehan Wakantanka iš iye kin on hdutan kta, nakun kohanna hdutan kta.

33 Hokšiyooqopa ehake ptenyedan ocipapi kta. Amayakitapi kta, qa Juda oyate ewicawakiye ciqon; Tokiya mde cin ekta yapi kta oyakihipi šni ce; he iyecen nakaha eciciyapi.

34 Woahope teca wan ciçupi, otoiyohe wašteyecidapi kta; wašteyecidapi kin he iyecen wašteyecidapi kta.

35 Heon waonspewicakiye yaunpi kin wicašta owasin sdonyapi kta, otoiyohe wašteyecidapi kinhan.

36 Itancan, tokiya de kta he, Simon Inyan eciya. Jesus ayupte; Tokiya mde cin ekta de kta ešta nakaha oyakihipi kte šni, tuka ihakamya mihektam yau kta, eya.

37 Unkan Inyan heciya; Itancan, tokeca nakaha cihakam waun kta owakihipi šni he; niye on wiconi mduhe cin ehpewaye kta, eya.

38 Jesus ayupte; Miye on wiconi nitawa ehpeyaye kta he. Wowicake, wowicake on heciya; Anpaohotonna kin hoton šni itokam yamni akihde sdonmayaye šni, kehe kta ce, eya.

## WICOWOYAKE 14.

1 Innuhan cante nišicapi kinhan; Wakantanka wicayadapi, qa miš nakun wicamayadapi.

2 Ate ti kin en oonyanpi kte cin ota yanka; he hecece šni unkanš ociciyakapi kta tuka; ekta wahde ça oyanke kin ciciyuštampi kta.

3 Ekta mde ça oyanke ciciyuštampi kinhan, hehan ake wau qa acihdapi kta; hecen miš waun kin he en niš nakun yaunpi kta.

4 Unkan tokiya mde cin he sdonyayapi, qa canku kin he nakun sdonyayapi.

5 Itancan, tokiya de cin sdonnyanpi šni, tokiya tanhan canku kin he sdonnyanpi kta he, Thomas eciya.

6 Unkan Jesus heciya; Canku, qa wowicake, wiconi ko he mi-

ye; tuwedan Ateyapi kin en u  
śni, miye eciyatanhan ecedan  
en u ece.

7 Sdonmayayapi unkanś nakun  
Atewaye cin sdonyayapi kta tu-  
ka; qa detanhan sdonyayapi qa  
wandakapi ce.

8 Itancan, Ateyaye cin wan-  
yag unyan po, hecen iunmnanpi  
kta, Philip eciya.

9 Hehan Jesus heciya; Philip,  
wana wanakajatanhan cicipi  
waun, tuka nahanhin sdonma-  
yaye śni he; tuwe wanmayake  
cin he Ateyapi kin wanyaka;  
hecen tokeca, Ateyapi kin wan-  
yag unyan miye, eha he.

10 Atewaye cin he wecica qa  
Atewaye cin he micica kin he  
wicayada śni he. Wicoie ecici-  
yapi kin dena miye cinka ecici-  
yapi śni; Atewaye micica kin  
he wicohan kin hena iye econ.

11 Atewaye cin he wecica qa  
Atewaye cin he micica he wica-  
mada po; qa is wicohan kin he-  
na e on wicamada po.

12 Wowicake, wowicake on  
heciyapi; Tuwe wicamada kin  
he wicohan ecamon kin hena is  
iyecen econ kta, nakun ees san-  
pa tanka econ kta; Ate ekta  
wahde kte cin heon etanhan.

13 Qa micaje kin on taku ya-  
dapi kinhan, ecen ecamon kta;  
Ateyapi kin Cinhintku kin on  
yutanpi kta e heon.

14 Taku wanji micaje on ya-  
dapi kinhan, ecen ecamon kta.

15 Wašte mayadapika hecin-  
han, mitawoahope kin tanyan  
yuha po.

16 Hehan Ate cewakiye kta,  
uncan wicakicanpte wan tokeca  
nicupi kta, he owihanke wanin  
nicipi un kta.

17 Wowicake Woniya kin hee,  
oyate kin he icu okihipi śni, to-  
hinni wanyakapi śni qa sdonya-

pi śni; tuka niye he sdonyaya-  
pi, he nicipi un qa en niunpi kta.

18 Wamdenica elipeciyapi kte  
śni; ake cihdiyohipi kta.

19 Wanna ptenyedana kinhan  
oyate wanmayakapi kte śni, tu-  
ka niye wanmayadakapi kta;  
wani waun, qa nis yani yaunpi  
kte cin heon.

20 Anpetu kin he en, Atewaye  
cin he wecica, qa nis miyecicapi,  
qa mis ocicipapi kin he sdonya-  
yapi kta.

21 Tuwe mitawoahope yuhe  
ca, hena ope cinhan he wašte-  
madake cin ee; qa tuwe wašte-  
madake cinhan, Atewaye cin he  
waštedake kta, qa mis nakun  
waštedadake kta, qa en mihdu-  
tanin kta ce.

22 Hehan Judas, Iskariot hee  
śni, he heciya; He tokeca Itan-  
can, unkišnana sdonniye unya-  
yapi kta he, qa oyate kin sdon-  
niyanpi kte śni.

23 Jesus waayupte ca heciya;  
Tuwe waštemadake cinhan  
mioie kin yuhe kta; qa Atewa-  
ye cin waštedake kta, qa tukten  
un kinhan en unhipi kta, qa ti  
kin en kici unyakonpi kta.

24 Tuwe waštemadake śni kin  
he mioie kin yuhe śni. Wicoie  
nayahonpi kin de mitawa śni,  
Atewayaya umaśi kin he iye tawa.

25 Ocipapi kin en taku kin he-  
na heciyapi.

26 Tuka Wicakicanpte, Woniya  
Wakan kin hee, Atewaye cin  
micaje on usi kte cin he, taku  
owasin onspeniciyapi kta, qa ta-  
ku eciciyapi kin owasin kiksuy-  
yeniciyapi kta.

27 Wokiyapi aihpeciyapi; wo-  
okiye mitawa ciçupi: wicašta  
akantu kiciçupi he iyecen ciçupi  
śni. Ihnuhan cante nisicapi qa  
kopehda yaunpi kinhan.

28 Wahde ca ake en ciupi kta



eciciyapi kin he wanna nayañonpi. Wašte mayadapi kinhan iduŝkinpi kta; Atewaye cin ekta wahde kta epe cin he; Atewaye cin he iye mikapeya tanka.

29 Qa nakaha hena heciciyapi, taku kin itokam; tohan he hiyohi kinhan hehan wicayadapi kta.

30 Detanhan taku ota eciciyapi kte ŝni; maka akan itancan kin wanna u, tuka miye kin en takudan tawa ŝni.

31 Tuka Atewaye cin wašte-wakida; qa Ate taku emakiye cin owasin ecen ecamon ece, he oyate kin sonyapi kta. Najin po, detanhan icunonpa unyanpi kta.

## WICOWOYAKE 15.

1 Hastanhanka iyuwi wowicake kin he miye, qa Atewaye cin he kicanye cin ee.

2 Adetka tona miye on waskuyeca icalhye ŝni kin hena yuŝun; qa adetka tona waskuyeca icalhye cin hena pakinta, hecen on waskuyeca ota icalhye kta.

3 Eya wanna niskapi, wicoie ociciyakapi kin heon.

4 Mici un po, hecen miŝ cicipi waun kta. Hastanhanka iyuwi adetka wiyuwi kin en ikoyake ŝni kinhan waskuyeca icalhya okihi ŝni ece; he iyecen miyeci yaunpi ŝni ehantanhan, niŝ eya oyakhipi kte ŝni.

5 Hastanhanka iyuwi kin he miye, adetka kin he niyepi. Tuwe mici un qa miŝ kici waun kin he waskuyeca ota icalhya; miye kin en icunonpa yaunpi kinhan takudan oyakhipi kte ŝni.

6 Tuwe mici un ŝni kinhan adetka iyecen tankan ehpeyapi, hecen ŝnija aya; unkan hena wicaŝta pahipi qa petan ehpeyapi, hecen huñnaga ece.

7 Miyeci yaunpi qa mioie kin

he nicipi un kinhan, taku tona yacinpi kin hena yadapi kta, unkan ecen ecaniconpi kta.

8 Waskuyeca ota icalhyayapi kinhan Atewaye cin nina yutanpi kta; qa heciya tanhan waon-speciciyapi yaunpi kta.

9 Atewaye cin token wašte makida kin he iyecen wašte cididapi; mitowašte kin he kici un po.

10 Mitawoahope kin duhapi kinhan, mitowašte kin he kici yaunpi kta; Ate tawoahope mduhe cin heon towašte kin kici waun kin he iyececa.

11 Taku eciciyapi kin dena on mitowiyuŝkin kin nicipi un kta e, qa nitowiyuŝkinpi kin he ece-tu niciciyapi kta.

12 Mitawoahope kin he dee, waštecididapi kin he iyecen wašteyecidapi kta.

13 Tuwe takuwicaye cin on wiconi ehpekiye cinhan, he wowašte kin tuwedan kapeye ŝni.

14 Taku econ ciŝipi kin owasin ecen ecanonpi kinhan takuciyapi yaunpi.

15 Ookiye wicayapi wanna eciciyapi ŝni; ookiye yapi un kin he Itancan ye cin taku econ keŝ sonye ŝni. Tuka takuciyapi eciciyapi; Atewaye cin tona nahonmaye cin owasin sonye eciciyapi kin heon.

16 Niye he mayakañigapi ŝni, tuka miye e cicalñigapi qa ciyusutapi; hecen tokiya dapi qa waskuyeca icalhyayapi kta; qa waskuyeca nitawapi kin ohinnian un kta; hecen micaje on Atewaye cin taku yakidapi kinhan niçupi kta ce.

17 Otoiyohi wašte kicida po, he iwahokonciyapi ce.

18 Oyate kin ŝice nidapi eŝta, he itokam miye ŝice madapike ciqon he sonyayapi.

19 Oyate kin enitanhanpi unkanś oyate kin taku iye tawapi wašte kidapi kta; tuka oyate kin henitanhanpi śni, miye e oyate kin etanhan cicalinigapi kin heon oyate kin śice nidapi.

20 Wicoie wan eciciyapi qon he yeksuyapi; Ookiye yapi un kin he Itancan yuhe cin kakipe ça iyotan tanka śni. Śicaya makuwapi hecinhan, niś oyate kin śicaya nicuwapi kta; qa mioie yuhapi hecinhan, niś nioie kin niciyuhapi kta.

21 Tuka micaje kin on hena owasin ecen ecaniconpi kta; tuwe u maśi kin he sdonyapi śni heon etanhan.

22 Wahi śni qa owicawakiye śni kinhan, woah̄tani nicapi kta tuka; tuka detanhan woah̄tani woakalpe nicapi.

23 Tuwe śice madake cin he nakun Atewaye cin śice daka.

24 Wicohan tuwedan hecen econ śni iyecen ecawicawecon śni unkanś, woah̄tani nicapi kta tuka; tuka wanna Atewaye cin kici wanmayakapi, qa napin śice undakapi.

25 Tuka woope tawapi kin en wicoie kagapi qon he wanna iyecetu; Takudan on etanhan śni śice madakapi ce.

26 Tuka Wicakicanpte, Atewaye cin etanhan uwaśi kte cin he, Wowicake Woniya kin hee, tohan hi kinhan, he iye Atewaye cin etanhan u kta, qa omayake kte cin hee.

27 Qa niś nakun omayadakapi kta, toka ehantanhan miyahna yaunpi qon heon.

### WICOWOYAKE 16.

1 Wayah̄tanipi kte śni e heon dena taku kin ociciyakapi.

2 Omniciye tipi kin etanhan

tankan iyenianpi kta; nakun anpetu wan u kta, hehan tuwe kašta niktepi kinhan, he Wakantanka iyokipiya kecin kta.

3 Atewaye cin sdonyapi śni, qa miś nakun sdonmayanpi śni, he etanhan henakiya hecen ecanionpi kta.

4 Tuka dena ociciyakapi, hecen tohan iyehantu kinhan, dena wanna eciciyapi kin he yeksuyapi kta. Qa dena otokahe ekta eciciyapi śni, hinyahin cicipi waun kin heon etanhan.

5 Tuka wanna tuwe umaśi kin he ekta wahde kta; qa wanjidan, Tokiya de kta he, emayakiyapi śni.

6 Tuka taku kin dena ociciyakapi, heon nicantepi kin ekta iyonyiakapi.

7 Tuka wowicake ece ociciyakapi; wahde cinhan heon tanyan yaunpi kta, qa wahde śni kinhan Wicakicanpte kin en nihipi kte śni; tuka wahde cinhan niyepi ekta uwaśi kta.

8 Unkan he tohan hi kinahan, woah̄tani, woowotanna qa woyaco kin on oyate kin sdonyewicaye kta:

9 Woah̄tani kin, wicamadapi śni kin heon:

10 Woowotanna kin, Atewaye cin ekta wahde kta, qa icimana wanmayadakapi kte śni, heon:

11 Woyaco kin, oyate kin de itancan un kin he wanna yacopi, heon etanhan.

12 Nakun taku ota eciciyapi kta mduha, tuka hena e qe nah̄nkin yuha oyakihipi śni.

13 Tuka tohan Wowicake Woniya kin he iye hi kinhan, wowicake ocowasin en anianpi kta; iye atayedan on ie kte śni, tuka taku nah̄n kin hena oyake kta, qa taku tokata ekta hena oniciyakapi kta.

14 Mayutan kte cin hee, taku mi-tawa kin hena icu, qa onici-yakapi kta.

15 Taku Ate tawa kin hena owasin mitawa; he etanhan, Tona mitawa kin hena icu, qa oniciyakapi kta ce, eciciyapi.

16 Wanna askayedan hehan wanmayadakapi kte sni; hehan akeś askadan ake wanmayada-kapi kta, Ate ekta wahde kte cin heon.

17 Hehan waonspewicakiye cin iyakitedan hekiyapi; Unkeki-ciyapi kin he taku hwo; Wanna askayedan wanmayadakapi kte sni, qa hehan askadan ake wan-mayadakapi kta; qa, Ate ekta wahde kte cin heon.

18 Heon heyapi; Askayedan eye cin he taku he; taku eye cin sdonunyanpi sni ce.

19 Wiwangapi cinpi kin he Je-sus sdonya, unkan heon hewica-kiya; Wanna askayedan wan-mayadakapi kte sni, qa hen iki-yedan wanmayadakapi kta, epe cin he, he token kapi hwo, otoi-yohi eyeciyapi he.

20 Wowicake, wowicake on heciyapi; Nihinniçiyapi qa yaceyapi kta, tuka oyate kin iyuskinpi kta; yionicişicapi kta, tuka yionicişicapi kin he wowi-yuskin wan en un kta.

21 Winohinca cinca ton kta eca yazan hda, wanna iyekicihan-tu kin heon; tuka tohan hokşi-yoçopa ton eca, yazan hda qon he kiksuye sni, wicaşta oyate kin den tonpi eca wowiyuskin ye cin heon.

22 He iyecen nakaha iyokişin dukanpi, tuka ake wanciyakapi kta, kinhan nicantepi kin wiyu-şkin kta, qa widuşkinpi kte cin he tuwedan nicipi kte sni.

23 Unkan anpetu kin he en ta-kudan imayanungapi kte sni.

Wowicake, wowicake on hecici-yapi; Taku micaje on Atewa-ye cin yakidapi kinhan niçupi kta.

24 Nahalin dehanyan micaje on takudan yadapi sni. Da po, iyacupi kta, hecen wowiyuskin ojudanniçiyapi kta.

25 Hena taku iyacinian heci-ciyapi; tuka anpetu wan u kta, hehan wiyacinian takudan eci-ciyapi kte sni, tuka taninyan Ateyapi kin on ociciyakapi kta.

26 Tohan iyehantu kinhan mi-caje on taku yadapi kta, tuka Atewaye cin wocekiye eciciya-pi kta. epe sni.

27 Ate iye atayedan waşte ni-dapika, waşte mayadapike ça Wakantanka eciyatanhan wahi kin he wicayadapi kin heon.

28 Atewaye cin eciyatanhan wau, qa oyate kin de en wica-wahi Ake oyate kin ehpewi-cawaye kta qa Ate ekta wahde kta.

29 Wanna wiyacinian iyae sni, ataninyan iyaa ce, waonspewi-cakiye cin eciyapi.

30 Taku owasin sdonyaye ça, tuwe winiwange kta iyecece sni yaun e wanna sdonunyanpi; heon etanhan Wakantanka eci-yatanhan yahi kin he wicaunda-pi, eyapi.

31 Jesus awicayupte; Wanna wicayadapi he.

32 Anpetu wan u kta qa wan-na hiyohi, enanakiya otoi-yohi yahdapi kta, qa mişnana ehpe-mayayapi kta; tuka nakun miş-nana waun sni, Atewaye cin he mici un.

33 Wookiye amayaduhapi kta heon etanhan hena heciyapi. Oyate kin de en wokakije du-hapi kta; tuka wiyuskin po, miye oyate kin ohiwicawaya ce.



WICOWOYAKE 17.

1 Jesus hena hecen eye ça hehan ísta yuwankan icu, qa mahpiya kin ekta etonwan qa, Ate wanna anpetu kin hiyohi, Nicinksi kin hdutan wo, hecen on Nicinksi kin nihdutan kta ce.

2 Wicacelipi owasin on wowasake yaqu qon, hecen tona yaqu kin owasin owihanke wanin wiconi wicaqu kta.

3 Unkan owihanke wanin wiconi kin he dee, wowicake Wakan-tanka niye e sdonniyanpi kta, qa Jesus Messiya uyaši qon.

4 Maka kin akan ciyutan; qa wicokicanye mayaqu qon wanna owasin wahduštan.

5 Unkan nakaha, Ate niye kin on miye mahdutan wo, wicoicage wanice cin he itokam wowitan niyeci hduha waun qon heon.

6 Oyate kin den wicašta tona mayaqu kin hena en nicaje mdatanin; hena nitawa, tuka hena mayaqu; unkan hena nioie qon niciyuhapi.

7 Taku mayaqu kin owasin he niye etanhan u, wanna sdonyapi.

8 Nioie mayaqu qon he wanna wicawaqu; unkan icupi, qa niye eciyatanhan wahi kin he tanyan sdonyapi, qa niye e umayaši kin he wicadapi.

9 Hena on wocekiye ewicaweciya, maka akan wicašta kin hena on wocekiye eciciye šni, tuka tona mayaqu kin hena on wocekiye eciciye, hena nitawa kin he etanhan.

10 Taku mitawa kin hena owasin nitawa, qa niš taku nitawa kin hena mitawa, qa hena on wowitan waun.

11 Wanna oyate kin dematanhan šni, tuka iye e oyate kin en opeya ni unpi, qa miye wanna

nitankiyadan waku kta. Ate wakan, nicaje kin on dena mayaqu qon hduha wo, hecen unwanjidan qon is iyecen wanjidan kta.

12 Oyate kin den om waun kin he icunhan nicaje kin on wicawahduha. Mayaqu qon hena e wicawahduha, qa owasin elpekiyapi šni, wicašta wayutakuni šni cinhintku kin hecedan elpekiyapi, hecen wowapi en un qon wanna iyecetu.

13 Wanna nitankiyadan waku kta, oyate kin den opeya waun kin en ehake hecen epa, hecen on mitowiyuškin kin iyepi en wicakiyuštanpi kta.

14 Nioie wicawaqu, qa oyate kin šice wicadapika, oyate kin hetanhanpi šni heon etanhan hececa, oyate dematanhan šni he iyecen.

15 Oyate kin detanhan ewicayahdaku kta e heon wocekiye eciciye šni, tuka taku šice cin he en anawicayecipte kta e heon.

16 Oyate kin de ematanhan šni kin he iyecen is oyate kin de etanhanpi šni.

17 Wowicake nitawa kin he on wicayuwakan wo; nioie kin he wowicake.

18 Oyate kin deci u mayasi qon, he iyecen is oyate kin ecen ye wicawaši.

19 Qa iyepi on miye mihduwakan, hecen on wowicake eciyatanhan wicayuwakanpi kta.

20 Qa denana on wocekiye ewicaweciye šni, nakun tona wicoie oyakapi eciyatanhan wicadapi kin hena koya.

21 Hecen on owasin wanjipidan kta, niye kin iyecen, Ate, miyecica, qa miš cicica; qa hecen is unkicicapi kta; qa oyate kin niye u mayasi kin he wicadapi kta.

22 Wowitan mayaqu qon he wanna wicawaqu; hecen on unwanjidan kin iyecen wanjipidan kta.

23 Miś wicakici waun, qa niś mici yaun, hecen wanjidan en wicayuŝtanpi kta; qa hecen niye umayaŝi kin he oyate kin sdonyapi kta; qa waŝtemayakida kin he iyecen waŝtewicawakida ece.

24 Ate, tona mayaqu kin hena, tokiya waun kin hen mici unpi kta wacin; hecen wowitan mayaqu qon he wanyakapi kta, wicoicage kin de itokam waŝtemayakida kin heon etanhan.

25 Ate owotanna, oyate kin sdonniyanpi ŝni ye, tuka miye sdonciye ciqon, qa dena iŝ niye e u mayaŝi kin he sdonyapi.

26 Unkan nicaje kin he sdonye wicawakiya qa nakun sdonye wicawakiye kta; hecen wawacinkta duza on waŝtemayakida qon he dena en un kta, qa miŝ nakun owicawape kta.

## WICOWOYAKE 18.

1 Jesus hena hecen eya, hehan waonspewicakiye cin om Kedron wakpadan kin akasanpa iyaya, hen can wojupi wan, unkan he en i, waonspewicakiye cin om.

2 Unkan Judas wiyopeye cin he iŝ nakun makoce kin he sdonya, Jesus hen waonspewicakiye cin om emniciya ece qon heon.

3 Heon Judas akicita wicoun wan icu, qa akicita tancan ko, woŝna kagapi qa Pharisee kin etanhan, om wipe yuhapi, qa petijanjan can itkonya ko yuha en yapi.

4 Jesus taku hiyahde kte cin owasin sdonkiya, itkowicakipe ca, Tuwe e oyadepi he, ewicakiya.

5 Jesus Nazareth etanhan, eya ayuptapi. Unkan Jesus, He miye ce, eya. Unkan Judas he wiyopeye ciqon ee en opa.

6 Unkan Jesus, He miye ce, ewicakiya hehan icicawin kihdapi, qa makata ihpayapi.

7 Heon etanhan ake wiwicawanga; Tuwe ayakitapi he, eya. Unkan, Jesus Nazareth etanhan, eyapi.

8 Jesus waayupte; He miye ce, eciciyapi qon; hecen miye e omayadepi hecinhan dena ito kihdapi kta.

9 Wicoie wan eye ciqon he iyecetu kta, Tona mayaqu kin wanjidan elipewakiye ŝni ce.

10 Unkan Inyan mazasagye wan yuhe cin ehdaku, qa on woŝna kagapi itancan ookiye wicaya wan noge etapa eciyatanhan ape ca kaŝpa iyeya, ookiye unna kin he Malkos eciyapi.

11 Hehan Jesus Inyan heciya; Mazasagye niŝawa ojuha en iyeikiya wo. Wiyatke Ate maqu kin he mdatke kte ŝni he.

12 Juda oyate akicita tancan, akicita eyanpaha, akicita ikcedan ko Jesus yuzapi, qa pahtapi.

13 Qa tokaheya Annas kaipi; Kaiaphas omaka kin he en woŝna kagapi itancan kin he tunkanku kin hee.

14 Wicaŝta wanjidan oyate kin on ŝe kte cin he hecetu kta ce, Juda oyate iwahokonwicakiye ciqon Kaiaphas ee.

15 Unkan Simon Inyan Jesus ihakam ya, nakun waonspewicakiye cin tokeca wan; unkan waonspewicakiye cin tokeca kin he woŝna kagapi itancan kin sdonya qon, heon hee woŝna kagapi itancan tihocoka kin en Jesus kici iyaya.

16 Tuka Inyan e tankan tiyopa kin en najin. Hehan waon-

spewicakiye cin unma, wośna kagapi itancan sdonya qon, he tankan hiyu, qa tiyopa awanyake cin he okiye ça, Inyan tin hiyuya.

17 Hehan wikośka tiyopa awanyake cin he Inyan heciya; Wicaśta kin de waonspewicakiye cin wanji niye he. Unkan, Hemaca śni ce, eya.

18 Akicita eyanpaha wowidag wicayapi ko hen najinpi, sni hdapi qa cetipi; unkan he en petiśkanpi: unkan Inyan is owi capeya injin, qa petiśkan.

19 Hehan wośna kagapi itancan kin Jesus wiwanga, waonspewicakiye cin heon, qa iye woonspe tawa kin he nakun.

20 Jesus ayupte; Oyate kin en taninyan womdaka ece; omniciye tipi etu, qa tipi wakan ko en, Juda oyate mniciyapi ece kin en ohinniyān waonspekiya wau, qa takudan anahbeyahan epe śni ce.

21 Taku on wimayanunga he; token ewicawakiye cin tona nationpi kin hena e wiwicawanga wo, token epe cin he sdonyapi ce.

22 Hena hecen eya, unkan akicita eyanpaha wan en najin kin he Jesus apa, qa heya; Wośna kagapi itancan kin hecen adu-pta he.

23 Unkan Jesus ayupte; Śicaya iwaa hecinhan taku śica epe cin he yaotanin wo; tuka tanyan epa hecinhan, tokeca amayapa he.

24 Annas Kaiaphas wośna kagapi itancan kin pahtapi ecen ekta aye wicakiye ciqon.

25 He icunhan Simon Inyan petiśkan najin. Heon heciyapi; Waonspewicakiye cin he wanji niye he. Tuka anakihbe ça, Hemaca śni ce, eya.

26 Wośna kagapi itancan kin wowidake tawa wan, Inyan noge kaśpe ciqon he takuya, Wojupi kin en kici yaun wanciyake śni he, eciya.

27 Tuka ake Inyan anakihman; unkan he icunhan anpa ohotonna wan hoton.

28 Hehan Kaiaphas etanhan woyaco tipi kin en Jesus aipi; unkan wanna anpa. Ihduśapapi kte śni e heon woyaco tipi kin en ipi śni, wośnapi kin hdutapi kta e heon.

29 Unkan Pilate tankata hinanpe ça, en wicau qa, Wicaśta kin de taku e iyayaonpapi he, ewicakiya.

30 Waayuptapi qa heciyapi; Wicaśta kin de oħan śice śni unkanś unnicahipi kte śni tuka, eyapi.

31 Hehan Pilate hewicakiya; Niye ito eyaku po, qa wayeconzapi kin eciyatanhan yaco po. Hehan, Wicaśta teyapi unkiye unkokihipi śni ye, Juda oyate eciyapi.

32 Hecen Jesus oie qon ecetu kta, token wiconte on te kta eye ciqon he.

33 Hehan woyaco tipi timahen Pilate kihde ça, Jesus en au wicakiye ça, Juda oyate wicaśtaya-tapi qon he niye he, eciya.

34 Jesus ayupta; He niye cinka heha he; qa is tuwe tokeca miye on hecen oniciyaka he.

35 Pilate ayupte; Juda wicaśta hemaca he; nitaoyatepi kin hena, qa wośna kagapi tankapi kin he iye miye en anihipi. Token oyahanda he.

36 Jesus ayupte; Wokiconze mitawa kin he maka kin detanhan śni; wokiconze mitawa kin maka kin detanhan unkanś, mitaokiye kin kis unpi kta, qa Juda oyate kin makaśkapi kte śni



tuka. Tuka nakaha wokiconze mitawa kin detanhan śni.

37 Hehan Pilate heciya ; Wicaštayatapi kin henica he. Unkan Jesus ayupte ; Wicaštayatapi hemaca e ecen eha ; hemaca kta e on matonpi, qa heon makata wahi, wowicake mdatanin kta e heon. Tuwe wowicake eciyatanhan un kinhan he miho kin nañon ece.

38 Wowicake kin he taku he, Pilate eciya. Hena hecen oie ya, unkan Pilate tankata inanpe ça, Juda oyate en wicaye ça, Wicašta kin he taku śica econ takudan iyewaye śni, ewicakiya.

39 Tuka wicoñan duhapi kin heciyatanhan, woacakśin anpetu ehan unkipi eca, tuwe kaška hnakapi wanji wakiyuška ece qon. Juda oyate wicaštayatapi kin de wakiyuška yacinpi he, eya.

40 Unkan ake owasin panyehan howayapi qa heyapi ; Wicašta kin dee kte śni, tuka Barabbas e hee kta. Unkan Barabbas e qe wawicaki sa kin heca.

## WICOWOYAKE 19.

1 Unkan hehan Pilate Jesus icu qa kapsinpsinta.

2 Unkan akicita wapepeka wapaha wan kazontapi qa wapaha kiyapi, qa śina to wan in kiyapi.

3 Qa, iho, Juda Wicaštayatapi kin, eciyapi, qa nape on apapi.

4 Pilate ake tankan inanpe ça, Iho, wicašta kin dee e tankan cicaupi, hecen on taku śica takudan en iyewaye śni e sdonyayapi kta, ewicakiya.

5 Hehan Jesus wapepeka wapaha kin un, qa śina to kin in, tankata inanpa. Unkan, Wanyaka po, wicašta kin dee ce, ewicakiya.

6 Unkan wośna kagapi tankapi qa akicita tancanpi kin, he wan-yag iheyapi hehan, panyehan heyapi, Icipaweñ okatan wo, icipaweñ okatan wo. Niśnana icupi qa icipaweñ okatan po, miye qe taku śica econ takudan iyewaye śni, Pilate ewicakiya.

7 Wowakiconze wan unhapi, wowakiconze unhapi kin eciyatanhan te kta iyececa, Wakantanka Cinhintku keiçiye cin heon etanhan, Juda oyate kin eya ayuptapi.

8 Unkan Pilate iapi kin he nañon qehan, iyotan inihan ;

9 Qa woyaco tipi kin timahen kihde ça, Nitokiya tanhan he, Jesus eciya. Tuka Jesus ayupte śni.

10 Hehan Pilate heciya ; Amayadupte śni he. Icipaweñ onicatanpi owakihii ; qa niciyuškapi nakun owakihii, he sdonyaye śni he.

11 Hehan Jesus ayupte ; Wankan tanhan taku kin de niçupi śni unkanś takudan on omayakihii kte śni tuka ; heon tuwe niye en amahi kin he iye woalitani tanka.

12 Hetanhan Pilate kiyuškapi akita. Tuka, Wicašta kin de yakiduške cinhan Kesar takuyaye śni ; tuwe wicaštayatapi içicage cinhan Kesar i en hiyeya ece, Juda oyate kin panyehan eyapi.

13 Pilate iapi kin he nañon, unkan Jesus tankan yuha inanpa, qa oiyotanke tawa kin he ohna kiyotanka, inyan mdaya omanipi kin en, he Hebrew iapi kin etanhan Gabbatha eciyapi.

14 Woacakśin itokam anpetu piiciyapi ece kin hetu, qa wiyo-tanhe cin behantu ; Wicaštayatapi nitawapi kin wanyaka po, Pilate Juda oyate kin ewicakiya.

15 Tuka, Iacunonpa, icunonpa

iyeye ça icipaweli okatan wo, panyehan eyapi. Wicaštayatapi nitawapi kin de icipaweli owakatan kta he, Pilate ewicakiya. Unkan wošna kagapi tankapi kin ayuptapi ; Kesar ecedan wicaštayatapi unhapi ce.

16 Hehan icipaweli okatanpi kta e wicaqu. Unkan Jesus icupi qa tokan ayapi.

17 Unkan Jesus can susbeca kičin, qa makece wan Wicapahu eciyapi, he Hebrew iapi on Golgotha eciyapi, he ekta aya.

18 Hen icipaweli okatanpi, qa wicašta toktokeca nom itan anokatanhan ewicahdepi, qa Jesus okitahedan.

19 Unkan Pilate wowapi wan kage ça, can susbeca inkpa kin en ehnaka ; JESUS NAZARETH ETANHAN, JUDA OYATE WICAŠTAYATAPI KIN.

20 Wowapi kin de Juda wicašta ota yawapi ; makece kin Jesus en icipaweli okatanpi kin he otonwe kin ikiyedani, qa he Hebrew, qa Helenes, qa Roma iapi henakiya wicoie kin on owapi.

21 Hehan Juda oyate etanhan wošna kagapi tankapi kin Pilate heciyapi ; Juda oyate Wicaštayatapi kin, eya owa šni wo ; tuka, Juda oyate Wicaštayatapi kin he miye ce, eiciye cin, hee eecen owa wo.

22 Tuka Pilate waayupte ; Taku owawa kin he wanna owawa ce, eya.

23 Akicita Jesus icipaweli okatanpi, hehan tawokoyake icupi, qa wopamni tom kagapi, akicita otioyohi kicipamnipi ; qa nakun tašina icupi ; šina kin he okagege wanica, wankan tanhan kun ihankeya kin behanyan okagege codan kagapi :

24 Heon etanhan iye iyakitedan hekiciyapi ; Šina kin he unyuhdecapi kte šni, econkupidan qa yeunkiyapi kta, hecen tuwe ohiye cinhan yuhe kta. Hecen wowapi en kagapi qon he iyece-tu ; Mitawokoyake kicipamnipi, qa mitašina kin he oeonna en yekiyapi ce. Unkan akicita kin hena hecen econpi.

25 Unkan Jesus hunku, qa tankaku kicica, Mary Kleopas tawicu, qa Mary Magdalene, hena can susbeca kin icahda najinpi.

26 Jesus hunku wanhdaka, qa en icunonpa ikiyadan waonspe-wicakiye cin wanji iyotan kidake ciqon wanhdaka, unkan, Winolinca, nicinkši kin hee ce, hunku kin eciya.

27 Qa waonspekiyapi kin he is, Wanyaka wo, nihun kin hee ce, eciya. Unkan waonspekiyapi kin he anpetu kin hetanhan iye ti kin ekta aki.

28 Wanna taku kin owasin ecetu Jesus wanyaka, qa wowapi en kagapi qon iyecetu kta e heon, Imapuza ce, eya.

29 Unkan mini škumna wakšica ojudan en icunhan han ; mini škumna icupi, qa nakun mini iyulhepe wan en oputkanpi, qa peji hota hu wan icam yeyapi, qa i kin en qupi.

30 Unkan Jesus mini škumna icu qehan, Wanna yuštampi ce, eya ; hehan pa makata iyeye ça taniya kin hiyuya.

31 Hehan Juda oyate kin Pilate cekiyapi, hu kawegapi qa etanhan icupi kta ; hecen anpetu wakan icunhan, tancan kin can susbeca kin akan un kte šni, anpetu en pičiyapi kin wanna hehantu, qa anpetu wakan kin he anpetu tanka, heon.

32 Unkan akicita en hipi, qa tokaheya kin hu kawegapi, qa

## WICOWOYAKE 20.

nakun unma kici icipaweh okatanki qon.

33 Hehan Jesus ehan ipi, unkan wanna ta wanyakapi, heon hu kin kawegapi s̄ni.

34 Tuka akicita wanji wahu-keza wan on cuwi kin en capa; unkan we mini ko au.

35 Tuwe wanyake ca yaotanin kin he wayaotanin kin he wowicake. Wowicake eye cin he sdonkiya, qa hecen on wicayadapi kta.

36 Hena hecetu, unkan wicowoyake wowapi en kagapi qon iyecetu; Hu kin wanjidan kawegapi kte s̄ni ce.

37 Qa nakun wowapi icinonpa hecen eya; Tuwe pahdokapi kin he wanyakapi kta.

38 Hehan ihakam Joseph Arimathea etanhan Pilate cekiya, Jesus tancan kin icu kta e heon; unkan is̄ eya Jesus waonspewicakiye cin wanji ee, tuka analibeya, Juda oyate kowicakipe cin heon; unkan Pilate ayupta. He en u, qa Jesus tancan kin hdokiyahda.

39 Unkan Nikodemos, tuwe tokaheya hanyen Jesus en hi qon hee, nakun en hi, qa pejihuta wastemna nom icicahiyapi, tkeutapi opawinge ecetu, yuha hi.

40 Hehan Jesus tancan kin icupi, qa minihuha ska iyapemnipi, pejihuta wastemna iyahna, Juda oyate wicašta hnakapi ece kin he iyececa.

41 Unkan icipaweh okatanpi qon he en ikiyadan wojupi wanhan, wojupi he cin he en ohna wicašta hnakapi wan iyuŕtan yanka, tuwedan he ohna oonpapi s̄ni.

42 Juda oyate piic̄iyapi anpetu kin he icunhan, ohna wicašta hnakapi en ikiyadan yanke cin

heon Jesus tancan kin en ohnakapi.

## WICOWOYAKE 20.

1 Anpetu wakan kin en, anpetu tokaheya hanlianna linca, nahanhin otpaza, hehan Mary Magdalene hnakapi qon ekta i, qa inyan kin hnakapi etanhan icunonpa iyeyapi e wanyaka.

2 Hehan inyang hde ca Simon Inyan hee, qa waonspewicakiye cin unma Jesus waŕstekidake ciquon, hena en hi qa hewicakiya; Itancan kin hnakapi kin etanhan eyakupi, qa tukten hnakapi kin sdonunyanpi s̄ni ye.

3 Unkan Inyan waonspewicakiye cin unma qon kici tankan inanpapi, qa en hnakapi qon ekta yapi.

4 Napin inyang yapi; qa waonspewicakiye cin unma qon hee duzahe ca Inyan kapa, qa iye tokaheya ehan i;

5 Patuŕ inajin, qa hnakapi kin aokasin, minihuha ecedan wan-yaka, tuka mahen iyaye s̄ni.

6 Hehan is̄ Simon Inyan iyohi, unkan katinyan mahen iyaya, minihuha ecedan makata yanka wanyaka.

7 Minihuha pa akan ehnakapi kin he, minihuha umanpi qon en ope s̄ni, he is̄ aiyog pehan yanka.

8 Hehan waonspewicakiye cin unma tokaheya hi qon he is̄ hnakapi kin mahen iyaya, qa is̄ eya wanyake ca wicada.

9 He wiconŕte etanhan ekicetu kta, eyapi, wowapi en kagapi qon he hinyahin tanyan sdonyapi s̄ni.

10 Hehan waonspewicakiye cin hena iye tipi ekta icicawin hda-pi.

11 Tuka hnakapi kin itankan Mary e ecen najin, qa ceya.



Unkan ceyaya patuś inajin, qa hnakapi kin en aokasin.

12 Qa mahpiya ohnihde nom wokoyake ska ece koyakapi kin hena wanwicayaka, Jesus tancan wanke ciqon itan anokatanhan, unma pa wanke ciqon eciyatanhan, qa unma is siha qon eciyatanhan yukanpi.

13 Unkan, Winohinca, taku on yaceya he, eciyapi. Unkan is, Itancan mitawa tancan kin icupi, qa toki ehnakapi kin sdonwaye ūni ce, ewicakiya.

14 Heye a hehan ihdamna unkan Jesus en najin wanyaka, tuka Jesus hee kin sdonye ūni.

15 Unkan Jesus heciya, Winohinca taku on yaceya he; tuwe ayakita he. Unkan is he wakicanye hee kecin, qa heon, Itancan, he niye iyacu hecinhan tokiya eyahnake cin omakiyakaye, kinhan ewehdaku kta ce, eciya.

16 Unkan Jesus heciya, Mary. Unkan iye ihdamna, qa, Rabboni, eciya; he Waonspekiye eyapi.

17 Unkan Jesus heciya; Ihnuhan omayadutan kin; nahanhin Ate ekta wahde ūni ce. Tuka mihunkawanji ekta wicaye a hewicakiya wo, Ate ekta wahde kta, he ate yayapi kin ee, he Wakantanka mitawa kin ee, qa niś he Wakantanka nitawapi kin ee ce, eya.

18 Hehan Mary Magdalene ku qa, Itancan kin wanhdake a hena hecen eciye cin, waonspewicakiye cin owicakiyaka.

19 Anpetu kin he anpetu tokaheya kin ee, ihtayetu kin he en waonspewicakiye cin, Juda oyate kowicakipa, qa aonaicitag yukanpi, en Jesus wicacokaya inajin, qa, Wookiye nicipi un kte, ewicakiya.

20 Hecen eye a hehan nape cuwi ko wicakipazo. Waonspewicakiye cin Itancan kin wan yakapi, unkan wiyuśkinpi tanka.

21 Wookiye nicipi un nunwe, ake Jesus ewicakiya. Ate u maśi kin he iyecen miś ye ciśipi.

22 Hecen eye a hehan awicaniya qa, Woniya Wakan icu po, ewicakiya.

23 Tona woahṭani wicayecicajujupi kinhan, hena wicakicicajujupi kta; qa tona wicayakipaganpi ūni kinhan, hena wicakipaganpi kte ūni.

24 Ake nonpapi kin etanhan Thomas Didumos eciyapi he Jesus hi kin he icunhan en ope ūni.

25 Itancan kin wanunyakapi, waonspewicakiye cin unmapi kin eciyapi. Tuka iye kin hewicakiya; Maza on nape en okatanpi qon he wanmdake ūni, qa napsukaza maza okatanpi kin en omdutan ūni, qa cuwi nakun en nape yewaye ūni kinhan, wicawada kte ūni ce, eya.

26 Unkan anpetu śahdogan iyohakam, hehan ake waonspewicakiye cin mahen yukanpi, qa Thomas owicapeya un. Hehan Jesus en hi, tiyopa onatag han, qa wicacokaya inajin, qa, Wookiye nicipi un nunwe, ewicakiya.

27 Hehan Thomas heciya; Ninarsukaza uye a minape kin wanyaka wo; qa ninape kin uye qa micuwi kin en oputkan wo, qa waceṭunhda ūni wicada wo.

28 Unkan Thomas ayupte a heciya; Itancan mitawa, qa Wakantanka mitawa.

29 Jesus heciya; Thomas, wanmayadake cin heon wicayada; tuka tona wanmayakapi ūni eśta wicadapi kinhan, hena wicayawaśtepi ce.

30 Unkan waonspewicakiye cin wanyakapi en taku tokeca ota

wapetokeca Jesus econ, tuka hena ege wowapi kin de en kagapi ūni.

31 Tuka dena e owapi, heon Jesus he Messiya Wakantanka Cinhintku kin hee e wicayadapi kta; qa wicayadapi kin on, iye caje kin eciyatanhan, wiconi duhapi kta.

## WICOWOYAKE 21.

1 Hena iyohakam Jesus ake waonspewicakiye cin en ihdutanin, Tiberias mde kin etu; unkan ihdutanin kin he kaketu:

2 Simon Inyan, qa Thomas Didumos eciyapi, qa Nathanael, Kana Galile makoce kin hetanhan, qa Zebedee cinhintku nadin, qa waonspewicakiye cin tokeca nonpa, hena witayapi etu.

3 Ho wakuwa kta ce, Simon Inyan ewicakiya. Niyahna unyanpi kta ce, eciyapi. Hecehna yapi, qa wata wan en opapi, tuka hanyetu kin he takudan ktepi ūni.

4 Ihanhanna qehan wicihuta ekta Jesus najin; tuka waonspewicakiye cin Jesus hee kin sdonyapi ūni.

5 Unkan Jesus hewicakiya, Hoksiyopa, taku yutapi duhapi he. Unkan, Hiya, eyapi.

6 Unkan hewicakiya; Ho kin he wata etapa kin eciyatanhan ehpeya po, etanhan iyeyayapi kta ce. Unkan ecen iyohpeyapi, tuka ehaes hogan kin ota kin heon ehdakupi okitpanipi.

7 Hehan waonspekiyapi wan Jesus waūtedake ciqon he Inyan heciya; Itancan kin hee ce. Simon Inyan, Itancan kin hee, eya nahon qehan, tancodan un kin heon onhodoūda kiçun qa minin ehpeçiya.

8 Unkan waonspewicakiye cin unmapi kin wata cistinna wan

ohna upi, huta kin icannan yakonpi, wiciūpa opawinge nom hehanyan, qa ho kin hogan ojudan akupi.

9 Wanna hutata kihunnipi, hehan petaga itkon wanyakapi, qa hogan aguyapi ko akan yanka.

10 Unkan Jesus hewicakiya, Hogan nakaha iyacupi kin etanhan aku po.

11 Simon Inyan ekta ye ça ho kin heyata hiyuya, hogan tankinyanyan ece opawinge qa sanpa wikcemna zaptan qa sam yamni; hogan kin ota ho kin ohnaka tuka iyuhdece ūni.

12 Upi qa de yuta po, Jesus ewicakiya. Unkan waonspewicakiye cin etanhan, Tuwe niye he, eyapi kta tuka tuwedan tawatenye ūni; Itancan hee kin he sdonyapi kin he etanhan.

13 Hehan Jesus en ye ça aguyapi icu, qa wicaqu, hogan nakun iyecen econ.

14 Piya ekicetu kin etanhan, de iyamni Jesus waonspewicakiye cin en ihdutanin.

15 Unkan wotapi ayaūtanpi, hehan Jesus Simon Inyan heciya; Simon Jona cinhintku, dena ege sam iyeya waūte mayadaka he. Han, Itancan, waūte cidaka e sdonyakiye ciqon, eya. Tahincadan mitawa kin taku yutapi wicaqu wo, eciya.

16 Ake icinonpa, Simon Jona cinhintku waūte mayadaka he, eciya. Han, Itancan, waūte cidaka e sdonyakiya, eya. Tahinca mitawa kin awanyaka wo, eciya.

17 Ake iciyamni, Simon Jona cinhintku waūte mayadaka he, eciya. Yamni akihde, Waūte mayadaka he, eya iwange cin heon Inyan iyokiūica; unkan heciya, Itancan, taku owasin sdonyaya; waūtecidake cin he

## OĤANYANPI QON.

sdonyaya. Hehan Jesus, Talingca mitawa kin wo wicaqu wo, eciya.

18 Wowicake, wowicake on heciciya; Koniska qehan niye cinka ipiyag yeton qa tokiya yacin eca ekta da ece, tuka tohan winicalinca kinhan wicašta tokeca wan ekta nape yeyakiye kta, kinhan ipiyag nicaton qa tokiya yacin šni ešta ekta aniye kta ce, eya.

19 Wiconŧe tukte e on Wakan-tanka yutan kta e he kiciyaotan-in kta heon hecen eya. Hecen eye cin hehan, Miyahna u wo, eciya.

20 Hehan Inyan hakikta, qa waonspekiyapi wan Jesus iyotan kidake ciqon hee wicibe-ktam u e wanyaka, ĥtayetu wotapi icunhan maku kin ipahin wanke a, Itancan, tuwe e wi-yopeniye kta he, eye ciqon hee.

21 Inyan he wanyaka unkan Jesus heciya, Itancan, de iŧ taku e akipe kta he.

22 Ake tohan wahi kte cin hehanyan decen un kta wacin ešta, he etanhan initokeca he; niye miyahna u wo, Jesus eciya.

23 Heon etanhan wicoie kin de hunkawanjinkiciyapi kin wicehna iyaya; waonspekiyapi kin de e kte šni, eyapi kin. Tuka Jesus, He e kte šni ce, eciye šni; tuka, Wahi kte cin hehanyan decen un kta, wacin ešta, he etanhan initokeca he.

24 Taku kin hena waonspekiyapi kin he yaotanin qa wowapi en kaga; qa taku yaotanin kin he wowicake kin e sdonunyanpi.

25 Nakun taku ota Jesus econ, tuka nakun hena owasin otoiyo-hi kagapi ešta, oyate hiyeye cin wowapi kagapi kte cin he yuhapi kta epce šni. Amen.

---

## YEWICAŠIPI KIN

### OĤANYANPI QON.

#### WICOWOYAKE 1.

1 Theophile, wicoie tokaheya wakage cin he en Jesus tokaheya taku econ qa waonspekiye cin *omdaka*;

2 Tona wicakahnige a yewica-ši qon hena Woniya Wakan kin eciyatanhan wahokonwicakiye cin iyohakam, anpetu wan en wankan eyakupi kin hehanyan.

3 Iye kakije cin iyohakam hena ege en ni un taniniiya, woyuo-tanin ota on, anpetu wikcemna topa hehanyan wanyagiiya, qa Wakantanka tokiconze taku tawa kin cajehdata ece;

4 Qa mniciyapi kin en owicapeya un qehan, Jerusalem etanhan ye šni wicaši, qa Ateyapi kin wahowicaye ciqon he apepi kta; He miye eciyatanhan nayahonpi ce;

5 Awicakehan Johannes mini on baptem wicaqu, tuka tokata anpetu tonana ihan, hehan Woniya Wakan on baptem niupi kta ce, *eya*.

6 Unkan hena witaya yukanpi hehan, Itancan, wanna dehantu Israel *oyate* wokiconze kin piya wicayaqu kta he, eya iwangapi.

7 Unkan hewicakiya; Tohan-yan qa tohantu kin. Ate iye to-



waśake kin en ekihnake cin hena sdonyayapi kta iyecece śni ;

8 Tuka Woniya Wakan kin en nihipi kinhan, wowaśake duhapi kta ; hehan Jerusalem en, qa Juda makoce kin owancaya, qa Samaria qa maka ihanke kin hehanyan mayadaotaninpi kta ce.

9 Unkan hena hecen eye ça, wanhdakapi icunhan, yuwankan icupi ; qa wanyakapi kin etanhan mahpiya śapa wan eyaku.

10 Unkan he wankan iyaye cin, mahpiya ekta etonwan yukampi kin he icunhan, iho, wicaśta nom ska ihduzapi en wicikiyadan najinpi ;

11 Qa, Galile wicaśta, tokeca e mahpiya ekta etonwan nayajinpi he. Jesus e qe niyepi etanhan mahpiya ekta eyakupi kin, he mahpiya ekta wankan iyaya wandakapi kin he iyecen ake u kta, ewicakiyapi.

12 Hehan Oliwe paha ec iyapi kin hetanhan Jerusalem ekta icicawin hdapi ; he Jerusalem ikiyedan, anpetu wakan oicimani wanji ecetu.

13 En hdipi qa wankan tipi wanji tin iyayapi qa hen iyukanpi, Inyan, qa Jakob, qa Johannes, qa Andrew, Philip, qa Thomas, Bartholomew, qa Mattheos, Jakob Alpheus cinhintku, qa Simon Zelotes, qa Judas Jakob sunkaku :

14 Hena owasin tawacin wanjidana wocekiye eyapi qa kida yukampi, winohinça kin hena om, qa Mary Jesus hunku, qa iye hunkawanjinwicaye cin hena koya.

15 Unkan anpetu kin hena en Inyan ookiye unpi kin wicacokaya najin, (wicacaje owasin opawinge sanpa wikcemna nom wicayawapi ;)

16 Qa heya ; Wicaśta hunka-

wanjinci yapi, Judas tona Jesus iyahpayapi qon en mdetahunka kin he on, ehanna Woniya Wakan, Dawid i kin eciyatanhan, ie ciqon, wowapi en kagapi kin, he ecetuyapi kta hunšte.

17 He iye unkiyopeyapi yawapi, qa wicohtani kin de en opa tuka.

18 Unkan wicaśta kin he woahtani iyunwin kin-maga wan iyopekiye ça, ehna makata ihpaya, unkan tancan kin kamdas ihpaye ça, śupe kin owasin tankan hiyu.

19 Tona Jerusalem en yakonpi sa owasin he sdonyapi ; qa heon maga kin he iye iapi kin eciyatanhan, Akeldama ec iyapi, he We maga, eyapi.

20 Odowan wowapi kin en kaken kagapi ; He tukten ti qon hewoskan yanke ça, tuwedan ohna ti śni nunwe ; qa, Awanhdakapi wicohan yuhe ciqon he tuwe tokeca icu kta.

21 Heon etanhan wicaśta kin dena ohinniyana om unyakonpi, Jesus Itancan kin unkopapi, ti mahen i, qa tankan ye cin,

22 Tokaheya Johannes baptem wicaqu qon hetanhan, anpetu kin en unkiyepi etanhan wankan eyakupi kin hehanyan, hena etanhan, piya ikicage cin, wanji unkiyopeyapi oyaka ece e kta, eya.

23 Unkan nom najinwicakiyapi, Joseph Barsabas ec iyapi, he, Owotanna, eya caŕtonpi, qa Matthias.

24 Hehan cekiyapi qa heyapi ; Itancan niye wicacante owasin sdonya nanka, wicaśta kin dena unma tukte yakahnige cin he yutanin wo ;

25 Ookkiye wicohan qa yewicaŕipi kin de en ope kta, Judas iye oyanke tawa kin ekta hde kta e etanhan hinhpaye cin he.

26 Hehan woohiye elipekiyapi, unkan woohiye kin Matthias ahinĥpaya; qa hecen yewicašipi akewanĥpidan kin owicapeya yawapi.

WICOWOYAKE 2.

1 Anpetu iwikcemna zaptan kin wanna iyehantu, unkan owasin tawacin wanĥidan witaya yukanpi.

2 Hehan ihnuhanna, tate wan wašagya uye cin he iyecen, oqo wan maĥpiya kin eciyatanhan hiyu, qa tipi ohna yukanpi kin ocowasin oĥudan.

3 Unkan wicaceĥi, peta se ececa, en wicatanin, qa otoiyoĥi kici-pannipi kin en awicahan.

4 Unkan owasin Woniya Wakan kin on oĥupidan qa wicaceĥi toktokeca on iapi, Woniya Wakan ie wicakiye cin he iyecen.

5 He ehan wicašta owotanna Juda wicašta kin hecapi, maĥpiya ihukuya oyate hiyeye cin etanhan Jerusalem en tipi.

6 Wicaho kin de otanin, unkan wicota en mniciyapi qa inihanpi, otoiyoĥi iye iapi tawapi kin on, hena ia yukanpi he nakihonpi kin heon.

7 Owasin inihanpi qa yušin-yayapi qa otoiyoĥi hekiyapi; Tona ia yukanpi kin hena owasin Galile wicašta kin hecapi šni he.

8 Token on otoiyoĥi iapi kin yuha untonpi kin hena ia nawicunĥonpi he.

9 Parthe qa Mede qa Elamite, qa Mesopotamia en tipi qon, Juda makoce kin en, qa Kappadokia en, Pontos qa Asia en;

10 Phrugia qa Pamphulia en, Eĥipta qa Libue makoce kin en, Kurene ihdukšan, Roma oyate kin etanhan, Juda wicašta, qa en opewicakiyapi qon,

11 Krete qa Arabe kin heun-

capi, Wakantanka taku tanka econ kin, unkiye unkiapi kin eciyatanhan, hena ia oyakapi kin naunĥonpi ce, eyapi.

12 Owasin inihanpi, qa yušin-yayapi, qa otoiyoĥi hekiyapi; De taku kapi hwo.

13 Qa wanĥikši iĥaĥapi qa; Dena miniša skuya on imnanpi ce, eyapi.

14 Tuka Inyan ake wanĥipidan kin om najin, ho yuwankan icu, qa hewicakiya; Juda wicašta, tona Jerusalem en dukanpi ko, owasin he de sdonyapi, qa mioie kin anagoptan po.

15 Niye hecannipi kin hecetu šni, wanna anpetu kin en yamni ape cin hehantu, heon wicašta kin dena witkopi šni.

16 Tuka Joel wicašta wokcan oyake ciqon he dee.

17 Unkan anpetu ihankeya kin en, (Wakantanka eya,) mitaniya kin wicaceĥi owasin awicawakaštan kta; unkan nieinkšipi nicunkšipi ko wokcanpi kta, qa koška nitawapi kin wowanyake kin wanyakapi kta, qa wicahinca nitawapi kin wowihamde ihamnanpi kta ce.

18 Anpetu kin hena en wicašta taokiye, qa winyan taokiye mitawa kin, hena en mitaniya awicawakaštan kta, qa hena e wokcanpi kta.

19 Unkan wankan maĥpiya kin ekta taku on yušin-yayapi wicawaqu kta, qa kuya maka kin akan wowapetokeca kin, we qa peta qa šotoju.

20 Itancan taanpetu tanka woinihan kin he hi šni itokam, anpetu wi kin otpaza icu kta, qa hanyetu wi kin is we icage kta.

21 Unkan hehan tuwe Itancan caje kin hoyekiye cinhan he ni-kiyapi kta ce.

22 Israel wicašta, wicoie kin de nañon po; Jesus Nazareth etanhan qon, wicašta wan niyepi kin ekta, Wakantanka hdu-tanin qon, wicowašake, taku on inihanpi, qa wowapetokeca niyepi cokaya Wakantanka econ kiye ciqon hena e niye sdonya-yapi.

23 He qe Wakantanka atayedan wakiconze ça, iye osdonye kin eciyatanhan qupi qon, he iyacupi, qa nape šiksica on icipaweh oyakatanpi, qa yaktepi.

24 Hee Wakantanka ekicetu ye ça, wiconțe icaške kin kiyuška, en yuhapi kta okihipica šni nakaeš.

25 Dawid he ke ça, kaken eya; Ohinniyān mitokam Jehowa wanmdaka, mietapa kin ekta yanke, heon pahoho šni waun kta.

26 Heon micante kin iyuškin, qa miceji kin ipsica; qa micelipi kin woape en wanke kta.

27 Minagi kin he hades ekta ehpemayakiye šni, qa Wanji Wakan nitawa kin he wicaliwīn wanyake kta e on yaqu kte šni.

28 Wiconi canku kin sdonye mayaye kta; qa niite kin etanhan wowiyuškin on imnamaya-ye kta.

29 Wicašta hunka wanjinci-yapi, Dawid hunkakeyapi un kin he eciyatanhan taninyan ociciyakapi kta; he țe ça hapi, qa anpetu kin dehanyān ohna hnakapi kin unkičipi wanka.

30 He wicašta wokcan kin heca, qa Wakantanka wokonze on konza, wicacelipi eciyatanhan iye tancan aicage kte cin he etanhan Messiya, iye oiyo-tanke kin akan iyotanke kta e icali-ye kta he sdonya.

31 Hecen tokaheya tanhan he wanyake ça Messiya ekicetuya-

pi kin he cajeyata, nagi kin hades ekta ehpekiyapi kte šni, qa celipi kin wicaliwīn wanyake kte šni.

32 Jesus iye qe Wakantanka ekicetuye cin he unkiyepi owasin unyaotaninpi ece.

33 He Wakantanka etapa kin ekta yuwankan icupi, qa Atkuku kin Woniya Wakan iwahoye ciqon he icu, heon nakaha taku wandakapi qa nayañonpi kin he akaštan.

34 Dawid e qe malhiya ekta wankan iyaye šni, tuka kaken eya; Jehowa Itancan mitawa kin kaken eciya, Mietapa kin eciyatanhan iyotanka wo,

35 Tona toka niye cin hena nisiha oahe kin ewahnake kte cin behanyan.

36 Heon etanhan, Israel tiyohnaka owasin, de tanyan sdonya wo, Jesus icipaweh oyakatanpi qon, hee Wakantanka Itancan qa Messiya kaga ce.

37 He nañonpi unkan cante kin ekta iyoyakapi, qa Inyan qa yewicašipi unmapi kin om, Wicašta hunkawanjin unniyanpi token econkupi kta he, ewicakiyapi.

38 Hehan Inyan hewicakiya; Ihducetū po, qa woahtani nicicajujupi kta e on Jesus Messiya caje kin on baptem ničipi kta; kinhan Woniya Wakan itunicihanpi kin he iyacupi kta.

39 Wahoyapi kin de niye nitawapi, qa nicincapi, qa tona itehanyan yukanpi kin owasin, tona Itancan unkita Wakantankapi kin wicakico kte cin hena tawapi ce, eya.

40 Qa wicoie tokeca ota on wicakiyatanin, qa wahokonwicakiye ça heya; Wicoicage šice cin de etanhan ničiya po.

41 Unkan tona oie kin iyuškin-



yan icupi kin hena baptem wicacupi; hecen anpetu kin he en wicanagi kektopawinge yamni en opapi.

42 Qa yewicašipi kin taku onspewicakiyapi kin en katinyan opapi ece, qa om taku yuhapi, aguyapi kiyušpapi qa wocekiye eyapi kin en ece unpi.

43 Unkan wicašta owasin nina yušinyayapi; unkan yewicašipi kin taku wakanyan econpi qa wowapetokeca ota econpi ece.

44 Unkan tona wicadapi kin hena owasin witaya yukanpi, qa taku owasin ptaya yuhapi.

45 Qa tona maga qa woyuha yuhapi kin hena e wiyopekiyapi, qa otoiyo hi cinpi kin iyecen owasin wicakipamnipi.

46 Qa anpetu otoiyo hi, tawacin wanjidan, tipi wakan kin ohna yukanpi, qa tipi iyaza aguyapi kiyušpapi, wowiyuškin cante okonwanjidan ko yuha taku yutapi icupi.

47 Wakantanka yatanpi, qa oyate kin owasin en wowašte yuhapi. Unkan Itancan kin tona nipi kte cin heca, anpetu otoiyo hi, okodakiciye kin en ope wicakiya.

### WICOWOYAKE 3.

1 Unkan hehan Inyan qa Johannes kici, tipi wakan kin ekta kaitawankanhde yapi, napeinwanka ape cin, wocekiye eyapi ece kin behantu.

2 Unkan wicašta wan tonpi kin ehantanhan hušte un kin he yuha ahipi, anpetu otoiyo hi tipi wakan tiyopa wan, Wašte eciyapi kin he en ehdepi, tona tipi wakan tin yapi kte cin hena taku wicakida kte cin heon.

3 Hee Inyan Johannes kici tipi wakan kin timahen yapi kta

wanwicayake ça, taku wicakida.

4 Unkan Inyan opahta, qa Johannes kici, qa, Ekta unkatonwan po, eya.

5 Taku okini kta kecin qa hecen anawicagoptan yanka.

6 Hehan Inyan; Mazaska mazaskazi ko takudan mduhe šni, tuka taku mduhe cin ciçu kta, Jesus Messiya Nazareth etanhan, he caje on najin, qa mani wo, eciya.

7 Qa nape etapa kin en yuze ça najin kiya; unkan ihnuhanna siha iškahu ko wašag hinnda.

8 Hehan iye kin psin iyaye ça najin, qa mani, qa om tipi wakan kin timahen iyaya, mani, qa psipsica, qa Wakantanka idowan.

9 He mani qa Wakantanka idowan kin oyate kin iyuhpa wanyakapi;

10 Qa wicašta tipi wakan, tiyopa Wašte eciyapi, kin en hiyotanke ça taku da ece qon he dee sdoniyapi; qa taku ecakiconpi kin on etanhan nina inihanpi, qa yušinyayapi.

11 Unkan, wicašta hušte qon wanna okizi kin he Inyan Johannes kici wicayus najin, hena en oyate owasin kiwitaya inyang iheyapi, qa nina yušinyayapi, omanipi Solomon tawa kin hetu.

12 Unkan Inyan he wanyake cehan, oyate kin hewicakiya; Israel wicašta, tokeca he on niyušinyayapi, qa tokeca opaunhtapi nayajinpi he; unkiye wowašake qa wowašte unhdubapi kin heon wicašta kin de mani unyanpi *kecanunyak*inpi seca.

13 Abraham, qa Isaak, qa Jakob Wakantanka tawapi; hunkake wicunyanpi Wakantanka tawapi kin he Cinhintku Jesus wanna hdutan; he niyepi e wi-

## WICOWOYAKE 4.

cayaqupi, qa Pilate itokam yaki-pajinpi, he iye kiyuške kte linca tuka.

14 Tuka Wanji Wakan qa Owotanna un kin he niye yaki-pajinpi, qa wicakte sa wan kiyuškapi yacimpi.

15 Qa Wiconi Itancan kin he yaktepi; he qe Wakantanka wicašte cin etanhan najinkiye cin unkiye unkiyakapi ece.

16 Qa iye caje kin, caje wicadapi kin heon, wicašta kin de wandakapi qa sdonayayapi kin he yuwaśaka; han, iye wacinyanpi kin he wicašta kin de tanyan okiziya, niyepi owasin en.

17 Unkan nakaha mihunkawanji, iyukcan śni hecanonpi, qa wicašta itancan wicaduhapi kin hena nakun, he sdonwaya.

18 Tuka Wakantanka Messiya token kakije kte cin, wicašta wokcan kin owasin i kin eciyatanhan, oyake ciqon hena he en hduacetu.

19 Heon ihduacetupi, qa ihduhomni po; hecen wayahtanipi kin nicicajujupi kta ce; tohan anpetu yuacetupi kin Itancan itohnake kin eciyatanhan u kinhan;

20 Qa Jesus Messiya oniciyakapi qon he uśi kta.

21 He qe małpiya kin ekta eyakupi kta, taku owasin ekicetuyapi kta anpetu kin hehayan, Wakantanka maka icage cin he tanhan wicašta wokcan wakan wicahduhe cin owasin i kin eciyatanhan oyake ciqon hec.

22 Moses iye qe hunkakeyapi kin hewicakiya; Nihunkawanjipi kin etanhan wicašta wokcan wanji, miye iyemaceca, Jehowa Wakantanka nitawapi kin icalniciciyapi kta; he taku eniciyapi kte cin owasin anayagoptanpi kta.

23 Qa wicanagi otoiyoħi, wicašta wokcan kin he anagoptan śni kinhan, he oyate kin etanhan ihangyapi kta ce.

24 Unkan wicašta wokcan owasin, Samuel hetanhan, tona iyoħakam woyakapi qon anpetu kin dena cajeyatapi.

25 Wicašta wokcan cincapi kin he niyepi, qa wicoun Wakantanka hunkake wicunyanpi wicakicage ciqon, he qe Abraham heciya; Unkan nicinca kin on etanhan wicowazi maka akan un kin owasin yawaštepi kta ce.

26 Wakantanka iye Cinhintku Jesus najinkiye qa niyawaštepi kta e on niyepi tokaheya en u śi, otoiyoħi wayahtanipi kin etanhan ihduhomni niyanpi kta e heon.

## WICOWOYAKE 4.

1 Unkan hena hecen oyate kin ewicakiyapi kin icunhan, wośna kagapi, qa tipi wakan en itancan kin, Saddukee ko en wicahipi;

2 Oyate kin waonspewicakiyapi, qa Jesus eciyatanhan wiconšte etanhan woekicetu kin he oyakapi kin heon śihdapi;

3 Qa nape on iyawicalipayapi, qa wicakaśka tipi kin en iyewicayapi, ihanhanna kte cin hehayan; wanna htayetu nakaes.

4 Tuka wicoie naħonpi qon hena wicota wicadapi; unkan wicašta kektopawinge zaptan eetu.

5 Unkan ihanhanna hehan, wicašta itancanpi, hunkawicayapi kin, wowapi kagapi ko;

6 Qa Annas wośna kagapi itancan, qa Kaiaphas, qa Johannes, qa Aleksandros, qa tona wośna kagapi itancan takuwicaye cin hena koya Jerusalem en mniciyapi.

7 Unkan wicacokaya ewica-

hdepi, qa wiwicawangapi ; Taku wowaŝake, qa tuwe caje kin on hecanonpi he, eyapi.

8 Hehan Inyan Woniya Wakan on ojudan, hecen ewicakiya ; Oyate en wicaŝta itancanpi, qa İsrail hunkawicayapi kin ;

9 Anpetu kin de wicaŝta huŝte qon tanyan ecakiconpi, qa token on okizi kin, he on wiunyanun-gapi hecinhan ;

10 Niyepi owasin, qa İsrail oyate kin owasin de sdonya po, Jesus Messiya Nazareth etanhan, icipaweĥi oyakatanpi qon, Wakantanka wicaŝe cin etanhan ekicetuye cin, he caje on wicaŝta kin de nitokam okizi najin.

11 Inyan kin de ticagapi yanunpi kin ayaktapi ŝni, tuka he oise en itancan kin ee.

12 Qa tuwe tokeca eciyatanhan wanikiyapi kin yuke ŝni ; qa wicacaje tokeca maĥpiya kin ihukuya wicaŝta wicakupi, on unnipi kte cin wanica ce.

13 Unkan Inyan qa Johannes waditakapi kin he wanyakapi, qa taku ota onspeiciyapi ŝni qa wicaŝta ikceka kin hecapi e sdonyapi qehan, nina yuŝinyayapi, qa hena Jesus kici unpi qon he iwicayucanpi.

14 Qa wicaŝta okiziyapi qon he wiciyopeya najin wanyakapi ; unkan taku awicayuptapi kte cin takudan yuhapi ŝni.

15 Tuka omniciye kin etanhan tankan ye wicaŝipi, hehan he akiiapi ;

16 Qa iyakitedan hekiciyapi ; Wicaŝta kin dena token ecawicunkiconpi kta hwo ; wowape-tokeca tanka kin de econpi kin he tona Jerusalem en yakonpi kin owasin sdonyapi, qa anaunĥmanpi kta unkokihipi ŝni.

17 Tuka he oyate kin en ana-

ptapi kta e heon nina wakokipe wicunkicagapi kta, qa caje kin de on tohinni wicaŝta wowicakiyakapi kte ŝni, *unkeyapi* kta ce.

18 Unkan hehan wicacicopi, qa Jesus caje kin on takudan ie ŝni, qa waonspekiye ŝni wicaŝipi.

19 Tuka Inyan Johannes kici awicayuptapi qa heyapi ; Wakantanka itokam, niyepi anaun-nigoptanpi kta, qa iŝ Wakantanka anaungoptanpi kta, unma tukte owotanna kin, niŝ iyukean po.

20 Taku sdonunyanpi qa nanunĥonpi qon hena oyake ŝni unyakonpi kta e unkokihipi ŝni.

21 Hehan ake wakokipe wicakicagapi tamwicakiyapi, qa hde wicaŝipi, taku on taku iyawicaponpapi kta takudan iyeyapi ŝni, oyate kin on etanhan ; taku econpi kin heon owasin Wakantanka yatanpi.

22 Wicaŝta wookizi wowape-tokeca kin he en econpi qon he wanna waniyetu wikcemna topa sam iyeya.

23 Unkan kihdewicayapi, hehan iye takodawicayapi kin ekta hdapi, qa woŝna kagapi, hunkawicayapi kin ko, taku token ewicakiyapi qon owasin ohdakapi.

24 Unkan hena naĥonpi qehan, witaya Wakantanka hoyekiyapi qa heyapi ; Itancan Wakantanka he niye, maĥpiya, maka, miniwanca qa taku ohnaka ko owasin yakaga.

25 Dawid nitaokiye kin i kin eciyatanhan kaken ehe cin ; Tokeca e Ikcewicaŝta kin oqoyapi, qa oyate kin taku ecinŝnian yukcanpi he.

26 Maka wicaŝtayatapi kin najin hiyaye a, wicaŝta itancanpi kin witaya mniciyapi, Itancan



## WICOWOYAKE 5.

kin en, qa Sdakiye ciqon he nakun.

27 Awicakehan Jesus Nicinksi wakan sdayakiye ciqon he en, Herod, qa Pontiyos Pilate, Ikcewicašta, Israel oyate ko mniciyapi;

28 Ehanna taku, ninape nitawacin ko on, econ yakonze ciqon, he ecen econpi kta heon etanhan.

29 Unkan nakaha, Itancan, token wakokipe unkcicagapi kta tamunkiyapi kin he wanyaka wo; qa nitaokiye kin nioie nina waditagya oyakapi kta e wicaqu wo;

30 Wawokiziya on ninape kin yahdugate cin heon; qa Jesus Nicinksi wakan caje kin on taku wapetokeca, qa on yušinyayapi kte cin hena econpi kta.

31 Unkan wocekiye eyapi, hehan tukten witaya yukanpi kin he yuhuhuzapi, qa owasin Woniya Wakan kin on ojupidan, qa Wakantanka oie kin waditagya oyakapi.

32 Unkan wicota wicadapi kin hena wicacante wanjidan wicanagi wanjidan ko yuhapi; qa taku tonpi kin tuwedan, De mitawa ce, eye šni; tuka taku owasin witaya yuhapi.

33 Unkan yewicašipi kin hena wowašake tanka on Jesus Itancan piya ikicage cin he oyakapi; unkan wowašte tanka owasin en un.

34 Unkan hena tuwedan takudan icakije šni unpi: tuka tona maga, qa tipi yuhapi qon hena wiyopekiyapi, qa taku wiyopeyapi kin on taku icupi kin he ahipi,

35 Qa yewicašipi kin siha hdepi kin en ehnakapi: unkan wicašta otioyohi taku token cinpi kin hecen pamni wicaqupi ece.

36 Unkan Joses, he yewicašipi kin Barnabas, eya cajeyatapi qon, Wicakicanpte cinhintku kin, eyapi kin he kapi, Lewi wicowazi qa Kupros makoce kin etanhan;

37 Hee makoce onšpa hduhe cin wiyopekiye ça mazaska kin hdohi, qa yewicašipi siha hdepi kin en ehna.

## WICOWOYAKE 5.

1 Tuka wicašta wan Ananias eciyapi, tawicu Sapphira kici, maga wan wiyopekiya;

2 Qa mazaska apa anakihbe, tawicu kin is nakun sdotkiya; unkan apa ahi, qa yewicašipi kin sihapi kin en ehna.

3 Tuka Inyan heciya; Ananias, tokeca e Woniya Wakan kin oiyaton kte šni e Satan nicante kin en ocowasin iyohpaya, qa maga iyoheyapi kin apa anayakiliman he;

4 Nahahin ecen un qon he ehan yahduhe šni he; qa wiyopekiyapi kin he ehan nakun nitawa šni he. Tokeca nicante ekta hecen econ wacani he. Wicašta akantu kin hee šni, tuka Wakantanka en iyatonšni ce.

5 Unkan Ananias hena oie kin nahion qehan, hinhpaye ça ça iyaya. Unkan tona hena taku kin nahonpi kin owasin nina wikipapi.

6 Unkan koška kin najinpi, qa opazuntapi, qa tankan ayapi, qa hapi.

7 He iyohakam wihiyayedan oape yamni, hehan tawicu kin taku econpi qon sdonye šni ecen tin hiyu.

8 Unkan Inyan heciya; Kana on maga iyoheyakiyapi he, omakiyaka wo. Unkan is; Han, kana on, cya.

9 Unkan Inyan; Token on sakim Itancan Taniya kin iyutanyayapi kta ecen wacinduza-pi he. Wanyaka wo, tona nihihna ĥapi kin hena sihapi kin tiyopa kin en najinpi, qa niye nakun tankan aniyampi kta, ecia-ya.

10 Hehan is eya hecehnana iye siha kin ekta hinĥipaye ĉa ĥa iyaya. Unkan koškapi qon en hiyupi, qa wanna ĥa e wanyaka-pi, hehan is eya tankan ayapi, qa hihnaku kin kici ĥapi.

11 Unkan okodakiciye kin oco-wasin, qa tona hena taku kin naĥonpi owasin nina wikipapi.

12 Unkan yewicašipi kin nape-pi kin on oyate kin en wowinihan wicoĥan qa wowapetokeca ota econpi. Unkan owasin wicacante wanĥidan yuha Solomon omanipi tawa kin ohna yukanpi.

13 Qa wicašta tokeca tuwedan en owicapa okihi šni, tuka oyate kin wicakinihanpi.

14 Qa tona wicadapi kin sanpa ota Itancan kin en opapi, wica winyan ko wicota.

15 Hecen tona wicayazan kin hena tankan awicaupi, qa canku otoiyohi ohna, ohehdepi qa owin-ja ko akan ahivicahnakapi, Inyan hen hiyaye cinhan hunĥ ohanzi wicaye kte cin heon.

16 Unkan, otonwe itan ihdu-ksan kin hena etanhan wicota Jerusalem en hipi, qa tona wayazanpi, tona taku wakan šica wicayuhnaškinyanpi ko en awica-hipi; unkan owasin asnipi.

17 Hehan wošna kagapi itancan kin najin hiyaye ĉa, tona om un kin, Saddukee wicowazi kin etanhanpi, hena winawizipi on ojupidan;

18 Qa nape on yewicašipi kin iyawicahpayapi, qa wicakaška

tipi ikceka kin ohna ewicahnakapi.

19 Tuka Itancan taohnihde ye cin he hanyen wicakaška tipi tiyopa kin yuzamni, qa tankan awicau qa heya;

20 Hunktiya po, tipi wakan kin ohna inajinpi qa wiconi kin de wicoie kin owasin oyate kin owicakiyaka po.

21 He naĥonpi, unkan hanĥan-na hin tipi wakan kin timahen yapi, qa wowicakiyakapi. Hehan wošna kagapi itancan, qa tona om un kin hena witaya iheyapi, qa omniciye tanka kin mniciye wicaši, Israel cinca hun-kawicayapi kin owasin koya; unkan wicakaška tipi kin ekta wicahuweye wicašipi.

22 Tuka akicita kin wicakaška tipi kin en hipi, qa iyewicayapi šni, hehan hoši hdapi;

23 Qa heyapi; Awicakehan wicakaška tipi kin sutaya onatakapi ecen iyeunyanpi, qa tiawanyag wicakiyapi kin tiyopa kin itokam najinpi; tuka unyuhdokapi qehan, tuwedan en wan-unyakapi šni.

24 Unkan wošna kagapi itancan, qa tipi wakan en itancan kin, wošna kagapi kin hena koya, hena wicoie kin naĥonpi qehan, he toketu kta hecinhan iyukanpi šni.

25 Hehan wanji en hi qa; Iho, wicašta wicakaška tipi kin en ewicayahnakapi qon hena tipi wakan kin ohna inajinpi qa oyate kin waonspewicakiyapi ce, eya owicakiyaka.

26 Hehan akicita tancan kin akicita ko ekta yapi qa iwaste-dan awicaupi, oyate kin inyan on wicakininpi kta e kokipapi heon etanhan.

27 En awicahipi qa omniciye kin wicacokaya najin wicakiya-

pi; unkan wośna kagapi itancan kin wiwicawanga,

28 Qa heya; Wicacaje kin de on wowicayakidakapi kte śni, nina unkeniciyapi śni he; unkan iho, woonspe nitawapi kin on Jerusalem ojudan yayapi, qa wicaśta kin de we kin en unkayau-pi kta wacannipi.

29 Hehan Inyan, yewicaśipi kin om, awicayupte ça heya; Wicaśta akantu hee śni, tuka Wakantanka hee e anaungo-tpanpi kta iyececa.

30 Jesus yaktepi qa can akan otkeyayapi qon he atewicunyan-pi ta Wakantankapi kin hduce-  
tu :

31 Hee kin Wakantanka wan-kan ehdaku, iye nape etapa kin ekta Itancan qa Wanikiya un kta, Israel ihducetupi qa wo-  
ħtani kajujupi kin wicaqu kta e heon.

32 Unkan unkiye, iye on, wi-coie kin hena unkoyakapi ece, qa Woniya Wakan tona Wakan-tanka anagoptanpi wicaqu kin, he iś eya hena yuotanin ece.

33 He naħonpi qehan cante-  
ptanyanpi, qa tewicayapi kta e akiipapi.

34 Hehan Pharisee wan Gama-  
liel eciyapi, woepe waonspekiya, qa oyate kin en okinihan, he om-niciye kin en najin, qa yewicaśi-pi kin cistiyedan tankan aye wi-  
caśi :

35 Qa hehan hewicakiya; Is-  
rael wicaśta, wicaśta kin dena taku ecawicakicon wacannipi kin he itonpa po.

36 Anpetu kin dena itokam Thudas icaga, he taku wicaśta keiĉiya; unkan wicaśta opawin-  
ge topa ecetu ihakam yapi; tu-ka he iye ktepi, qa tona wicada-pi qon owasin enanakiya iyewi-  
cayapi qa takuni śni aya.

37 Qa he iyohakam Judas Gal-  
ile etanhan, owicawapi anpetu kin he ehan inajin, qa oyate ota ihakam awicaya; he nakun ihang-  
yapi, qa tona wicadapi qon owa-  
sin enanakiya eyaya.

38 Heon nakaha heciyapi; Wicaśta kin dena wiciheyata najinpi, qa awicayuśtan po; wo-  
konze qa wicoħan kin de wica-  
śta akantu kin etanhan hecinhan atakuni kte śni;

39 Tuka Wakantanka eciyatan-  
han un kinahan, yujuju oyakihi-  
pi śni; okinni Wakantanka kici yeciza dukanpi kta naceca, eya.

40 Unkan he anagoptanpi, qa yewicaśipi kin wicakipanpi, qa wicakapsinsintanpi qehan, Jesus caje kin on woyake śni wicaśi-  
pi, qa wicakiyuśkapi.

41 Unkan iye omniciye kin etanhan hdapi, qa *Jesus* caje kin on wowištece en awicaupi iye-  
ceca wicayawapi kin heon wi-  
yuśkinpi.

42 Qa anpetu otoiyoħi tipi wa-  
kan kin ohna, qa tipi iyaza wa-  
hokonwicakiyapi, qa Jesus Mes-  
siya oyakapi ayaśtanpi śni.

## WICOWOYAKE 6.

1 Unkan anpetu kin hena en, waonspewicakiyapi kin wanna wicota aya qehan, Helenes He-  
brew oyate kin wicabapi, anpe-  
tu otoiyoħi wapamnipi kin en wiwazica wicayuhapi kin hena awicatonwanpi śni kin heon etan-  
han.

2 Hehan akenonpapi kin waon-  
spewicakiyapi kin owasin wica-  
kicopi qa hewicakiyapi; Wa-  
kantanka oie kin unkayuśtanpi, qa wahna wotapi wiyeya eun-  
ħnakapi kte cin hecetu śni.

3 Heon hunkawanjin unniyanpi enitanhanpi wicaśta owotanna



## OĤANYANPI QON.

yawapi, qa Woniya Wakan wicoksape ko on ojupidan šakowin wicakahniga po, wicoĥan kin de yuhe wicunĥiyapi kta.

4 Tuka unĥiye qe cekiyapi qa wicoie oyakapi kin en ohinniyan ye unĥiĥiyapi kta ce.

5 Unkan wicoie kin he oyate kin owasin iyokipipi; qa Stephanos, wicašta wan wacinyanpi Woniya Wakan ko ojudan, kin he kahngapi, qa Philip, qa Procoros, qa Nikanor, qa Timon, qa Parmenas, qa Nikolas Antiyoka ekta en opeĥiyapi qon.

6 Hena yewicašipi kin wicacokaya ewicahdepi; unkan wocekiye eyapi, hehan nape on awicaputakapi.

7 Unkan Wakantanka oie kin icage qa Jerusalem en waonspewicakiyapi kin nina ota aya; qa wošna kagapi kin ota nakun wacinyanpi kin en opapi.

8 Unkan Stephanos wowacinye wowašake ko on ojudan, taku on yušinyayapi, qa wapetokeca tanka econ, oyate kin en.

9 Unkan wicašta wanĥikji omniciye tipi wan, Wicakiyuškapi tawapi eciyapi kin hetanhan, qa Kurene qa Aleksandre wicašta kin, qa Kilikia qa Asia etanhanpi, hena en inajinpi qa Stephanos kici hdokinicapi.

10 Tuka Woksape Woniya ko on ie cin he okihipi šni.

11 Hehan wicašta opewicatonpi, unkan hena e, Wicašta kin de Moses qa Wakantanka nakun wicoie šica ewicakiya, naunĥonpi ce, eyapi.

12 Hecen oyate kin, qa hunkawicayapi, wowapi kagapi ko iyowicapaštakapi; unkan anatanhipi, qa yuzapi, qa omniciye kin en ahipi.

13 Qa oitonšni waayatanin kin heca najin wicakiyapi; hena iš

heyapi; Wicašta kin de tipi wakan kin de wicoope ko on taku šica eye cin ayaštan šni.

14 Jesus Nazareth etanhan qon he tipi kin de ihangye qa, wicoĥan Moses unqupi qon hena yutokeca kta ce, eya naunĥonpi ce.

15 Unkan omniciye kin en iyotankapi kin owasin opaĥta yukampi, qa ite kin he mahipiya ohnihde wan ite kin iyececa wanyakapi.

## WICOWOYAKE 7.

1 Hehan wošna kagapi itancan kin heya; Hena hecetu he.

2 Unkan iye hehan heya; Wicašta hunkawanĥinciyapi, ateci-yapi ko anamagoptan po. Wowitan Wakantanka kin, Abraham ateunyanpi Mesopotamia en ounye cigon, Carran en ahiti kin he itokam, en ikpazo;

3 Qa heciya; Nita makoce qa nitakuye kin etanhan ya wo, qa makoce wan cicipazo kte cin he ekta u wo, eciya.

4 Hehan Kaldeya makoce kin etanhan hiyu qa Carran en ahiti. Hen atkuku kin qa, unkan hetanhan makoce kin en nakaha oununyanpi kin den ahiti.

5 Unkan tawa kte cin siha oahe kin hinskokeca qu šni, tuka he yuhe kta qa iyohakam cinca kin yuhapi kta e qu kta iwahoya; nahahin cinca wanica.

6 Unkan Wakantanka kaken eya; He cinca kin makoce tokeca en unhdaka unpi kta; unkan hen wowidake wicayuhapi, qa waniyetu opawinge topa hehanyan šicaya wicakuwapi kta.

7 Qa oyate kin hena wowidag wicayuhapi kte cin he wicamdaco kta; qa he iyohakam etanhan hiyupi kta qa makoce kin

den ohomadapi kta ce, Wakan-tanka eya.

8 Hehan bakilidayapi wicoope kin he qu. Unkan hecen Isaak cincaya, qa anpetu isahdogan hehan bakilidaya. Isaak Jakob cincaya; qa Jakob hunkakewicayapi akenonpapi qon cincawicaya.

9 Unkan hunkakewicayapi qon Joseph inakiwizipi, qa Egipta ekta wiyopekiyapi. Tuka Wakantanka kici un;

10 Qa wokakije kin owasin etanhan ehdaku, qa Pharo Egipta wicaštayatapi kin itokam wowaonšida woksape ko qu; unkan Egipta en wicašta itancan kaga, qa iye ti kin ocowasin en.

11 Hehan Egipta makoce Kanan ko owancaya wicaakihan, qa nina wicakakija; unkan hunkake wicunyanpi kin taku yutapi iyeyapi šni.

12 Tuka hehan Egipta heciya wamnaheza yukan, Jakob nahon, unkan hunkake wicunyanpi kin tokaheya ekta ye wicaši.

13 Unkan inonpa hehan, Joseph hunkawanjinwicaye cin sdonkiyewicakiye, qa hehan Joseph otakuye kin Pharo en oyakapi.

14 Hehan Joseph atkuku kin wahoye qa kico, qa takuwicaye cin owasin nakun, wicanagi wikcemna šakowin sanpa zaptan.

15 Hecen Jakob Egipta ekta apamahde iyaye qa hen ta, iye qa nakun hunkake wicunyanpi kin:

16 Unkan Sucem ekta awicayapi, qa wicahnakapi wan, Abraham Sucem atkuku Em-mor he cinca kin, mazaska on, opewicakicaton qon he en wicahnakapi.

17 Tuka anpetu wahoyapi, Wakantanka Abraham konza iwa-

hoye cigon he wanna kiyadan u, hehan oyate kin icage qa Egipta en ihduotapi.

18 Hehan wicaštayatapi tokeca wan Joseph sdonye šni kin he icaga.

19 Unkan he qe takuwicunyanpi kin wicahnaye qa, hunkake wicunyanpi kin šicaya ecawicakicon, hecen hokšiyogopa kin nipi kte šni e tankan elipewicakiyapi qon.

20 He ehan Moses tonpi, he qe hokšiyopa owanyag wašte hinca; unkan wi yamni hehanyan atkuku ti kin ohna icaškiyapi.

21 Qa tankan elipeyapi, hehan Pharo cunwintku kin eyaku, qa iye cinca kin hecen icašiya.

22 Unkan Moses Egipta oyate wicoksape kin owasin onspekiyapi, qa wicoie, wicohan ko on wašaka.

23 Unkan wanna waniyetu wikcemna topa, hehan hunkawanjitku Israel cinca kin wanwicahdag ye kta wacinyuza.

24 Qa wanji šicaya ecakiconpi kin he wanhdake çehan, okiye ca šicaya ecakiconpi qon he tokiciçon, qa Egipta wicašta kin kaštaka.

25 Hunkawanjitku kin, iye nape kin on Wakantanka wiconi wicaqu kte cin he iyukanpi kta kecin, tuka okašnigapi šni.

26 Ihanhanna hehan ake kicizapi kin en taniniçiye qa woo-kiye wicakicage kta wacin qa heya; Wicašta hunkawanjin yeci-yapi, tokeca šicaya ecaye-ciconpi he.

27 Tuka tuwe takodaku kin šicaya ecakicon kin he paha iye-ye qa, Tuwe unkiyepi en wicašta itancan qa wayaco nicaga he.

28 Egipta wicašta litanihan yakte qon he iyecen mayakte kta he, eya.

29 Wicoie kin de on Moses nape ça Madiyan makoce kin en hewotahedan un, qa hen hoksidan nom cinca wicaya.

30 Unkan wanna waniyetu wikcemna topa ihunniyan, hehan hewoskan makoce kin en Sina Paha kin hetu, can yuhaha wan ohna peta ide kin en, Itancan taohnihde wan taniniçiya.

31 Unkan Moses he wanyake çehan, wowanyake kin on yuşinyaya; qa tanyan wanyake kta e on kiyedan ya, hehan Itancan ho kin en tanin;

32 Qa, Nihunkake Wakantanka tawapi kin he miye; Abraham ta Wakantanka, Isaak ta Wakantanka, qa Jakob ta Wakantanka kin, eya. Unkan Moses cancan qa ekta etonwan okihi şni.

33 Unkan Itancan kin heciya; Nitahanpe kin hduşdoka wo, tukten nayajin kin he maka wakan ce.

34 Ekta ewatonwe ça, Egupta en mitaoyate token kakijapi kin he wanmdake ça comnihdazipi kin nawañon, qa wicawakiyuşke kta e on kun hibu; unkan nakaha u wo, Egupta ekta ye cişi kta.

35 Moses aktapi şni qa; Tuwe wicaşta itancan qa wayaco nicaga he, eciyapi qon he Wakantanka wicaşta itancan wanikiya ko kage ça ye şı, malpiya ohnihde can yuhaha kin en taniniçiyeye cin he nape kin on.

36 Unkan hee tankan awicau, qa taku on yuşinyayapi wapetokeca ko, Egupta makoce kin en, Mde şa ekta, qa hewoskan makoce kin etu, waniyetu wikcemna topa hehanyan econ.

37 Moses Israel cinca kin; Hunkawanjin wicayayapi etanhan wicaşta wokcan wan miye

iyemaceca, Itancan Wankantanka nitawapi kin icahniciciyapi kta, he anayagoptanpi kta ce, ewicakiye ciqon he dee.

38 Qa hewoskan makoce kin ekta okodakiciye kin kici un qon hee, Sina paha kin etu, malpiya ohnihde kin okiye ça nakun hunkake wicunyanpi kin; qa he wiconi oie kin unqupi kta e icu.

39 Unkan hee kin hunkake wicunyanpi kin anagoptonpi cimpi şni, tuka heyata iyeyapi, qa can-tepi kin en Egupta ekta hdapi.

40 Qa Aaron heciyapi; Taku wakan unkitokam yapi kte cin unkickaga po; Moses Egupta makoce kin etanhan unkaupi qon he tokiya iyayá sdonunyanpi şni ce.

41 Unkan anpetu kin hena en ptejicadan wan kagapi, qa wakagapi kin he taku wakiyuşnapi, qa iye nape kagapi kin on wiyuşkinpi.

42 Hehan Wakantanka ihduhomni, qa malpiya ohnaka kin ohodapi kta e awicayuştan; wicaşta wokcan tawowapi en kagapi kin he iyececa; Israel ti kin woteca ktepi woşnapi ko, hewoskan makoce kin en, waniyetu wikcemna topa hehanyan mayaqupi he.

43 Unkan ito Molok tawakeya kin, qa Remphan taku wakan yadapi wicanhipi tawa kin he iyacupi; hena wakagapi kin itokam canpeşka makehde inayajinpi kta e yakagapi: Unkan ito Babulon akotanhan aciyapi kta ce.

44 Hunkake wicunyanpi kin hewoskan makoce kin en waayatani wakeya kin yuhapi; tuwe Moses okiye ça, token wanyake cin he iyecen kage kta keciye ciqon, hee yuştan qon iyececa.



## WICOWOYAKE 8.

45 He hunkake wicunyanpi kin icupi, qa Joshua kici Ikcewicasta tamakoce kin en ahipi, hena e Wakantanka hunkake wicunyanpi itepi kin etanhan heyata iyaye wicaya, Dawid taanpetu kin hehanyan ;

46 He Wakantanka itokam wowaonsida iyeye ca, Jakob ta Wakantanka kin tipi wan iyekiciye kta cin.

47 Tuka Solomon tipi wan kicaga.

48 Hececa tuka, Iyotan Wankan un kin tipi wicanape on kagapi kin ohna ti sni ; wicasta wokcan hecen eye cigon ;

49 Mahpiya kin he oiyotanke mitawa kin ee, qa maka kin he misiha oahe kin hee ; ecin tukte tipi miyecagapi kta he, qa tukten ozimiciye kta he.

50 Minape kin taku henana owasin kage sni he, Itancan kin eya ce.

51 Tahu nisutapi, qa cante noge ko banicihdayapi sni kin, ohinnyan Woniya Wakan kin yakipajinpi, nihunkakepi econpi qon he niye iyenicecapi.

52 Wicasta wokcan kin tukte wanji e nihunkakepi kin sicaya kuwapi sni he. Wanji Owotanna un kin he u kte cin tona oyakapi qon hena wicaktepi ; qa he qe nis niyepi wanna iyoheyayapi qa yaktepi.

53 Mahpiya ohnihde ahipi kin he eciyatanhan wope kin iyacupi, tuka tanyan yeciyuhapi sni ce, eya.

54 Unkan hena taku kin nationpi hehan, cante kin ekta nina iyoyakapi, qa hi ahdakokokapi.

55 Tuka iye Woniya Wakan kin ojudan mahpiya ekta opalita yanke ca, Wakantanka towitan kin, qa Jesus Wakantanka etapa

kin eciyatanhan najin e he wan-yaka ;

56 Qa heya ; Wanyaka po, mahpiya kin yuzamnipi, qa Wicasta Cinhintkukin Wakantanka etapa kin eciyatanhan najin e wanmdaka ce, eya.

57 Hehan hotankakiya hotaninpi, qa nogepi kin ohmus hduzapi, qa tawacin wanjidan on iyahpayapi ;

58 Qa otonwe kin tankan ehpeyapi, qa inyan on kininpi. Unkan waayataninpi kin wokoyake kin koska wan, Salos eciyapi, he siha kin en ekihnakapi.

59 Unkan Stephanos inyan on kininpi, he icunhan cekiye ca heya, Jesus Itancan, minagi kin eldaku wo.

60 Hehan canpeska makehde inajin qa hotankakiya hoyekiya ; Itancan woahntani kin de iyepi kin en awicau sni wo. Hena hecen eye ca hehan istinma iyaya.

## WICOWOYAKE 8.

1 Unkan he te cin Salos iyo-winkiya. Unkan anpetu kin he en okodakiciye Jerusalem en un kin sicaya wicakuwapi tanka. Qa owasin Juda makoce qa Samaria ekta enanakiya iyewicayapi, yewicasipi kin henana yapi sni.

2 Unkan wicasta awacin unpi kin heca Stephanos yuha ayapi, qa nina akiceyapi.

3 Tuka Salos okodakiciye kin yutakuni sni wicakuwa, tipi iyaza tin iyaye ca, wica winyan ko wicayuze ca, wicakaska tipi kin en iyewicaya.

4 Heon etanhan tona enanakiya iyayapi qon hena owancaya iyayapi, qa wicoie kin oyakapi ece.

5 Hehan Philip Samaria oton-

we kin ekta apamahde iyaye ça, Messiya owicakiyaka.

6 Unkan oyate kin Philip taku wapetokeca econ kin nahonpi qa wanyakapi qehan, taku tona oyake cin cante wanjidan on anagoptanpi.

7 Taku wakan síca hotankakiya hotaninyan tona wicayuhnaškinyanpi kin etanhan inanpapi, qa tona řařapike cin huřtepi ko ota okizipi.

8 Unkan otonwe kin he en wi-  
yuskinpi tanka.

9 Unkan wicařta wan Simon eciyapi, otonwe kin he en wanakaja tanhan wapiyapi econ, qa Samaria oyate kin yušinyewicaye ça, iye wicařta tanka kei-  
çiya.

10 He owasin anagoptanpi, cistinpidan tankinkinyan ko, qa ; Wakantanka towařake tanka kin he dee ce, eyapi.

11 Wanakaja tanhan wapiyapi econ kin on yušinyewicaye cin heon he anagoptanpi.

12 Tuka Wakantanka tokiconze kin, qa Jesus Messiya caje kin eciyatanhan taku Philip oyake cin hena wicadapi qehan baptem wicaqupi, wica winyan ko.

13 Qa Simon íř eya wicada, qa baptem qupi ; hehan Philip kici un, qa wowakta taku wapetokeca tanka ko wanyake cin heon yušinyaya.

14 Unkan Jerusalem ekta yewicařipi kin, Samaria Wakan-  
tanka oie kin icupi kin he nahonpi qehan, Inyan qa Johannes kici ekta ye wicařipi.

15 Hena e ekta apamahde hipi, qa Woniya Wakan icupi kta heon wocekiye ewicakiciyapi.

16 He nahahin tuwedan ahinhe řni, Jesus Itancan caje kin on baptem wicaqupi kin hecedan.

17 Hehan nape on awicaputakapi, unkan Woniya Wakan kin icupi.

18 Unkan yewicařipi kin nape on awicaputakapi kin he eciyatanhan Woniya Wakan wicaqupi kin he Simon wanyaka, hehan mazaska wicakahi ;

19 Qa heya ; Tuwe nape on awaputake cinhan he Woniya Wakan icu kta e wowařake kin he maqu po.

20 Tuka Inyan heciya ; Mazaska nitawa kin niye kici atakuni řni nunwe. Taku Wakan-  
tanka wicaqo ece kin he mazaska on opetonpi kta kecanni kin heon etanhan.

21 Wicoie kin de en oyape řni qa takudan nitawa řni ; Wakan-  
tanka itokamya nicante kin owotanna řni.

22 Heon etanhan taku řice cin de on iyopeiçiye ça, Wakantanka cekiya wo, nicante taku awacin kin nicicajujupi nun ce.

23 Nahanhin pizi pa hinca, qa woahitani icařke kin en yaun e wanmdaka ce.

24 Hehan Simon ayupte ça heya ; Taku ehapi kin takudan mahiyahde kte řni heon niř ito miye on Itancan kin cekiya po.

25 Unkan wanna yaotaninpi, qa Itancan oie kin oyakapi qehan, Jerusalem ekta icicawin hdapi, qa Samaria otonwe ota kin en wotanin wařte kin oyakapi.

26 Unkan Itancan taohnihde ye cin Philip okiye ça heciya ; Najin qa itokahikiya, canku wan Jerusalem hetanhan iyaye ça Gaza en iyohpaye cin he en i wo, he hewoskan kin ee.

27 Hehan iye najin, qa iyaya. Unkan iho, Ethiopa wicařta wan yunokos heca, Ethiopa wicařta-

## WICOWOYAKE 9.

yatapi winohinca, Kandake eciyapi, he ihukuya wicašta tanka, qa woyuha tawa kin owasin kiciyuha un kin, he Jerusalem ekta cekiye kta e i.

28 Qa he wanna hde ça canpahmihma ohna kiyotanke ça, Isaya wicašta wokcan kin he yawa yanka.

29 Unkan Woniya Wakan kin Philip heciya ; Ekta ye ça canpahmihma kin de kici ya wo.

30 Hehan Philip ekta inyanga ye ça Isaya wicašta wokcan kin yawa yanke cin he nahon qa ; Taku dawa kin he oyakafniga he, eciya.

31 Unkan ; Tuwedan onspemakiye sni ecin token owakihi kta he, eye ça, Philip en u qa kici iyotanke kta, keya.

32 Wowapi yawa yanke cin iapi kin he dee ; Tahinca wan ktepi kte cin en aipi, qa tacincadan hin wicayusda kin itokam inina yanke cin, he iyecen is iye i hdukawa sni.

33 Wicawahpanica en un qehan, yacopi kin he ekiciyakupi ; qa wicoicage tawa kin tuwe oyake kta he ; wiconi tawa kin maka kin etanhan ayapi ce.

34 Hehan yunokos kin Philip ayupte ça heciya ; Ceciciya ce, tuwe on wicašta wokcan kin hena hecen eya he, iye iceia qa is wicašta tokeca ka.

35 Hehan Philip i hdukawa qa wowapi kin he etanhan ie ça Jesus e okiyaka.

36 Unkan canku kin ohna hda-pi, qa mini yuke cin wan iyohipi. Hehan yunokos kin ; Mini wanyaka wo, baptem maqupi kta e taku tehinda kta he, eya.

37 Unkan Philip, Nicante kin ocowasin on wicayada kinhan enicicetu kta, eciya. Hehan is ayupte ça ; Jesus Messiya he

Wakantanka Cinhintku kin ee wicawada ce, eya.

38 Hehan canpahmihma kin owanji yanke si ; qa mini kin ekta kun iyayapi, Philip qa yunokos kin ; unkan baptem qu.

39 Unkan mini kin etanhan hdicupi qehan, Itancan Taniya kin Philip eyaku, qa yunokos kin ake wanyake sni ; unkan canku kin ohna iyuskinyan hda.

40 Tuka Philip Azotos ekta iyekiyapi ; qa otonwe kin owasin opta ye ça wotanin wašte kin oyaka, ecen Kesareya ekta iyohi.

## WICOWOYAKE 9.

1 Unkan Salos waaiapi tin wicaktepi ko Itancan waonspewicakiye cin awicapogan, wošna kagapi itancan kin en i ;

2 Qa Damaskos en omniciye tipi kin ekta wowapi da ; hecen canku kin de ohna yakonpi kin tona iyewicaye kte cin, wicawinyan ko, Jerusalem ekta kaska awicahdi kta e heon.

3 Unkan icimani ye cin Damaskos ikiyedjan ya ; unkan ihnuhanna ojanjan wan mahpiya eciyatnhan ihdukšan iyoyanpa.

4 Hehan makata hinhpaye qehan, wicaho wan nahon, Salos, Salos, tokeca sicaya mayakuwa he, eciya.

5 Unkan is ; Itancan nituwe he, eya. Hehan Itancan kin is ; Jesus sicaya yakuwa kin he miye ; can pesto kin nayahtake cin he tehika ce, eya.

6 He cancan qa yušinyaye ca ; Itancan taku ecamon yacin he, eya. Unkan Itancan kin ; Najin qa otonwe kin ekta ya wo, token ecanon kte cin oniciyakapi kta ce, eciya.

7 Unkan wicašta om icimani kin yušinyaya najinpi, wicaho



kin nañonpi tuka tuwedan wan-yakapi šni.

8 Unkan Salos maka kin etanhan najin qa išta kamdaya hehan, tuwedan wanyake šni; unkan nape on yus ayapi, qa Damaskos ekta aipi.

9 Unkan anpetu yamni wawan-yake šni un; qa takudan yute šni qa yatke šni.

10 Unkan Damaskos en waonspekiyapi wan, Ananias eciyapi, he wowihanmde en Itancan kin; Ananias, eciya. Unkan is; Itancan, de miye ce, eya.

11 Hehan Itancan kin heciya; Najin qa canku wan Owotanna eciyapi kin he ekta ye ça Judas ti kin en Salos eciyapi, Tarsos etanhan he akita wo; wanna cekiya un;

12 Qa wowihanmde wan en wicašta wan Ananias eciyapi tin hiyu, qa tonwe kta e on nape on aputake cin he wanyaka ce.

13 Hehan Ananias ayupta; Itancan, wicota etanhan wicašta kin he Jerusalem ekta, tona owotanna wicaduhe cin taku šica ecawicakicon kin hena nawalion;

14 Qa deciya nakun wošna kagapi kin eciyatanhan wowašake yuha un, tona nicaje hoyekiyapi kin hena owasin wicakaške kta ce, eya.

15 Tuka Itancan kin is heciya; Hunktiya wo, wakšica wakafinige cin he wanji ee, micaje kin İkeewicašta, qa wicaštayatapi kin Israel cinca ko itokam yuha un kta:

16 Qa micaje kin on taku token kakije kte cin he wakipazo kta ce, eya.

17 Hehan Ananias ye ça, tipi kin timahen iyaye ça, nape on aputake ça heya; Salos mihunkawanji, yatonwe ça Woniya

Wakan on onijudan kta e Itancan kin u maši; Jesus canku ohna yau kin en taniniçiye ciquon hee.

18 Unkan ihnuhanna taku hocēpu kin iyececa išta kin etanhan hinlipaya; unkan ecahankeya tonwe ça najin, qa baptem qupi.

19 Unkan taku yutapi icu qehan, wašaka aya. Unkan Salos anpetu tonana waonspewicakiyapi kin, Damaskos en yakonpi, hena om un.

20 Qa kohanna omniciye tipi kin ohna Messiya he Wakantan-ka Cinhintku kin ee ce, eya oya-ka.

21 Unkan tona nañonpi kin owasin yušinyayapi qa heyapi; Jerusalem ekta tona wicacaje kin de hoyekiyapi kin šicaya wicakuwa, qa nakaha wicakaške ça, wošna kagapi kin ekta awicaye kta e on den hi kin he dee šni he.

22 Tuka Salos sanpa wašaka icage ça Juda wicašta Damaskos ekta yakonpi kin hena inina yanke wicakiye ça, He Messiya kin ee e yawicaka.

23 Wanna anpetu ota hehan Juda oyate kin he te yapi kta e akiapi.

24 Tuka hecen konzapi kin he Salos sdonya. Unkan ktepi kta e anpetu hanyetu ko otonwe tiyopa kin awanhdakapi.

25 Hehan waonspewicakiyapi kin hanyen icupi, qa makanopiye wan ohna otonwe conkaške kin etanhan kun iyeyapi.

26 Unkan Salos Jerusalem en hdi qehan, waonspewicakiyapi kin om un kta cin; tuka owasin kokipapi, qa wanna waonspekiyapi kin heca e wicadapi šni.

27 Tuka Barnabas he icu, qa yewicašipi kin en ahi, qa token

## WICOWOYAKE 10.

tahepi Itancan kin wanyake ça, he okiye ça, token Damaskos ekta Jesus caje kin on waditagya oyake cin hena owicakiyaka.

28 Unkan Jerusalem ekta om un, qa timahen u qa tankan ya ece; qa Jesus Itancan kin on wasagya woyaka.

29 Qa Helenes oyate kin om hdokinica. Tuka hena ege he ktepi kta akitapi.

30 Hunkawanjin kiciyapi kin he sdonyapi, unkan Kesareya ekta aipi, qa Tarsos heciya hde sipi.

31 Hehan okodakiciye kin Juda makoce kin owancaya, qa Galile, qa Samaria ekta wookiye yuhapi, qa icagapi; qa Itancan kin kokipeyahan manipi, qa Woniya Wakan wicakicanpte cin en unpi, qa hecen ihduotapi.

32 Unkan Inyan makoce kin owasin opta iyaye çehan, Ludda ekta wicašta owotanna yukanpi kin hena en wicahiyohi.

33 Qa wicašta wan Eneas eciyapi hen wanyaka; he waniyetu şahdogan makan wanka, şataka ececa.

34 Unkan Inyan; Eneas Jesus Messiya asniniyan, najin qa owinja hdatata wo, eciya. Unkan ihnuhanna najin hiyaya.

35 Unkan tona Ludda qa Saron en yakonpi kin owasin he wanyakapi, qa Itancan kin ekta ihduhonnipi.

36 Unkan Joppa ekta waonspekiyapi wan Tabitha eciyapi, he Tatokadan eyapi kin he kapi; winohinea kin he ohan wašte qa taku wacantkiya econ kin ojudan:

37 Unkan he anpetu kin hena en wayazanka, qa şa iyaya. He yujajapi qehan, wankan tipi wan ekta ehnapapi.

38 Unkan Ludda Joppa ikiyedan, qa Inyan hen un kin waon-

spewicakiyapi kin nahonpi qon, heon wicašta nom ekta ye wicaşıpi, qa ecadan en wicau kta e iwahoyapi.

39 Hehan Inyan najin qa hena om hda. Ekta i, unkan wankan tipi kin en aipi, unkan wiwazica kin owasin en najinpi, qa ohde wokoyake ko, Tabitha ni un qehan, kage ciqon hena pazo yan-kapi, qa ceyapi ece.

40 Tuka Inyan hena owasin tankan iyewicaye ça, canpeška makehde inajin qa wocekiye eya, hehan tancan wanke cin ekta ihdamna qa; Tabitha, najin wo, eya. Unkan išta kamdaye ça Inyan wanyake çehan iyotanka.

41 Unkan nape yekiye ça najinkiya; qa wicašta owotanna wiwazica ko wicakico qehan, he ni un e wicakipazo.

42 Unkan Joppa owancaya he otanin, qa wicota Itancan kin wacinyanpi.

43 Unkan Inyan anpetu ota Joppa en, wicašta wakpanyan wan Simon eciyapi, he kici yan-ka.

## WICOWOYAKE 10.

1 Unkan Kesareya en wicašta wan Kornelios eciyapi, akicita opawinge obe wanjidand, Italike eciyapi, kin he en itancan kin hee;

2 Wicašta wakinihan, qa Wakantanka kokipeyahan un, tiyohnaka kici; qa oyate kin nina cantewicakiya, qa ohinniyan Wakantanka cekiya un ece.

3 He qe anpetu wan en, napeinwanka apa hehantu, wowan-yake wan en, Wakantanka tao-hnihde wan en hi, qa, Kornelios, eciye cin he taninyan wanyaka.

4 Unkan he opahta yanke ça inihan qa; Itancan taku he, eya.

Unkan ís ito heciya ; Wocekiye nitawa qa wacantkiya oyahande cin he Wakantanka itokam kiksuyapi.

5 Heon nakaha Joppa ekta wicašta ye wicaši, qa Simon Inyan eciyapi kin he kico wo.

6 Wicašta wakpanyan wan Simon eciyapi ti kin miniwanca kahda han, he kici yanka. He token ecanon kte cin oniciyake kta ce.

7 Unkan małpiya ohnihde Kornelios okiye cin he wanna kihda, hehan tiawanyag wicakkiye cin nom, qa akicita wašte ohinnian tankiyadan wicahduhe cin wanjidan, hena wicakico ;

8 Qa hena taku kin owasin owicakiyake çehan, Joppa ekta ye wicaši.

9 Unkan icimanipi, qa ihanhanna wanna otonwe kin ikiyadan, hehan Inyan tipi kin akan wocekiye eya iyaya, wanna wiyotanhe cin hehantu.

10 Nina wotektehda, qa wote kta cin, tuka taku yutapi wiyeya ehnapapi kin he icunhan wokiksuye šni wan ahinłpaya.

11 Unkan małpiya kin yuzamnipi e wanyaka, qa heciyatanhan taku wan minihuha ska tanka iyececa, oise topa kin iciyakaškapi he kutkiya u, qa maka kin ahe kiyapi.

12 He ohna taku maka akan wahutopa ocaje owasin, qa woteka, qa watutka, qa małpiya okinyanpi kin.

13 Unkan wicaho wan tanin qa ; Inyan, najin, qa kte, qa yuta wo, eciya.

14 Tuka ís ; Itancan, hecetu šni, tohinni taku ikceka qa ašape cin wate šni ce, eya.

15 Unkan ake icinonpa wicaho kin tanin qa ; Taku Wakantan-

ka pakinte cin he ikceka eciye šni wo, eya.

16 Yamni akihde hecen econpi, qa hehan taku kin he małpiya kin ekta akiyahdapi.

17 Unkan Inyan wowanyake wanyake cin he taku kin iyukean šni un, he icunhan, ito wicašta Kornelios u wicaši qon hena Simon ti kin akitapi, qa wanna tiyopa kin itokam en hinajinpi ;

18 Qa panpi qa ; Simon Inyan eciyapi den yanka he, eya iwicawangapi.

19 Wowanyake kin he Inyan awakicin un kin he icunhan, Woniya Wakan kin heciya ; Wanyaka wo, wicašta yamni onidepi.

20 Heon najin qa kun hde ça, takudan çeťunhda šni om ya wo, hena u wicawaši ce, eya.

21 Hehan Inyan wicašta Kornelios u wicaši qon hena ekta kun wicai, qa ; Tuwe ayakitapi kin he miye ce ; taku on yahipi he, ewicakiya.

22 Unkan ís heyapi ; Kornelios akicita opawinge wicayuhe cin, wicašta owotanna, qa Wakantanka kokipeyahan un he Juda oyate kin iyulıpa oyakapi, hee małpiya ohnihde wakan wan okiye ça, tuwe nihuwe u wicaši, qa iye ti kin ohna nioie kin nahon kta, keya ce, eyapi.

23 Hehan tin u wicaši qa won wicaya. Unkan ihanhanna Inyan hena om hda, unkan Joppa etanhan hunkawanjinkiciyapi kin wanjikji opapi.

24 Unkan ihanhanna qehan Kesareya iyohipi. Unkan Kornelios tona takuwicaye ça koda wicaye cin hena wicakico, qa om ape yanka.

25 Unkan Inyan en u, hehan Kornelios itkokim ye ça, siha



kin en makata elipeiye ça ce-kiya.

26 Tuka Inyan is najin kiye ça; Najin wo, mis eya wima-čašta ce, eya.

27 Qa kici wohdaka ecen tipi kin timahen i, qa wicota mnici-yapi kin wanwicayaka.

28 Hehan hewicakiya; Tuwe Juda wicašta kin heca e oyate tokeca etanhan wan kici un, qa en hi kin he hecetu šni e sdon-yayapi, tuka tuwedan wicašta ikceka qa asaŋe cin ewakiye kte šni he Wakantanka sdonye ma-kiya.

29 Heon etanhan mahuwe ipi kin ecen wacetunhda šni hibu, heon taku on miyecopi hecinhan he iciwangapi, eya.

30 Unkan Kornelios heya; Wanna ehantanhan anpetu topa he ehan, qa nakaha oape kin de-hantu, wote šni waun, qa napein-wanka ape cin hehan wati kin en cekiya waun; unkan wicašta wan wokoyake wiyatpa koyake cin he en mahinajin;

31 Qa, Kornelios wocekiye ni-tawa kin he nahonpi, qa taku wacantkiya ecanon kin he Wa-kantanka itokam kiksuyapi ce.

32 Heon Joppa ekta tuwe ye ši, qa Simon Inyan eciyapi kin he kico wo; he wicašta wakpan-yan wan, Simon eciyapi, ti kin miniwanca kahda he cin he ohna yanka. He hi kinhan taku eniciye kta ce, eya.

33 Heon kohanna wahociya; qa yahi kin he tanyan ecanon. Heon nakaha unkiyepi kin owa-sin Wakantanka itokam unkanpi, taku Wakantanka eye niši kin owasin naunhonpi kta ce

34 Hehan Inyan i hdukawa qa heya; Awicakehan Wakantan-ka wicašta itohnake kin iwanya-ke šni e imdukcan.

35 Tuka oyate otoiyo hi en, tu-we kokipeyahan un, qa owotan-na oħanye cin he waštedaka ece.

36 Jesus Messiya kin, owasin en Itancan kin hee, he eciya-tanhan wicoie Israel cinca kin wookiye iwahowicayapi qon.

37 Wicoie kin he sdonyayapi, Juda makoce kin owancaya oya-kapi, Galile etanhan, Johannes baptem oyake cin hehan tanhan.

38 Jesus Nazareth etanhan kin he Wakantanka sdakiya, Wo-niya Wakan wowašake ko on; qa he qe taku wašte econ iyaya ece, qa tona taku wakan šica wi-cayuhnaškinyan kin hena okizi-wicaya ece, Wakantanka kici un kin heon.

39 Qa taku Juda oyate tama-koce, qa Jerusalem ekta econ qon owasin unyaotaninpi ece. He iye kin ktepi, qa can wan akan otkeyapi qon.

40 Tuka anpetu iciyamni qe-han Wakantanka piya icahikiye ça, taninyan wicakipazo.

41 Oyate kin iyulħpa šni, tuka tona otokaheya ekta Wakantan-ka wicakahnige ciqon hena en, waayataninpi kin unkiyepi, wi-conte etanhan piya ikicage cin iyohakam kici wauntapi qa wa-unyatkanpi ece.

42 Unkan oyate kin wahokon-wicakiye unšipi qa nipi tapi ko en wayaco Wakantanka kage cin he iye ce, eya oyake unšipi.

43 He wicašta wokcan kin owasin oyakapi; iye caje kin eciyatanhan tuwe wicada kinhan woahani wokajuju kin yuhe kta ce.

44 Wicoie kin dena Inyan ecen eye cin he icunhan, tona oie kin nahonpi owasin Woniya Wakan kin awicahinħpaya.

45 Unkan bakiħdayapi kin etan-

hanpi tona wicadapi qon, tona Inyan kici hipi kin hena yuŝin-yayapi, Woniya Wakan wicaqu-pi ece kin he Ikcewicaŝta iyepi kaeŝ awicakaŝtanpi kin heon etanhan.

46 Wicaceji tokeca on iapi, qa Wakantanka yatanpi kin he naĥonpi. Hehan Inyan waayupte a ;

47 Tuwe mini teĥinda okihi, qa hena baptem wicaqupi kte ŝni he ; hena ege unkiyepi kin iyecen Woniya Wakan kin icupi ce, eya.

48 Hehan Itancan aje kin on baptem wicaqu wicaŝi. Hehan anpetu ota en yanke kta e iceki-yapi.

#### WICOWOYAKE 11.

1 Unkan yewicaŝipi kin hun-kawanjinkiciyapi ko, Juda ma-koce kin en yakonpi qon, Ikce-wicaŝta Wakantanka oie icupi kin he naĥonpi.

2 Unkan Inyan Jerusalem en hdi kin, hehan tona bakiĥdayapi kin etanhanpi qon he kici akini-capi ;

3 Qa heyapi, Wicaŝta bakiĥdayapi ŝni kin heca en wicayai, qa om wayata ce.

4 Hehan Inyan wohdake a owasin eceken owicakiyake a heya ;

5 Joppa otonwe kin en, woce-kiye eya waun, unkan wokiksuyeye ŝni wan en taku wowanyake wanmdaka, taku wan miniĥuha ska tanka iyececa, oise topa kin iciyakaŝkapi maĥpiya kin eciyatanhan kun aupi, qa miye ekta mahiyohi.

6 He opaĥta manke a awacin waun, unkan maka akan taku wahutopa, qa wamanica, qa watutka, qa maĥpiya okinyanpi kin wanmdaka.

7 Unkan wicaho wan ; Inyan najin, qa kte, qa yuta wo, emakiye cin he nawaĥon.

8 Tuka miŝ ; Itancan hecetu ŝni, taku ikceka qa aŝape cin tohinni mii kin ohna iyaye ŝni, epa.

9 Tuka maĥpiya kin eciyatanhan wicaho kin ake amayupta ; Taku Wakantanka pakinte cin he ikceka eciye ŝni wo, eya.

10 Yamni akiĥde hecen econpi, qa hehan maĥpiya kin ekta owasin hdokiyahdapi.

11 Unkan ito wicaŝta yamni, Kesareya etanhan miye ekta mahiyu ŝipi qon, hena wanna tipi ohna waun kin itokam hina-jinpi.

12 Hehan Woniya Wakan kin iŝ ; Takudan ceĥunwicahda ŝni hena om yahde kta ce, emakiya. Unkan hunkawanjinkiciyapi kin dena ŝakpe om imdamde a wicaŝta qon he ti kin en unkiyi.

13 Hehan iye, token maĥpiya ohnihde wan iye ti kin en hina-jin wanyake ciqon he unkokiyakapi ; hee kin kaken eciya ; Joppa ekta wicaŝta ye wicaŝi, qa Simon Inyan eciyapi kin he u ŝi wo.

14 He taku eniciye kte cin on yani kta, qa nakun tiyohnaka nitawa kin owasin, eya ce, eya.

15 Unkan miŝ tokaheya iwae cin, hehan Woniya Wakan kin awicahinĥpaya, tokag ehan unkiyepi kin en hi qon iyececa.

16 Hehan Itancan oie qon weksuya ; Awicakehan Johannes mini on baptem wicaqu, tuka niyepi kin Woniya Wakan on baptem niĥupi kta ce, eye ciqon he.

17 Hecen unkiye Jesus Mesiya Itancan kin wicaundapi, Wakantanka taku unqupi qon he iyecen wicaqu kinhan, miŝ

matuwe he, Wakantanka anawapte kta owakihi he.

18 Hena oie kin nahonpi unkan inina yukanpi qa Wakantanka yatanpi qa heyapi; Awicakehan Ikcewicašta on nipi kta e ihducetupi kin Wakantanka wicaqu ce.

19 Unkan Stephanos te cin on śicaya wicakuwapi qon, heon enanakiya iyewicayapi kin hena Phenike, qa Kupros, qa Antiyoka ekta ipi, qa wicoie kin Juda oyate kin ecedan owicakiyakapi.

20 Unkan hena wanjikji Kupros qa Kurene wicašta kin heca, hena Antiyoka en hipi qehan, Helenes wicašta kin wowicakiyakapi, qa Jesus Itancan kin oyakapi.

21 Unkan Itancan nape kin hena om un, qa wicota wicadapi, qa Itancan kin ekta ihduhomnipi.

22 Hena taku kin okodakiciye Jerusalem en un kin nogepi kin en otanin, hehan Barnabas Antiyoka ekta i kta e ye śipi.

23 He ekta i, unkan Wakantanka towaonśida kin wanyake çehan iyuśkin, qa cante kin ocowasin on Itancan kin opapi kta e owasin iwahokonwicakiya.

24 He wicašta wašte, qa Woniya Wakan wacinyanpi ko on ojudan. Unkan wicota Itancan kin opapi.

25 Hehan Barnabas Salos akite kta e Tarsos ekta iyaya. He iyeya, unkan Antiyoka en ahdi.

26 Qa waniyetu mdoketu ahna, tipi wakan kin en mniciyapi, qa oyate ota waonspewicakiyapi; unkan Antiyoka ekta, waonspewicakiyapi kin tokaheya Kristian ewicakiyapi.

27 Unkan anpetu kin hena en, wicašta wokcan Jerusalem etanhan Antiyoka ekta hipi.

28 Hena wanji, Agabos eciyapi kin he inajin, qa maka kin owancaya wicaakihan wan tanka u kta e Woniya Wakan kin eciyatanhan oyaka. Unkan he Klaudios Kesar taanpetu kin en eceutu.

29 Unkan hehan waonspewicakiyapi kin otoiyo, token okihi kin, hecen hunkawanjtkupi Juda makoce kin en yakonpi kin, wawokiyapi kin wicaqupi kta e konzapi.

30 Hecen econpi, qa Barnabas Salos kici napepi kin on hunka wicayapi kin wicakai wicaśipi.

## WICOWOYAKE 12.

1 Unkan hehan Herod wicaštayatapi kin okodakiciye kin wicakiyuše kta e nape yekiya;

2 Qa Jakob Johannes cincu qon he mazasagye on kte.

3 Qa he Juda oyate kin iyokipipi' e wanyake çehan, Inyan nakun yuze kta aya; aguyapi on napohyapi codan anpetu kin he ehan.

4 Unkan he iyahpaye çehan, wicakaška tipi kin en ehnaqe çacacita ake śakpe awanyag wicaśi, wośnapi kin enakiyapi kinhan oyate kin ekta tankan au kta kecin.

5 Hecen Inyan wicakaška tipi kin ohna awanyakapi; unkan on okodakiciye kin Wakantanka nina cekiyapi.

6 Unkan Herod wanna tankan au kta hehan, hanyetu kin he en Inyan akicita nom, unma itan anokatanhan iśtinma wanke çacacita, qa tiawanyag kiyapi kin hena tiyopa kin itokam wicakaška tipi kin awanyakapi.

7 Unkan inyun, Itancan taohnihdeye cin en hi, qa ojanjan wan



wicakaška tipi kin en iyoyanpa ; unkan Inyan cuwi kin en ape a najin kiye a heya ; Kohanna najin wo. Unkan maza icicalihaha kin nape kin etanhan hinlipaya.

8 Hehan malhipiya ohnihde kin ; Ipihdag kiton qa hanpokihan wo, eciya. Unkan is ecen econ. Hehan ; Sina hdowin qa miyahnna u wo, eciya.

9 Hehan tankan ya ; unkan is eya ihakam ye a, malhipiya ohnihde taku ecakicon kin he wicakapi kin sdoneyeni ; tuka wowanyake wan wanyaka kecin.

10 Unkan wicakaška tipi tokaheya qa iyokihe kin etanhan hinanpapi, hehan maza tiyopa kin en iyohipi, he otowwe kin ekta iyahde, he iye cinka wicakiyuhidog iyaya. Unkan tankan yapi, qa canku wanjidan ihunnipi, hehan malhipiya ohnihde kin ehpeya kihda.

11 Unkan Inyan kiksuya hinhda qa heya ; Nakaha awicakehan Itancan kin ohnihde tawa kin u si, qa Herod nape kin, Juda oyate aepi ko, owasin etanhan emahdaku e sdonwakiya ce.

12 Unkan he awakicin qehan, Johannes Markos eciyapi kin, he hunku Mary ti kin ekta i, hen wicota mniciyapi, qa cekiya yukanpi.

13 Unkan Inyan tipi tiyopa kin kabubu yanke cin he icunhan, wicinnyanna wan Rhoda eciyapi, he ekta wanahon i :

14 Qa Inyan ho kin iyekiye cehan, wowiyuskin on tiyopa yuhidoke sni, tuka inyang hdicu qa, Inyan tiyopa kin itokam najin e oyaka.

15 Unkan, Niyuhnaškinyanpi ce, eciyapi. Tuka is hecen eya kitan. Hehan, Malhipiya ohnihde tawa kin hee ce, eciyapi.

16 Tuka Inyan katinyan tiyopa kin kabubu yanka. Unkan yuhidokapi qa wanyakapi hehan yušinnyayapi.

17 Tuka inina yukanpi kta e namwicakicawin, qa token on Itancan kin wicakaška tipi kin etanhan tankan hiyu kiye cin he owicakiyaka. Qa heya, Jakob qa hunkawanjinkiciyapi kin hena oie kin owicakiyaka po. Hehan tankan kinape a tokan iyaya.

18 Unkan anpa kamdeze cin hehan Inyan toki iyaye cin he akicita kin nina aqoyapi.

19 Unkan Herod akita, tuka iyeye sni hehan, tiawanyag wicakiyapi kin hena wiwicawange a, wicaktepi kta e konza. Qa hehan Juda makoce kin etanhan apamahde iyaye a Kesareya en ounyan.

20 Unkan Herod Turos qa Sison oyatepi kin wicakize wacin ; tuka hena e wicocante wanjidan en hipi, qa Blastos wicastayatapi ohehdepi tipi tawa kin awanyake cin he yuwaštepi qehan, wookiye dapi ; iye tamakocepi kin wicastayatapi tawa kin on icahyapi kin heon etanhan.

21 Unkan anpetu wan cajeyatapi qon he en Herod wicastayatapi ihduze a, woyaco oiyo-tanke kin akan kiyotanke a, wowicakiyaka.

22 Hehan oyate kin hotankakiya hotaninpi qa ; He wicaho sni, Wakantanka ho kin hee ce, eyapi.

23 Unkan ihnuhanna Itancan taohnihde ye cin he kastaka, Wakantanka wowitan qu sni kin heon etanhan. Unkan wamduškadan yutapi qa hecen a iyaya.

24 Tuka Wakantanka oie kin icage a tankaya aya.

25 Unkan Barnabas Salos kici wawokiyapi qon hduſtanpi qehan, Jerusalem etanhan hdicupi, qa Johannes Markos eciyapi qon he yuha hdapi.

## WICOWOYAKE 13.

1 Unkan Antiyoka ekta okodakiciye kin en wicaſta wokcan waonspekiya ko wanjikji yukan; Barnabas, qa Simeon he nakun Niger eciyapi, qa Lukios Kurene etanhan, qa Manaen, Herod wicaſta ihdawa qon kici icage cin hee, qa Salos.

2 Hehan Itancan kin cekiyapi qa wote ſni unpi kin icunhan, Woniya Wakan kin heya; Barnabas Salos kici wokicanye iwicaweco kin heon ewicamicihde po, eya.

3 Unkan hehan takudan yute ſni wocekiye eyapi, qa nape awicaputakapi, hecen ye wicaſipi.

4 Hena Woniya Wakan tokiya ye wicaſi, unkan Selukiya ekta iyohipi, qa hetanhan Kupros ektakiya watom yapi.

5 Qa Salamis en iyukanpi hehan, omniciye tipi Juda oyate tawapi kin ohna Wakantanka oie kin oyakapi, qa Johannes he ookiye yuhapi.

6 Unkan wita kin opta yapi, qa Paphos ekta iyohipi qehan, wicaſta wapiyapi econ kin, wicaſta wokcan itonſni, Juda wicaſta kin heca wan, Barjesus eciyapi he wanyakapi:

7 He Sergios Palos, wicaſta ksapa, makoce kin en itancan yanke cin he kici un. He qe Barnabas qa Salos kici wicakico, qa Wakantanka oie kin nahon cin.

8 Tuka Elumas wapiye cin, caje kin hecen kapi, he wicakipajin, qa wicaſta itancan kin

wacinyanpi kin etanhan yuhomni kta e akita.

9 Hehan Salos, iye nakun Palos eciyapi, Woniya Wakan on ojudan he opahta najin,

10 Qa heya; 'Taku wohmaye owasin on ojudan, qa wicohan ſica owasin, Wakan ſica cinca niye qa, taku owotanna owasin toka yaye cin, Itancan tacanku owotanna kin kaſeyaye cin he aduſtan kte ſni he.

11 Hecen dehan inyun, Itancan nape kin iyahdeniyan; unkan anpetu ota iſta nigonge qa anpetu wi kin wandake kte ſni, eciya. Unkan ihnuhanna opo qa otpaza wan ahinhpaya; qa tuwe nape yus aye kta e akin iyaya.

12 Hehan taku econpi kin wicaſta itancan kin wanyake qehan wicada, qa Itancan tawoonſpe kin on yuſinyaya.

13 Unkan Palos tona om un kin hena Paphos etanhan pacanan iyeyapi, qa Pampuliya ekta Perge en iyohipi. Hehan Johannes awicayuſtan qa Jerusalem ekta icicawin hda.

14 Hehan Perge etanhan inanpapi, qa Antiyoka Piſidiya en, he ekta ipi, qa anpetu wakan hehan omniciye tipi kin en tin iyayapi, qa iyotankapi.

15 Unkan woope, qa wicaſta wokcan tawowapi kin, hena yawapi enakiyapi qehan, omniciye tipi kin en wicaſta itancan wicakiyapi kin iſ wicakicopi qa, Wicaſta hunkawanjin unniyanpi wicakicanpte oie wanji duhapi kinhan oyate kin owicakiyaka po, ewicakiyapi.

16 Hehan Palos najin, qa namwicakicawin qa heya, Israel wicaſta, qa tona Wakantanka kokihipi kin anagoptan po.

17 Israel oyate kin de Wakan-

tanka tawapi kin he hunkake wicunyanpi kin wicakañnige ça, oyate kin Egupta makoce kin en yakonpi kin he icunhan yuwankan iwicacu, qa isto hduwankan iyeye cin on tankan awicau.

18 Qa waniyetu wikcemna topa hehanyan hevoskan makoce kin en won wicakiya.

19 Qa oyate šakowinpi Kanan makoce kin en, ihang wicaye çehan, makoce kin woohiye eciyatanhan kicipamni wicakiya.

20 Qa he iyohakam, wicašta wayaco kin heca wicaqu, waniyetu opawinge topa sanpa wikcemna zaptan hehanyan, ecen Samuel wicašta wokcan qon *icaga*.

21 Unkan hehan wicaštayatapi wan cinpi ; qa Wakantanka Saul, Kiš cinhirtku, Benjamin wicoun kin hetanhan, wicašta kin he wicaqu, waniyetu wikcemna topa hehanyan.

22 Qa he heyata iyeye çehan, Dawid icaliwicakiciye ça wicaštayatapi kaga ; he oyake ça heya, Dawid Jesse cinhintku kin he iyewakiya, wicašta wašte wakidake cin, he mitawacin kin ocowasin ecen econ kta ce.

23 Wakantanka token eye cion he eciyatanhan, wicašta kin de cinca kin etanhan, Jesus Waniykiya kin, Israel oyate kin icaliwicakiciya.

24 He ihdutanin šni qon itokam, Johannes baptem on ihducetupi kte cin he Israel oyate kin iyulipa en eyanpaha owicakiyaka.

25 Unkan Johannes oinyanke kin ihunniye kte cin, hehan hecen eya, Miš matuwe kecannipi he : He miye šni ; tuka iho, wanji mihektam u kin he tahananpe siha kin etanhan kiyuška owakihi šni ce.

26 Wicašta hunkawanjin ciyapi kin, Abraham cinca wicaye cin, qa tona Wakantanka koki-papi kin, niš niyepi wiconi oie kin de oniciyakapi.

27 Tona Jerusalem en yakonpi, wicašta itancan wicayuhapi ko, he iyekiyapi šni, qa wicašta wokcan oiepi, anpetu wakan eca yawapi ece kin he nakun ; hecen he yacopi kin on hena ecetuyapi.

28 Qa taku on te kte cin takudan iyeyapi šni qeyaš, he ktepi kta e Pilate icekiyapi.

29 Qa on taku wowapi en kagapi qon owasin ecetuyapi qehan, can kin etanhan eyakupi, qa ohna hnakapi wan en ohnakapi.

30 Tuka te cin etanhan Wakantanka najin kiya.

31 Unkan tona Galile etanhan Jerusalem ekta om hi qon hena anpetu ota wanhdakapi, qa hena eepi dehan oyate kin wicakiyaotaninpi ece.

32 Unkan unkiye wotanin wašte unkoniciyakapi, hunkake wicunyanpi taku iwahowicaye cion,

33 He cincawicayapi unkiyepi kin en, Wakantanka ecetukiya, Jesus piya icalhiye cin hee on ; hecen odowan icinonpa kin en kaken owapi qon, Micinkši kin he niye, anpe dehan cinca cicaga ce.

34 Qa wicašte cin etanhan najin kiye ça, wicalhwin kin ekta i kte šni, heon kaken eya, Dawid towaonšida wicakapi kin he cicipi kta ce.

35 Heon etanhan wanji tokeca en hecen eya ; Wanji Owotanana nitawa kin he wicalhwin wanyake kta e iyowinyakiye kte šni.

36 Dawid wicoicage tawa kin



tanyan owicakicilian, Wakan-tanka tawacin kin eciyatanhan, hehan iştinma iyaye ça, hunkake wicaye cin om hnakapi, qa wicahwin wanyaka.

37 Tuka tuwe Wakantanka najin kiye cin he wicahwin wanyake şni.

38 Heon wicašta hunkawanjin ciyapi, wicašta kin de eciyatanhan, woahitani kajujupi kin oniciyakapi e sdonya po.

39 Qa taku owasin, Moses tawoahope kin niyuowotanpidan kta e okitpani kin hena ee kaeş etanhan, tuwe wicada kinhan iye on owotanna kagapi kta.

40 Heon itoniçipa po, okinni taku wicašta wokcan kin en cajyatapi qon he en nihiyahdepi kta :

41 Tona ayaktapi şni kin, wawanyakapi qa inihanpi qa yutakuni şni iyeiçiya po ; anpetu nitawapi kin en wicohan wanji ecamon kta, qa wicohan kin he tuwe oniciyakapi ešta wicayadapi kte şni ce.

42 Unkan Juda wicašta kin omniciye tipi kin etanhan tankan hdicupi, hehan wicoie kin hena anpetu wakan hepiya, owicakiyakapi kta e icewicakiyapi.

43 Unkan omniciye kin wanna enakiyapi, hehan Juda wicašta qa oyate tokeca etanhan he en opapi qon, cekiya unpi kin hena wicota Palos qa Barnabas kici owicapapi. Unkan wowicakiyakapi, qa Wakantanka towaonşida kin en unpi kta e iwahokonwicakiyapi.

44 Unkan ake anpetu wakan, hehan Wakantanka oie nañonpi kta e otonwe kin iyulpa se en kiwitaya iheyapi.

45 Tuka Juda wicašta kin hena wicota kin wanyakapi qehan, winawizipi on ojupidan, qa Pa-

los taku eye cin he akinicapi qa aiapi.

46 Hehan Palos Barnabas kici waditake içicagapi qa heyapi, Wakantanka oie kin niyepi tokaheya oniciyakapi kta e hecetu ; tuka he ayaktapi şni, qa owihanke wanin wiconi kin iye-nihantupi şni nihdukecanpi kin heon, iho, Ikcewicašta kin ekta unkihdamnanpi.

47 Hecen Itancan kin iwahounyanpi ; Ikcewicašta iyoyanpa kin ecihnaka, maka ihanke kin hehanyan niwicayakiye kte cin heon.

48 Unkan Ikcewicašta kin, hena oie kin nañonpi qehan, nina iyuşkinpi, qa Itancan oie kin yatanpi. Unkan tona owihanke wanin wiconi yuhapi kta e wicakahnigapi qon hena wicadapi.

49 Unkan Itancan oie kin makoce kin he owancaya oyakapi.

50 Tuka Juda wicašta kin iş, winohinca okinihan cekiya unpi kin hena iyowicapaştakapi, qa otonwe kin en wicašta itancanpi kin nakun, hecen Palos Barnabas kici şicaya wicakuwapi, qa makoce kin he etanhan hdicu wicayapi.

51 Tuka iş iyepi kin, hena en, siha watuşekşeca askape cin he hdatatapi, qa Ikonium ekta ipi.

52 Unkan waonspewicakiyapi kin wowiyuşkin Woniya Wakan ko on ojupidan.

## WICOWOYAKE 14.

1 Unkan Ikonium ekta, sakim omniciye tipi, Juda oyate tawapi kin he en timahen yapi, qa iyecen iapi, hecen Juda wicašta Helenes ko ota wicadapi.

2 Tuka Juda wicašta tona wicadapi şni kin hena Ikcewicašta kin iyowicapaştakapi, qa hun-

kawanjin kiciyapi kin śicaya wacinwicakiyus wicakiyapi.

3 Unkan tehan en yukanpi, qa Itancan kin on waditagya iapi, he qe wowaonśida oie kin hdao-tanin, qa wowapetokeca wakan-yan econpi ko econ wicakiya.

4 Tuka otonwe kin oyate kin akipam iyeyapi; apa Juda wicaśta kin om tipidan, qa apa is yewicaśipi kin hena owicapapi.

5 Unkan Ikcewicaśta, qa Juda oyate kin, tona itancan wicayuhapi kin hena koya, hena ana-wicatanpi, śicaya wicakuwapi qa inyan on wicakininpi kta;

6 He iye sdonkiyapi, qa Lustra qa Derbe, Lukaoniya en otonwe kin, makoce ihdukśan ko en onapapi.

7 Qa hen wotanin waśte kin oyakapi.

8 Unkan Lustra en wicaśta wan siha on okitpani iyotankehhan yanka, tonpi kin ehantanhan huśte, qa tohinni mani śni.

9 He Palos ie cin nahon; unkan he opaĥta yanke a, wacin-yanpi on ni kte cin yuha e wan-yaka,

10 Hehan hotankakiya, Nisiha on bosdan najin wo, eya. Unkan is psin iyaye a mani.

11 Unkan Palos taku econ kin he oyate kin wanyakapi qehan ho yuwankan icupi qa Lukaoniya iapi kin eciyatanhan, Taku wakan kin wicaśta ihduza unkiyepi en kun unhiyupi ce, eyapi.

12 Qa Barnabas Jupiter eya caśtonpi; qa Palos is, Hermes eciyapi, iapi on itancan kin hee, heon etanhan.

13 Hehan Jupiter otonwe itokam yanke cin he wośna kagapi tawa kin he tatanka wateśdake ko, tiyopa kin en ahi, qa oyate kin om wośna kta tuka.

14 He yewicaśipi kin, Barnabas Palos kici, nahonpi qehan, wokoyake aihdupotapi, qa oyate kin ekta inyang yapi, hotaniupi,

15 Qa heyapi, Wicaśta kin, tokeca e hecanonpi he; niye yaunpi kin iyecen, wicaśta akan-tu kin heuncapi, qa hena taku-śniśni kin aduśtanpi qa Wakan-tanka ni un kin ekta nihduhomni-pi kta e iwahokonunniciyapi; he maĥpiya, maka, qa miniwanca, taku ohnaka ko, owasin kage cin hee.

16 He wicoicage hekpata un kin en, oyate kin owasin canku tawapi kin ohna manipi kta e iyowinwicakiya.

17 Hececa eśta tanyan econ, qa maĥpiya eciyatanhan magaju wicaqu, makoncage taku ota icahye cin hena ko, qa woyute wowiyuśkin ko on cante imna-unyanpi qon, he eciyatanhan ohinniyan ihdutanin ce.

18 Unkan wicoie kin hena on wawicakiyuśnapi kte cin oyate kin kitan se ayuśtan wicayapi.

19 Hehan Antiyoka qa Ikonium etanhan Juda wicaśta wanjikji en hipi qa oyate kin iyowicapa-śtakapi; hecen Palos inyan on kininpi qa otonwe kin tankan yusdohan ayapi, wanna a ke-cinpi.

20 Tuka waonspewicakiyapi kin ihdukśan hinajin yukanpi kin icunhan, iye najin hiyaye a otonwe kin en i. Unkan ihan-hanna qehan Barnabas kici Derbe ekta iyaya.

21 Unkan otonwe kin he en wotanin waśte kin oyakapi, qa wicota waonspewicakiyapi qehan, hehan Lustra, qa Ikonium, qa Antiyoka ekta icicawin hdapi.

22 Qa waonspewicakiyapi nagipi kin waśag wicakiyapi, qa wacinyanpi kin en kitanyan unpi

kta e iwahokonwicakiyapi, qa wokakije ota iyoopteya Wakan-tanka tokiconze kin en unkipi kta ce.

23 Unkan okodakiciye otoiyo-hi en hunka wicayapi kin wica-kagapi, qa wote šni wocekiye eyapi qehan, Itancan wicadapi qon he awanwicahdake kta e *icekiyapi*.

24 Unkan Pisidia opta yapi hehan Pampulia en kiyohipi.

25 Qa Perge en wicoie kin oya-kapi qehan, Atalia ekta apama-hde iyayapi.

26 Qa hetanhan Antiyoka ekta watom hdapi, wicohtani wanna hduštanpi kin heon, Wakantanka towaonšida kin yuhapi kta e icekiyapi qon he hetu.

27 Hen hdiapi qa okodakiciye kin mnickiye wicašipi, qa Wakan-tanka token econ wicakiye cin hena owasin owicakiyakapi, qa wacinyanpi tiyopa wan Ikcewicašta kin wicakiyuhdoke cin he nakun.

28 Unkan hen waonspewicakiyapi kin om tehan owanji yukanpi.

## WICOWOYAKE 15.

1 Unkan wicašta wanjikji Juda makoce kin etanhan apamahde yapi, qa hunkawanjinkiciyapi kin wahokonwicakiyapi qa, Moses toope kin eciyatanhan banicihdayapi šni kinhan yanipi kte šni ce, eyapi.

2 Unkan Palos Barnabas kici hena wicakigepi, qa nina awicakinicapi, hehan wiwicawangapi kin he on, Palos Barnabas kici, qa iyepi kin etanhan wicašta tokeca wanjikji ko, yewicašipi kin, qa hunkawicayapi kin, Jerusalem ekta yakonpi kin, hena en wicayapi kta e konzapi.

3 Unkan okodakiciye kin hena

hecen yewicakiyapi qehan, Phe-nike, qa Samaria opta yapi, qa Ikcewicašta ihduhomnipi kin he oyakapi; qa hunkawanjin kiciyapi kin owasin en wowiyuškin tanka kagapi.

4 Unkan Jerusalem ekta ipi qehan, okodakiciye kin he, qa yewicašipi kin, hunkawicayapi kin hena ko, tin hiyu wicakiyapi; hehan Wakantanka token econ wicakiye cin owasin ohdakapi.

5 Tuka Pharisee yuomdecapi kin etanhan wanjikji wicadapi qon hena inajinpi qa heyapi, Bawicakihdayapi qa Moses toope kin ope wicašipi kta iyececa ce, eyapi ce.

6 Unkan wicoie kin de akiiapi kta e on yewicašipi kin, hunkawicayapi ko witaya mniciyapi.

7 Qa nina wikiciwangapi hehan, Inyan inajin qa hewicakiya, Wicašta hunkawanjinciyapi kin, ehanna unketanhanpi kin Wakantanka miye makahnige ça, mii kin eciyatanhan Ikcewicašta kin wotanin wašte oie kin nahonpi, qa wicadapi kta e konzadonyayapi.

8 Qa Wakantanka wicacante kin sdoneye cin he wicayaotanin, qa Woniya Wakan unkiye *unqupi qon*, he iyecen wicaqu.

9 Qa takudan ocitkonze šni unkagapi, iye cantepi kin nakun wicadapi kin on wicakipakinta.

10 Heon nakaha tokeca e Wakantanka iyutanyayapi, qa can napinpi wan, hunkake wicunyanpi qa unkiyepi kin yuha unkokihipi šni kin he waonspewicakiyapi tahupi kin en eyahnakapi kta he.

11 Tuka Jesus Messiya Itancan kin towaonšida kin on, Iš iyepi kin wiconi *yuhapi kte* cin, he iyecen unkiš unhapi kta e wicaundapi ce.



12 Hehan omniciye kin owasin inina yukanpi, qa Barnabas Palos kici, wowapetokeca wakanyan econpi ko, Wakantanka Ikcewicašta kin ekta econ wicakiye cin hena ecen ohdakapi kin nahonpi.

13 Unkan wanna ayaštanpi, hehan Jakob ayupte ça heya; Wicašta hunkawanjin ciyapi, miye namañon po.

14 Otokahe ekta token Wakan-tanka Ikcewicašta kin etanhan oyate wanji, iye caje kin on, iwicacu kta e ekta wicai qon he Simon oyaka.

15 Qa he kici wicašta wokcan oiepi qon okonwanjidan, kaken wowapi en kagapi;

16 He iyohakam mihdamna, qa Dawid tawakeya jujuwahe cin he piya wakage kta; qa mdecahe cin hena ake wakage ça ecen he wakiye kta.

17 Qa hecen wicašta okapta-  
pi kin, Ikcewicašta owasin ko, tona micaje icajewicayatapi kin hena Jehowa akitapi kta ce, Itancan kin hena owasin econ kin he heya ce.

18 Otokaheya tanhan Wakan-tanka taku icalıye cin owasin sdonkiya.

19 Heon etanhan miş kaken imdukcan, Ikcewicašta kin tona Wakantanka ekta ihduhomnipi kin hena nagiyewicunyanpi kte şni.

20 Tuka wakagapi on aşapapi kin, qa wiinañmanpi kin, qa we, qa taku weye şni yuřapi kin, hena itehan yeiçiyapi kta e wowa-  
pi wicunkicagapi kta.

21 Wanakaja tanhan tona Moşes oyakapi kin hena otonwe otoiyo hi kin en yukanpi, qa anpetu okiñpapi eca, omniciye tipi kin ohna he yawapi ece, eya.

22 Hehan iş iyepi kin etanhan

wicašta kañnigapi kin heca, Judas Barsabas eciyapi, qa Silas, hunkawanjin kiciyapi kin en wicašta okinihan, hena Palos qa Barnabas kici, Antiyoka ekta ye wicaşıpi kta e, yewicaşıpi kin, hunka wicayapi kin, okodakiciye kin owasin ko iyokipipi.

23 Qa heciya ayapi kta e kaken wowapi kagapi; Yewicaşıpi kin, qa hunka wicayapi, hunkawanjin kiciyapi kin hena ko, hunkawanjin kiciyapi Ikcewicašta etanhan, Antiyoka, qa Suria, qa Kilikia en yakonpi kin, Wookiye yukan po.

24 Unkiyepi etanhan wanjikji iyayapi, qa wicoie on nagiyeniyampi, qa ninagipi kin nipahohopi qa, Baniçilıdayapi, qa wicoope kin oyapapi kta ce, eniciyapi ce, naunhonpi; unkiye tohinni heye wicunşıpi şni tuka:

25 Heon etanhan tawacin wanjidan hduha unwitayapi qehan, wicašta kañnigapi kin heca e niyepi kin ekta ye wicunşıpi kta e iyounkipipi, Barnabas qa Palos waştewicunkidakapi kin hena om:

26 Hena wicašta kin wiconi eñpekiyapi seca, Jesus Messiya Itancan unkiyapi kin heon etanhan.

27 Hecen Judas qa Silas ye wicunşıpi, hena e wicoie on atayedan hecen oniciyakapi kta.

28 Woniya Wakan kici hecen iyounkipipi, waqinpi tokeca unkanihnakapi kte şni, tuka dena taku owotanna kin hecehnana;

29 Taku wakagapi wakiyuşnapi, qa we, qa taku we ye şni yuřapi, qa wiinañmanpi kin hena itehan yeniciyapi kta. Hena itehanyan yaunpi kinhan tanyan eanonpi kta. Tanyan yaunpi nunwe.

30 Hecen hena ye wicaşıpi qe-

han, Antiyoka ekta ipi, qa oyate kin kawitaya iheyapi, hehan wuwapi kin he wicaqupi.

31 He yawapi, unkan wahokonwicakiyapi kin on nina iyuskinpi.

32 Unkan Judas qa Silas wicasta wokcan kin hecapi, heon hunkawanjin kiciyapi kin oie ota on wahokonwicakiyapi, qa wicayasutapi.

33 Wanna anpetu ota en yukampi, hehan hunkawanjin kiciyapi kin hena yewicasipi kin ekta wookiye hde wicasipi.

34 Tuka Silas en un kta e iyokipi.

35 Palos qa Barnabas Antiyoka en unpi, wicasta tokeca ota ko, *oyate* kin waonspewicakiyapi, qa Itancan oie kin oyakapi.

36 Unkan iyohakam anpetu tonana, hehan Palos Barnabas heciya, Tukten. Itancan oie kin unkoyake cigon, ake otowwe otoyohi ekta unye ca, hunkawanjin wicunye cin wanwicundhake ca, token yakonpi kin *sdonunye kta ce, eya.*

37 Unkan Barnabas he is, Johannes Markos eciyapi, yuha yapi kta cin.

38 Tuka he Pampulia ekta elhpewicaye ca wicohtani kin en owicape sni qon, heon etanhan Palos he yuha yapi kte cin iyokipi sni.

39 Unkan he on hdokinicapi qa hecen otoyohi elpekiciyapi : unkan Barnabas Markos yuha Kupros ekta watom iyaya.

40 Tuka Palos Silas kalinige ca, Wakantanka towaonsida kin kici un kta e hunkawanjinkiciyapi kin icekiyapi qehan, hehan iyaya ;

41 Qa Suria qa Kilikia opta iyaye ca, okodakiciye kin suta wicakaga.

## WICOWOYAKE 16.

1 Hehan Derbe qa Lustra ekta iyohi ; unkan iho, waonspekiyapi kin wanji hen un, Timotheos eciyapi, Juda winohinca wicacin he cinbintku, tuka atkuku kin e Helenes oyate kin etanhan.

2 Hunkawanjin kiciyapi Lustra, qa Ikonium en yukampi kin hena, he waste e oyakapi.

3 Hetanhan Palos kici ya cin, qa Juda wicasta hen unpi kin hena on, he icu qa bakicihdaya ; atkuku kin Helenes heca e owasin sonyapi.

4 Unkan otowwe iyaza yapi, qa yewicasipi kin, kunka wicayapi ko, Jerusalem en yukampi kin woahope kagapi qon hena tanyan yuhe wicasipi.

5 Hecen okodakiciye kin wacinyanpi kin en wicayusutapi, qa anpetu otoyohi nina yuota aya.

6 Unkan Phrugia qa Galatia makoce kin opta iyayapi, qa Asia en wicoie kin oyakapi kte cin Woniya Wakan kin tehinda qehan ;

7 Hehan Musia ekta ipi, qa hetanhan Bithunia ekta ye wacimpi, tuka Woniya kin iyowicaki sni.

8 Unkan Musia opta iyayapi qehan, Troas en iyohipi.

9 Unkan hanyen Palos wowanyake wan wanyaka ; Wicasta wan Makedonia etanhan tanyan inajin, qa cekiye ca, Makedonia en u, qa ounkiya po, eya.

10 Wowanyake kin de wanyake cin heon hinnakaba Makedonia heciya unyanpi kta e uncinpi, Itancan kin hena wotanin waste kin owicunkiyakapi kta cin heon unkipi e unhdukanpi.

11 Hecen Troas etanhan paccanan iyeunyanpi, qa Samotrake ekta owotanna unyanpi, qa hetanhan ihanhanna Neapolis en unkipi.

12 Qa hetanhan Philippi en unkipi, otonwe teca qa Makedonia makoce onśpa kin he en otonwe tokapa kin hee. Qa anpetu tonana otonwe kin he en unkanpi.

13 Unkan anpetu wakan hehan, otonwe kin etanhan inaunpapi, qa wakpa wan icahda wocekiye eyapi ece qon he en *unkipi*; hen unkiyotankapi, qa winolinca ece en mniciyapi kin hena owicunkiyapi.

14 Unkan winolinca wan, Ludia eciyapi, Thuatira otonwe kin etanhan, wokoyake duta ece wiyopeye cin heca, Wakantanka kokipeyahan un he naĥon yanka: unkan cante kin Itancan kin yuzamni, on Palos oie kin anagoptan.

15 Unkan tiyohnaka kin om baptem qupi qehan, hehan ceunkiyapi qa, Itancan kin on wicawaka kecanmayakinpi hecinhan, wati kin en tin upi, qa ohna yukan pe, eye qa ecen econ unkiyapi.

16 Hetanhan wocekiye eya unyanpi eca, wicinyanna wan itkounkipapi ece, he taku wakan woyaka ece kin yuhe qa, wakan yan wohdag un kin heon tawayapi kin taku ota wicakicamna.

17 He Palos unkiyepi ko unkihakam u, qa; Wicaśta kin dena Wakantanka tehan wankantuya un kin taokiye wicaye cin, wiconi canku kin unkokiyakapi kin hena eepi ce, eya hoyekiya.

18 Qa anpetu ota hecen econ. Tuka Palos nagiyeye cin heon hakikta qa, Jesus Meśsiya caje on winolinca kin de etanhan

tankata inanpe ciśi, taku wakan kin eciya. Unkan wihiyayedan oape kin he en tankan hiyu.

19 Unkan winolinca kin de yuhapi kin heepi, taku kamnanpi kte cin he akitakunipi śni kin he wanyakapi e etanhan, Palos Silas kici wicayuzapi, qa tipi hocoka kin ekta wicaśta tokahe wicakiyapi kin en awicayapi:

20 Qa wicaśta itancan wicakiyapi kin en wicakaipi, qa heyapi, Wicaśta kin dena Juda wicaśta kin hecapi, otonwe unkitawapi kin nina nagiyeyapi;

21 Qa wicoĥan onspewicakiyapi kin hena e, Roma wicaśta heuncapi kin, unki cupi qa unkopapi kta e iyecece śni.

22 Unkan oyate kin owasin witaya takpe wicaupi; qa wicaśta itancan wicakiyapi kin wokoyake awicayupotapi, qa wicakapsinsinte wicaśipi.

23 Unkan ota awicapapi, hehan wicakaśka tipi kin en iyewicayapi, qa tipi awanyake cin sutaya wicayuhe śipi.

24 He hecen econ śipi, unkan wicakaśka tipi temahentuya kin he en onawicataka, qa siha kin can on kaśkapi ece kin en sutaya kaśka wicahnaka.

25 Unkan hanye cokaya hehan, Palos Silas kici Wakantanka cekiyapi, qa yatan downpi; unkan wicaśta wicakaśkapi kin he nahonpi.

26 Unkan ihnuhanna maka kin nina huhuzahan, qa tipi ahe cin hena yuhuhuzapi, qa tiyopa kin owasin kazamni iyaye qa, on pawicaĥtapi kin owasin mdечahan hinnda.

27 Hececa, unkan wicakaśka tipi awanyag kiyapi kin kikta, qa tiyopa kin yuzamni han wan-yaka, unkan wicaśta wicakaśkapi kin owasin kihdapi kecin, he-



on mazasagye ehdaku qa on  
icikte kta ;

28 Tuka Palos nina hoyekiye  
ça, Kiuniiciye šni wo, owasin  
den unkanpi ce, eya.

29 Hehan petijanjan wan da,  
qa tin iyaye ça, cancan Palos  
Silas kici siha hdepi kin en  
cłpeiciya ;

30 Qa tankan awicaye ça, Itan-  
canpi wani kta e token ecamon  
kta he, ewicakiya.

31 Unkan, Jesus Messiya Itan-  
can kin wacinyan wo, hecen  
nicinea om yani kta ce, eci-  
yapi.

32 Qa Itancan oie kin okiya-  
kapi, tona ti kin en yukanpi kin  
hena owasin koya.

33 Unkan hanyetu kin wihiya-  
yedan oape kin he en, iwicacu,  
qa oape kin wicakiyujaja, qa he-  
han baptem qupi, tiyohnaka owa-  
sin ko.

34 Qa iye ti kin en awicaki qa  
won wicaya ; qa tiyohnaka kin  
om wicada qa iyuskin.

35 Unkan wanna anpa qehan,  
itancan wicakiyapi kin akicita  
eyanpaha kin ekta ye wicašipi,  
qa, Wicašta kin hena wicakiyu-  
ška wo, eyapi.

36 Unkan wicakaška tipi awan-  
yake cin, hena oie kin Palos oki-  
yake ça, Itancan wicakiyapi kin  
niciyuski kta keya hoši hipi,  
heon etanhan tankan kinanpapi,  
qa wookiye hda po, eya.

37 Tuka Palos hewicakiya, Ro-  
ma wicašta heuncapi, tuka un-  
yacopi šni ecen taninyan un-  
kapsinpsintapi, qa onatag eun-  
hnakapi, qa hinnakaha anahbeya  
hde unšipi he : hiya, iye ataye-  
dan upi, qa tankan unkaupi kta,  
eya.

38 Hehan akicita eyanpaha kin  
itancan wicakiyapi kin dena owi-  
cakiyakapi, unkan Roma wicašta

kin hecapi e nahonpi kin heon  
inihanpi.

39 Qa iye atayedan ekta ipi, qa  
cewicakiyapi, qa tankan awicau-  
pi, qa otonwe kin etanhan hdapi  
kta icewicakiyapi.

40 Unkan wicakaška tipi kin  
etanhan tankata inanpapi, qa Lu-  
dia ti kin en ipi ; qa hunkawan-  
jin kiciyapi kin wanwicahdaka-  
pi, hehan wicakihnapi, qa etan-  
han token iyayapi.

## WICOWOYAKE 17.

1 Unkan Amphipolis qa Apolo-  
nia opta yapi kin, hehan Thesa-  
lonike en ipi ; hen Juda oyate  
omniciye tipi kin wanji yu-  
kan.

2 Unkan Palos token econ ece  
kin ake ecen econ, qa timahen i,  
qa anpetu okilipapi yamni, wo-  
wapi wakan kin eciyatanhan,  
oyate kin wowicakiyaka.

3 Ie ça Messiya te kte ça, wi-  
conte kin etanhan najin kta e  
hecetu e yaotanin, qa, Jesus oci-  
ciyakapi kin he Messiya kin ee  
ce, eya.

4 Unkan hunh wicadapi, qa  
Palos Silas kici owicapapi, He-  
lenes wicašta owotanna ota, qa  
winohinca tokapapi kin wani-  
stinpidan šni.

5 Tuka Juda oyate wicadapi  
šni kin hena wohinyanpi, qa wo-  
peton tipi hocoka kin etanhan  
wicašta šica wanjikji iwicacupi,  
qa kiwitaya iheyapi, qa otonwe  
kin ocowasin oqoyeyapi, hehan  
Jason ti kin takpe ipi, qa oyate  
kin ekta tankan hiyu wicayapi  
kta e akitapi.

6 Qa iyewicayapi šni qehan,  
Jason hunkawanjin kiciyapi wan-  
jikji om otonwe kin en wicašta  
itancanpi kin ekta awicaipi, qa  
hotankakiya hotaninpi, Tona ma-

ka kin yuahdapsinyan elĥeyapi qon hena den ĥipi :

7 Qa Jason hena tin u wicaŝi. Unkan hena owasin Kesar toope kin opapi ŝni, qa, Wicaŝtayatapi tokeca wan Jesus hee ce, eya oyakapi ece, eyapi.

8 Unkan otonwe en wicaŝta itancanpi kin oyate ko, hena nahonpi kin inihan wicayapi.

9 Unkan Jason qa unmapi kin taku iwakta wicayapi, hehan awicayuŝtanpi.

10 Hehan hunkawanjin kiciyapi kin Palos Silas kici hanyen Berea ekta awicayapi. Hena ekta ipi, qa Juda oyate omniciye tipi yuhapi kin he en timahen yapi.

11 Hena iŝ Thesalonike oyate kin sam iyeya wacin ksapapi, wicoie kin tawacin inahni on icupi, qa hena hecetu e sdonyapi kta, heon anpetu iyohi wowapi wakan kin en akitapi ece.

12 Heon etanhan wicota wica-dapi, Helenes winohinca okinihan, qa nakun wicaŝta ota.

13 Tuka Berea ekta Palos Wakantanka oie kin oyake cin he, Juda wicaŝta Thesalonike en un kin hena sdonyapi qehan, ekta ipi, qa wicota kin wicayaŝkiŝkapi.

14 Unkan hehan hunkawanjin-kiciyapi kin Palos miniwanca kin ekta ye kta se tokan ye ŝipi; tuka Silas qa Timotheos hen owanji yukanpi.

15 Unkan tona Palos ayapi qon hena Athenas ekta aipi; qa Silas Timotheos kici kohanna en upi kta e iwahowicaye cin he hoŝi wicakahdapi.

16 Unkan hena Athenas ekta upi kta e Palos awicape yanke cin, he icunhan, otonwe kin wakagapi ojudan e wanyake qa on wacin iyokiŝica hinħda.

17 Qa heon omniciye tipi kin ohna Juda oyate, qa tona owicapapi kin hena om wohdaka, qa nakun anpetu otioyohi wopeton tipi hocoka kin ekta tona itkowicakipe cin hena om.

18 Unkan hehan Epikureos qa Stoikos oyate kin etanhan, wicaŝta woksape cinpi wanjikji Palos itkokipapi qa, I wakan kin de token eye kta he, hunħ eyapi; qa hunħ iŝ, He taku wakan tokeca ehde sececa ce, eyapi; Jesus qa wiconte etanhan woe-kicetu kin hena owicakiyaka, heon etanhan.

19 He icupi, qa Areyos paha kin ekta aipi qa, Woonspe teca odake cin he taku kin sdonunyanpi kta uncinpi:

20 Taku wotanin tokeca noge on nahon unyayapi kin hena token kapi hecinhan, sdonunyanpi kta ce, eciyapi.

21 Athenas oyate, qa wicaŝta tokeca en yukanpi kin owasin, taku tokeca econpi ŝni, taku nakaha otanin kin oyakapi, qa nahonpi kin heceyedana.

22 Hehan Palos Areyos paha kin cokaya inajin, qa heya; Athenas wicaŝta kin, taku wakan kin nina awacannipi e, taku owasin on imdukcan.

23 Naka taku wakan yadapi kin en awahimdanda, unkan iho, wahna woŝnapi wan, Taku wakan sdonyapi ŝni un kin, akan owapi kin he iyewaye. He iyukcanŝniyan ohoyadapi kin hee e ociciyakapi.

24 Taku Wakan kin tuwe maka taku ohnaka ko owasin kage ca, mahpiya maka ko Itancan kin hee, heon tipi wakan wicanape on kagapi kin ohna ti ŝni;

25 Qa iye kin owasin wiconi, qa woniya, qa taku owasin ko wicaqu ece kin, he taku icakije

cin iyecen, wicašta nape kin on okiyapi šni ece.

26 Qa wicawe wanjidan on, wicašta oyate hiyeye cin owasin, maka kin owancaya etipi kta e wicakaga; qa tohanhan nipi, qa tuktektan tipi kte cin hena otokahe tanhan wicakiciyuštan.

27 Heon Itancan kin akitapi kta iyececa, okinni yutantan akitapi kinhan iyeyapi kta, otaiyohi unkitehanpi šni un tuka ce.

28 Iye atayedan on unnipi, qa unškanškanpi, qa en unyakonpi ece: enitanhanpi wicašta odowan kagapi ece kin hena wanjikji heyapi qon, Unkiš eya he cinca unyakonpi ce.

29 Hecen Wakantanka cinca unyakonpi kin, mazaskazi, qamazaska, qa inyan, wicašta wayupike wacinksape bagopi kin, Taku Wakan kin iyacinpi kta iyececa unkecinpi kte šni.

30 Qa wookahnige šni omaka kin hena, Wakantanka ekta etonwe šni; tuka wanna wicašta owasin owancaya ihduecetu wicaši.

31 Qa anpetu wan en wicašta kin woowotanna on wicayaco kta e konza, wicašta kahnige ciquon he on *hecon kta*, qa wiconŧe kin etanhan najin kiye cin heon he owasin sdoneye wicaya ce, eya.

32 Unkan wicaŧe cin piya icahyapi kin he nahonpi qehan, hunh ihaŧapi; qa apa iš, He on ake naunnihonpi kta ce, eyapi.

33 Hecen Palos wicacokaya tanhan token iyaya.

34 Tuka wicašta wanjikji opapi, qa wicadapi; Dionušius Areyos paha omniciye kin en ope ciquon he wanji ee, qa winohinca wan Damaris eciyapi, qa nakun toktokecapi.

## WICOWOYAKE 18.

1 Hena iyohakam Palos Athenas ayuštan, qa Korinth ekta i:

2 Qa hen Juda wicašta wan iyeya, Akula eciyapi, Pontos entonpi, qa aškatudan Italia etanhan hiyu, tawicu Priskila kici; Kludios Juda wicašta kin owasin Roma ayuštan wicaši kin heon etanhan. Unkan hena en wicahi;

3 Qa kici wicohtani okonwanjidan, heon om un, qa om htani, wakeya kagapi kin hecapi.

4 Qa anpetu wakan eca omniciye tipi kin ohna wowicakiyaka ece, qa Juda oyate Helenes ko cinwicakiya.

5 Unkan Silas qa Timotheos Makedonia etanhan hiyupi qa en hipi qehan, Palos nagı kin ekta iyopaštag iŧiye a, Jesus he Mes-siya kin ee ce, Juda oyate kin owicakiyaka.

6 Unkan hena e wakipajinpi, qa šicaya iapi kin, hehan Palos wokoyake aihdatata, qa hewicakiya, Niwe kin nipapi kin akan niunpi nunwe, miye mabapica šni waun, detanhan Ikcewicašta kin ekta mde kta ce.

7 Unkan hetanhan tankan ye a, wicašta wan Wakantanka ohoda, Justos eciyapi he ti kin omniciye tipi kin ikiyadan han; unkan tipi kin he en tin iyaya.

8 Unkan Krispos, omniciye tipi kin en itancan kin, he Itancan kin wacinyan, tiyohnaka owasin om; qa Korinth oyate kin wicota nahonpi qehan wicadapi, unkan baptem wicakupi.

9 Unkan hehan hanyen wowihamde en, Itancan kin Palos heciya, Ihnuhan taku koyakipe cin, tuka nina ie a, inina yanke šni wo.

10 Miye cicica, qa tuwedan



kiuniniye kta e iyanihpaye kte šni; otonwe kin de ohna oyate ota wicamduha ce, eya.

11 Unkan hen wi ake šahdogan hehanyan iyotanke ça, Wakantanka oie kin onspewicakiya.

12 Unkan Galiyo Akeya makece kin en itancan un kin, hehan Juda oyate witaya Palos takpe ipi, qa woyaco oiyotanke kin en ahipi;

13 Qa, Woahope kin eciyatanhan šni Wakantanka cekiyapi kta e wicašta kin onspewicakiye cin he dee ce, eyapi.

14 Unkan Palos i hdukawa kta, hehan Galiyo Juda oyate kin hewicakiya; Juda wicašta kin, de taku šica econpi, qa iš wicaštašniyan ohanyanpi kin hee unkanš, nacihonpi kta iyececa tuka:

15 Tuka wicoie, qa wicacaje, qa woope nitawapi on wiwagapi kin heca hecinhan, niš ito ekta etonwan po; taku hececa on wimdukcan kte šni ce.

16 Hehan woyaco oiyotanke kin etanhan kašam iyewicaya.

17 Unkan Helenes wicašta kin owasin Sosthenes, omniciye tipi kin en itancan kin he, icupi, qa woyaco oiyotanke kin itokam apapi. Tuka Galiyo hena taku kin ekta ewacin šni yanka.

18 Unkan he iyohakam Palos anpetu ota hen yanke çehan, hunkawanjin kiciyapi kin awicayušan, qa Suria ektakiya watom iyaya, Priskila Akula kici opapi Kenkreye ekta paha kin bakišda, hecen içiconza kin heon.

19 Hehan Ephesos ekta iyohi, qa hen ehpewicaya; tuka iye kin omniciye tipi kin en tin iyaye ça, Juda oyate kin om wohdaka.

20 Unkan en tehan owanji yanke kta e cinpi ešta wicada šni:

21 Tuka napewicayuze ça, Jerusalem ekta wošnapi u kte cin he en owape kta, tuka Wakantanka iyokipi kinhan, ake en cihdipi kta ce, eya. Hehan Ephesos etanhan watom iyaya.

22 Qa Kesareya en huta ekta ihunni, qa hen ihe ça okodakiciye kin napewicayuze çehan, Antiyoka ekta apamahde iyaya.

23 Qa anpetu ota hen un kin, hehan Galatia qa Phrugia makece kin owancaya ye ça, waonspewicakiyapi kin owasin wašag wicakiya.

24 Unkan Juda wicašta wan, Apolos eciyapi, Aleksandrea en tonpi, wicašta wayapike ça wowapi wakan on wašaka, he Ephesos ekta hi.

25 Wicašta kin he Itancan tancanku kin onspe, qa nagi kata, heon ninana ie ça, Itancan taku tawa kin onspewicakiya, Johannes baptem tawa kin hecedan sdonya tuka.

26 Hee omniciye tipi kin ohna waditagya ia; unkan Akula qa Priskila nahonpi qehan, he icupi, qa Wakantanka tancanku kin sanpa tanyan okiyakapi.

27 Unkan Akeya ekta ye wacin, hehan hunkawanjin kiciyapi kin heciya wowapi wicacagapi, qa he iyowinkiyapi kta e iwahokonwicakiyapi. He heciya i, qa tona wowaonšida kin on wicadapi qon hena nina owicakiya;

28 Qa Juda oyate kin omniciye en nina awacin wicaye ça, wowapi wakan kin eciyatanhan Jesus he Messiya kin ee e yatanin.

#### WICOWOYAKE 19.

1 Unkan Apolos Korinth en un kin icunhan, Palos iheyata makece kin opta ye ça, Ephesos

ekta iyohi, qa hen waonspewicakiyapi wanjikji iyewicaya :

2 Qa hewicakiya, Wicayadapi ehantanhan Woniya Wakan kin iyacupi he. Unkan is, Woniya Wakan yukan e nahalin naunhonpi sni ce, eyapi.

3 Unkan, Taku on baptem nicupi he, ewicakiya. Unkan, Johannes baptem tawa kin hee ce, eyapi.

4 Unkan Palos, Johannes ihducetupi kte cin on baptem wicaqu, qa oyate kin tuwe u kte cin he wicadapi kta, kewicakiya, he Jesus Messiya kin ee ce, eya.

5 He nahonpi, unkan Jesus Itancan caje kin on baptem wicacupi.

6 Hehan Palos nape on awicaputake ca, Woniya Wakan en wicahi, unkan ceji tokeca on iapi qa wekcanpi.

7 Hena owasin wica ece wikcemna ake nonpa.

8 Unkan omnicuye tipi kin tin iyaye ca, wi yamni waditagya ie ca wohdaka, qa Wakantanka tokiconze taku tawa kin onspewicakiya.

9 Tuka wanjikji suta icicagapi qa wicadapi sni kin hena, wicota kin en, canku kin de on sicaya eyapi qehan, hena awicayustan, qa waonspewicakiyapi kin aiyog iyewicaye ca, anpetu otioyohi, tuwe Turannos eciyapi, he oya-wa tipi yuhe cin ohna woyaka ece.

10 Waniyetu nonpa behanyan hecen econ, unkan tona Asia en yakonpi kin hena owasin Jesus Itancan oie kin nahonpi, Juda Helenes wicašta ko.

11 Unkan Palos nape kin on Wakantanka wowapetokeca wakan kin econ ece.

12 Hecen iye tancan kin etan-

han, napipakinte qa makuakalipe kin wayazanpi kin en akipi; unkan wowayazan kin ayuŕstan iyaye ca, taku wakan sicapi kin tankan inanpapi.

13 Unkan wanjikji, Juda wicašta wapiyapi kin heca, tona taku wakan sica yuhapi kin hena en, Jesus Itancan kin cajeyata utapi, qa, Jesus Palos oyake cin he cajeyan naunhon po, eyapi.

14 Qa Juda wicašta woŕna kagapi wanji, Skewa eciyapi, he cinhintku ŕakowin kin hena heconpi.

15 Tuka woniya sice cin he waayupte ca, Jesus sdonwaye ca, Palos nakun sdonwaya, tuka niŕ nituwepi he, eya.

16 Unkan wicašta taku wakan sica yuhe cin he iyawicalhpaye ca, ohiwicaya, hecen tancodan kiunniyanpi ecen tipi kin etanhan tankan najicapi.

17 Unkan tona Ephesos en yukanpi kin, Juda qa Helenes oyate kin owasin he sdonyapi; qa wokokipe owasin awicahinlpaya, unkan Jesus Itancan caje kin yatanpi.

18 Unkan tona wicadapi kin etanhan wicota en ahi, qa wohdakapi, wicoŕhan qon ohdakapi;

19 Qa tona wapiyapi econpi kin hena wicota woyapi tawapi kin en ahipi, qa owasin wicotokam hulinahyapi; hena iyopeyapi kin hdawapi, qa mazaska kektopawinge wikcemna zaptan iyawapi.

20 Hecen Itancan oie kin nina icage ca ohiya.

21 Unkan hena taku kin wana enakiyapi, hehan Palos woniya eciyatanhan konza, Macedonia qa Akeya opta ye cinhan, hehan Jerusalem ekta ye kta, qa, Heciya wai kinhan hehan Roma wanmdake kta ce, eya.

22 Qa ookiye wicayuhe cin nom, Timotheos qa Erastos, hena Makedonia ekta ye wicaŝi, tuka iye anpetu tonana Asia en owanjidan yanka.

23 Unkan he icunhan canku kin de on nina owodutaton.

24 Tuwe Demetrios eciyapi, mazaska kage cin heca, he mazaska kokadan Diana kicaga ece, qa tona wocon kin he econpi kin hena taku ota wicakamna.

25 Hena eepi, qa tona opeya htanipi kin hena ko wicakico qa hewicakiya, Wicaŝta kin, wicohtani kin de on woyuha untonpi e sdonyakiyapi.

26 Qa nakun Ephesos ecedan ŝni, tuka Asia owancaya, Palos kin de oyate ota wahokonwicakiye ça, wicayuhomni qa, Taku wakan nape on kagapi kin hena wakan ŝni ce, eya owicakiyaka e sdonyayapi qa naŷhonpi.

27 Qa hecen taku on waunkamnanpi ece kin he wahtedapi kte ŝni seca, qa hecedan ŝni, nakun Diana taku wakan tanka tipi wakan tawa kin takudapi kte ŝni, qa wowitan hduhe cin yutakuni kte ŝni, he qe Asia owancaya, qa oyate kin iyulĥpa ohodapi tuka ce, eya.

28 Unkan hena naĥonpi qehan, nina canteptanyanpi qa, Diana Ephesos oyate tawapi kin he tanka ce, eyaya hotaninpi.

29 Unkan otonwe kin owancaya nina owodutaton; qa Gayos qa Aristarkos kici, Makedonia wicaŝta kin, Palos kici hipi qon hena iwicacupi, qa tawacin wanjidan owanyake tipi kin en inyang yapi.

30 Unkan Palos oyate kin en wicai kta, tuka waonspewicakiyapi kin iyokipi ŝni:

31 Qa Asia en wicaŝta tokapapi wanjikji, iye takodawicaye cin hena wahoyapi, qa owanyake tipi kin timahen iyolĥpaye kte ŝni e icekiyapi.

32 Heon hunĥ taku eya hotaninpi, qa hunĥ iŝ togye eyapi; omniciye kin nina oqoyapi; qa tokeca e on mniciyapi kin ota sdonyapi ŝni.

33 Hehan Aleksander wicota kin etanhan ahiyupi, qa Juda wicaŝta kin he cokata iyaye yapi. Unkan Aleksander namwicakicawin, qa oyate kin wowicakiyake kta.

34 Tuka he Juda wicaŝta kin heca e sdonyapi, unkan wihiyayedan oape nonpa hehanyan, owasin ho wanjidan hotankakiya hotaninpi, Diana Ephesos oyate tawapi kin he tanka ce, eyaya yukanpi.

35 Unkan wowapi kage cin he oyate kin wicayuina qehan, hecen eya, Ephesos wicaŝta kin, Ephesos otonwe kin de Diana taku wakan tanka he tipi wakan tawa kin awanyag un, qa wakagapi Jupiter etanhan hinĥpaye ciqon he nakun, he tuwe wicaŝta kin he sdone ŝni he.

36 Dena taku kin ceĥunhdapica ŝni, heon inina dukanpi, qa takudan inaĥniyan ecanonpi kte ŝni tuka.

37 Wicaŝta kin dena tipi wakan kin etanhan takudan manonpi ŝni, qa taku wakan nitawapi kin yaŝicapi ŝni, tuka den awicayahipi.

38 Demetrios qa tona om htani kin hena tuwe en taku aupi cinpi kinhan, woyaco anpetu yukan, qa nakun wicaŝta wayacopi kin; otoiyoŝi wiyakicionpapi kta.

39 Qa niŝ taku tokeca on winungapi hecinhan, omniciye wi-



coope kin eciyatanhan un kin he en yacopi kta.

40 Anpetu kin de owodutaton kin on wiunwangapi kta naceca ; omniciye kin de on etanhan taku unkeyapi kte cin takudan unhapu šni ce, eya.

41 Unkan hena hecen eye çehan, hehan omniciye kin hde wicaši.

## WICOWOYAKE 20.

1 Owodutaton kin he henakeca, hehan Palos waonspewicakiyapi kin wicakico, qa i iwicaputaka, qa Makedonia ekta ye kta e hetanhan iyaya.

2 Unkan makoce kin hena opta iyaye ça, oie ota on iwahokonwicakiye çehan, Helenes makoce kin en iyohi :

3 Qa wi yamni hen owanji yanka. Unkan Suria ekta watom ye kta, hehan Juda wicašta kin nahmana iyapepi kin heon Makedonia opta icicawin hde kta e iciconza.

4 Unkan Sopater Berea etanhan, qa Thesalonike etanhan Aristarkos Sekundos kici, qa Gayos Derbe etanhan, qa Timotheos, qa Asia wicašta, Tucikos qa Trophimos, hena Asia ekta Palos kici yapi.

5 Hena e tokata yapi, qa Troas en unkapepi.

6 Unkan aguyapi on napohiyapi codan anpetu kin iyohakam, Philippi etanhan watounpapi, qa anpetu zaptan hehan Troas en wicunkihdegapi, qa hen anpetu šakowin unkokihpapi.

7 Unkan anpetu tokaheya kin he en waonspewicakiyapi kin aguyapi kiyušta immiciyapi, hehan Palos wowicakiyaka, hanhanna hetanhan hde kta, hecen hanye cokaya hehanyan wahokonwicakiya yanka.

8 Unkan wankan tipi ohna immiciya yukanpi kin he en petijanjan ota hdepi.

9 Unkan koška wan, Yutikos eciyapi kin he owanyeye kin en iyotankehan yanke ça, ištınbe hinca : unkan Palos tehan woyake cin icunhan, ištınma iwanke ça, owanka iciyamni kin hetanhan hinhpaye ça ça ecen eyakupi.

10 Hehan Palos kun ye ça akan ehpeiçiye ça, poskin yuze ça, Ihnuhan yaceyapi kin, taniya kin nahahin mahen un ce, eya.

11 Qa ake wankan ye ça, aguyapi kiyušte ça, yute ça, tehan ia yanke cin, anpa kamdeze cin hehanyan, hehan hetanhan kihda.

12 Unkan koška qon ni ikikcupi qa nina pidapi.

13 Unkan unkiye tokaheya wita wata kin ekta unyanpi, qa Asos ekta watom unyanpi, heciyatanhan Palos en ope unšipi kta unkecinpi ; iye qe hehanyan mani cin, qa heon hecon unšipi.

14 Unkan Asos ekta eunkihdegapi qehan, hehan en ope unkiyapi, qa Mitulene en unhipi.

15 Unkan hetanhan iyoopta watom unyanpi, qa ihanhanna qehan Kios en iyotakons unyanpi ; qa ake ihanhanna qehan Samos iyounhipi, qa Trogulios en owanji unkanpi ; qa ake ihanhanna qehan Miletos ekta unkiyi.

16 Palos Ephesos en icunom watom iyaye wacin, Asia en okihpe kte šni, qa okihi kinhan anpetu iwikcemna zaptan kin he en Jerusalem en un kta cin, qa heon inahni.

17 Unkan Miletos etanhan ye wicaši, qa Ephesos en okodakiciye hunkawicayapi kin wicakico.

18 Unkan hena en bipi, hehan hewicakiya; Asia en wahi qon anpetu tokaheya hehantanhan, token obinniyan cicipi waun kin sdonyayapi.

19 Tawacin ocowasin walibayedan waun, Itancan kin ohowada, istamnihanpe ota, qa taku wawiyutanyan un kin, Juda oyate nahmana iyamapepi kin on mahiyahde kin hena koya.

20 Qa taku on tanyan yaunpi kte cin takudan ipicidapi šni, tuka omniciye kin en, qa tipi iyaza wociciyakapi qa waonspeciciyapi ece.

21 Wakantanka ekta ihdueceptupi, qa Jesus Messiya Itancan unkiyapi wacinyanpi kin hena, Juda Helenes oyate ko en mdatanin ece.

22 Unkan nakaha iho, Woniya kin on makaškapi ecen Jerusalem ekta mda, qa heciya taku mahiyahde kte cin sdonwakiye šni.

23 Tuka otonwe otoiyo hi en Woniya Wakan mayaotanin qa, On kaškapi qa wokakije micium, keya ce.

24 Tuka hena takuwada šni, qa wiconi mitawa kin tehi ke waki da šni, iyuškinyan ihunniyan waimnanke kta, qa wicohan Jesus Itancan maqu kin, Wakantanka towaonšida wotanin wašte omdake kte cin hee tanyan mduštan kinhan.

25 Qa nakaha iho, niyepi kin Wakantanka tokiconze kin ociciyag ciipi qon owasin ake miite kin wanmayadakapi kte šni e sdonwakiya.

26 Heon anpetu kin de waayan tanin ciciyapi, wicašta owasin we kin on ašape šni waun.

27 Wakantanka tawacin kin ocowasin ociciyakapi qa takudan anawaħbe šni.

28 Heon tanyan piiçiyapi, qa optaye owasin en, Woniya Wakan waawanhdake nicagapi kin hena koya, qa Wakantanka taokodakiciye kin, iye we kin on opekiron qon he awanhdaka po.

29 Miye imdamde cinhan, hehan šunktokeca ocin šicapi kin niyepi en niipi kta, qa taħinca kin itonwicapapi kte šni he sdonwaya.

30 Qa niyepi enitanhanpi wicašta icagapi kta, qa is iyepi iħakam waonspewicakiyapi kin u wicakiyapi kta e nina yaškiškapi kta.

31 Heon kiktahan un po, qa waniyetu yamni, anpetu hanyetu ko, istamnihanpe *amau*, qa otoiyo hi wahokonciyapi amdaštan šni, he kiksuya po.

32 Hunkawanjinciyapi, nakaha Wakantanka is iye, qa towaonšida oie kin en aciupi; he icalniyanpi, qa tona ska wicakagapi kin owasin om taku yuhe niciyapi kta e okihi.

33 Tuwe mazaska, qa mazaska zi, qa wokoyake tawa kin wakon šni.

34 Han, minape kin dena on taku wacin kin miħdamna, qa tona om waun kin hena wicawecamna qon he niye sdonyayapi.

35 Hena owasin en waonspeciciyapi, hecen litayanipi, qa tona wašake šni un kin owicayakiyapi kta, qa Jesus Itancan oie qon yeksuyapi kta, Wicaqupi kin hee wowašte, qa icupi kin hee aoptetu, eye ciqon he.

36 Hena hecen eya, unkan hehan canpeška makehde inajin, qa owasin om cekiya.

37 Unkan owasin nina ceyapi, qa Palos poskin yuzapi, qa i iputakapi.

38 Miite kin ake toħinni wanmayadakapi kte šni *eye ciqon*, oie

kin de on iyotan nina iyokišica-pi. Unkan wita wata kin ekta kici yapi.

## WICOWOYAKE 21.

1 Unkan hena ehpewicunyanpi, qa pacanan iyeunyanpi, hehan Kos ekta owotanna unkupi, qa ihanhanna hehan Rodos ekta, qa hetanhan Patara en iyounhipi.

2 Qa hen wita wata wan Phenike ekta watom ye kte cin iyeunyanpi, qa he en unkopapi, qa hetanhan unyanpi.

3 Qa Kupros taninyan wanunyakapi, hehan catka tanhan ehpeya unhiyupi, qa Suria ekta watom unkupi, qa Turos en unhdihunipi, hen wata taku ohnaka kin wahetajupi kta.

4 Unkan waonspewicakiyapi kin iyewicunyanpi, qa hen anpetu šakowin unkokihpapi; hena e qe Woniya Wakan eciyatanhan Palos Jerusalem ekta ye kte šni, keciyapi.

5 Tuka anpetu kin hena wanna unkihunnipi, hehan hetanhan inaunpapi, qa hena is tawicupi šiceca ko owasin opapi, otowwe itankata hehanyan, qa huta kin ekta canpeška makehde inaunjipi, qa ptaya ceunkiyapi.

6 Unkan hehan nape unkiciyuzapi, qa unkiš wata kin en unkopapi, tuka iyepi kin ekta hdapi.

7 Unkan Turos etanhan watom unkupi kin he ihunni unkiyapi, hehan Ptolemais ekta unhipi; qa hunkawanjin kiciyapi kin nape wicunyuuzapi, qa anpetu wanjidan om unkanpi.

8 Unkan ihanhanna qehan, tona Palos kici unyakonpi kin, hetanhan inaunpapi, qa Kesarea en iyounhipi; qa Philip wotanin wašte oyake cin he ti kin en unyanpi, šakowinpi qon he wanji ee, qa he kici unyakonpi.

9 Unkan he cunwintku topa witanšna unpi, hena wokcanpi ece.

10 Unkan hen anpetu ota owanji unkanpi kin icunhan, wicašta wokcan wan Agabos eciyapi, Juda makoce kin hetanhan apamahde hi.

11 Qa en unhiyupi qehan, Palos ipiyaka tawa kin icu, qa on siha nape ko iyaihdaške qa, Woniya Wakan kin heya ce, Wicašta tuwe ipiyaka kin de tawa hecinhan, he Juda wicašta, Jerusalem ekta, hecen kaškapi kta, qa Ikcewicašta kin nape kin en wicaqupi kta ce, eya.

12 Unkan he naunhonpi qehan, tona en tipi kin hena om, ceunkiyapi, Jerusalem ekta ye kte šni.

13 Tuka Palos, Token ecanonpi qa yaceyapi, qa hecen cante mayadutakunipi šni he, Jesus Itancan caje kin on Jerusalem ekta makaškapi, qa nakun maše kta e wiyeya manka ce, eya.

14 Unkan wicada šni qehan, unkayaštanpi qa, Itancan tawacin kin ecen econpi nunwe, unkeyapi.

15 Unkan anpetu kin hena iyohakam owasin piunkiçiyapi, qa Jerusalem ekta itawankanhde unyanpi.

16 Nakun Kesarea etanhan waonspewicakiyapi kin wanjikji unkopapi, qa wanji Mnason eciyapi kin he aupi, he Kupros etanhan, wanakaja waonspekisyapi kin heca, he ti kin en unyakonpi kta.

17 Unkan Jerusalem ekta iyo-unhipi, hehan hunkawanjinkiciyapi kin iyuškinyan tin unki-copi.

18 Unkan ihanhanna kin hehan, Palos kici Jakob ekta unyanpi; unkan hunkawicayapi kin owasin en yukanpi.



19 Hena nape wicayuze a, hehan Ikcewicaŝta kin ekta iye woyake cin on token Wakantan-ka econ qon owasin ecekcen owicakiyaka.

20 Unkan hena naĥonpi qehan, Itancan kin idowanpi qa *Palos* heciyapi, Cinye, Juda wicaŝta kektopawinge ota wicadapi, qa owasin wicoope kin sutaya awa- kicinpi kin he wandaka.

21 Qa niye, Juda oyate Ikce- wicaŝta ehna yakonpi kin hena owasin Moses toope kin ahdu- ŝtanpi kta e onspewicayakiye a, cinca bawicakicilĥdayapi kte ŝni, qa wicoĥan kin hena eciyatan- han manipi kte ŝni, keha keyapi e naĥonpi.

22 Heon toketu kta he. Awi- cakehan wicota kin kawitaya iheyapi kte. Wanna yahi kin he naĥonpi.

23 Hecen token unkeniciyapi kin de ecen econ wo. Wicaŝta tom token iiconzapi kin hena om unyakonpi.

24 Hena owicape a, om ihdu- ska, qa mazaska on owicakiya wo, hecen paha kin hduŝdapi kta. Unkan hecen token oniya- kapi naĥonpi qon hena taku ŝni, qa niŝ eya owotanna mayani, qa wicoope kin opeya yaun kin he owasin sdonyapi kta.

25 Tuka Ikcewicaŝta, tona wi- cadapi kin hena wowapi wicun- kicagapi, qa wicoĥan kin dena takudan opapi kte ŝni unkeyapi qon, tuka taĥu wakagapi waki- yuŝnapi, qa we, qa taku we ye ŝni yuĥapi kin, qa wiinaĥmanpi kin hena en ihdoipi kte ŝni ce, hecedan unkeyapi.

26 Hehan *Palos* wicaŝta kin hena owicape a, ihanĥanna kin hehan om ihduska, qa ihduskapi anpetu kin wanna henakeca kte cin he yuotanin kta e tipi wa-

kan kin tin iyaya; taku qupi wan otoiyoĥi on woŝnapi kta he- hantu.

27 Unkan anpetu ŝakowin qon wanna henakeca kte hehan Ju- da wicaŝta, Asia etanhan upi qon hena tipi wakan kin en un wanyakapi qehan, oyate kin owasin iyowicapaŝtakapi qa *Pa- los* iyalĥpayapi;

28 Qa hotaninpi, Israel wica- ŝta kin, ounkiya po; wicaŝta kin de oyate kin en, qa wicoope kin, qa nakun tipi kin de aie a, owancaya hecen onspewicaki- ya; qa nakun Helenes wicaŝta kin tipi wakan kin en awicahi, qa hecen tipi iyotan waŝte kin de aŝamya ce, eyapi.

29 He itokam Trophimos, Ephesos wicaŝta kin heca, e otonwe kin en kici un qon he wanyakapi, unkan he *Palos* tipi wakan kin en aĥi, kecinpi.

30 Unkan otonwe kin ocowasin nina oqoyapi, oyate kin kawita- ya iheyapi, qa *Palos* icupi, qa tipi wakan kin etanhan tankan yusdohan ayapi, unkan echan- keya tiyopa kin ecen iyeyapi.

31 Wanna ktepi kta e akitapi, hehan akicita tancan wicobe yu- he cin he, Jerusalem owancaya owodutaton ce, eya okiyakapi kin he naĥon;

32 Qa kohanna akicita, akicita tancan ko iwicacu, qa inyang ye a ekta wicai. Unkan akici- ta tancan akicita ko wanwica- yakapi qehan, *Palos* apapi kin ayuŝtanpi.

33 Hehan akicita tancan kin en ye a, icu, qa maza icicahiĥa nom on kaŝke wicaŝi; qa he tuwe kin, qa token econ kin he, eya iwicawanga.

34 Tuka oyate kin hunĥi taku eya hotaninpi, qa hunĥi iŝ togye eyapi. Unkan owodutaton kin

on wowicake kin sdonya okitpani, heon conkaške kin mahen aye wicaši.

35 Unkan can iyadipi kin en hdipi, hehan akicita kin yuha ayapi, oyate kin aotins upi kin heon etanhan.

36 Oyate kin iyulpa ihakam yapi qa, Yutokan aya po, eya hotaninpi.

37 Unkan conkaške kin mahen ayapi kta, hehan Palos akicita tancan kin heciya, Taku eciciye kta tuka ce, iyowinmayakiye kta he. Unkan is, Helenes iapi kin onnispe he, eya.

38 Egipta wicašta anpetu kin dena itokam icage ca, wicašta wabotica kin hecapi kektopawinge topa ihakam hewoskan makoce kin ekta awicaye cion he niye šni he.

39 Unkan Palos, Juda wicašta Kilikia en, Tarsos *otonwe* kin hetanhan waun, otonwe šice šni en imacaga. Ceciciya ce, oyate kin taku ewicawakiye kta, iyowinmakiya wo, eya.

40 Hecen iyowinkiya; unkan Palos can iyadipi kin akan inajin, qa oyate kin namwicakicawin. Unkan inina yukanpi qehan, Hebrew iapi kin on ie ca, hewicakiya;

## WICOWOYAKE 22.

1 Wicašta hunkawanjinciyapi qa hunkakeciyapi kin, nakaha niyepi en wowahdake cin namañon po.

2 Unkan Hebrew iapi un wovicakiyake cin he nañonpi qehan, iyotan inina yukanpi.

3 Unkan hecen eya; Juda wicašta kin hemaca, Kilikia ekta Tarsos en matonpi, qa otonwe kin de en icalmayanpi, qa Gamaliel siha kin ekta, hunkake

wicayapi wicoope yuhapi kin tanyan onspemakiyapi, qa Wakantanka on nina inawañni, niyepi kin owasin nakaha yaunpi kin iyececa.

4 Qa canku kin de wiconte ayahdeya šicaya wakuwa, wicawakaške ca, wicakaška tipi kin en iyewicawaya, wica winyan ko.

5 Hecen wošna kagapi itancan, qa hunka wicayapi kin owasin mayaotaninpi ece. Hena eepi hunkawanjinkiciyapi kin wowapi wicakicagapi qa maqupi qon, hecen Damaskos ekta imdamde, heciya tona yukanpi kin hena wicakaška Jerusalem ekta wicakaštakapi kta e awicawau kta, heon etanhan.

6 Ohnihde waun, qa Damaskos wanna ikiyadan, unkan wiyotanhe cin hehan, iho, ihnuhana mahpiya kin eciyatanhan. iyoyanpa tanka wan aohdute mayan.

7 Hehan makata mahinhpaye ca, wicaho wan nawañon, Salos, Salos, tokeca e šicaya mayakuwa he, emakiya.

8 Unkan miš amdupte ca, Itancan nituwe he, epa. Hehan is, Jesus Nazareth etanhan šicaya yakuwa kin he miye ce, emakiya.

9 Unkan tona om waun kin ojanjan kin wanyakapi, qa nina inihanpi, tuka wicaho omakiye cin he nañonpi šni.

10 Hehan miš, Itancan token ecamon kta he, epa. Unkan Itancan kin, Najin, qa Damaskos ekta ya wo, heciya token ecanon kte cin owasin oniciyakapi kta ce, emakiya.

11 Unkan iyoyanpa wiyatpa kin on wawanmdake šni, hecen tona om waun kin hena minape kin yus amayanpi, qa Damaskos en wai.

## OĤANYANPI QON.

12 Qa wicašta wan, Ananias eciyapi, wicoope kin eciyatanhan owotanna, Juda oyate hen yakonpi kin owasin he oyakapi ;

13 He en mahi, qa najin, qa hemakiya, Salos, misunka tonwan wo. Unkan wihiyayedan oape kin he en ekta ewatonwan.

14 Hehan iye heya ; Hunkake wicunyanpi Wakantanka tawapi kin nicalniga, iye tawacin kin sdonyaye kta, qa Wanji Owotanna kin wandake ça, he i kin eciyatanhan ho kin nayalhon kta ;

15 Qa iye on taku wandake ça, nayalhon kin wicašta owasin owicayakidake kta heon.

16 Unkan nakaha taku e ayape he. Najin wo, baptem niçupi kta, Itancan caje kin hoyeyakiye kta, hecen wayalhani kin yakpakinte kta ce, eya.

17 Unkan ake Jerusalem ekta icicawin wahdi, qa tipi wakan kin ohna cekiya waun, hehan woakiktonje wan mahiyahde ;

18 Qa Itancan kin wanmdaka ; he kaken emakiya ; Inalini, qa kohanna Jerusalem etanhan inanpa wo, mayadaotanin kin he wicadapi kte šni ce, eya.

19 Unkan hepa ; Itancan, tona wacinniyampi kin hena wicawakaška, qa omniciye tipi kin ohna wicawakaštaka ece qon he sdonyapi :

20 Qa Stephanos waayatanin nitawa kin we papsonpi qehan, hen nawajin, qa he iyowinwicawakiye ça, tona ktepi tašina awanwicaweciyaka qon.

21 Hehan, Hunktiya wo, detanhan tehan ye ciši, Ikcewicasta kin ekta, emakiya ce.

22 Unkan wicoie kin de hehanyan nahon yukanpi, hehan nina hotaninpi qa, Wicašta kin de ma-

ka kin etanhan aya po, ni kta e iyecece šni ce, eyapi.

23 Unkan hotankakiya hotaninpi, qa šina ešpekiyapi, qa watušekšeca wankan yeyapi kin ;

24 Hehan akicita tancan kin, conkaške mahen aupi, qa kapsinsintapi kin on wiwangapi kta, keya ; hecen tokeca on oyate kin nina aoqoyapi kin he sdonye kta.

25 Unkan telimiso on kaškapi icunhan, Palos akicita tancan wan en najin kin heciya, Roma wicašta kin heca, qa nahalin yacopi šni, tuka yakapsinsintapi kta oyakihipi he.

26 Akicita tancan kin he nahon, unkan akicita tancan tanka kin hoši hde ça heya ; Taku ecanon kte cin he itonpa wo, wicašta kin he Roma kin heca.

27 Hehan akicita tancan tanka kin en hi, qa heciya, Roma wicašta kin henica he, omakiyaka wo. Unkan, Han, eya.

28 Unkan akicita tancan qon heya, Ihduhapi kin de ota iyopewakiya, eya. Tuka miš hecen matonpi ce, Palos eya.

29 Heon kohanna tona Palos wiwangapi kte cin hena ayušta iyayapi, qa akicita tancan tanka kin nina kopehda ; he kaška tuka Roma wicašta kin heca e sdonye cin he etanhan.

30 Unkan ihanlianna qehan, Juda oyate taku iyaonpapi hecinhan, he atayedan sdonye kta, heon icaške kin etanhan kiyuška ça, wošna kagapi, hunkawicayapi ko owasin mniciye wicaši, qa hehan en abi, qa wicacokaya ehde.

### WICOWOYAKE 23.

1 Unkan Palos omniciye kin opawicalita yanke ça, Wicašta



hunkawanjin ciyapi, Wakantanka itokam mitawacin ocowasin wašte, anpetu kin dehan wani, eya.

2 Unkan Ananias wošna kagapi itancan kin, tona ikiyadan najinpi kin *Palos* i kin ohna ape wicaši.

3 Hehan *Palos* heciya, Conkaške skayapi kin, Wakantanka anipe kta ce; wicoope kin eciyatadhan mayadaco kta e yahidotanka tuka wicoope kašeya amape wicayaši.

4 Unkan tona en najinpi kin, Wakantanka wawayušna itancan tawa kin he šicaya owayakiya he, eyapi.

5 Unkan *Palos*, Hunkawanjinciyapi, he wawayušna itancan kin ce sdonwaye šni, eya; Wwapi en kaken kagapi, Nitaoyate kin en wicašta itancan kin dašice kte šni ce.

6 Tuka apa Saddukee, qa apa is Pharisee kin hecapi e *Palos* iyukan qehan, hehan omniciye kin en hotankakiya heya; Pharisee kin hemaca, qa nakun Pharisee cinhintku kin, qa wicašte cin piya ikicagapi kte cin ape waun kin heon etanhan nakaha mayacopi ce.

7 Unkan hecen eye çehan, Pharisee Saddukee kin om hdokincapi, qa omniciye kin akipam iyeyapi.

8 Piya ikicagapi kin wanica, qa mašpiya ohnihde, wanagi ko wanica ce, Saddukee kin eyapi ece; tuka Pharisee kin, Napin yukan ce, eyapi ece.

9 Hecen nina owodutaton, qa wowapi kagapi Pharisee etanhanpi kin hena inajinpi, qa wicakigepi, qa heyapi, Wicašta kin de en taku šica takudan iyeunyanpi šni; tuka wanagi, qa mašpiya ohnihde wan taku okiyake

cin he hecetu kinhan, Wakantanka kici unkcizapi kte šni.

10 Nina hdokincapi, unkan *Palos* yušpašpa icupi kta e akicita tancan tanka kin kokipe ça, heon akicita kin kun ye wicaši, hena wicacokaya tanhan icupi, qa conkaške kin mahen akupi kta.

11 Unkan he ihtayetu, hehan Itancan kin en hinajin qa, *Palos* cante wašte wo, Jerusalem en mayadaotanin kin he iyecen Roma ekta mayadaotanin kta ce, eciya.

12 Unkan anpa kamdeze cin, hehan Juda wicašta wanjikji okodakiciye wan kagapi, qa witaya içiconzapi, takudan yutapi kte šni, qa takudan yatkanpi kte šni, *Palos* ktepi šni kin hehanyan kta, keyapi.

13 Wakiconzapi kin hena wicašta wikcemna topa aktonpi.

14 Unkan hena wawayušna tankapi, qa hunka wicayapi ko en wicayapi, qa heyapi; *Palos* unktepi šni kin hehanyan, takudan untapi kte šni e wokonze on unkiconzapi.

15 Heon etanhan hanhanna, niye omniciye kin owasin om akicita tancan tanka kin he au yašipi kta, taku sanpa atayedan inungapi kta seca e heon; qa unkiš he ikiyadan aupi šni, hehan unktepi kta e wiyeya unkanpi kta ce, eyapi.

16 Unkan hena nahmana iyape yukanpi kin he *Palos* tonškaku kin nahon qehan, hehan ekta ye ca conkaške kin timahen i, qa *Palos* okiyaka.

17 Hehan *Palos* akicita tancan wanji kico qa, Koška kin de akicita tancan tanka kin ekta aya wo, taku okiyake kta ce, eya.

18 Unkan heon he icu, qa akicita tancan tanka kin ekta ai qa,

Palos kaškapi un kin he mico, qa koška kin de cicahi kta e econ maši, taku oniciyake kta keya ce, eya.

19 Hehan akicita tancan tanka he nape yuze ça kicišnana icunom iyaye ça, Taku omayakidake kta he, eya iwanga.

20 Unkan, Heyakecinhan Juda wicašta kin omniciye kin en Palos au nišipi kta wanna konzapi, taku sanpa atayedan iwangapi kta seca e heon heyapi.

21 Tuka niš awicayupte šni wo. Wicašta wikcemna tom aktonpi kin wokonze on waki-conzapi, Palos ktepi šni hehanyan takudan yutapi kte šni qa takudan yatkanpi kte šni, hena nakaha wiyeya yukanpi qa niš awicadupte kte cin he ape yukanpi, eya.

22 Hehan akicita tancan tanka koška qon hdicu ye ça, Hena omayakidake cin he tuwedan sdonye ye šni wo, eciya.

23 Qa hehan akicita tancan nom wicakico qa, Akicita opawinge nom taku owasin on wicayuwiyeya po, qa nakun šuktanka akan yotankapi kin wikcemna šakowin, qa wahukeza yuhapi kin opawinge nom, hanyetu kin oape iyamni, hehan Kesarea ekta yapi kta ce.

24 Nakun šuktanka wiyeya ehnaka po, Palos akan yankekiyapi kta, qa Phelika wicašta itancan yanke cin he en tanyan aipi kta, ewicakiya.

25 Hehan wowapi wan kaken kaga :

26 Kladios Lusias, Phelika wicašta itancan iyotan wašte kin *wowapi kicaga ce*. Wookiye.

27 Wicašta kin de Juda wicašta kin icupi, qa wanna ktepi kta hehan akicita hduha en wai, qa etanhañ iwacu, he Roma wica-

šta kin heca e nawañon kin heon.

28 Qa taku iyaonpapi kin he tanyan sdonwaye kta wacin, heon iye omniciye yuhapi kin en awai ;

29 Qa iye wicoope hduhapi kin eciyatanhan wiwangapi kin iyaonpapi wanmdaka, tuka taku on ktepi, qa kaškapi kta e iyaonpapi kin takudan iyewaye šni.

30 Qa wicašta kin de Juda wicašta nahmana iyape yukanpi kin he omakiyakapi qehan, kohanna niye ekta aye wicawaši, qa tona taku en aupi kte cin hena hecen iyaonpeya eniciye wicawaši. Tanyan yaun nunwe.

31 Hehan akicita iš econ wicaši qon iyecen Palos hanyen icupi, qa Antipatris en aipi ;

32 Qa hanhanna hehan šuktanka akan yotankapi kin hena hetanhan ayapi kta e elipewicayapi, qa conkaške kin ekta hdicupi.

33 Unkan hena iš Kesarea ekta ipi, qa wicašta itancan wowapi qon qupi qehan, hehan Palos itokam ehdepi.

34 Unkan iye he yawa, qa makoce kin tukte e etanhan un hecinhan wiwanga ; qa Kilikia etanhan un kin he sdonya ;

35 Hehan, Tohan tona taku iyanionpapi kin hena nakun hipi kinhan, hehan miš eya naciñon kta ce, eya ; qa Herod woyaco tipi tawa qon he ohna awanyag wicaši.

#### WICOWOYAKE 24.

1 Unkan hetanhan anpetu zaptan, hehan Ananias wawayušna itancan kin hee, qa hunkawicayapi kin om, ekta apamahde ya, nakun wicašta ieksapa wan, Tertulos eciyapi, hena wicašta itancan kin itokam Palos taku iyaonpapi kta.

2 Unkan en kicopi qehan, Tertulos taku iyaonpe ça heya ;

3 Niye enitanhan wookiye tanka unhapi ce, qa waawandake cin eciyatanhan oyate kin de en wicohan wašte econpi ece kin he ohinniyen qa owancaya unki-cupi, qa on, Phelika iyotan wašte, wopida unkeniciyapi ce.

4 Tuka sanpa nagiyeciye kte šni, heon ceciciya ce, nitowaonšida kin ón wicoie wanjikji naunyahonpi kta.

5 Wicašta kin de makošice, qa maka kin owancaya Juda oyate cante okičuninwicaye cin, qa yuomdecapi wan Nazareth etanhanpi, ewicakiyapi kin he en mdetahunkapi kin he wanji dee e iyeunyanpi ce.

6 He tipi wakan kin yušape kta ; unkan hehan unkiš unki-cupi, qa wicoope unkitawapi kin eciyatanhan unyacopi kta ;

7 Tuka Lusias akicita tancan tanka kin ekta i, qa wicowašake tanka on unnapapi kin etanhan eyaku.

8 Qa tona taku iyaonpeya eyapi kin hena niye kin ekta u wicaši. Hena wiwicanunge cinhan taku iyaunkonpapi kin owasin atayedan sdonyaye kta ce.

9 Unkan Juda wicašta kin is waayuptapi qa, Hena hecetu ce, eyapi.

10 Hehan wicašta itancan kin Palos ie kta e namkicawin, hehan waayupte ; Oyate kin de en waniyetu ota wicašta wayaco nanka e sdonwaya, heon etanhan nakaha iyuškinyan wowahdaka.

11 Hecen Jerusalem ekta cekiya imdamde cin, hehantanhan wanna anpetu ake nomnana e sdonyaye kta oyakibi.

12 Qa tipi wakan kin ohna tuwe kici awaknica ecen wannam-

yakapi šni, qa omniciye tipi kin ohna, qa otonwe kin en, oyate kin wicayuumdeca waun šni.

13 Qa nakaha taku iyamaonpapi kin hena yasutapi kta e okihipi šni.

14 Tuka de ociciyaka, yuomdecapi kin cajeyatapi qon he canku kin ohna hunkake wicawaye cin Wakantanka tawapi kin ohowada, qa wicoope, qa wicašta wokcan taku owapi qon hena owasin wicawada :

15 Qa Wakantanka wacinwaye, qa wicašte cin, wašte šica ko, ake woekicetu kte cin he ape waun, he is iyepi nakun hecen wicadapi.

16 Heon Wakantanka, qa nakun wicašta kin en tawacin takudan iyaonpepica šni waun kta e ohinniyen opimičiya ce.

17 Unkan nakaha waniyetu ota iyohakam, mitaoyate kin taku qupi, wošnapapi ko wicaweci-cau kta e wahdi.

18 Qa hecen tipi wakan kin ohna mihduska waun, wicota qa owodutaton kin unmana en owape šni, ecen Juda wicašta Asia etanhan wanjikji wanmayakapi qon.

19 Hena eepi kin niye en nihiyupi, qa taku yuhapi kinhan iyamaonpapi kta tuka.

20 Qa dena is, omniciye kin en nawajin kin, he icunhan taku šica ecamon kin taku sdonyapi kinhan oyakapi kta.

21 Tuka wicacokaya nawajin qehan, wicoie wanjidataninyan epa, Anpetu kin de wicašte cin woekicetu kte cin heon mayadacopi, epe ciqon hee, eya.

22 Unkan Phelika hena nahon qehan, qa canku kin de on sanpa tanyan sdonye kta cin kin heon, hde wicaši qa, Tohan Lusias akicita tancan tanka hi kinhan,



niyepi kin on taku owasin sdon-  
waye kta ce, eya.

23 Qa akicita tancan wan Pa-  
los awanyag kiye ça, woozi yuhe  
kta, qa iye takuwicaye cin tuwe  
en hi qa okiye kta cin kinhan  
tehinda kte śni, *keya*.

24 Unkan anpetu tonana iyo-  
hakam, Phelika, qa tawicu Dru-  
sila eciyapi, Juda winohinca kin  
heca, he kici hi, hehan Palos  
kico, qa Messiya wacinyanpi kin  
on nahon.

25 Unkan Palos wicoowotana,  
qa iyatahde iciyapi śni, qa  
woyaco u kte cin hena oyake  
cin, he icunhan Phelika cancan,  
qa, Nakaha ekta hda wo, tohan  
tanyan iyomakipi kinhan ake  
cico kta ce, eya.

26 Palos kiyuške kta e on ma-  
zaska qupi kta kecin, heon kico,  
qa kici wohdaka ece.

27 Tuka wanna waniyetu non-  
pa, hehan Phelika yanke cin en  
Porkios Phestos hiyotanka. Un-  
kan Phelika Juda oyate kin iyo-  
kipi wicaye kta cin, qa heon Pa-  
los kaškapi ecen eħpeya kihda.

### WICOWOYAKE 25.

1 Unkan Phestos makoce kin  
he en hiyotanke cin, iyohakam  
anpetu yamni, hehan Kesarea  
etanhan Jerusalem ekta itawan-  
kanhde iyaya.

2 Unkan wawayuśna itancan  
qa Juda wicašta tokapapi kin,  
Palos on okiyakapi qa cekiyapi;

3 Cinkiyapi, Jerusalem ekta  
Palos au wicakiye kta, qa iyepi  
kin nahmana ktepi kta e tahepi  
iyapepi kta.

4 Tuka Phestos, Palos Kesar-  
rea ekta awanyakapi kta, qa  
iye kin ecadan ekta hde kta,  
*keya*.

5 Qa niyepi kin etanhan tona

waškapi kinhan, apamahde om  
mde kta, qa wicašta kin he taku  
en un kinhan wiyaonpapi kta  
ce, eya.

6 Unkan anpetu śahdogan, qa  
iś wikcemna hena om un kin,  
hehan Kesarea ekta hda, qa  
ihanhanna qehan woyaco oiyo-  
tanke kin akan kiyotanke cin,  
hehan Palos en au wicaši.

7 He en hi, unkan hehan Juda  
wicašta Jerusalem etanhan hipi  
qon hena ihdukśan najinpi, qa  
wiyaonpapi ŧanka ota Palos en  
aupi, tuka yaacetupi okihipi śni.

8 Hehan iye wohdaka; Juda  
oyate wicoope hduhapi, qa tipi  
wakan kin en, qa nakun Kesar  
en takudan wawaħtani śni ce,  
eya.

9 Tuka Phestos Juda oyate kin  
iyokipi wicaya cin, heon Palos  
ayupte ça heciya; Jerusalem  
ekta de ça, heciya mitokam de-  
na on niyacopi kta tawaħenyaya  
he, eya.

10 Hehan Palos, Kesar woya-  
co oiyyotanke tawa kin en nawa-  
jin, hen mayacopi kta iyececa;  
Juda oyate kin taku śice cin ta-  
kudan ecawicawecon śni e tan-  
yan sdonyaya.

11 Wawaħtani, qa taku śica  
on maktepi kta iyecece cin he  
ecamon kinhan, maħe kta tawa-  
ħenyaya tuka; tuka dena taku  
iyamaonpapi kin taku śni kin-  
han, tuwedan hena mayuhe wi-  
cakiye kte śni. Kesar cajemda-  
ta ce, eya.

12 Hehan Phestos, tona owi-  
capeya wayaco iyotanke cin he-  
na om wohdaka, hehan ayupta;  
Kesar cajedata, Kesar ekta de  
kta ce, eya.

13 Unkan anpetu tonana iyo-  
hakam, Agrippa wicaštayatapi  
kin Bernike kici, Phestos nape  
yuzapi kta e on Kesarea en hipi.

## WICOWOYAKE 26.

14 Qa anpetu ota hen yukanpi, hehan Phestos wicaštayatapi kin Palos on okiyake ça heya, Wicašta wan Phelika kaška ehnahe cion he nahanhin ecen yanka.

15 Jerusalem ekta wai qehan, wawayušna tankapi, qa Juda hunka wicayapi kin hena he kapi, qa omakiyakapi, qa yacopi kta e cinpi.

16 Hena hecen awicamdupte ça, Wicašta wan taku iyaonpapi kinhan, tona taku iyaonpeya eyapi kin wicitokam wiyaonpapi kin en waayupte iyowinkiyapi šni kinhan, țeyapi yacopi kin he Roma wicohan šni ce, epa.

17 Heon hena den hipi, unkan mdutehan šni, tuka ihanlianna hehan, woyaco oiyotanke kin akan wakimdotanke ça, wicašta kin he en au wicawaši.

18 Hehan tona taku iyaonpapi kin hena najinpi, tuka token wacami qon he iyecen takudan iyaonpapi šni.

19 Tuka iyepi wocekiye eyapi kin eciyatanhan wiwicawangapi kin wanjikji he en aupi, qa nakun wanji Jesus eciyapi kin he ța, tuka ake kini kin, Palos keya ece.

20 Unkan wiwicawangapi heca kin imdukan šni heon, Jerusalem ekta de ça heciya dena on niyacopi kta tawațenyaya he, eya imunga.

21 Tuka Palos Sebastos cajeyate ça, he itokam yacopi kta keye çehan, Kesar ekta aye wicawakiye kta hehanyan awanyag wicawaši.

22 Hehan, Miš eya wicašta kin de nawahion kta wacin ce, Agrippa Phestos eciya. Unkan is, Heyakecinhan nayahion kta ce, eya.

23 Unkan ihanlianna qehan,

Agrippa Bernike kici wokoyake waštešte kiçun hipi, qa wanahion tipi kin en tin ipi; qa nakun akicita tancanpi kin, qa otowe en wicašta tokapapi kin hena ko; hehan Phestos econwicaši kin on Palos en ahipi.

24 Unkan Phestos heya, Agrippa wicaštayatapi kin, qa wicašta tona den om unkanpi kin, wicašta kin on Jerusalem ekta, qa deciya nakun, Juda oyate kin owasin cemakiyapi qa, Sanpani kta e hecetu šni ce, eya hotaninpi qon, he dee wandakapi.

25 He taku šica econ kin, on țe kte cin, takudan iyewaye šni, qa is iye Sabastos cajeyate cin, heon ekta ayapi kta e wakonza.

26 Tuka he on, mayuhe cin taku wecage kte cin atayedan takudan mduhe šni. He etanhan nakaha en cicahipi, wicaštayatapi kin niye iniyotan, hecen tohan tanyan wiwangapi kinhan, token wakage kte cin taku mduhe kta.

27 Wicašta wan kaškapi kin he heciya aye šipi, qa wiyaonpapi kin takudan kagapi šni kinhan, he hecetu šni imdukan ce, eya.

## WICOWOYAKE 26.

1 Hehan Agrippa Palos heciya, Wanna woyahdake kte cin iyowinniciyapi ce. Unkan hehan Palos nape kin hdugate ça wohdaka.

2 Agrippa wicaštayatapi kin, Juda oyate taku iyamaonpapi kin owasin nakaha nitokam wowahdake kte cin heon imduškin.

3 Juda wicohan kin wiwangapi ko owasin tanyan hdukan nanka sdonwaya, heon etanhan. Qa hecen ceciciya ce, wacin tanka on namahion wo.

4 Tokaheya tanhan Jerusalem

## OHANYANPI QON.

ekta mitaoyate kin om, homakšidan ehantanhan, token oňanyan waun qon Juda wicašta kin owasin sdonyapi.

5 Token ohoundapi ece kin owotanna hince cin en opeya waun, Pharisee hemaca, hena e otokaheya tanhan sdonmayanpi, oyakapi cinpi unkanš.

6 Qa nakaha Wakantanka hunkake wicunyanpi kin iwahowicaye ciqon he aepi kin on, den mayacopi kin ecen nawajin.

7 De ekta wicoun unkitawapi ake nonpapi kin iyohipi kta e ape yuknpi, qa anpetu hanyetu ko cekiyapi ece. Agrippa wicaštayatapi kin, woape kin de on Juda wicašta wimawangapi qon.

8 Wakantanka wicašte cin ake ekicetu wicaye cin he tokeca e he taku wicadapica šni kecanipi he.

9 Miš eya Jesus Nazareth etanhan caje kin on, taku ota kipa-jinyan ecamon kta iyececa kepee ciqon.

10 Jerusalem ekta hena hecen ecamon qon; qa wawayušna tankapi kin wowašake maqupi kin on, wicašta owotanna kin ota wicakaška tipi kin en iye-wicawaye ça, te yapi kta wicayacopi qehan, miš eya iyecen epa ece.

11 Qa omniciye tipi kin iyaza otakiya wicawakaštake ça, woaštéhda wicawakiye ça, nina canniye wicawaye cin heon otonwe tokeca ekta šicaya wicawakuwa.

12 He icunhan wawayušna tankapi kin wowašake wowapi ko maqupi kin, he yuha Damaskos ekta imdamda.

13 Unkan tahepi iho, wicaštayatapi, anpe cokaya kin hehantu, iyoyanpa wan anpetu wi kin sam iyeya wiyatpa kin he wan-

mdaka, he ihdukšan iyoyanpa maye ça tona om mawani kin hena nakun.

14 Unkan owasin makata ehpeunkičiyapi, hehan wicahowan nawahon, Hebrew iapi on hecen emakiya, Salos, Salos, tokeca šicaya mayakuwa he, can pesto kin nayahtake cin he teħika ce.

15 Unkan miš, Itancan, nituwe he, epa. Unkan, Jesus šicaya yakuwa kin he miye ce, eya.

16 Tuka inajin, qa nisiha kin on najin wo; token wandake ça, tokata taku wanyag ciciye kte cin hena en waayatanin, qa ookiye kin cicage kta e heon nakaha wanmayag ciciya.

17 Oyate kin etanhan ecihdaku kta, Ikcewicašta kin nakun, hena e ekta nakaha ye ciši.

18 Išta wicadumdaye ça, otpaza etanhan iyoyanpa ekta, qa Satan towašake kin etanhan Wakantanka ekta wicaduhomni kta; qa hecen wacinmayanpi kin on wahtanipi wicakicicajujupi kin, qa tona ska wicakagapi kin hena om woyuha yuhapi kta ce.

19 Hecen on, Agrippa wicaštayatapi kin, maħpiya wowanyake kin he ceŧunwahda šni.

20 Tuka tokaheya Damaskos en yakonpi, qa Jerusalem, qa Juda makoce kin owancaya, qa nakun Ikcewicašta kin, ihduacetupi, qa Wakantanka ekta ihduhomnipi kta, qa ihduacetupi wicohan kin econpi kta hena hecen owicawakiyaka ece.

21 Hena on etanhan, Juda wicašta kin tipi wakan kin ohna mayuzapi, qa maktepi kta tuka.

22 Tuka Wakantanka omakiye cin heon anpetu kin dehanyan wani, qa tona ciqapidan tankinyan ko, wicawakiyaotanin,



qa wicašta wokcan kin Moses kici taku u kte cin oyakapi qon henana owicawakiyaka ece.

23 Messiya kakije kte ça iye tokaheya wicašte cin etanhan najin kta, qa oyate kin Ikce-wicašta ko iyoyam wicaye kte cin.

24 Hena hecen eya, unkan Phestos hotankakiya ie ça, Palos niyuhnaškinyan, wowapi ota onspeničiciye cin he wicayuhnaškinyan en iyeniyan ce, eya.

25 Tuka iye, Phestos iyotan wašte kin, mayuhnaškinye šni, tuka wowicake wicowalıbadan oje kin epa ce, eya.

26 Qa wicaštayatapi kin is hena tanyan sdonya, heon itokam waditagya wowahdaka, hena taku kin iye kin anakihmanpi šni e mdukan, okahimin en econpi šni nakaes.

27 Agrippa wicaštayatapi kin, wicašta wokcan kin hena wicayada he. Wicayada e sdonwaya.

28 Hehan Agrippa Palos heciya; Kitan ecinyan Kristian hemaca kta e awacinmayaya ce.

29 Unkan Palos heya, Wakan-tanka cewakiya ce, niye nišana šni, tuka tona anpetu kin de namahonpi kin owasin, kitan ecinyan hee šni, tuka ocowasin miš waun kin iyecen yaunpi kta, tuka icaške kin dena ope kte šni.

30 Hena hecen eya, unkan hehan wicaštayatapi, qa wicašta itancan kin, Bernike kici, qa tona om iyotankapi kin hena ko najinpi;

31 Qa icuonom yapi qa, Wicašta kin de taku on fe kte ça, kaškapi kte cin takudan econ šni ce, iyakitedan ekiciyapi.

32 Hehan, Wicašta kin de Kesar cajeyate šni unkanš kiyuškapi kta tuka, Agrippa Phestos eciya.

## WICOWOYAKE 27.

1 Unkan Italia ekta watom unyanpi kta e wanna konzapi, hehan Palos qa wicakaškapi tokeca kin, akicita tancan wan, Sebastos taobe kin etanhan, Julios eciyapi kin, he wicayuhekiyapi.

2 Unkan wita wata wan Adramutium etanhan, Asia makoce kin ekta tuktekten oihunni kte cin he en unkopapi, qa pacanan iyeunyanpi, qa Aristarkos Makedonos, Thesalonike etanhan, he kici unyanpi.

3 Unkan ihanhanna qehan, Sison en unkihunnipi. Unkan Julios Palos tanyan okicihan, takuwicaye cin ekta wicai, qa hena etanhan taku yuhe kta e iyowinkiya.

4 Unkan hetanhan pacanan iyeunyanpi, qa Kupros ihukuya watounpapi, tatoheya unyanpi kin heon.

5 Unkan Kilikia qa Pamphulia miniwanca kin unkihunnipi qehan, Lukia en Mura eciyapi kin he ekta unhipi.

6 Unkan hen wita wata wan Aleksandria etanhan, Italia ekta watom ye kte cin, he akicita tancan kin wanyake ça, he en ope unyanpi.

7 Unkan anpetu ota iwaštedan watounpapi qa kitan se Knidos en iyotakons unkipi, tatoheya unyanpi nakaes, hehan Krete ihukuya, Salmone iyotakons watounpapi.

8 Qa he kitan se kapeya unyanpi, hehan makoce wan Oihunni wašte eciyapi kin he en unkipi, he Lasea otonwe kin ikiyadan.

9 Wanna anpetu ota, qa watopapi kin okokipe aya, hamdepi tanka kin warna enakiyapi, hehan Palos wahokonwicakiya;

10 Qa hewicakiya, Wicašta kin, watounpapi kte cin de on wita wata kin taku ohnaka ko yutakunipi kte šni, qa nakun unkiyepi kin iyotanhan iyeunkiyapi kta e imdukcan ce, eya.

11 Tuka akicita tancan kin, wahektape cin qa wita wata tawa kin hena anawicakicigoptan, qa Palos ie cin he wicada šni.

12 Unkan oihunni kin he en waniyetu osan yukanpi kte cin he wašte šni, heon hetanhan yapi, qa okhipi kinhan, Phenike ekta watom ipi, qa hen waniyetu owanji yukanpi kta, wicota keyapi; Krete en oihunni wan itokagatanhan, wiyohpeyata ohna waziyata etkiya huta kin yuškomya wanke cin hee.

13 Unkan okaga tanhan tate kin iwaštedan hiyu, qa hecen token wacinpi qon wanna ecetu kecinpi, hehan kiyuškapi qa Krete ikiyedan watopapi.

14 Tuka iecadan, tateyanpa wan ohitike cin he en iyapa hiyu, he Tate-taja eciyapi.

15 Unkan wita wata kin nina iyapa, hecen tatoheya yapi okhipi šni, hehan kaha iyeunyanpi iyowinunkiyapi.

16 Unkan wita wan Klauda eciyapi, he ikiyadan unyanpi, hehan kitan hin wata cistinna kin icu unkokhipi.

17 He yuwankan ehdakupi, qa icaške kin unpi, qa wita wata kin opta yuskiskitapi, hehan wiyaka šice cin en iyohpeyapi kta kokipapi, qa heon šina on watopapi kin pašpapi, qa hecen tate on kaha iyewicayapi.

18 Qa nina unkakihanšicapi, heon ihanhanna, hehan wata kin etanhan taku tankan elpeyapi.

19 Qa *anpetu* iciyamni hehan, unnapapi kin on, wita wata kin

en, taku wowinyunyanpi kin minin elpeunyanpi.

20 Unkan anpetu ota, anpetu wi wicanhipi ko tanin šni un, qa nina unkakihanšicapi, hehan unhipi kta unkecinpi qon he wanna unkayuštampi.

21 Tuka tehan takudan yute šni unpi kin, hehan Palos wicacokaya najin, qa, Wicašta kin, anamayagoptanpi qa Krete etanhan pacanan iyeyayapi kte šni iyececa, hecen taku šice ça wicakakije cin de nihyahdepi kte šni tuka.

22 Qa nakaha ceciciyapi ce, cante wašte po; tuwedan ništapi kte šni, tuka wita wata kin hecedan.

23 Wakantanka ohowada, qa iye mayuhe cin he taohnihde ye cin hinhan en mabinajin.

24 Qa, Palos kokipe šni wo; Kesar itokam inayajin kta, unkan tona om watoyape cin owasin Wakantanka niču ce, eya ce.

25 Heon etanhan, wicašta kin, cante wašte po; Wakantanka wicawada, token emakiye cin he ecetu kte.

26 Tuka wita wan en iyeunyanpi kta ce, eya.

27 Unkan otpaza iaketopa kin, hehan Adria miniwanca kin ohna kaha iyeunyanpi kin icunhan, hanye cokaya hehan watope wicakiyapi kin makoce wan ikiyadan upi kecinpi.

28 Qa hehan mazasu hañonta ikoyake cin minin iyeyapi, qa akatinpi wikcemna nonpa e iye-yapi. Hetanhan kitanna kapeya yapi, hehan ake econpi, unkan wanna akatinpi ake zaptan.

29 Unkan imnija kin en iyewicayapi kta e kokipapi, heon wahektapa kin etanhan maza aspeiciyapi tom minin iyeyapi, qa anpao kta e cinpi hinca.

30 Unkan watope wicakiyapi kin wita wata kin etanhan najicapi kta akitapi, qa wata cistina qon he mini kin ekta yuhukun iyeyapi, watokapa tanhan maza aspeiçiyapi minin iyeya konzapi.

31 Unkan Palos akicita tancan kin akicita ko hewicakiya; Dena wita wata kin obna yukanpi šni kinhan, yanipi oyakhipi kte šni ce.

32 Hehan akicita kin wata cistina hañonta ikoyake cin bapsakapi, qa kun iyeyapi.

33 Wanna anpao kta hehan Palos owasin taku yutapi icu wicaši, qa heya, Nakaha takudan yute šni yaunpi anpetu iake topa kin he dee, hehanyan takudan iyacupi šni.

34 Heon ceciciyapi ce, taku yutapi icu po, on wanišakapi kta ce, paha nitawapi sukaza wanjidan hinhpaye kte šni ce.

35 Hena hecen eya hehan aguyapi icu, qa owasin wicitokam Wakantanka cekiye ça, kiyuše ça yuta.

36 Hehan owasin cante waštepi, qa woyute icupi.

37 Unkan wita wata kin obna, wicanagi owasin opawinge nom sanpa wikcemna šakowin sanpa šakpe unyakonpi.

38 Unkan taku yutapi on imnanpi hehan wita wata kin yukapojedanpi, qa aguyapi su kin minin ehpeyapi.

39 Unkan wanna anpa kamdeze çehan, makoce kin iyekiyapi šni; tuka kałmin wan huta oihunni wašte kin he wanyakapi, qa okhipi kinhan, he en wita wata kin aipi kta, keyapi.

40 Hehan maza aspeiçiyapi kin bapsag iyeyapi, qa minin ehpeyapi, qa iyupse yuza icaške kin kiyuškapi; hehan šina watope-

kiyapi tanka kin yuwankan iyeyapi, qa huta kin ekta yapi.

41 Tuka tukten miniwanca nom kokijuya hiyu kin he en iyolhpayapi, qa hen wita wata kin azi yapi. Unkan watokapatanhan kin he sutaya ihan, tuka wahektapatanhan kin taja on kamden iyeya.

42 Unkan akicita kin wicakaškapi kin hena wicaktepi kta e konzapi, okinni wanjikji huta kin ekta niwanpi, qa najicapi kta, keyapi.

43 Tuka akicita tancan kin is Palos nikiye kta cin kin, heon taku econpi kte cin iyowicaki šni; qa hehan tona niwan okhipi kin hena tokaheya minin ehpeiçiyapi qa huta kin ekta niwanpi kta, keya.

44 Hehan tona nahañin en un kin hena, hunñ canmdaska akan, qa hunñ is wita wata etanhan onšpašpadan akan iyayapi. Unkan hecen owasin huta kin ekta tanyan iyohipi.

## WICOWOYAKE 28.

1 Unkan ekta tanyan iyohipi hehan wita kin he Melite eciyapi e sdonyapi.

2 Unkan Ikcewicašta kin nina taku wašte ecaunkiconpi, cetipi qa otoiyohe en unkiçipi, nina magaju qa osni kin heon etanhan.

3 Unkan Palos can cikcistina ota pahi, qa peta en aonpa hehan, wamduškadan wan iyokapipi kin etanhan hiyu, qa Palos nape kin en ikoyag içiya.

4 Unkan nape kin en taku ocinšice cin de ikoyake cin he Ikcewicašta kin wanyakapi qehan, iyakitedan hekiciyapi; Awicakehan wicašta kin de tin wicakte kin heca, miniwanca kin



etanhan ni hiyu ešta, taku owotanna kin he ni kta e iyowinkiyeni ce.

5 Tuka wamduškadan qon nape kin etanhan peta kin en hdatata ešpeye ça tuktedan kiunniye šni.

6 Tuka kapo kta, qa išihnuhan-na ťa iyaye kta kecimpi. Qa tehan ekta etonwan yukampi qa tuktedan kiunniye šni un kin wanyakapi, hehan tawacin kin tokeca hinhdapi qa, De taku wakan kin hee ce, eyapi.

7 Unkan hen ikiyedani, wita kin ohna wicašta tokapa, Publios eciyapi kin he makoce onšpa yuha; unkan he tin hiyu unšipi, qa anpetu yamni hehanyan tanyan wo unqupi.

8 Unkan Publios atkuku kin wayazanka, tancan kate ça we ece iheya. Palos he en i, qa cekiyeni ça, nape on aputake ça asniyan.

9 Hecen econ, unkan hehan wita kin en tona wowayazan yuhapi kin hena en hipi, qa asni wicayapi.

10 Heon etanhan nina unkinihanpi, qa hetanhan unyanpi kte cin, hehan taku uncinpi kin owasin unqupi.

11 Unkan wi yamni, hehan wita wata wan Aleksandrea etanhan, he wita kin hen waniyetu wanke cin, he wiyokiyedan yuke cin, Jupiter cekpapi tawa kin hee, unkan he en unkopapi.

12 Qa Surakusa ekta unkihunni, qa anpetu yamni unyakonpi.

13 Unkan hetanhan ohomni unyanpi, qa Regium ekta unhipi. Qa anpetu wanjidan iyohakam, tate itokaga tanhan uya, qa anpetu inonpa hehan Puteoli en unkipi.

14 Hen hunkawanjin kiciyapi kin *wanjikji* iyewicunyanpi, qa anpetu šakowin om unyakonpi

kte e cinpi. Hehan Roma ekta kiyeni unyanpi.

15 Unkan heciyatanhan hunkawanjin kiciyapi kin unkiyepi eciyatanhan nahonpi, qa itkounkipapi au, Appiiphorum qa Owote tipi yamni kin hehanyan. Hena Palos wanwicayaka, unkan Wakantanka wopida eciye ça wakišag iciya.

16 Unkan Roma ekta unkipi, hehan akicita tancan qon wicaške cin hena wicaštayatapi taakicita tancan kin qu, tuka Palos akicita wanjidan awanyag un kin he kicišnana yanke kta e iyowinkiyapi.

17 Unkan anpetu yamni iyohakam, Palos Juda wicašta tokapapi kin wicakico. Qa en mniciyapi hehan hewicakiya, Wicašta hunkawanjinciyapi, atewicunyanpi oyate qa wicošan kin en taku šica takudan ecamon šni ešta, Jerusalem ekta makaškapi ecen Roma oyate napepi kin en iyemayanpi.

18 Hena iš wimawangapi qehan makiyuškapi kta, miye en taku on maťe kte cin takudan *iyeyapi* šni.

19 Tuka Juda wicašta kin nina tehindapi kin heon, Kesar caje mdate kta iyececa wadaka, mitaoyate kin taku iyawicawaonpe kte cin takudan mduhe šni tuka qon.

20 Heon etanhan nakaka cico, wanciyakapi qa wociciyakapi kta, Israel oyate awacinpi kin he on maza icicahiša kin de on makaškapi ce, eya.

21 Hehan iš eya heciyapi, Juda makoce kin etanhan niye on wuwapi unkahipi šni, qa hunkawanjin kiciyapi heciyatanhan hipi kin tuwedan taku šica iyanionpe ça oyake šni.

22 Tuka niš token nitawacin

## WICOWOYAKE 1.

kin naunnihonpi kta uncinpi, yu-  
omdecapi kin de owancaya ya-  
šicapi e sdonunyanpi ce.

23 Unkan anpetu wan cajeya-  
tapi kin he en wicota Palos  
yanke cin en hipi; unkan iš  
Wakantanka tokiconze kin yao-  
tanin, qa onspewicakiye ça, Mo-  
ses toope kin wicašta wokcan  
ko, etanhan Jesus on wahokon-  
wicakiya, anpao kin etanhan  
otpaze cin hehanyan.

24 Unkan hunh taku oyakapi  
kin wicadapi, qa hunh iš wica-  
dapi šni.

25 Unkan okonwanjidan awa-  
kicinpi šni kin, hehan kihdapi,  
Palos wicoie wanjidan oyake  
cin iyohakam; Woniya Wakan  
kin Isaya wicašta wokcan kin  
en, hunkake wicunyanpi kin  
tanyan wowicakiyaka;

26 Qa heya, Oyate kin de ekta  
wicai, qa heya wo; Wanañonpi  
kin on nayañonpi kta tuka oya-  
kahñigapi kte šni, qa wawanya-

kapi kin on wandakapi kta tuka  
widukcanpi kte šni :

27 Oyate kin de cantepi kin  
cepa aye ça nogepi kin on kitan  
se wanañonpi, qa istapi kin o-  
lmus icupi; ista kin on wawan-  
yakapi kte šni, qa noge kin on  
wanañonpi kte šni, qa cante kin  
on okaññigapi kte šni, qa ihdue-  
cetupi kte šni, qa miš okizi wi-  
cawaye kte šni heon etanhan.

28 Hecen on he sdonya po,  
Wakantanka wiconi tawa kin  
Ikcewicašta kin wicaqupi, un-  
kan hena iš nañonpi kta ce.

29 Hena hecen eya, unkan Ju-  
da wicašta kin kihdapi, qa nina  
hdokinicapi.

30 Unkan Palos waniyetu nom  
tipi iyunwin ton odote cin he  
ohra yanke ça, tona en hipi kin  
owasin tin u wicaši.

31 Wakantanka tokiconze kin  
yaotanin, qa Jesus Messiya Itan-  
can taku tawa kin waditagya  
oyaka ece, tuwedan tehinda šni.

---

## PALOS,

# ROMA OYATE

## WOWAPI WICAKICAGE CIN.

---

### WICOWOYAKE 1.

1 Palos Jesus Messiya taokiye,  
yewicašipi kin en kicopi, Wa-  
kantanka tawootanin wašte on  
kahñigapi;

2 Ehanna wowapi wakan kin en  
wicašta wokcan oyakapi qon hee;

3 Iye Cinhintku Jesus Messiya  
Itancan unyanpi kin heon etan-  
han; he qe wicacehpi eciyatan-  
han Dawid cinca kin hetanhan  
icaga;

4 Qa wowašake on Wakantan-  
ka Cinhintku kin hee e yuotan-  
inpi, Woniya Wakan kin eci-  
yatanhan, wiconțe etanhan piya  
ikicage cin he en;

5 Iye kin eciyatanhan wowašte  
unkicupi, qa oyate owasin wa-  
cinyanpi kin anagoptanpi kte cin  
heon yewicašipi wicoñan kin he  
nakun, iye caje kin on;

6 Hena ehna Jesus Messiya  
wicakico kin he niyepi.

7 Tona Roma ekta un kin owa-

sin, Wakantanka wašte wicakida, yaowotanpidan kte cin on wicakico kin hena, *wowapi cica-gapi*. Wowoaonsida, wookiye ko, Wakantanka ateunyanpi, qa Jesus Messiya Itancan kin etanhan, nicipi un nunwe.

8 Tokaheya, Jesus Messiya eciyatanhan, niyepi owasin on etanhan, Wakantanka mitawa kin wopida ewakiya ece, niye wacinyayapi kin he maka kin owancaya cajeyatapi kin heon.

9 Wakantanka minagi kin eciyatanhan ohowada, iye Cinhintku tawootanin wašte kin en, he sdonmayan, ayaştan şni wocekiye epa eca, ohinniyan cajeciya-tapi ece ;

10 Qa nakaha Wakantanka tawacin kin eciyatanhan ekta ciupi owakihi kte cin heon cewakiya ece.

11 Wanciyakapi nina wacin, woniya etanhan taku wicaqupi wan ciqupi kta, on niyusutapi kte cin heon etanhan.

12 Niyepi kin on iyuşkinmayanpi kte cin he waka, niş niye qa miş miye napin wacinunyanpi kin on etanhan.

13 Mihunkawanji, he de sdoney şni dukanpi kta wacin şni, wana ota ekta ciupi kta kepca, tuka dehanyan iyomakipi şni, niyepi ekta waskuyeca wanjikji mduhe kta wacin, oyate toktokeca kin en *mduhe* cin he iyececa.

14 Helenes, Ikcewicašta ko, ksapapi, wacintonpi şni ko, hena iyohi wicaweciye şni waun.

15 Hecen token owakihi kin, niyepi nakun Roma ekta yaunpi kin, wootanin wašte kin ociciyakapi kta wacin.

16 Messiya tawootanin wašte kin on imaštece şni ; he niwicaye kte cin on Wakantanka to-

waşake kin hee, tona wicadapi kin hena en, Juda wicašta kin he tokaheya, qa hehan Helenes wicašta kin hena.

17 Heon etanhan Wakantanka owotanna ohanye cin he wacinyanpi kin etanhan wacinyanpi ekta yuotaninpi ; wowapi qon iyececa, Tuwe owotanna kin he wacinyanpi on ni kta ce.

18 Mahpiya kin etanhan Wakantanka tocanniye kin yuotaninpi, woaktaşni owasin qa wicašta woalitani econpi kin en, tona woalitani on wowicake kin anaptapi kin hena en.

19 Hena on Wakantanka token sdonyapi kte cin taninyan un ; Wakantanka sdoney wicakiya nakaes.

20 Maka kagapi kin hetanhan Wakantanka towakan qa towaşake otokahe wanice cin hena tanin, hena wanyagpica şni ešta, taku kage cin on etanhan sdonyapi ece ; hecen on woanalibe yuhapi kte şni.

21 Qa hecen Wakantanka sdonyapi, tuka Wakantanka iyecen yutanpi şni, qa pidapi şni ; tuka tawacinpi kin ekta waňanhan-icida ayapi, qa iye cantepi wacintonşni kin otpas aya.

22 Ksapeicidapi kin en icunhan witkotkoka icalı ayapi.

23 Qa Wakantanka tepica şni towitan kin he wicašta te kte cin ouncage kin iyecen yutokecapi, qa zitkadan, wahutopa, wanutka kin hena koya.

24 Heon iye cantiheyapi sıce cin en Wakantanka awicayuştan, ihduşapapi kte ca, iye tancanpi kin kiciyuşiltinpi kte cin heon.

25 Hena Wakantanka wowicake tawa kin woitonşni kagapi, qa taku icalıyapi kin he yuonihanpi qa ohodapi, waicalı-



ye cin he isanpa, he qe owi-  
hanke wanin yawaštepi nunwe.

26 Heon etanhan wocantiheye  
šice cin en Wakantanka awica-  
yuštan; hecen winolinca wica-  
yuhapi kin hena e wicoħan owo-  
tanna kin yutokecapi, qa owo-  
tanna šni econpi ece.

27 Qa wicašta kin is eya win-  
yan yuhapi kin he ayuštanpi, qa  
is iyepi otoiyohi winktapi on ki-  
cicinpi, wica kin wica kici wo-  
wištece okicihyanpi, qa iye  
tancan mahen waħtanipi kin ta-  
ku iyohi kte cin he yuhapi.

28 Qa Wakantanka wacin en  
yuze wacinpi šni kin he iyecen,  
Wakantanka is eya wicotawa-  
cin waħte šni kin en awicayu-  
štan, hecen taku wowištece kin  
hduštanpi kta.

29 Hena e woaħtani owasin,  
wiinaħmanpi, wicošice, waicu-  
cupi kte cin, qa ohinyanpi on  
iyatahdepi; winawizipi, tin wi-  
caktepi, wakinicipi, wohnaye,  
qa wocanniye on ojupidan.

30 Waajijipi sa, waaiapi sa,  
Wakantanka šice dapika, wa-  
ħaničidapi, wamnaičidapi, ihda-  
tanpi sa, taku šica kagapi sa,  
hunkakeyapi kin anawicago-  
ptanpi šni;

31 Wacintonpi šni, woope ki-  
caksapi, wacantkiyapi šni, wacin  
tankapi šni, qa waonšidapi šni.

32 Hena Wakantanka toope  
kin sdonyapi; (tona hecen econ-  
pi kin hena wiconšte iyahdeči-  
yapi,) tuka is iye hecen econpi  
qa tona heconpi kin hena on  
iyokipipi ece.

## WICOWOYAKE 2.

1 Heon etanhan wicašta kin  
nituwe kašta, wadaco kinhan  
iyaonpepica šni yaun kte šni.  
Taku on wicašta tokeca daco

kinhan he en niye nihdaco, wa-  
daco tuka niš eya he kici taku  
okonwanjidani ecanon ece.

2 Tona wicoħan hecen econpi  
kin hena Wakantanka wowicake  
eciyatanhan wicayaco kin he  
sdonunyanpi.

3 Qa wicašta kin, niš tona he-  
conpi kin wicadaco, qa iyecen  
ecanon kinhan, Wakantanka wi-  
cayaco kin he nayeciye kta ke-  
canni he.

4 Qa is iye towašte wowijice  
kin ayakta šni he, wacintanka  
qa wawacinkta yuza tanka ko-  
ya; qa Wakantanka towašte  
kin nihduacetu kta aniye cin  
hee e sdonyaye šni he.

5 Tuka cante niteħika, qa ni-  
hduacetu šni kin eciyatanhan,  
wocanniye anpetu, qa Wakan-  
tanka owotanna wicayaco kin  
yutaninpi iyehantu kte cin en,  
wocantiyahde amnayaya he.

6 He wicašta otoiyohi iye oħan  
kin eciyatanhan wicakicu ece  
e kta:

7 Tona wicoħan wašte en ape  
yukanpi, qa wowitan, woyuoni-  
han, qa řepica šni kin akitapi  
ece kin hena wiconi owihanke  
wanice kta:

8 Tuka tona wakinin unpi; qa  
wowicake kin anagoptanpi šni,  
tuka woalitani awacinpi kin he-  
na, wošihda, qa wocanniye,

9 Wošitkihda, qa wokakije,  
wicašta otoiyohi taku šica econ  
kin wicanagi kin *kiciun* kta, Ju-  
da wicašta kin he tokaheya, qa  
hehan Helenes hee kta.

10 Tuka wowitan, woyuoni-  
han, wookiye ko, tona waštaya  
oħanye cin hena kiciun kta, Ju-  
da wicašta kin he tokaheya, qa  
hehan Helenes hee kta.

11 Wakantanka wicašta ito-  
ħnake ekta etonwe šni ece.

12 Tona woope codan waħta-

nipi kin hena woose codan yutakunipi kte śni, qa tona woose kin en wahitanipi kin hena woose kin eciyatanhan wicayacopi kta.

13 Wakantanka ekta tona woose nahonpi kin hena owotanna kin eepi śni, tuka tona woose kin ecen econpi kin hena owotanna wicayawapi kta.

14 Tohan Ikcewicašta woose yuhapi śni kin hena iye cinka woose wicohan kin ecen econpi kinhan, woose yuhapi śni ešta, iš iye woose ihduhapi ece.

15 Hena iš iye cantepi kin ekta woose wicohan owapi kin he hdutaninpi, iye tawiyukcan kin nakun he yaotanin, qa tawacinpi kin otoiyo hi tuktektan iyakiccionpapi, qa akeś anakihmanpi ece.

16 Anpetu wan en, Wakantanka wotanin wašte mitawa kin eciyatanhan, Jesus Messiya on, wicašta taku nahmana awacinpi kin yaco kinhan.

17 Iho, Juda wicašta eniciyapi, qa woose kin awacin nanke ça Wakantanka on nihdatan,

18 Qa iye tawacin kin sdonyaya, qa taku tona wašte kin idukcan, woose kin tanyan onnispe nakaes ;

19 Qa tona išta gongapi kin tanyan yewicayaye ça, otpaza ehna un kin iyoyamwicaye cin he niye kecanničin ;

20 Qa wacinton śni kin hena waonspekiya niyuhapi, qa hoksiyoqopa kin onspewicayakiya ece, qa woose kin en wosdonye wovicake ko ouncage kin yuha yaun.

21 Heon etanhan wicašta tokeca onspayakiye cin niś niye onspeničiciye śni he. Wamanonpi kte śni keya odake cin, niś niye wamayanon he.

22 Wawicihahapi econpi kte śni kehe cin, niś niye tuwe wawiyakihaha he. Wakagapi kin wahteyada śni kin niś niye tipi wakan kin etanhan wamayanon he.

23 Niś woose kin en iniwin- kta kin, woose kicaksapi kin on Wakantanka wowištenyaya he.

24 Niyepi eciyatanhan Ikcewicašta kin Wakantanka caje kin oštehdapi ece ; wowapi en kagapi qon iyececa ;

25 Woose kin oyape cinhan, awicakehan bakihdayapi kin taku okihi ece ; tuka woose yakaksa ece kinhan, banicihdayapi kin he bakihdayapi śni icaga.

26 Heon bakihdayapi śni kin he woose woowotanna kin tanyan ope cinhan, he bakihdayapi śni kin bakihdayapi kiciyawapi kte śni he.

27 Qa bakihdayapi śni ece kin he woose kin ope cinhan, he, niye oowa qa bakihdayapi kin eciyatanhan woose yecakse cin, niyaco kte śni he.

28 Tuwe akan tanhan ecedan hecece cin, he Juda wicašta kin heca śni ; qa bakihdayapi akan tanhan qa wicacehi ecedan en un kin he hee śni ;

29 Tuka tuwe mahen tanhan hecece cin he Juda wicašta kin hee, qa bakihdayapi kin he oowa kin en he śni, tuka wicanagi kin en un kin hee ; he wowitan kin wicašta akantu eciyatanhan śni, tuka Wakantanka eciyatanhan un.

### WICOWOYAKE 3.

1 Hecen Juda wicašta kin token iyotan un he, qa bakihdayapi kin he taku okihi he.

2 Taku owasin on iyotan, tuka tokaheya Wakantanka oie kin wicakupi qon he.

3 Qa wanjikji wicadapi śni ešta, hecen tokeca kta he. Hena wicadapi śni kin he Wakantanka wacinyanpi kin ecetu śni ye kta he.

4 Hiya, hecetu śni; Wakantanka wowicake kta, qa wicašta otoiyo hi iton kte śni; wowapi en kagapi qon iyececa; Nioie kin on nihdaowotanna kta, qa niyacopi kin en ohiyaye kta ce.

5 Tuka waunhitanipi kin hena Wakantanka toowotanna yutanin kinhan token unkeyapi kta he; Wakantanka kakiświcaye cin he owotanna śni he; (wicašta akantu kin iyecen iwaa;)

6 Hiya hecetu śni; *hecetu* kinhan token Wakantanka wicoicage kin wicayaco kta he.

7 Oiwaton śni kin on etanhan Wakantanka towicake kin he iye towitan kin hduotanin kinhan, token on etanhan wahtani sa iyecen mayacopi he.

8 Qa tokeca taku wašte u kte cin heon taku śica econkupi kte śni he, unkakicagapi qa wanjikji, unkeyapi ce, keyapi kin iyececa; hena wicayacopi kin he owotanna.

9 He etanhan tokeca kta; unkiye iyotan unwaštepi he. Hiya, takuśnina on. Wanna Juda Helenes wicašta ko, owasin woahntani ihukuya yukanpi kin he unyaotaninpi qon.

10 Wowapi en kagapi qon iyececa; Tuwedan owotanna un śni;

11 Tuwedan okahnige śni; tuwedan Wakantanka akite-śni;

12 Owasin icunonpa iyayapi, ptaya ihduśicapi; tuwedan taku wašte econ śni, wanjidan ešta.

13 Dotepi kin wicahnakapi yulidokapi kin hee; ceji pi kin on wicahnayanpi ece, ihapi kin en sintehda tage yukan:

14 Ipi kin wicayaśicapi qa wicoie pa hinca ko on ojudan:

15 Sihapi kin iś weyapi kta e duzahanpi;

16 Tacankupi kin ohna wicotakuni śni wicokakije ko yukan;

17 Qa wookiye canku kin he sdonyapi śni.

18 Qa ištapi kin itokam Wakantanka kokipapi kin wanica ce.

19 Wooke kin taku tona eye cinhan, tona wooke ihukuya un kin hena hewicakiya ece e sdon- unyanpi. Hecen wicai otoiyo hi iohmus icupi kta, qa wicoicage owasin Wakantanka itokam wicayacopi kta.

20 Heon etanhan iye itokam, wooke wicohan kin on, wice- lipi takudan yaowotanpi kte śni; wooke kin eciyatanhan woahntani sdonkiyapi ece.

21 Tuka nakaha wooke codan Wakantanka toowotanna kin yutaninpi; wooke qa wicašta wokcanpi kin he yaotaninpi ece.

22 Wakantanka toowotanna kin, Jesus Meśsiya wacinyanpi kin eciyatanhan u kin hee, tona wicadapi kin owasin en, qa owasin akan un, qa owasin akiyece- capi.

23 Owasin hin wahtanipi, qa Wakantanka towitan kin iyohi śni unpi.

24 Qa iye towaonśida kin on iyunwin codan owotanna wicayawapi, wopekitonpi Jesus Meśsiya en un kin he eciyatanhan.

25 He Wakantanka toka qe- han ehde, wokajuju kta, iye we kin wacinyanpi kin eciyatanhan, iye toowotanna hduotanin kte, woahntani ehanna econpi qon he- na kajujupi kin on etanhan.

26 Wakantanka tehan ape un kin en, nakaha iye toowotanna



kin hdutanin kta e heon; hecen iye kin owotanna un kta, qa nakun tuwe Jesus wacinye cinhan, he yaowotan kta.

27 Hehan ihdatanpi kin toki un he. He anaptapi. Woope kin tukte e on; wicohan kin hee he. Hiya, wacinyanpi woope kin hee on etanhan.

28 Heon woope wicohan codan, wacinyanpi on etanhan, wicašta kin owotanna yawapi e he unkiyucanpi.

29 Juda oyate isnana Wakan-tanka tawapi he; qa Ikcewicasta tawapi šni he. Hiya, nakun Ikcewicasta tawapi.

30 Tuwe wacinyanpi on baki-hdayapi kin yaowotanna kte, qa wacinyanpi eciyatanhan baki-hdayapi šni kin owotanna yawa kte cin he Wakantanka wanjidan.

31 Hecen wacinyanpi kin on woope kin ecetu šni unyanpi he. Hiya, hecetu šni, tuka woope kin unyusutapi.

#### WICOWOYAKE 4.

1 Heon, Abraham ate unyanpi kin, wicacehpi eciyatanhan taku iyeye ciqon tukte e he, unkeyapi kta he.

2 Abraham wicohan on ihduowotanna kinhan taku iwinkta kte cin hduha, tuka Wakantanka itokamya šni.

3 Wowapi wakan kin token eya he. Abraham Wakantanka wacinyan, qa woowotanna kiciyawapi qon.

4 Tuwe hitani kin he wokajuju kin wowaonsida iyecen kiciyawapi šni, tuka wopetonpi kin he iyeececa.

5 Tuka tuwe oħanye šni, qa tuwe tona wahtanipi kin wica-yaowotanna kin he wacinye cin-

han, wacinyanpi kin he wicoowotanna kiciyawapi ece.

6 Wicašta kin tuwe wicohan codan Wakantanka wicoowotanna kiciyawa kin wowašte yuhe cin he Dawid oyake ciqon iyeececa :

7 Tona taku šica econpi qon wicakicicajujupi, qa wahtanipi kin yutokan iyewicakiciciyapi kin hena wicayawaštepi ece.

8 Wicašta kin tuwe Itancan kin woahitani kiciyawa šni kin he yawaštepi ce.

9 Unkan wowašte kin de baki-hdayapi kin ecedan en au he; qa is baki-hdayapi šni kin nakun en au he. Wacinyanpi kin he Abraham woowotanna on kiciyawapi ce, unkeyapi qon.

10 Token he on kiciyawapi he; baki-hdayapi kin en un, qa is baki-hdayapi šni en. Baki-hdayapi en un šni, tuka baki-hdayapi šni kin en icunhan.

11 Qa nahanhin baki-hdayapi šni un kin en icunhan, baki-hdayapi kin he wowapetogton, wocacinye woowotanna ipuspe kin hee icu; hecen tona wacinyanpi kin owasin, bawicalhdayapi šni ešta, he ateyapi kta, qa nakun hena e wicoowotanna wicakiciyawapi kta.

12 Qa tona baki-hdayapi kin he ceepidan šni, nakun Abraham ateunyanpi, hinahin baki-hdaye šni, he ehan wacinye ciqon, tona he oye kin ohna manipi kinhan, hena is eya baki-hdayapi kin en ateyapi kte cin heon.

13 Maka kin tawaye kte cin, Abraham iye cinca kin om, iwahoyapi qon he woope kin eciyatanhan šni, tuka wacinyanpi on woowotanna kin eciyatanhan.

14 Tona woope kin eciyatanhanpi kin hena tawayapi kte cin eepi hecinhan, wacinyanpi kin

## WICOWOYAKE 5.

ecetuśniyapi, qa wahoyapi qon he nakun takudan okihi śni.

15 Woose kin he wocanniye kaga; tukten woose wanica hecinhan hen woalitani nakun wanica.

16 Heon etanhan, he wacinyanpi kin on, wowaonsida eciyatanhan kte cin heon, qa wahoyapi qon cincapi kin owasin en wicakiciyusutapi kta, tona wope eciyatanhan unkin hecedan śni, tuka tona Abraham, unkiye owasin ateunyanpi kin, wacinye ciqon en opapi kin hena koya.

17 Wowapi qon iyececa; Ikcewicašta oyate ota atenyani kta e ecihde ce; Wakantanka wicašte cin ake ni wicaye ça, taku tona un śni kin hena taku unkin iyecen cajeyata ece kin he wacinyan kin heon etanhan.

18 Oyate ota ateyapi kte cin he asepica śni, tuka wacinyan kin heon ape, taku eyapi qon iyececa; Nicinca iyenaka kta ce.

19 Qa waśagya wacinye cin heon iye tancan kin wanna kan he awakicin śni, wanna waniyetu opawinge ikiyedana, qa Sara tamni kin nakun wanna ecece śni tuka.

20 Qa Wakantanka wahoye cin he ceťunhda kin on kaktihanhan śni; tuka wacinyanpi on wakiśaka un, qa Wakantanka yatan.

21 Qa taku iwahoye cin he eceen econ kta okihi e he nina wicada.

22 Heon etanhan he wicoowotanna kiciyawapi.

23 Qa he hecen kiciyawapi kin he iye isnana on wowapi kin en kagapi śni;

24 Tuka unkiyepi on, he unkiyawapi kte cin heon etanhan, tuwe Jesus Messiya Itancan unkiyapi kin wiconšte etanhan na-

Dak.

jin kiye ciqon he wacinyanpi kinhan.

25 Iye waunhtanipi kin on wicacupi, qa owotanna unyawapi kte cin on ake najinkiyapi qon.

## WICOWOYAKE 5.

1 Hecen wacinyanpi on owotanna unyawapi kin, heon etanhan Wakantanka ekta wookiye unhapi, Jesus Messiya Itancan unkiyapi kin eciyatanhan.

2 Qa he iye eciyatanhan en unhiyupi, wowaonsida en aban naunjimpi kin en, wacinyanpi kin on etanhan, qa Wakantanka towitan kin ape unkiyuskinpi ece.

3 Qa hecedan śni, nakun wokakije on unkiyuskinpi ece; wokakije kin he wacin tankapi kaga e sdonunyanpi;

4 Qa wacin tankapi kin he wiyukcanpi, qa wiyukcanpi kin he woape;

5 Qa woape kin he isťen wicaye śni, Woniya Wakan unqupi kin he eciyatanhan, Wakantanka towašte uncantepi kin en unkokicicašťanpi kin he etanhan.

6 Takudan unkokihiپی śni kin he icunhan, wanna iyehantu qehan Messiya walitanipi sa kin on ta.

7 Tuwedana wicašta owotanna kin on te kte śni naceca; tuka okinni wicašta wašte on tuwe te kta tawaťenye kta nace.

8 Tuka walitanipi sa heuncapi kin he icunhan, Messiya unkiyepi on te cin he en, Wakantanka token canteunkiyapi kin hduotanin.

9 Hecen sam iyeya, nakaha iye we kin on owotanna unyawapi kin, iye eciyatanhan wocanniye kin etanhan eunhdakupi kta.

10 Toka unyakonpi qehan he

icunhan, iye Cinhintku te cin eciyatanhan, Wakantanka kici okiciciye unyanpi hecinhan, he sam iyeya kici okiciciya unyankonpi kin, iye ni un kin eciyatanhan ni unyanpi kta.

11 Qa hecedan sni, tuka nakun Wakantanka kin en unkiyuskinpi, Jesus Messiya Itancan unkiyapi kin eciyatanhan, he etanhan nakaha wookiye unhapi.

12 Heon etanhan wicašta wanjidan eciyatanhan woahłani wicoicage kin wicehna hiyu, qa woahłani etanhan wiconęe, qa hecen wiconęe wicašta owasin akan iwicayaya, owasin wałtanipi nakaes.

13 Wooke kin itokam woahłani wicašta kin ehna un; tuka tukten wooke wanice cinhan hen woahłani wicakiciyawapi sni ece.

14 Hececa ešta, Adam qa Moses iyotahedan wiconęe onunyan, Adam tuwe u kte cin oowa kin hee wałtani kin tona iyecen wałtanipi sni kin hena eepi kaes en onunyan.

15 Tuka woahłani qon he kici wowaonsida kin akidecece sni. Wicašta wanjidan wałtani qon he on wicota ąapi hecinhan, he sam iyeya Wakantanka towaonsida, qa wowaonsida on ituwicakihanpi kin he wicašta wanjidan, Jesus Messiya kin hee on wicota en wicakiciyuota kta.

16 Qa wicašta wanjidan wałtani qon eciyatanhan, wowaonsida on ituwicakihanpi kin he iyecece sni. Wanjidan on etanhan wiconęe iwicayacopi; tuka wowaonsida on ituńanpi kin he woahłani ota etanhan wicayaowotanna kta.

17 Wicašta wanjidan wałtani kin on etanhan wanjidan eciyatanhan wiconęe onunyan hecin-

han, he sam iyeya tona wowaonsida untkana, qa wicoowotanna wicaqupi kin icupi kin hena, wanjidan, Jesus Messiya kin hee, e eciyatanhan wiconi kin en unyanpi kta.

18 Heon etanhan woahłani wanjidan eciyatanhan, wicašta owasin en wiconęe iwicayacopi kin aupi; he iyecen woowotanna wanjidan on etanhan wiconi iwicayaowotanna kin he wicašta owasin en aupi.

19 Wicašta wanjidan waanagoptan sni un qon he etanhan wicota wałtani sa wicakagapi kin, he iyecen wanji waanagoptan un kin eciyatanhan wicota owotanna wicakagapi kta.

20 Woahłani ihduota kte cin heon wooke kin hi, tuka tukten woahłani yuota ikicage ciqon hen wowaonsida nina sam iyeya ihduota.

21 Hecen wiconęe en woahłani onunye ciqon he iyecen wiconi owihanke wanica en wowaonsida onunye kta, Jesus Messiya Itancan unkiyapi kin eciyatanhan.

## WICOWOYAKE 6.

1 Hecen taku unkeyapi kta he. Wowaonsida yuotapi kte cin heon woahłani en unkitanpi kta he.

2 Hiya hecetu sni. Tona woahłani ekta unąapi kin, token he en nakun unnipi kta he.

3 Tona Jesus Messiya en baptem wicaqupi kin hena iye te cin en baptem wicaqupi kin he sdonyayapi sni he.

4 Heon etanhan baptem eciyatanhan he kici unhnakapi, wiconęe kin en, hecen iye Atkuku towitan kin Messiya wicaęe cin etanhan ekicetu ye ciqon he iyecen unkiś eya wiconi teca kin en maunnipi kta.



## WICOWOYAKE 7.

5 Qa iye te cin iyacinpi kin en kici huunhdepi hecinhan, nakun he piya ikicage cin en iyecen unyakonpi kta.

6 Qa wicašta tanina unhapi kin he iye kici icipaweh okatanpi kin he sdonunkiyapi, hecen woahitani tancan kin he ihangyapi kta, qa hetanhan woahitani wowidag unyanpi kte šni.

7 Tuwe te cinhan, he wanna woahitani etanhan kiyuškapi.

8 Hecen Messiya kici unŕapi hecinhan, kici unnipi kta e wacinunyanpi.

9 Qa Messiya wicaŕe cin etanhan ekicetuyapi qon he ake icimana te kte šni e sdonunyanpi; tokata wiconŕe tohinni yuha okihi kte šni.

10 He te ciqon wancadan woahitani on ŕa; qa he kini kin Wakantanka on ni un.

11 He iyecen niš eya woahitani on te nihdawapi, tuka Wakantanka ekta ni yaunpi, Jesus Messiya Itancan unkiyapi kin eciyatanhan.

12 Heon nitancan te kte cin en woahitani ounye šni nunwe, hecen wocantiheye ŕice cin anayagoptanpi kte šni.

13 Qa nihuhapi kin hena wicohan ŕica en woahitani wowinyunye kta e qupi šni po, tuka wicaŕe cin etanhan ni un kin iyecen Wakantanka iŕiŕu po, qa nihuhapi kin wicoowotanna en Wakantanka wowinyunye kiya po.

14 Woahitani icimana inidakapi kte šni. Woope kin ihukuya yaunpi šni tuka wowaonšida kin ihukuya.

15 Hecen tokeca kta; woope kin ihukuya unyakonpi šni, tuka wowaonšida ihukuya unyakonpi kin heon etanhan waunhitanipi kta he. Hiya hecetu šni.

16 Tuwe anayagoptanpi kta inidake niŕiyapi kin he anayagoptanpi kin on wowidake niyanpi kin he sdonyayapi šni he; he woahitani wiconŕe aiyahdeye cin hee, qa iš waanagoptanpi kin on wicoowotanna kta.

17 Tuka Wakantanka wopida kiciun nunwe, woahitani inidakapi tuka qon; tuka woonspe, ecedan en yenianpi qon he cante eciyatanhan oyapapi.

18 Qa woahitani etanhan enihdakupi kin, heon wicoowotanna wowidake niyan yaunpi.

19 Wicašta akantu kin iyecen iwaa ce, nicehpipi wašake šni kin heon etanhan. Wicošice en nihuhapi kin ašapapi qa woahitani wowinyunniyanpi kta e iyowinyakiyapi qon, he iyecen nakaha wicayuecedan kin en nihuhapi kin wicoowotanna inidakapi kta e iyowinkiya po.

20 Woahitani wowidake niyanpi qehan, wicoowotanna inidakapi šni.

21 Hehan taku nakaha on iništecapi kin hena en taku waskuyeca duhapi qon he tukte e he; hena e ihanke kin he wiconŕe ee.

22 Tuka nakaha woahitani etanhan enihdakupi, qa Wakantanka wowidake niyanpi, heon wicayuecedan on waskuyeca duhapi, qa he ihanke kin owihanke wanin wiconi kin hee.

23 Woahitani wokajuju kin he wiconŕe ee; tuka Wakantanka taku ituwicakihan kin he, Jesus Messiya Itancan unkiyapi kin eciyatanhan, owihanke wanin wiconi kin hee.

## WICOWOYAKE 7.

1 Mihunkawanji, (tona woope sdonyapi kin hena owicawakiya); woope kin wicašta kin wo-

widag ya, tohanyan ni un kin hehanyan, he sdonyayapi śni he.

2 Winohinca kin tuwe hihna ton kinhan, hihnaku ni un kin hehanyan, toope kin on kaškapi; tuka hihnaku kin wanna te cinhan hehan hihnaku toope kin etanhan kiyuškapi.

3 Hecen hihnaku ni un kin icunhan, wicašta tokeca hihnaye cinhan, wawicihalapi econ eciyapi kta; tuka hihnaku te cinhan hehan woope qon etanhan kiyuškapi qa wicašta tokeca hihnayan ešta he wawicihalapi econ śni.

4 Heon etanhan, mihunkawanji, niś eya Messiya tancan kin eciyatanhan woope kin ekta niŋapi kin; hecen tuwe tokeca hihnayayapi kta, tuwe wicate cin etanhan ekicetuyapi qon he hee; hecen Wakantanka on waskuyeca icalunyanpi kta.

5 Wicacełpi kin en unyakonpi qehan, woahłani wocantiheye kin, woope kin eciyatanhan un kin, hena waskuyeca wiconę icalkiciciye kta e heon unuhapi kin en ołhanyan.

6 Tuka nakaha woope kin etanhan unkiyuškapi, taku on unkaškapi qon he ekta unŋapi kin; hecen oowa tanina kin en wowidag unyanpi kte śni, tuka woniya teca kin en.

7 Hecece cinhan token unke-yapi kta he : Woope kin he woahłani kin ee he : Hiya, hecetu śni; woope eciyatanhan śni unkanś, woahłani sdonwakiye kte śni tuka qon. Woope kin, Tokan tawa yacin kte śni ce, eye śni unkanś, wocantiheye śice cin sdonwaye kte śni tuka.

8 Hehan woahłani woahope kin wowinyunye ęa, miye mahen wocantiheye śice cin owasin mi-

caga. Woope codan woahłani ŋa wanka.

9 Ehanna woope codan ni wau-  
un; tuka woahope kin he hi qehan, woahłani kini, qa miye maŋa.

10 Qa woahope kin wiconi kta e on yušanpi qon he wiconę kin ee imicicaga ce.

11 Woahłani woahope kin wowinyunyan, hecen mahnaye ęa, on makte.

12 Hecen woope kin he wakan; qa woahope kin he nakun wakan, owotanna qa wašte.

13 Hecen taku wašte kin he wiconę imicicaga he. Hiya hecetu śni. Tuka woahłani kin he woahłani hee e tanin kta, heon taku wašte on etanhan wiconę ical miciciya; hecen woahope kin eciyatanhan woahłani kin iyotan śice kta.

14 Woope kin he wakan sdonunyanpi; tuka miye qe wicacełpi kin hemaca, qa woahłani ihukuya wiyopemayanpi.

15 Taku ecamon ece kin he iyowinwakiye śni. Taku wacin kin he ecen ecamon śni; tuka taku śice wadake cin he ecen ecamon ece.

16 Taku wacin śni kin he ecen ecamon kinhan, woope kin he wašte e induotanin.

17 Qa hecen tuwe hecon kin he miye śni, tuka woahłani miye mahen un kin hee.

18 Miye en, micelpi kin he waka, taku wašte en maun śni e sdonwakiya. Ięiconzapi kin he iyemicihantu, tuka token taku wašte ecamon kte cin iyewakiye śni.

19 Taku wašte wacin kin he ecen ecamon śni; tuka taku śica wacin śni kin hee ecen ecamon ece.

20 Hecen taku wacin śni kin

## WICOWOYAKE 8.

he ecen ecamon kinhan, tuwe hecon kin he miye *śni*, tuka woahitani miye mahen un kin he *hecon*.

21 Hecen woope wanji iyewakiya, taku wašte ecamon wacin eca, taku *śica* miye en micium ece.

22 Wicašta mahentu kin eciyatanhan Wakantanka toope kin on imduškin :

23 Tuka mihuha kin en woope tokeca wan wanmdaka, he mitawacin toope kin kici kicize *ča*, woahitani woope mihuha kin en un kin he en wayaka amahda.

24 Wicašta nina iyokišice cin he miye ; tuwe wiconęe tancan kin de etanhan emahdaku kta he.

25 Wakantanka wopida ewakiya ece, Jesus Messiya Itancan unkiyapi kin hee on etanhan. Hecen miye mitawacin kin on Wakantanka toope kin wowidag mayan, tuka wicacełpi eciyatanhan woahitani woope kin he *imadaka*.

## WICOWOYAKE 8.

1 Heon etanhan, nakaha tona Jesus Messiya en un kin, hena wiconęe iwicayacopi wanin unpi, wicacełpi eciyatanhan manipi *śni*, tuka Woniya kin eciyatanhan.

2 Wiconi Woniya toope kin Jesus Messiya en un kin, he woahitani wiconęe ko woope kin etanhan makiyuška.

3 Woope kin wicacełpi eciyatanhan waške *śni* un qon he taku okihi *śni* kin hee Wakantanka *econ*, iye Cinhintku wicacełpi wahtani ouncage kin en hiyuya, woahitani on, qa wicacełpi kin en woahitani yaco.

4 Hecen tona wicacełpi kin eciyatanhan maunnipi *śni*, tuka

Woniya eciyatanhan, unkiyepi en woope wicoowotanna kin ecetu kta.

5 Tona wicacełpi eciyatanhan un kin hena wicacełpi taku tawa kin awacinpi ; qa tona Woniya kin eciyatanhan un kin hena taku Woniya tawa kin *awacinpi*.

6 Wicacełpi awacinpi kin he wiconęe kin ee ; tuka Woniya awacinpi kin he wiconi qa wookiye kin hee.

7 Wicacełpi wicotawacin kin he Wakantanka toka ya. He Wakantanka toope kin ope *śni*, qa nakun ecaca okihi *śni*.

8 Hecen tona wicacełpi kin en un kin hena Wakantanka iyokipi yapi kta okitpanipi.

9 Tuka niyepi wicacełpi kin en yaunpi *śni*, Woniya kin en yaunpi, Wakantanka Taniya kin niyepi kin en ounye cinhan. Qa tuwe Messiya Taniya kin yuhe *śni* kinhan he tawa *śni*.

10 Qa Messiya en niunpi kinhan, wicatančan kin he woahitani eciyatanhan *ča*, tuka wicanaęi kin he wiconi un, wicoowotanna eciyatanhan.

11 Tuwe Jesus wicaęe cin etanhan najin kiye ciqon he Taniya kin niyepi en ounye cinhan, tuwe Messiya wicaęe cin etanhan najin kiye ciqon hee nitancan *ęapi* kte cin ekicetu ye kta, iye Taniya Wakan niyepi en ounye cin he eciyatanhan.

12 Heon etanhan, mihunkawanji, wicacełpi kin takudan ikicazo *śni* unyakonpi, on etanhan wicacełpi kin eciyatanhan unniipi kta.

13 Wicacełpi kin eciyatanhan yanipi kinhan nięapi kta ; tuka Woniya kin eciyatanhan wicatančan wicohan kin *ęe* yakiyapi kinhan yanipi kta.



14 Wakantanka Taniya kin tona yus awicaye cin hena Wakantanka cinca wicaye cin eepi.

15 Ake wokokipe kta e on ookiyeyapi woniya kin iyacupi *śni*, tuka cinhintkuyapi woniya kin he iyacupi, on Abba, Ate, eya hoyeunkiyapi ece.

16 Qa Wakantanka cinca kin heuncapi e unnagipi kin kici Woniya kin e unyuotaninpi.

17 Unkan uncincapi kinhan tawayapi kte cin heuncapi; Wakantanka tawayapi; Messiya kici tawayapi kte cin; kici unkakijapi kinhan, nakun kici wowitan unhapi kta ce.

18 De nakaha wicokakije kin he, wowitan unkiyepi en ecadan yutaninpi kte cin kici akiyecen yawapi kta e iyecece *śni* wadaka.

19 Wakantanka cinca wicayutaninpi kte cin on taku kagapi kin cantokpaniyan ape yanka.

20 Taku kagapi kin he wocectu *śni* kin en ihukuya ye kta cin *śni*, tuka tuwe woape on he wwidagye cin hee on etanhan.

21 Qa taku kagapi kin hee kaeś wicalwin wowidagyapi kin etanhan kiyuśkapi kta, qa Wakantanka cincawicaye cin ihduhapi wowitan kin en yeyapi kta.

22 Taku icage cin owasin dehanyan witaya comnihdazi, qa hokśiksuya un e sdonunyanpi.

23 Qa hecedan *śni*, tuka unkiś eya Woniya kin taku tokaheya icalhya unhapi kin, unkiyepi qe comniunhdazipi, qa atayedan cinca yapi kte cin unkapepi, unkitancanpi ekicetu ye kte cin hee.

24 Woape kin on niunyanpi; tuka woape wanyakapi kin he woape kin ee *śni*, tuwe taku wanyake cinhan tokeca e nahalin ape yanka he.

25 Tuka taku wanunyakapi *śni*

kin he unkapepi hecinhan, hehan wacintankapi on unkiyepi kta e ape unyakonpi ece.

26 Qa nakun Woniya kin is waunśakapi *śni* kin en icunhan ounkiyepi ece. Token wocekiye unkeyapi kte cin sdonunki-yapi *śni*, tuka Woniya kin e qe unkiyepi on wocekiye eya, hawayapi oyagpica *śni* kin on.

27 Qa tuwe wicacante iyukean kin he Woniya kin token wacin yuze cin sdonya, he Wakantanka *tawacin kin* eciyatanhan tona owotanna un kin hena on wocekiye eya ece.

28 Unkan Wakantanka waśte dakapi kin hena taku owasin tanyan owicakihan ece e sdonunyanpi, tona iye tawacin kin eciyatanhan wicakicopi kin hena.

29 Tona otokaheya tanhan sdonwicakiye cion hena wicakiconza, iye Cinhintku ouncege kin en icagapi kte cin heon, qa hecen he hunkawanjitku ota ehna tokapa kta.

30 Qa tona wicakiconze cion hena wicakico; qa tona wicakico qon hena wicayaowotanna; qa tona wicayaowotanna qon hena is eya wicayutan.

31 Heon etanhan hena taku kin en taku unkeyapi kta he. Wakantanka unkiyepi un kinhan, tuwe kaśeunyanpi kta he.

32 Tuwe iye Cinhintku kin kpatan *śni*, tuka unkiyepi owasin on kpagan qon, he iye kici taku owasin iyakiçuya unqupi kte *śni* he.

33 Tona Wakantanka wicakahnige cin hena tuwe taku iyawicaonpe kta he. Wicayaowotanna kin he Wakantanka kin ee ce.

34 Tuwe wayaco kta he. Tuwe te cion he Messiya ee, qa ake

## WICOWOYAKE 9.

piya ikicage cin hee, Wakantanka etapa kin eciyatanhan yanke ça, unkiyepi on wocekiye eciya.

35 Tuwe Messiya towašte kin etanhan unyušpapi kta he. Wicokakije, wošitkihda, wicokicize, wicaakihan, tancowicakadan, wokokipe, qa maza sagye okihi kta he.

36 (Owapi qon he hecetu, Niye kin on anpetu ohinniyan unktepi unyakonpi, tahinca ktepi kte cin iyecen unyawapi ce.)

37 Tuka hena taku kin owasin en, tuwe canteunkiyapi qon he eciyatanhan, tanyan ohiye unyakonpi.

38 Heon, wiconțe, qa wiconi, qa mahpiya ohnihde cin hena, qa wokiconze kin, qa wicowaške kin, qa taku nakaha un kin taku u kte cin ko ;

39 Qa taku wankantuya un kin, qa taku mahentuya un kin, qa taku icage cin tokeca, takudan Wakantanka towašte, Jesus Messiya Itancan unkiyapi en un kin, he etanhan unyušpapi kte šni e sdonwaye hinca.

## WICOWOYAKE 9.

1 Messiya eciyatanhan wowicake epe, itonšni mawanica, minagi kin hee e Woniya Wakan kin kici mahdutanin ;

2 Nina iyomakišice ça micante ekta ohinniyan iyokišin waun.

3 Mihunkawanji qa tona wicacehpi eciyatanhan takuwicawaye cin hena on, Messiya etanhan mayacopi tawařenwaya owakihi tuka.

4 Hena Israel wicašta kin hecapi, qa atayedan cinkši wicaye cin hena eepi, qa wowitan, qa wicotakuye, qa woope wicaqupi kin, qa wawokiyapi kin, qa wahoyapi kin hena tawapi.

5 Qa hunkake wicayapi kin etanhanpi kin hena eepi, qa hena etanhan wicacehpi eciyatanhan Messiya inapa, he owasin iwankam Wakantanka kin ee, owihanke wanin wowašte yuha nunwe.

6 Wakantanka oie kin ecetu šni aye cin he wake šni. Tona Israel etanhanpi kin hena owasin Israel hecapi šni.

7 Qa Abraham etanhan icagapi kin heon owasin cincapi kin hecapi šni. Tuka, Isaak etanhanpi kin hena nicinca ewicakiyapi kta ce.

8 He kaketu, tona Wakantanka cinca wicaye cin hena wicacehpi eciyatanhan cinca wicayawapi qon heon etanhan šni, tuka tona cinca wahoyapi qon hena e wicowazi kin ee iyawapi.

9 Wahoyapi wicoie kin he decetu, Omaka dehantu kinhan wau kta, qa Sara cinhintku wan ton kta ce.

10 Qa heceyedana šni, tuka Rebeka nakun wanjidan on, Isaak ateunyanpi kin hee on, ihdušake cehan,

11 Nabanhin tonpi šni, taku wašte taku šica ko unmana nahanhin econpi šni, Wakantanka tawacin kin wicakahnigapi kin en sutaya un kte cin heon, wicohan kin eciyatanhan šni, tuka tuwe wicakico kin he eciyatanhan ;

12 Hehan heciyapi, Hakakta kin he tokapa kin wowidag ye kta ce.

13 Owapi qon he kaketu, Jakob wašte wadaka, tuka Esau šice wadaka ce.

14 Hecen token unkeyapi kta he. Wakantanka owotanna šni econ he. Hiya, hecetu šni.

15 He Moses heciya ; Tuwe onšiwakida kte cin he onšiwaki-

da kta, qa tuwe wacin en mduze kte cin he wacin en mduze kta ce.

16 Heon etanhan tuwe cin kin eciyatanhan *šni*, qa tuwe inyanke cin he nakun eciyatanhan *šni*, tuka Wakantanka on*š*wicakida kin he eciyatanhan ece.

17 Wowapi wakan kin he Pharo heciya; He dee on etanhan ica*h*ciya, niye en mitowa*š*ake kin wahduotanin kta, qa maka owancaya micaje kin oyakapi kte cin heon.

18 Heon etanhan tuwe ka*h*nige cinhan, he on*š*ikida ece; qa tuwe ka*h*nige cinhan he yute*h*i ece.

19 Hecen hemayakiye kta nace; Tokeca e nahan*h*in wicaba he; tuwe e iye tawacin kin ece*tuš*niya he.

20 Hiya, wica*š*ta kin, ni*š* nituwe he, hecen Wakantanka i en hiyeyaya he. Taku kagapi kin he tuwe kage cin, Tokeca hecen mayakaga he, eciye kta he.

21 Maka wak*š*ica kage cin heca maka kin okihi *šni* he, up*š*i*ja* omnaye wanjidan etanhan wak*š*ica wan woyuonihan, qa wanji i*š* wowi*š*tece on kage kte *šni* he.

22 Hecen Wakantanka wocanniye kin hdutanin kta cin, qa towa*š*ake kin sdonye unkiyapi kta e on wocanniye wak*š*ica wicotakuni *šni* kicagapi qon hena wawacinkta yuza tanka on wicakuwa kinhan;

23 Qa tona wowaon*š*ida wak*š*ica kin otokaheya tanhan wowitan on wiyeya ehnakapi qon, hena en iye towitan wowijice kin hduotanin kta.

24 He wicakico kin hena unkiyepi, Juda oyate etanhanpi kin hecedan *šni*, tuka nakun Ikcewica*š*ta etanhanpi.

25 Hose en heye ciqon iyececa;

Tona mitaoyate *šni* kin hena mitaoyate ewicawakiye kta, qa wa*š*te dakapi *šni* qon he wa*š*te dakapi kin ewakiye kta.

26 Qa tukten, Mitaoyate kin he niyepi *šni* ce, ewicakiyapi qon, hen, Wakantanka ni un cinca kin ewicakiyapi kta ce, *eya*.

27 Isaya i*š* *eya* Israel oyate kin on hotanin; Israel cincapi kin miniwanca wiyaka sukaza iyece*n* ota yawapi e*š*ta, tona okaptapi kin henana nipi kta ce, *eya*.

28 Wayawapi yuptecedan kta qa wicoowotanna en hdu*š*tan kta; maka akan Itancan kin yawawapi ptecedan wan kage kta.

29 Qa he itokam Isaya heye ciqon; Sabaoth Itancan kin wicowazi wan unkokicicaptapi *šni* unkan*š*, Sodom iyecen unyakonpi kta, qa Gomorra en unkiyoptapi kta tuka.

30 Hecen token unkeyapi kta he. Ikcewica*š*ta kin wicoowotanna iyeyapi ce, wacinyanpi kin eciyatanhan wicoowotanna kin hee.

31 Tuka Israel wicoowotanna woope odepi qon hena wicoowotanna woope kin iyohipi *šni*.

32 Tokeca he. Wacinyanpi kin eciyatanhan *šni*; tuka woope wico*h*an kin eciyatanhan odepi kin, heon etanhan. Inyan ibotopi kin de on siha ibotopi.

33 Wowapi kagapi qon iyececa; Wanyaka wo, Zion en inyan ibotopi, qa imnija on hicahanpi wan ewahde; qa tuwe he wacinye cinhan inihan kte *šni*.

## WICOWOYAKE 10.

1 Mihunkawanji, micante cantiheye *ča* taku Wakantanka icewakiye cin, Israel oyate kin wicani kte cin hee.



## WICOWOYAKE II.

2 Hena wicaweciyaotanin, Wakantanka wacin en yuzapi tuka he wosdonye eciyatanhan šni.

3 Wakantanka toowotanna kin sdonyapi šni, qa iye wicoowotanna tawapi kin hdusutapi akitapi, qa Wakantanka toowotanna kin he ihukuya iyeiçiyapi šni.

4 Tona wicadapi kin owasin en Messiya kin he wicoowotanna woope woyuřtan kin hee.

5 Woowotanna woope kin eciyatanhan kin he on Moses kaken owa qon; Wicařta tuwe hena taku kin econ kinhan, hee hena on ni kta ce.

6 Tuka wacinyanpi eciyatanhan wicoowotanna un kin he kaken eya, Nicante kin mahen, Messiya kun ahi kte cin heon tuwe mahpiya ekta wankan ye kta he ;

7 Qa, Wicaře cin etanhan Messiya yuwankan au kte cin heon tuwe wořbe kin ekta ye kta he, eye šni wo.

8 Tuka taku eya he ; Wicoie kin he nikiyedani un, nii kin ohna, qa nicante kin en un, wacinyanpi wicoie unkoyakapi kin he hee.

9 Nii kin on Jesus Itancan kin yahdaotanin, qa he wicaře cin etanhan Wakantanka ekicetu ye cin he, nicante kin eciyatanhan wicayada kinhan, yani kta.

10 Wicoowotanna kta e wicacante on wicadapi, qa wiconi kta e wicai kin on wohdakapi ece.

11 Wowapi wakan kin he heya, Tuwe he wacinye cinhan, he wiřtece kte šni ce.

12 Juda qa Helenes oyate kin kici ocikpanipi wanica. Tuwe owasin en Itancan kin he tona hoyekiyapi kin hena owasin en wijinya un.

13 Tona Itancan caje kin ho-

yekiyapi kinhan hena otioyohi nipi kta.

14 Tuka tuwe kin wacinyanpi šni kinhan token on he hoyekiyapi kta he ; qa he nahahin nahonpi šni kinhan token wacinyanpi kta he ; qa tuwedan oyake šni kinhan token nahonpi kta he.

15 Qa ekta ye wicařipi šni kinhan token oyakapi kta he. Owapi qon he hecetu ; Tona wookiye wotanin wařte kin oyakapi, qa taku wařte en wotanin wařte oyakapi kin hena sihapi kin iyotan wařte ce.

16 Tuka owasin wotanin wařte kin anagoptanpi šni. Isaya heye ciqon ; Itancan, tuwe unko-yakapi kin wicada he.

17 Heon etanhan wanañonpi kin eciyatanhan wicadapi kin u, qa wanañonpi kin he Wakantanka oie kin eciyatanhan.

18 Unkan miř, Hena nahonpi šni he, epe. Hiya, hena oqo kin makoce owasin ekta iyaye ça wicoie kin maka ihanke kin hehanyan i.

19 Qa Israel oyate kin he sdonyapi šni he. Tokaheya Moses heya, Tona oyate šni se un kin hena on iyocipařtakapi kta, qa ikce oyate wacinton šni wan on řinhdaciyapi kta ce.

20 Tuka Isaya nina waditake ça heya ; Tona omadepi šni qon hena e iyemayanpi, qa tona amakitapi šni qon hena en mihdutanin ce.

21 Qa Israel oyate kin hewicakiya, Anpetu osan oyate wanañon šni qa wacetuñhdapi kin he nape wicawakiyugata ce.

## WICOWOYAKE II.

1 Heon hepa, Wakantanka taoyate kin ehpewicakiya he. Hiya hecetu šni. Israel wica-

šta kin hemaca, Abraham cinca, qa Benjamin wicoun kin hema-tanhan.

2 Wakantanka taoyate kin to-na otoaheya tanhan sdonwica-kiye ciqon hena elipewicakiye šni. Wowapi wakan Elijah on token eye cin sdonyayapi šni he ; Wakantanka cekiyē ča, Israel oyate kin cajeyata qa heya ;

3 Itancan, wicašta wokcan ni-tawa kin hena wicaktepi, qa wa-hna wošnapi nitawa kin yujuju-pi, qa miye mišnana omakaptapi, unkan te mayanpi kta akitapi ce.

4 Tuka Taku Wakan kin token eya ayupta he ; Nahahin Baal en canpeška makehde inajinpi šni kin wicašta kektopawinge šakowin wicawahduha ce.

5 He iyecen nakaha wowaon-šida wicakahnigapi kin eciya-tanhan hunh okaptapi.

6 Qa he wowaonšida eciyatanhan kinhan hehan wicoħan eci-yatanhan šni ; hecetu šni kinhan, wowaonšida kin wanna wowaonšida heca šni. Qa wi-coħan eciyatanhan kinhan, hehan wowaonšida eciyatanhan šni ; hecece šni kinhan, wicoħan kin wanna wicoħan heca šni.

7 Hecen toketu kta he ; Israel taku akite ciqon he iyeye šni, tuka tona wicakahnigapi kin he-na e iyeyapi, qa unmapi kin išta gonge wicayapi.

8 Wowapi qon iyececa ; Wi-caliba wicacante kin Wakantan-ka wicaqu, išta on wiwanyakapi kte šni, qa noge on winahonpi kte šni, anpetu kin dehanyan.

9 Qa Dawid is heya ; Wahna wotapi tawapi kin he mazahita-kiyapi, qa wihmunke, qa wona-hnaye, qa iyunwin yuhapi kin hee kta ce.

10 Išta kin aotpaswicayapi kte,

heon wawanyakapi kte šni ; qa cankahu ohionnyan patuš inajin-pi nunwe.

11 Heon hepe ; Hinħpayapi kta on hicahanpi he. Hiya, hecetu šni ; tuka hicahanpi kin on etanhan Ikcewicašta kin wiconi iyo-wicahi, hena is eya iyowicapa-štakapi kta e heon.

12 Hena e hicahanpi kin he wicoicage kin en wowijice kin hee, qa hena wicayuaoptetu kin he Ikcewicašta kin en wowijice kin hee hecinhan, wicayuecetu-pi kin he sanpa hince kta.

13 Ikcewicašta henicapi kin hena hecen eciciyapi ; Ikcewica-šta kin ekta yemašipi waun, qa heon mitoħtani kin wahdutan.

14 Hecen tona micelħi etanhanpi kin hena inahni wicawaye kta, kinhan wanjikji ni wicawa-ye kta.

15 Hena elipewicayapi kin he wicoicage kin en wookiye kin hee hecinhan, hena ake wicayu-ecetupi kinhan he taku kta he ; wiconte etanhan wiconi kin hee kta.

16 Taku tokaheya suton kin he wakan kinhan, ocowasin hecece kta ; qa can huta kin he wakan kinhan, can adetka kin hena ha-kun hecece kta.

17 Unkan can adetka kin hena wanjikji yuksapi, qa niš can wi-hdi hu ikceka henica, tuka can adetka qon ehna can kin en ica-ħniyanpi, qa can wihdi cepa can huta kin etanhan, en opeya yaun kinhan ;

18 Can adetka qon on ihdatan šni wo. Nihdatan keš can huta kin he duhe šni tuka can huta kin hee niyuha.

19 Hehan, Hen emahdepi kta on can adetka qon yuksapi ce, ehe kta naceca.

20 Han, hecetu ; wicadapi šni

## WICOWOYAKE 12.

kin heon hena yuksapi, qa niye wacinyanpi on ecen nayajin ece. Wahanicida sni qa kokipa wo.

21 Can adetka tawa qon hena Wakantanka kpatan sni hecinhan, okinni nis eya nikpatan kte sni.

22 Wakantanka towaonsida to-cantiyahde ko wanyaka po ; to-na hinhpayapi qon hena en wo-cantiyahde, qa niye en wowaonsida kin, wowaonsida kin he en nayajin kinhan, tuka hecanon sni kinhan nis eya nicaksapi kta.

23 Qa hena cetunhdapi ecen unpi sni kinhan, is eya ake can kin en iyekiyapi kta. Ake can kin en Wakantanka icalhwicaya okihi.

24 Qa niye can wihdi ikceya icage ciqon etanhan nicaksapi, qa inicage cin eciyatanhan sni, can wihdi waste kin en iyeniyampi kinhan, tona can kin he aicage ciqon hena iyotan ake can wihdi tawapi kin en iyeyapi kta.

25 Mihunkawanji, wowiyukan kin de sdoneye sni dukanpi kta wacin sni, okinni ksape nicidapi kta ; Israel oyate kin apa ista gonge aya, Ikcewicašta kin oco-wasin en hiyu kte cin hehayan.

26 Qa hecen Israel oyate kin owasin nipi kta. Wowapi en kagapi qon iyecetu ; Zion etanhan Wanikiya wan u, qa woahtani Jakob yutokan iyekiciciye kta.

27 Qa woahtani yutokan iye-wicaweciciye cinhan hehan wicotakuye wicawaqu kte cin hee ce.

28 Wotanim waste kin ekta, hena niyepi kin on etanhan toka wicayawapi, tuka wicakahnigapi kin ekta, hena e hunka-kepi kin on etanhan waste wicakidapi.

29 Wakantanka taku wicaqu qa wicakico kin hena iyopeici-yapi wanin un.

30 Unkan nis niyepi kin ehan-na Wakantanka anayagoptanpi sni, tuka nakaha hena wicadapi sni kin on wowaonsida nicupi.

31 He iyecen nakaha hena is eya anagoptanpi sni kin, niye nitowaonsida kin on etanhan onsi-wicadapi kta.

32 Hena owasin witaya wicadapi sni kin en Wakantanka onawicataka, iyulpa onsiwicada kta heon etanhan.

33 Wakantanka toksape qa wosdoneye tawa wowijica osbe kin he tanka hinca. Woyaco tawa kin okahnihpica sni, qa tacanku kin iyeyepica sni.

34 Tuwe Itancan tawacin kin sdoneya he ; qa tuwe okiya un he.

35 Qa tuwe he tokaheya taku qu he ; kinhan kicicajujupi kta.

36 Iye etanhan, qa iye eciyatanhan, qa iye ohna taku owasin un ; owihanke wanin wowitan kiciun nunwe.

## WICOWOYAKE 12.

1 Heon mihunkawanji, Wakantanka wacantohnake cin on etanhan eciciyapi ce, nitancanpi kin wošnapi ni un, wakan, qa taku Wakantanka iyokipi kin, hena hecen yaqupi kta, he wawoyaki-yapi kte cin hecetu hinca.

2 Qa wicoicage kin de en iyecen awacanipi kte sni, tuka nitawacinpi yuecepidan kte cin on nihdutokecapi nunwe ; hecen Wakantanka tawacin waste, oi-yokipi, qa hduštanpi kin he tukte e iduceanpi kta.

3 Wowaonsida maqupi kin he eciyatanhan, tona niyepi ekta un kin otioyohi hecen eciciyapi ; Tu-



wedan token ihdukan kte cin he isanpa ihdawa kte s̄ni, tuka wacinksamya ihdukan kta, Wakantanka otoiyo hi wacinyanpi iyuta wicaqu kin he eciyatanhan.

4 Wicatancan wanjidan en wicahuha ota unhapi, qa huha kin hena owasin okonwanjidan ohanye s̄ni :

5 He iyecen unkiye unkotapi, tuka Messiya en tancan unwanjipidan, qa otoiyo hi huha unkiyapi.

6 Hecen wowaonsida otoiyo hi yकिनुक्यान unqupi kin eciyatanhan wicookihi ociptetu unhapi ; he wokcanpi kte cin hee hecinhan, wowacinye iyutapi kin on unkiyucanpi ece e kta.

7 Qa waowicakiyapi kin hee hecinhan, waowicakiyapi kin en unyakonpi kta ; qa tuwe waon-spekiya okihi kinhan, he waon-spekiyapi kin en un kta.

8 Tuwe wahokonwicakiye kte cin he wahokonwicakiyapi kin en un kte ; tuwe taku wicaqu kte cin he ohanpiya econ kte ; tuwe oyate wicayuhe cinhan he mnihenya econ kta ; qa tuwe onsiwicadake cinhan iyokipiya econ kte.

9 Wacantkiyapi kin he wohnaye wanin un nunwe. Taku sice cin he sice dakapi, qa taku wašte kin he en iyaihdaška po.

10 Hunkawanjin kiciyapi wašte kicidakapi kin he on otoiyo hi cante en kiciyuza po, qa woyuonihan on otoiyo hi iyotan kicidaka po.

11 Wicohtani kin en kujapi s̄ni, woniya on aiçiciyapi, Itancan kin okiya po.

12 Woape en wiyuŝkinpi ; kakijapi kin en icunhan wacintankapi ; qa wocekiye eya yukan po.

13 Tona owotanna un kin taku icakijapi kinhan owicakiya po. Wicašta icimanipi kin ohanpiya ecawicakicon po.

14 Tona śicaya nicuwapi kin hena wicayawašte po ; wayawašte po, qa wayaścapi s̄ni po.

15 Tona wiyuŝkinpi kin hena om wiyuŝkin po ; qa tona ceyapi kin hena om ceya po.

16 Otoiyo hi okonwanjidan awakicicin po. Taku wankan un kin hena ekta ewacinni s̄ni po ; tuka tona kun ihdawa kin hena en opa po. Wacinksapeiçidapi s̄ni po.

17 Tuwedan taku śica on itkom śicaya econpi s̄ni po. Wicašta owasin itokamya taku owotanna ecedan kamnan po.

18 Tohanyan oyakihipi kinhan, wicašta owasin om wookiye yakon po.

19 Wašte cicidapi kin, ihnuhan niye cinka watoyeçonpi kin, tuka wocanniye nakicipa po. Hecen wowapi en kagapi, Tokiçonpi kin he miye mitawa, wicawecu kta ce, Itancan kin eya.

20 Heon tuwe toka niye cin he wotektehda kinhan wo qu wo ; qa ipuza kinhan mini qu wo ; hecen ecanon kinhan, petaga kin he pa kin en eju ade kta.

21 Ihnuhan taku śica on ohinyanpi kin, tuka taku wašte e on taku sice cin ktepidan po.

### WICOWOYAKE 13.

1 Wicanagi otoiyo hi wicowaŝake itancan kin hena ihukun iyeiçiyete kte. Wicowaŝake Wakantanka etanhan un kin hecedan yukan. Wicowaŝake un kin hena Wakantanka kaga.

2 Heon etanhan tuwe wicowaŝake kin kipajin kinhan he Wakantanka toope kin kipajin,

qa tona wawakipajin kin hena wicayacopi kta.

3 Wicaštayatapi kin hena wicoħan wašte kin en wakokipe wicakicagapi šni, tuka wicoħan šice cin en. Hecen wicowašake kin he koyakipe kte šni he. Taku wašte e econ wo, kinhan on niyatanpi kta ce.

4 He taku wašte on niye ekta Wakantanka taokiye kin hee. Tuka taku šica ecanon kinhan kokipa wo. He mazasagye ituli yuhe šni; tuka Wakantanka taokiye kin heca, tuwe taku šica econ kinhan tokiĉon kta, wocanniye kin heon.

5 Heon etanhan anagoptan yanpi kta, wocanniye kin hecedan on etanhan šni, tuka nakun wiyukcanpi kin heon.

6 Heon etanhan mazaska mnakiyapi kin en oyapapi ece: hena e Wakantanka taokiyepi kin ohinniyan taku kin de econ yukanpi.

7 Heon etanhan, owasin taku token wicaqupi kta iyecece cin wicaqu po: Tona iye taoyate kin etanhan mazaska mnayanpi kin he *ecen wicaqu po*; qa tona oyate tokeca etanhan mnayanpi kin he *nakun ecen wicaqu po*. Tona kinihanpi kte cin hena wicakinihan po, qa tona yuonihanpi kte cin hena wicayuonihan po.

8 Tuwedan takudan ikicazo šni un po, otoiyoħi wašte yecidakapi kte cin hecedan. Tuwe wicašta tokeca wašte wicadake cin he woahope kin tanyan yuha.

9 He decetu; Wawiciahapi ecanon kte šni; Tin wicayakte kte šni; Wamayanon kte šni; Tuwedan en oitonšniyan wodake kte šni; Taku tokan tawapi kin yacin kte šni; qa woahope tokeca yuke cinhan wicoie kin

de en yuwitayapi; Wicašta tokeca niye inihdacin wašte yadake kta ce.

10 Waštewicadakapi kin he wicašta tokeca taku šica takudan ecakicon šni, heon waštewicadakapi kin he woahope yu ecetupi kin hee.

11 Qa nakun kaketu, anpetu kin sdonunyanpi, woištinma etanhan unkiĉtapi kte cin wanna iyehantu; nakaha eunhdakupi kte cin tokaheya wicaundapi qon he isanpa ikiyadan ihan;

12 Hanyetu kin wanna ecanon unkihunipi kta, anpetu kin hannaha u kta, heon etanhan otpaza wicoħan kin elhepunyanpi, qa iyoyanpa wipe kin kounyakapi kta.

13 Qa iyokipiya maunnipi kta, anpetu kin en iyececa. Hanyetu wacipi qa witkopi kin en *unkopapi* kte šni; wicawihomnipi qa wicinpi, wakinicapi qa winawizipi kin hena en *ounpapi* kte šni.

14 Tuka niye Jesus Messiya Itancan kin he koyaka po, qa wicaceħpi wocantiheye šice cin ecetu yapi kta e on takudan kicamnanpi šni po.

## WICOWOYAKE 14.

1 Tuwe wicada kinhan wašake šni ešta iyowinkiya po, tuka akipam waakinicapi kin ekta šni.

2 Wicašta wanĉidan taku owasin yuta okiħi awacin, qa wicašta tokeca wašake šni kin he walhe ece yuta.

3 Tuwe wote cinhan he tuwe wote šni kin ihaha kte šni; qa tuwe wote šni kinhan he tuwe wote cin yaco kte šni; Wakan-tanka he iyowinkiya.

4 Nituwe he wicašta tokeca taokiye kin daco he; he iye yu-

he cin en najin kta qa ís hinlipaye kta. Qa he ecen najin kiyapi kta, Wakantanka najin kiye kta okihi.

5 Wicašta wanji anpetu wanji iyotandaka, qa wicašta tokeca wan anpetu owasin akiyecen yawa ece. Otoiyoobi iye tawacin ekta sutaya awacin nunwe.

6 Tuwe anpetu wan awacin kinhan he Itancan kin on awacin; qa tuwe anpetu kin awacin šni kinhan, Itancan kin ekta awacin šni. Tuwe wote cinhan, he Itancan kin on wota, qa Wakantanka wopida eciya; qa tuwe wote šni kinhan, Itancan kin on wote šni, qa Wakantanka wopida eciya ece.

7 Unkiyepi kin tuwedan iye linca on ni šni, qa tuwedan iye linca on te šni.

8 Unnipi kinhan Itancan kin on unnipi, qa unťapi kinhan Itancan kin on unťapi. Hecen unnipi, qa unťapi *unma tukte* hecinhan, Itancan kin tawa unyanpi.

9 Hecen on Messiya te a ake kini, wicaťe a wicani kin heniyoza en Itancan kta e heon.

10 Tokeca nihunkawanji daco he; qa tokeca nihunkawanji iyakihaha he. Owasin Messiya tawoyaco oiyotanke kin itokam inaunjinpi kta.

11 Hecen wowapi en kagapi; Miye wani kin, heon hupahu otoiyoobi miye en canpeška makehde inajin kta, qa wicaceji otoiyoobi Wakantanka en wohdake kta, Itancan kin eya.

12 Heon etanhan unkiyepi otoiyoobi Wakantanka kin en wounhdakapi kta.

13 Hecen on, detanhan otoiyoobi unkiyiacopi kte šni, tuka kaken e iyotan wakonza po, tuwedan taku en siha ibotopi, qa

on hinlipaye kte cin he hunkawanjitku kin itokam ehde kte šni.

14 Miš sdonwaye a Jesus Itancan kin en awacami, takudan atayedan šape šni; tuka tuwe taku šapa kecin kinhan, he taku kin iye ekta šapa ece.

15 Qa woyute kin on etanhan nihunkawanji iyokišin yaye cinhan wowaštedake eciyatanhan mayani šni. Messiya tuwe on te ciqon he woyute nitawa kin on ihang ye šni wo.

16 Ihnuhan taku wašte duhapi kin he yašicapi kinhan.

17 Woyute qa woyatke kin Wakantanka tokiconze kin hee šni; tuka wicoowotanna wookiye qa Woniya Wakan kin en wowiyuškin kin hena ee.

18 Tuwe hena taku kin en Messiya wowidag ye cinhan, he Wakantanka iyokipi ye a, wicašta kin on wašte dakapi.

19 Heon etanhan taku tona wookiye kage cin hena unkakitapi kta qa nakun taku on otoiyoobi icaš unkiciyapi kta.

20 Woyute kin on etanhan Wakantanka taku kage cin he ihang ye šni wo. Awicakehan taku owasin wašte; tuka tuwe taku yute a on walitani wicaye cinhan, he šica ece.

21 Waconica yutapi šni, qa mini ša yatkanpi šni, qa taku tokeca on etanhan nihunkawanji hicahe a, walitani, qa wašake šni aye cin, hena *econpi* šni kinhan he wašte.

22 Wowacinye duha he: Niš niye Wakantanka itokamya hduha wo. Tuwe taku iyowinkiye cin on ihdaco šni kinhan, he yuwaštepi ece.

23 Qa tuwe wicada šni kinhan he yute cinhan wanna yacopi, wacinyanpi kin on hecon šni,



heon etanhan. Taku owasin wacinyanpi eciyatanhan šni kin hena woahntani.

## WICOWOYAKE 15.

1 Unkiye waunšakapi kin tona wašake šni un sutaya wacinyanpi šni kin on wacinuntankapi kta, qa iyokipiunkiciyapi kte šni.

2 Otoiyohei wicašta tokeca iyokipi unyanpi kta, wowašte en icah yapi kte cin heon.

3 Messiya iye kaeš iyokipi içiye šni, tuka wowapi en kagapi qon iyecen, Tona aniiapi kin waaia-pi kin he miye aihpemayanpi qon.

4 Taku tona wowapi en kagapi kin hena onspeunkiyapi kte cin heon kagapi, hecen wicowahbadan, qa wowapi wakan kin en wicakicanpte cin eciyatanhan woape unhapı kta.

5 Wakantanka wicowahbadan, wicakicanpte ko yuhe cin he Jesus Messiya eciyatanhan, otoiyohei okonwanjidan wacin en kiciyus niyanpi nunwe.

6 Qa hecen wicotawacin wanjidan, qa wicai wanjidan on Wakantanka Jesus Messiya Itancan unkiyapi he Atkuku kin dantanpi kta.

7 Heon etanhan otoiyohei iyowinkiciciya po, Wakantanka yutanpi kte cin heon Messiya iyowinunkiyapi qon iyececa.

8 Miye kin kaken epe; Jesus Messiya bakiħdayapi wicoħan kin en ookiye ikicaga, Wakantanka towicake kin heon, qa hunkakepi kin wahowicayapi qon he hduacetu kte cin heon etanhan.

9 Qa hecen Ikcewicašta kin Wakantanka yatanpi kta, iye towaonšida kin on; wowapi en kagapi qon iyececa, Heon etan-

han Ikcewicašta ehna ociyake ça nicaje kin iwadowan kta.

10 Qa ake hecen eya, Ikcewicašta kin iyuškin po, iye taoyate kin kici.

11 Qa ake, Ikcewicašta kin owasin Itancan kin idowanpi, qa oyate kin owasin he yatan po.

12 Ake Isaya hecen eya, Jesse hutkan wanjidan qa tuwe Ikcewicašta en wicaštayatapi un kte cin he icage kta; he Ikcewicašta kin wacinyanpi kta.

13 Hehan woape Wakantanka kin he wicayadapi kin eciyatanhan wowiyuškin owasin wookiye ko on imna niyanpi nunwe, Woniya Wakan towašake kin eciyatanhan woape en nina inicagapi kte cin heon.

14 Mihunkawanji niyepi on awacin manka, wowašte onijupidan, qa wosdonye owasin on oju niyanpi, hecen otoiyohei wahokonyeciciyapi kta oyakihipi.

15 Tuka mihunkawanji, hececa ešta waditagya wowapi cica-gapi, hecen wicoie wanjikji kiksuye ciyapi kta, Wakantanka towaonšida maqupi kin he eciyatanhan;

16 Ikcewicašta ehna Jesus Messiya taokiye kin wanji he miye kta, Wakantanka tawootanin wašte kin on ĩtawani, qa hecen Ikcewicašta wahdušnapi kin he woiyokipi kta, Woniya Wakan kin on yuwakanpi kin heon.

17 Heon etanhan Jesus Messiya en taku Wakantanka tawa kin on wowinkta mduha.

18 Wicoie wicoħan ko on Ikcewicašta anagoptanpi kta e, miye eciyatanhan šni, Messiya taku econ qon hena cajemdate kte šni:

19 Tuka wowapetokeca tanka,

qa woyuśinyaye econpi, Wakan-tanka Taniya Wakan towaśake kin eciyatanhan; hecen Jerusaleman etanhan, qa ohomniyan Ilurikon ekta Messiya tawootanin wašte kin omdaka ece.

20 Qa hecen wotanin wašte kin aićiciya oyag uwate, tukten Messiya cajeyatapi kin hetu śni, okinni wicašta tokeca taku ahde kin akan ti wakage kta naceca.

21 Tuka hecen wowapi en kagapi qon; Tona en cajeyatapi śni kin hena wanyakapi kta, qa tona nañonpi śni qon hena iyukanpi kta.

22 Qa hecen on otakiya ekta ciupi kte cin okitpani mayanpi:

23 Tuka nakaha makoce kin dena en tuktedan omakan śni qa wanna waniyetu ota ekta ciupi kta nina wacin;

24 Heon tohan Spania ekta mde cinhan hehan ekta ciupi kta. Heciya icimani mde cinhan tahepi wanciyakapi, qa ekta ye mayayapi kta awacin manka, tokaheya niyepi kin on cistiye-dan imamdeze cinhan.

25 Tuka nakaha Jerusalem ekta mda, tona owotanna un kin hena owicawakiye kte cin heon.

26 Tona Makedonia qa Akeya en yukanpi kin hena, tona wahanpanica wacinyanpi Jerusalem ekta yakonpi kin hena taku wicacupi kta e iyokipipi.

27 Hecon iyokipipi; taku iwicakicazopi kin iyecen unpi nakaes. Hena taku wakan yuhapi qon en Ikcewicašta opapi hecinhan, taku wicacelipi ekta un kin hena on itkom owicakiyapi kta iyececa.

28 Heon etanhan tohan he mduśtan qa waskuyeca kin de hena en awicawecipuspe cin-

han, hehan niyepi iyoopteya Spania ekta imdaunde kta.

29 Qa ekta ciupi kinhan, Messiya tawootanin wašte woyuwašte woojudan kin yuha wau kta sdonwakiya.

30 Hehan nakaha mihunkawanji ceciciyapi ce, Jesus Messiya Itancan kin caje on, qa Woniya Wakan towaštedake kin on, miye kici Wakantanka nina cemiyećiciyapi kte cin he.

31 Tona Juda makoce kin ekta anagoptanpi śni kin hena etanhan emahdakupi kta, qa Jerusaleman ekta wicohtani mitawa kin tona owotanna un kin iyokipi wicaye kte cin heon.

32 Qa hecen Wakantanka tawacin kin eciyatanhan wowiyuśkin yuha ekta ciupi, qa niyepi on imagaga mićiye kta.

33 Wookiye Wakantanka kin niyepi owasin en nicipi un nunwe.

#### WICOWOYAKE 16.

1 Phebe tawinohtinunyanpi, Kenkrea ekta okodakiciye kin en ookiye wanji hee cantohnake cišipi.

2 He Itancan kin on iyowin-yakiyapi kta, tona owotanna un kin iyececa, qa taku on i kin he en token ecayeconpi cin kinhan ecen okiya po. Iye kin wicota owicakiye ça miye nakun oma-kiya ece.

3 Priskula Akula kici, Jesus Messiya en mitawašipi kin hena napewicayuza po.

4 Hena e minagi kin on iye tahupi kin ehnakapi, qa hena miye miśnana pidamakiyapi śni, tuka Ikcewicašta ekta okodakiciye kin owasin pidawicayapi.

5 Qa iye tipi kin ohna okodakiciye kin napewicayuza po. Epinetus waštewadake cin he

napeyuza po; Akeya ekta Messiya en un qon tokaheya kin hee.

6 Mary nina ounkiyapi qon he napeyuza po.

7 Andronikus Junia kici mitakuye, qa om makaškapi qon hena napewicayuza po; yewicašipi kin owicapeya yuonihanpi, qa mitokapa tanhan Messiya en un qon hena.

8 Amplias Itancan kin en wašte wadake cin he napeyuza po.

9 Urbane Messiya en unkita-wašipi kin, qa Stacus wašte wadake cin, hena napewicayuza po.

10 Apelles Messiya en yuecepidan kin he napeyuza po. Aristobulus takuwicaye cin hena napewicayuza po.

11 Herodian mitakuye kin napeyuza po. Narkisus takuwicaye cin Itancan en un kin hena napewicayuza po.

12 Truphena Truphosa kici Itancan kin on hitanipi kin hena napewicayuza po. Persis wašte dakapi kin Itancan kin on nina hitani kin he napeyuza po.

13 Ruphus Itancan kin on kalinigapi kin, qa iye hunku, nakun mitawa kin, hena napewicayuza po.

14 Asunkritus, Plegon, Ermas, Patrobas, Ermes, hena, qa tona om unpi hunkawanjin kiciyapi kin hena ko; napewicayuza po.

15 Philologus, Julia, Nereus, iye tawinohtin kici, Olumpas, qa hena om tona owotanna un kin hena owasin napewicayuza po.

16 Otoiyohi iiputakapi wakan kin on napekiciyuza po. Messiya taokodakiciye kin napeniyuzapi.

17 Mihunkawanji ceciciyapi ce, tona woonspe onspeniciyapi

qon eciyatanhan šni yuomdecapi, qa wahtani wicayapi kin hena iwanwicayakapi, qa nawicakicipa po.

18 Tona hececapi kin Jesus Messiya Itancan unkiyapi kin wowidag wicaye šni, tuka iye tezipi kin hee, qa wicoie wašte, iapi iyokipi se ececa ko, on wicašta wacin ksape šni kin wicahnayanpi.

19 Niye waanayagoptanpi kin he wicašta owasin sonyapi. Heon niyepi kin on imduškin. Tuka taku wašte e on yaksapapi kta, qa taku šica on wadupipi kte šni wacin.

20 Unkan kohanna Wookiye Wakantanka kin niye nisihapi kin ihukuya Satan napan kta. Jesus Messiya Itancan unkiyapi towaonšida kin niyepi en nicipi un nunwe.

21 Timotheos mitawaši, qa Lukius, Jason qa Sosipater mitakuye kin, hena napeniyuzapi.

22 Tertius wowapi kin de owa kin he miye, Itancan kin on napeciyuzapi.

23 Gayos wonmakiye ca, okodakiciye owasin *hecawicakicon* kin, he napeniyuzapi. Erastus otowwe kin en wicašta itancan wan, qa Kuartus hunkawanjiu kiciyapi wan, hena napeniyuzapi.

24 Jesus Messiya Itancan unkiyapi towaonšida kin niyepi owasin en nicipi un nunwe.

25 Tuwe wootanin wašte mitawa qa Jesus Messiya woyake cin he eciyatanhan niyusutapi kta okihi, wowiyukan nakaha yuotaninpi kin eciyatanhan, he maka icage cin ehantanhan wicoicage kin en anahmanpi qon;

26 Tuka nakaha yuotaninpi, wicašta wokcan tawowapi wakan kin heon, Wakantanka ewi-



## I. KORINTH.

hanke wanin un, tawoahope kin eciyatanhan, qa oyate owasin wacinyan anagoptanpi kte cin heon *oyakapi*;

27 Jesus Messiya on etanhan, Wakantanka ecedan ksape cin hee wowitan owihanke wanin kicihan nunwe.

### PALOS

## KORINTH OYATE

### WOWAPI WICAKICAGE CIN:

#### TOKAHEYA KIN.

#### WICOWOYAKE 1.

1 Palos Wakantanka tawacin kin eciyatanhan, Jesus yewicaši kin heca e kañnigapi kin he, qa Sosthenes hunkawanjinunyanpi kici,

2 Wakantanka taokodakiciye Korinth ekta un qa Jesus Messiya on ecepidan kta, wakan wicakañnigapi kin hena eepi, qa tona makoce otoiyohe en Jesus Messiya is iyepi kin Itancan kiyapi, qa unkiš eya Itancan unkiyapi caje kin hoyeyakiyapi kin *wowapi unnicagapi*.

3 Wowaoñsida, wookiye ko, Wakantanka Ateunyanpi, qa Jesus Messiya Itancan kin etanhan niyepi en nicipi un nunwe.

4 Ohinniyan niyepi kin on Wakantanka mitawa wopida ewakiya, Wakantanka towaoñsida Jesus Messiya eciyatanhan niçupi kin heon;

5 Taku henana owasin on, iye en, wijica nicagapi, wicoie owasin qa wosdonye owasin on.

6 Hecen niyepi kin en Messiya tawoyaatanin kin yusutapi.

7 Qa hecen wowaste wanjidan sokpaniyan yaunpi šni, qa Jesus Messiya Itancan unkiyapi

ihdutanin kte cin he ape dukanpi.

8 He owihanketa lehanyan iyanionpepica šni niyusutapi kta, Jesus Messiya Itancan unkiyapi taanpetu kin etu.

9 Wakantanka wacinyepica, iye Cinhintku Jesus Messiya Itancan unkiyapi kin takodakiciyapi tawa kin en nicopi.

10 Mihunkawanji, Jesus Messiya Itancan unkiyapi cajeyan ceciciyapi ce; owasin okonwanjidan oie yetonpi, qa yuomdecapi wanin yaunpi kta, qa wicotawacin eca wanjidan wiyukcanpi ko wanjidan tanyan onspe yaunpi kte.

11 Mihunkawanji, Kloe etanhanpi kin hena omakiyakapi, niyepi kin en woakinica yuke cin he.

12 Hecen kaken epe; Niyepi otoiyohe, Palos opeya waun, qa, Apolos opeya waun, qa, Inyan opeya waun, qa Messiya opeya waun ce, ehapi ece.

13 Messiya yukinukan ehnakapi he; niyepi kin on Palos cansusbeca kin en okatanpi he; qa is Palos caje on baptem niçupi he.

14 Wakantanka wopida ewakiya, enitanhanpi tuwedan ba-

## WICOWOYAKE 2.

ptem waqu *śni*, tuka Krispos qa Gayos henioza :

15 Tuwedan, miye micaje on baptem wicawaqu, keye kte *śni* heon.

16 Qa nakun Stephanas tiyohnaka kin baptem wicawaqu, qa tuwe tokeca baptem waqu kinhan sdonwaye *śni*.

17 Baptem wicawaqu kta e on Messiya ye ma*śni*, tuka wotanin wa*šte* omdake kte cin heon; wicoksape iapi kin ohna *śni*, okinni Messiya cansusbeca tawa kin taku *śni* yapi kta.

18 Cansusbeca oyakapi kin he tona ihdutakunipi *śni* kin en witkotkoya iapi kin hee, tuka unkiyepi tona ni unyanpi kin en Wakantanka towa*šake* kin hee.

19 Kaken wowapi en kagapi; Tona wacin ksapa woksape tawa kin taku *śni* waye kta, qa tona oka*hnig*api kin hena wooka*hnige* tawa kin mdutakuni kte *śni* ce.

20 Wacin ksape cin tokiya un he; wowapi kage cin heca tokiya un he; wiconi kin de en wiyukcan kin tokiya un he; Wakantanka wicoicage kin de wicoksape kin yuwitkotko *śni* he.

21 Hecen Wakantanka toksape kin on, wicoicage kin de wicoksape eciyatanhan Wakantanka sdonyapi *śni* qehan, wowahokonkiye wowitkotkoke cin on, tona wacinyanpi kinhan hena ni wicaye kta Wakantanka iyokipi.

22 Juda oyate kin wowapetokeca dapi, qa Helenes oyate kin wicoksape akitapi ece.

23 Tuka unkiyepi kin Messiya cansusbeca en okatanpi kin he unkoyakapi; he Juda wica*šta* kin ekta wonahnaye qa Helenes wica*šta* kin ekta witkotkoya iapi kin hee.

24 Tuka tona wicaka*hnig*api,

Juda qa Helenes wica*šta* kin hena ekta, Messiya Wakantanka towa*šake* qa Wakantanka toksape kin hee.

25 Wakantanka taku tawa witkotkoke cin he wica*šta* kin isanpa woksape; qa Wakantanka towa*šake* *śni* kin he wica*šta* kin isanpa wowa*šake*.

26 Mihunkawanji, nicopi kin he wandakapi, wicace*hpi* eciyatanhan wacin ksapa ota *śni*, wa*šaka* ota *śni*, qa wica*šta* okinihan ota *śni*.

27 Tuka wicoicage kin en taku witkotkoke cin he Wakantanka ka*hniga*, on taku ksape cin wi*šten* ye kta; qa wicoicage kin en taku wa*šake* *śni* kin hena Wakantanka ka*hniga*, on taku wa*šake* cin wi*šten* ye kta.

28 Qa taku wicoicage kin en okinihan *śni* un kin he Wakantanka ka*hniga*, qa taku un *śni* kin hena ko, on taku un kin yutakuni kte *śni*.

29 Hecen iye itokam wicace*hpi* owasin ihdatan kte *śni*

30 Tuka iye eciyatanhan Jesus Messiya en unyakonpi; he unkiyepi on Wakantanka eciyatanhan woksape, qa woowotanna, qa woyuecedan, qa wokajuju ikicaga.

31 Hecen wowapi qon iyececa; Tuwe iwinkta kinhan Itancau kin on iwinkta kta.

## WICOWOYAKE 2.

1 Unkan mihunkawanji, ekta ciipi qehan, wicoie qa wicoksape oiyokipi kin yuha wai *śni*, tuka Wakantanka tawoyatanin kin ociciyakapi.

2 Niyepi kin ekta takudan sdonwaye kte *śni* e mi*çiconza*, Jesus Messiya hecedan, qa he cansusbeca kin en okatanpi.

## I. KORINTH.

3 Unkan waśake śni, wokokipeya nina macancan cicipi waun.

4 Qa mioie, qa womdake cin hena wicaśta toksape wicoie oiyokipi kin en un śni, tuka Woniya wayuotanin, qa wowaśake kin en un.

5 Hecen wicayadapi kin he wicaśta wicoksape tawa kin en ahe kte śni, tuka Wakantanka towaśake kin en.

6 Tuka tona ksapapi kin hena ekta woksape unkoyakapi ece; tuka wicoicage kin de en wicoksape kin hee śni, qa wicoicage kin de en wicaśtayatapi toksape kin hee śni, hena atakuni śni aya.

7 Tuka wowiyukan en Wakantanka toksape kin he unkoyakapi ece; ege nahmanpi qon, woicage śni itokam wowitan unkitawapi kte cin heon, Wakantanka wakiconze ciqon.

8 He wicoicage kin de en wicaśta itancanpi kin tuwedan sdonye śni; sdonyapi unkanś Wowitan Itancan kin cansusbeca en okatanpi kte śni tuka.

9 Tuka wowapi qon iyececa; Tona Wakantanka waśtedakapi kin taku wicakiciyuśtan kin he wiciśta kin tobinni wanyake śni, qa wicanoge on nahonpi śni, qa wicaśta cante kin mahen iyohpaye śni.

10 Tuka hena Wakantanka iye Taniya kin eciyatanhan unkoki-yakapi; Woniya kin he taku owasin iyukan, Wakantanka wośbe tawa kin sdonya.

11 Wicaśta kin ekta tuwe taku wicaśta tawa kin sdonya he, wicaśta taniya iye mahen un kin hee sdonkiya. He iyecen taku Wakantanka tawa kin tuwedan sdonye śni, tuka Wakantanka Taniya kin hecedan.

12 Unkan unkiye wicoicage

kin de en wicoksape kin he un-kicipi śni; tuka Wakantanka eciyatanhan Woniya Wakan kin he *unkicipi*, hecen taku Wakantanka iyunwin codan unqupi kin hena sdonunyanpi kta.

13 Qa hena unkoyakapi, wicaśta wicoksape woonspe wicoie kin eciyatanhan śni, tuka Woniya Wakan woonspe tawa kin eciyatanhan, hecen wicoie wakan kin wicaśta wakan iyukan-wicunyanpi ece.

14 Tuka wicacełpi wicaśta kin he Wakantanka Taniya taku tawa kin icu śni, hena taku witkotkoke dake a okałniga okihi śni, hena wakanyan iyukanpi nakaeś.

15 Tuka tuwe wakanyan un kin he taku owasin iyukan, tuka iye kin tuwedan on yukcanpi śni.

16 Itancan tawacin kin tuwe he iyukan he, hecen onspekiye kta. Tuka unkiye Messiya tawacin kin unhapi.

### WICOWOYAKE 3.

1 Unkan mihunkawanji, miś wicaśta wakanpi kin iyecen ociciyapi kta owakihi śni, tuka wicacełpi wicaśta kin heca, qa Messiya en hokśiyopa kin iyececa.

2 Pteasanpi yatke ciciyapi, qa waconica kin he ciłupi śni; he ehan nahalin he oyakihipi śni, qa dehan nahalin nakun oyakihipi śni.

3 Nahalin wicacełpi wicaśta kin henicapi. Niyepi ekta winawizipi, qa wakinicapi, qa yuomdecapi yukan hecinhan, wicacełpi kin henicapi, qa wicaśta akantu iyecen mayanipi śni he.

4 Wanji, Palos opeya waun,



#### WICOWOYAKE 4.

qa wanji is, Apolos opeya waun, eye cinhan, wicacepi wicašta kin henicapi šni he.

5 Palos he tuwe, qa Apolos he tuwe he; wowidake unpi kin hecapi, on wicayadapi, otoiyohti Itancan kin wicaqu kin iyececa.

6 Miye wowaju, Apolos mini akašta, qa Wakantanka icahya.

7 Tuwe woju kin he taku šni, qa tuwe mini akašta kin kin he nakun, tuka Wakantanka wai-cahye cin hee tanka.

8 Tuwe woju qa tuwe mini akašta kin hena okonwanjipidan; otoiyohti iye tohtani kin iyacinan iyunwin icupi kta.

9 Wakantanka kici litanipi kin hena unkiyepi; Wakantanka tamaga, qa Wakantanka tipi kage cin he niyepi.

10 Wakantanka towaonšida maqupi kin eciyatadhan wicašta ticaga ksape cin iyecen, taku ahehde kin ewahde, qa he akan wicašta tokeca tipi kaga; tuka otoiyohti token ticage cin he on waktaya un kte.

11 Tuka ahehde kin tokeca tuwedan ehde kta okihi šni, taku ehdepi kin hecedan, Jesus Messiya hee.

12 Unkan tuwe ahehde kin de akan mazaskazi, qa mazaska, qa inyan okitanin, qa can, qa peji, qa cedi en kage cinhan,

13 Otoiyohti ohan kin atanin kta; anpetu kin he yuotanin kta, peta on yuotaninyan aye kta; qa peta kin otoiyohti ohan kin he taku kin iyukan kta.

14 Tuwe ticage cin en ohan kin sutaya un kinhan he woka-juju icu kta.

15 Qa tuwe ohan kin huhnage cinhan he iwahpanice kta, tuka iye qe peta kin etanhan iyecen niyanpi kta.

16 Wakantanka tipi tawa kin

he niyepi, qa Wakantanka Taniya kin onitipi kin he sonyakiyapi šni he.

17 Tuwe Wakantanka ti kin ašanye cinhan he Wakantanka ihangye kta. Wakantanka ti kin he wakan, qa he niyepi.

18 Ihnuhan tuwe içihnaye cinhan. Tuwe niyepi ekta wicoicage kin de en ksapeiçida kin he witkotkoke içicaga nunwe; hecen ksape kta.

19 Wicoicage kin de en taku woksape kin he Wakantanka witkotkoke daka. Kaken wuwapi en kagapi; Wicašta ksape cin hena iye wohmaye tawapi kin on wicayuza ece.

20 Qa ake, Wicašta ksape cin tawacinpi kin hena taku šni e, Itancan kin sonya ce.

21 Hecen tuwedan wicašta kin on iwinkta kte šni. Taku owasin nitawapi.

22 Palos, qa Apolos, qa Inyan, qa wicoicage kin, qa wiconi, qa wiconę, qa taku nakaha un kin, qa taku u kte cin hena owasin nitawapi;

23 Qa Messiya tawa niyanpi, qa Wakantanka Messiya tawa ya.

#### WICOWOYAKE 4.

1 Wicašta kin kaken ecanun-kinpi kta, Messiya iwicadake cin qa Wakantanka tawowiyukan awanyakapi kin heuncapi.

2 Nakun tona waawanyakapi un kin hena owotanna ohanyanpi kta iyececa wicadakapi ece.

3 Tuka mayadacopi, qa wicašta akantu mayacopi ešta, he taku šni wadaka; qa nakun mihdaco šni.

4 Miye cinka takudan sdonwakiye šni, tuka heon owotanna mihdawa šni; tuka tuwe mayukan kin Itancan kin hee.

## I. KORINTH.

5 Hecen iyehantu śni kin itokam takudan yacopi śni po, Itancan kin he hi śni kin behanyan; he iye kin taku otpaza en nahmanpi qon aiyoyam ye kta, qa wicocante awacinpi kin yuatanin kta; unkan hehan otoiyohei Wakantanka eciyatanhan idowanpi kta.

6 Mihunkawanji, niyepi on etanhan hena hecen Apolos kici miye imihdacin; hecen unkiyepi kin on wowapi en kagapi kin isanpa kecanwicayakinpi kte śni onnisepi kta, qa hecen otoiyohei on wahanniçidapi kte śni.

7 Tuwe hecen iyotan nicaga he; qa taku niçupi śni kin tukte e duha he. Qa niçupi kinhan tokeca niçupi śni kin iyecen on iniwinkta he.

8 Nakaha winipipi; nakaha winijicapi; unkiyepi unkiçunonpa tanhan wicaštayatapi yaunpi: Unkan wicaštayatapi yaunpi wacin, hecen niyepi kici wicaštayatapi unyakonpi kta tuka.

9 Miś kaken wacin mduza; Wakantanka yewicašipi unkiyepi kin ehake taninyan eunhdepi, wiconțe iyacopi kin iyececa; hecen wicoicage qa mahpiya ohnihde cin, qa wicašta kin en woiwanyake kin he unkiyepi kta.

10 Messiya on wiuntkotkopika, tuka niye Messiya en yaksapapi. Unkiye waunšakapi śni, tuka niye wanišakapi. Unkiye unyuonihanpi śni, tuka niye nicinihanpi.

11 Qa nakun anpe dehan wotekteunhdapi, qa iunpuzapi, qa tancounkapidan, qa unkaštakapi, qa tuktedan tinsadan unyakonpi śni;

12 Qa hununkitapi, unnapapi kin on hitaunnipi. Unkaiapi keš wicunyawastepe; sicaya unkuwapi keš wacin untankapi;

13 Unyašicapi keš ceunkiyapi ece. Wicoicage en watušekšeca kin iyecen untagapi, qa anpe dehanyan taku owasin etanhan taku kahin elpeyapi kin hecen unyawapi ece.

14 Ištenciyapi kta heon hena hecen wowapi wakage śni, tuka micinca wašte wicawakidake cin iyecen wahokoncicyapi.

15 Messiya en waonspekiyapi kektopawinge wikcemna duhapi ešta, ateyapi ota duhapi śni; Jesus Messiya en wotanin wašte on cinca cicagapi.

16 Heon etanhan cecicyapi ee, ecen omicipa po.

17 Heon niyepi kin ekta Timotheos ye waši, he nakun micinca hokšincantkiyapi, qa Itancan kin en wacinyepica, he mitacanku Messiya en un kin kiksuyé niyanpi kta, ohinniyan okodakiciye otoiyohei en waonspewakiye cin iyececa.

18 Ekta ciupi kte śni se ececa, heon wanjikši walianhaniçidapi.

19 Tuka ecadan ekta ciupi kta, Itancan kin iyokipi kinhan, qa tona wahaniçidapi token eyapi kin hee śni, tuka taku okihipi kin he sdonwaye kta.

20 Wakantanka tokiconze kin he wicoie en ahe śni, tuka wowašake en han.

21 Cansakadan yuha ekta ciupi kta, qa iš wacantkiyapi cante aħbayedan ko hduha wau kta, unma tukte yacinpi he.

### WICOWOYAKE 5.

1 Niyepi ekta wawicihalapi yukan keyapi; qa wawicihalapi kin he iyececa Ikcewicašta kin ekta cajeyatapi śni, wanji iye atkuku tawicu kin yuze kte cin.

2 Unkan niye wahanniçidapi; on iyonicišicapi kta tuka; hecen

tuwe hecon kin niyepi etanhan iyaye yapi kta.

3 Miye mitancan on ekta opeya ciunpi śni, tuka micante on en waun seca, heon en waun kin iyecen wanna mduŝtan ; tuwe hecon kin,

4 Mniciciyapi qa mitoksape duhapi kinhan, Jesus Messiya Itancan unkiyapi caje kin on, qa Jesus Messiya Itancan unkiyapi towaŝake kin yuha,

5 Wicaŝta kin he Satan yaqupi kta, celĥi yutakuni kte śni, hecen Jesus Itancan kin taanpetu kin en nagi kin ni kta.

6 Iniwinktapi kin he waŝte śni. Taku on napoĥyapi kin waniqadan aguyapi ocowasin napoĥya ece e sdonyayapi śni he.

7 On napoĥyapi tannike cin elĥeya po ; hecen aguyapi teca qa napoĥye śni yaunpi kta. Messiya wohduze unkitawapi kin he iye kaeŝ unkiyepi on woŝnapi.

8 Heon etanhan wohduze kin en unkopapi kta, on napoĥyapi wanakaja qa wocanniye wicoŝice ko on napoĥyapi kin he *unhap*i kte śni, tuka wicoowotanna wowicake ko on napoĥyapi kin hee unkunpi kta.

9 Wowapi en kaken cicagapi ; Wiinalĥmanpi kin om mayanipi kte śni.

10 Tuka wicoicage kin de en wiinalĥmanpi, qa tona waicucupi kte cin, qa wawicaki sa, qa tona wakagapi ohodapi kin hena e wicawake śni ; unkanŝ wicoicage kin de etanhan tankan dapi kta tuka.

11 Tuka nakaha kaken wowapi cicagapi, tuwe hunkawanjin kiciyapi eciyapi kin he wiinalĥman, qa waicucukte cin, qa wakagapi ohoda, qa waaie sa, qa witko sa, qa wawicaki sa

heca kinhan, kici yaunpi kte śni, ihnuhan kici wayatapi kinhan.

12 Tona tankan unpi kin hena token ecin wicamdaco kta he ; tona timahen un kin hena wicadacopi śni he.

13 Tuka tona tankan un kin hena Wakantanka wicayaco ece. Hecen wawicilĥahapi econ qon he niyepi kin etanhan tankan iyeya po.

## WICOWOYAKE 6.

1 Wicaŝta wan taku icanŝin niyanpi kinhan token ecin owotanna olĥanye śni unpi kin en yukcanpi kta e ayaipi he, qa wicaŝta wacinyan unpi kin en ayaipi śni.

2 Tona wacinyan unpi kin hena wicoicage kin yacopi kta e sdonyayapi śni he. Unkan niyepi wicoicage kin dacopi kta hecinhan, taku iyotan cistinna kin hena iyukan iyenicacapi śni he.

3 Maĥpiya ohnihde kin hena eepi kaeŝ wicunyukanpi kta e sdonyayapi śni he. Hecen wiconi kin de en taku hiyeye cin sam iyeya *unkokihipi*.

4 Heon etanhan wiconi kin de en taku iyukanpi kte cin duhapi kinhan, tona okodakiciye kin en yuonihanpi śni kin hena iyukan wicaŝi po.

5 Iniŝtecapi kte cin heon hepa. Niyepi ekta wicaŝta ksape a tuwe hunkawanjitektupi kin wiyukan okihi kte cin wanica he.

6 Tuka hunkawanjinkiciyapi kin taku iyakicionpapi ece, a he nakun wacinyanpi śni kin wicitokam.

7 Hecen taku iyayecionpapi kin he ŝicaya ecanonpi ece. Tokeca e ŝicaya ecaniconpi kin ayatpaspapi śni he. Tokeca ta-



## I. KORINTH.

ku nicipi kinhan wacin tanka yeçunpi ñni he.

8 Tuka niye ñicaya ecanonpi, qa wawicayakipi ece, qa he nihunkawanjipi kin.

9 Tona owotanna ñni un kin hena Wakantanka tokiconze kin tawapi kte ñni e sdonyayapi ñni he. Ieihnayanpi ñni po: wiinalmanpi, qa wakagapi ohodapi sa, qa wawicihalhapi econpi sa, qa winyan içidapi kin, qa iwicalu sa.

10 Qa wamanonpi sa, qa wai-cucukte cin, qa witkopi sa, qa wawicakipi sa, henakiya Wakantanka tokiconze kin tawapi kte ñni.

11 Qa niş niyepi kin hunh heni-cecapi tuka, tuka niyujajapi; tuka niyuwakanpi; tuka niyuowotanpidan, Jesus Itancan kin cajeyan qa Wakantanka unkita-wapi Taniya kin on.

12 Taku owasin ecamon kta e iyowinmakiyapi, tuka taku owasin ecamon kta iyecece ñni; taku owasin ecamon kta e iyowinmakiyapi, tuka takudan imadake kte ñni wacin.

13 Woyute kin he wicatezi kin *kicagapi*, qa wicatezi kin iş woyute *kicagapi*, tuka henioza Wakantanka ilang ye kta. Unkan wicatančan kin he wiinalmanpi on kagapi ñni, tuka he Itancan kin *kicagapi*, qa Itancan kin he iş wicatančan kin tawa kta.

14 Unkan Wakantanka wanna Itancan kin najin kiye ça, nakun iye towaşake kin on najin unkiyapi kta.

15 Nitancanpi kin hena Messiya huha kin ee sdonyayapi ñni he. Hecen Messiya huha kin iwacu, qa witkowinna wan huha wakiye kta he. Hiya, hecetu ñni.

16 Tuwe witkowinna wan en kici iyaihdaşke cin he kici tan-

can wanjidan, sdonyayapi ñni he. Henioza celipi wanjidan kta ce, eye ciqon.

17 Tuka tuwe Itancan kin en kici iyaihdaşke cinhan he iye kici woniya wanjidan.

18 Wiinalmanpi kin nakicipa po. Woahłani wicaşta econ kin owasin wicatančan kin itankan un, tuka tuwe wiinalman kinhan he iye tancan kin en waiçihłani.

19 Tokeca, nitancanpi kin hena Woniya Wakan Wakantanka niçupi, qa niyepi en un kin he tipi tawa kin hee, qa hecen tawa nihdawapi ñni e sdonyayapi ñni he.

20 Taku tanka iyopeniyanpi, heon nitancanpi ninagipi ko on Wakantanka yatan po, hena Wakantanka tawa.

### WICOWOYAKE 7.

1 Wowapi en miyecagapi kin he icaltagya, wicaşta kin winohinca yutan ñni kin he waşte.

2 Tuka wiinalmanpi kte ñni e heon etanhan wicaşta otoiyo hi winohinca tawa hduhe kta, qa winohinca kin iş otoiyo hi wicaşta hduha nunwe.

3 Unkan wicaşta kin iye tawicu kin wowaşte eakicon kta, qa winohinca kin iş iye hihnaku kin nakun ecen *ecakicon* nunwe.

4 Winohinca kin iş iye tancan kin hduhe ñni, tuka hihnaku kin he *yuha*, qa nakun wicaşta kin iş iye tancan kin hduhe ñni, tuka tawicu kin he *yuha*.

5 Otoiyo hi tancan ehpekiciyapi ñni po, ptecedan hehanyan, napin wicayadapi kinhan hecedan, takudan yute ñni qa wocekiye eyapi kin en ocowasin yeniciyapi kte cin heon, kinhan ake napin yahdapi kta, unmana

kinhan oiçihipi şni kin on Satan iyutannianpi kta naceca.

6 Hena hecon eişipi kin e on hepe şni, tuka wahokonciçiyapi kin heon.

7 Wicaşta owasin miye waun kin iyecen unpi kta wacin, tuka otoiyohi Wakantanka etanhan wicowaşake hduha un, wanji decetu, qa wanji iş kaketu.

8 Tuka tona tanşna un qa tona wiwazicapi kin hena, miye waun kin iyecen unpi kte cin he waşte kta, kewicawakiya.

9 Tuka oiçihipi şni kinhan kiciyuzapi kta; wakan kiciyuzapi kin he waşte qa wacin itkon kin he şica.

10 Unkan tona kiciyuzapi kin hena kaken wahokonwicawakiya, qa he miye cinka *epe* şni, Itancan kin he *heya*; Winohinca iye hihnaku kin ahduştan kte şni.

11 Tuka ahduştan kinhan tanşna un kta, qa iş ake hihnaku qon okiciye kta; qa wicaşta kin iye tawicu kin ihnuhan ehpekiye cinhan.

12 Unkan ehake, Itancan kin hee şni, miye cinka hecen epe kta; Hunkawanjin kiciyapi wan winohinca wicada şni kin heca yuhe ça, he kici un iyokipi kinhan, he ihnuhan ehpekiye cinhan.

13 Qa winohinca wan wicaşta wicada şni kin heca yuhe ça, he kici un iyokipi kinhan, he iş nakun ehpekiye kte şni.

14 Wicaşta wicada şni kin he iye tawicu kin on yuwakanpi, qa winohinca wicada şni un kin he nakun iye hihnaku on yuwakan kagapi. Hecece şni unkanş nicincapi kin aşapapi kta, tuka nakaha hena e wakan.

15 Tuka wicada şni un kin he unma kpgan kinhan hecen kpa-

gan kta. Hena hecece cin en hunkawanjin kiciyapi, qa tawinohin kiciyapi kin idakapi şni. Wakantanka wookiye en unkiçopi.

16 Winohinca, niş taku sdonyaya he, okinni nihihna niyakiye kta. Qa wicaşta kin, niş token sdonyakiya he, okinni nitawin niyakiye kta.

17 Tuka otoiyohi token Wakantanka wicaqu qa Itancan kin otoiyohi wicakico kin he iyecen mani nunwe. Hecen okodakiçiyeye owasin en econ wicawaşi ece.

18 Tuwe bakişdayapi ecen kicopi hecinhan, bakişdayapi şni kin akite kte şni. Qa tuwe bakişdayapi şni ecen kicopi hecinhan, he bakişdaye kte şni.

19 Bakişdayapi kin he taku şni, qa bakişdayapi şni kin he nakun taku şni, tuka Wakantanka tawoahope opapi kin he tan-

ka.

20 Otoiyohi wicohtani en kicopi kin he en un kta.

21 Wowidake un kin henica ecen nicopi kinhan he ekta ewacin şni wo; tuka tawa niçiyeye kta e oyakihi kinhan he en oyaşan de kta.

22 Tuwe wowidake un kin he Itancan kico kinhan, hee Itancan kin on tawa içiya; qa nakun tuwe tawa içiyeye cin hecen kicopi kinhan he Meşsiya wowidake tawa kin hee.

23 Teşiya openitonpi, heon wicaşta akantu wowidag niyanpi şni nunwe.

24 Mihunkawanji, otoiyohi taku en un hecen kicopi kin he en Wakantanka kici un nunwe.

25 Unkan hokşiwinpidan icaştagya, Itancan kin eciyatanhan woope takudan mduhe şni. Tuka miye owotanna waun kta

## I. KORINTH.

Itancean kin ionsímakida, hecen token wacin mduze cin owahdake kta.

26 Nakaha wicokakije kin on etanhan de wašte kepcé, wicašta kin ecen un kte cin he wašte.

27 Winohinca en iyanihdaška he ; etanhan nihduške kta akite šni wo. Qa winohinca en iyanihdaške šni he ; winohinca wan akite šni wo.

28 Tuka winohinca duza esta wayahtani šni, qa hokšiwinna wan hihnaton esta wahtani šni ; tuka hena e wicacehpi ekta wicokakije yuhapi kta ; hececa esta ito itoncipapi.

29 Tuka mihunkawanji kaken epe kta ; Wanna tokata ptenyedan ; tona winohinca yuhapi kin hena winohinca tonpi šni kin iyecen unpi kte.

30 Tona ceyapi kin hena ceyapi šni kin iyececapi kte ; tona iyuškinpi kin hena iyuškinpi šni kin iyececapi kta ; qa tona wopetonpi taku yuhapi šni kin iyececapi kta.

31 Qa tona maka kin de woinyunyanpi kin šicaya yuhapi kin iyececapi kte šni ; wicoicage kin de ouncage kin atakuni šni aya.

32 Tuka takudan icante šice šni yaunpi kta wacin. Tuwe tawicu ton šni kin he Itancean taku tawa kin awacin yanka, token Itancean iyokipi ye kta.

33 Tuka tuwe tawicu ton kin he wicoicage kin en taku awacin yanka, token tawicu kin iyokipi ye kta.

34 Qa nakun winohinca hihnaton qa witašna un kin hena kici akidecece šni. Hihna ton šni kin he Itancean taku tawa kin awacin yanka, tancean nagí ko wakan un kta heon. Tuka hihna ton kin he wicoicage en ta-

ku un kin awacin yanka, token hihnaku kin iyokipi ye kta.

35 Tanyan yaunpi kta heon hena hepa. Taku on hmunkapi kin nitokam ewahnake kta e hee šni ; tuka wacinktonja wanin, qa wiciyokipi kin en Itancean kin oyapapi kta e heon.

36 Tuka tuwe iye cunwintku tanšna un kin tanyan ecakicon šni kecin, qa wanna wikoška hecinhan, qa he iyecetu kinhan, token cin kinhan ecen econ esta, wahtani kte šni ; wakan kiciyuzapi kte.

37 Tuka tuwe iye cante kin en sutaya un qa tokan tanhan hecon kiyapi šni, qa iye tawacin kin oičihi, qa cunwintku tanšna un hduhe kta e cante mahen ičiconze cinhan he tanyan econ.

38 Hecen tuwe kiciyuzapi kin en wicaqu kinhan he tanyan econ, qa tuwe kiciyuzapi kin en wicaqu šni kin he sanpa tanyan econ ece.

39 Winohinca kin tohanyan hihnaku ni un kin hehanyan wicoope kin on kaškapi ; tuka hihnaku kin te cinhan hehan tawaičiya, tuwe tokeca cin kinhan he hihnaye kta okihi, Itancean kin en un kin hecedan.

40 Tuka ecen yanke cinhan he iyotan waštaya un kta imdukecan, qa Wakantanka Taniya kin he mduha kepcé.

### WICOWOYAKE 8.

1 Unkan taku wakagapi wakiyušnapi kin icaltake, owasin wookahnige unhapi sdonunkiyapi. Wookahnige kin he tankaičidapi kaga, tuka wacantkiyapi kin he tanka icalhya.

2 Tuwe taku sdonya kecin kinhan he nahahin sdonye kte cin iyecen takudan sdonye šni.



## WICOWOYAKE 9.

3 Tuka tuwe Wakantanka wašte dake cinhan Wakantanka he iye sdonya.

4 Taku wakagapi wakiyušnapi kin yutapi kin he icahtake, wakagapi maka akan un kin he taku šni sdonunyanpi, qa Taku Wakan wanjidan, hecedan yukan.

5 Taku wakan eciyapi kin mahpiya ekta qa maka akan yukan ešta; taku wakan ota, qa itancan kiyapi kin nakun ota keyapi ece :

6 Tuka unkiye, Taku Wakan wanjidan Ateyapi kin hee unhapı, he etanhan taku owasin u, qa he en unkiye *unyakonpi*; qa Jesus Messiya Itancan kin wanjidan, he on taku owasin un qa he eciyatanhan unkiyepi.

7 Tuka owasin hecen okaħni-gapi šni. Wanjikji anpetu dehanyan wakagapi sdonyapi, taku wakagapi wakiyušnapi kin iyacinyan yutapi ece; hecen nagi suta šni kin hena ašamyapi.

8 Taku untapi kin eciyatanhan Wakantanka iyokipi unyanpi šni; wauntapi kinhan heon etanhan sanpa unwaštepi šni, qa wauntapi šni kinhan heon sanpa unšicapi šni.

9 Tuka ihnuhan wawoyakihipi kin de tona wašake šni un kin hena en wonahnaye kte cin.

10 Niye osdonya yaun kin, wakagapi tipi kin en wota idotanke cin tuwe wanniyake cinhan, wicašta nagi wašake šni un kin he taku wakagapi wakiyušnapi kin yuta onspeyakiye kte šni he.

11 Hecen nihunkawanji wašake šni un kin, on Messiya te cin he ihangyapi kta, niye wasdonyaye cin heon etanhan.

12 Tuka hunkawanjin kiciyapi kin en hecen wayaħtanpi, qa iye

nagipi kin wašake šni kin nagi-yeyayapi eca, Messiya en wayaħtanpi ece.

13 Heon etanhan woyute kin mihunkawanji waħtaniye cinhan, ohinniyān tado wate šni waun kta, okinni mihunkawanji waħtaniwaye kta.

## WICOWOYAKE 9.

1 Yewicašipi kin hemaca šni he; tawa mičiye šni he; Jesus Messiya Itancan unkiyapi he wanmdake šni he; Itancan kin en mioħan kin he niyepi šni he.

2 Wicašta tokeca ekta yewicašipi kin hemaca šni ešta, niyepi kin ekta hemaca. Yewicašipi kin en opeya waun kin ipuspe kin he niyepi, Itancan kin en.

3 Tona wimawangapi kin hena kaken awicamdupta ece :

4 Unkiye wauntapi qa waunyatkanpi unkokihipi šni he.

5 Yewicašipi kin tokeca, qa Itancan hunkawanjinwicaye cin, qa Inyan iyececa, unkiye tankšiwicunyanpi wanji hdus un-kayapi unkokihipi šni he.

6 Qa iš, miš miye Barnabas kicišnana, wicoħan ayušan owa-kihı šni he.

7 Toħantu kašta tuwe iyunwin codan zuya iyaya he; tuwe hastanhanka iyuwi kin huhde qa etanhan waskuyeca yute šni he; qa tuwe taħınca optaye wan hduhe qa optaye kin etanhan asanpi yute šni he.

8 Wicašta akantu eciyatanhan hena hecen epa he; qa woope kin he hena hecen eye šni he.

9 Moses toope kin en kaken kagapi, Tatanka aguyapi napan kin he iohmus icu yaye kte šni ce. Wakantanka tatanka iħawicakta he;

10 Qa iš unkiyepi kin on hena

## I. KORINTH.

hecen eya he. Unkiyepi kin on he wowapi en kagapi; hecen tuwe mahyumdu kinhan woape en mahyumdu kta, qa tuwe woape yuha aguyapi kapan kinhan he kici woape en okicipe kta.

11 Unkiye ninagipi kin on taku unkonicijupi hecinhan, taku wicacehpi kin nitawapi kin he mnaunyanpi kte cin he taku tanka he.

12 Wicašta tokeca niyepi ekta wookihi kin de en okicipapi kinhan, unkiye unkiyotanpi šni he. Tuka wookihi kin he unkunpi šni; taku owasin unkapaspapi, Messiya tawootanin wašte kin anaunptapi kte šni kin heon.

13 Tona tipi wakan kin en kicanyanpi kin hena tipi wakan kin etanhan nipi ece sdoniyayapi šni he; qa tona wahna wošnapı kin ekta olianyanpi kin hena wošnapı kin etanhan wotapi ece.

14 Hecen nakun Itancan kin woope kaga; tona wotanin wašte oyakapi kin hena wotanin wašte kin on nipi kta.

15 Tuka hena taku kin takudan iwacu šni, qa hecen ecami-conpi kte cin heon hena hecen wowapi wakage šni; miye maše kte cin hee wašte, qa tuwe imawinkta kin de ecetu šni miciciye kte cin he šica.

16 Wotanin wašte kin omdaka keš, he wowinkta wahdawa šni; waecon makiyapi, qa wotanin wašte omdake šni ehantanhan wokakije micihan.

17 Qa he iyokipiya ecamon kinhan on iyunwin mduhe kta, tuka iyomakipi šni esta taku econmakiyapi wan maqupi.

18 Hecen taku mduhe kta he. Wotanin wašte omdake cinhan, Messiya tawootanin wašte kin iyunwin codan ewahde, qa he-

cen wotanin wašte kin en w-wakihi kin tanyan mduhe kta.

19 Wicašta owasin ekta wowidake šni waun tuka owasin wowidake mayuhe wicawakiya, wanjikši okihiwicawaye kte cin heon hecamon.

20 Juda oyate kin wicehna, Juda wicašta kin hemaca, Juda oyate kin owicawakihi kte cin heon. Tona woope kin ihukuya un kin hena ekta woope yuha unpi kin hemaca, tona woope yuhapi kin hena owicawakihi kta.

21 Qa tona woope nicapi kin hena ekta woope codan unpi kin hemaca; — Wakantanka ekta woope codan waun šni tuka Messiya on woope yuha waun; tona woope nicapi kin hena owicawakihi kta.

22 Tona wašake šni kin hena en wašake šni se emaceca, tona wašake šni kin hena owicawakihi kta. Wicašta owasin en taku owasin un kin hemaceca, wanjikji ni wicawaye kte cin heon.

23 Wotanin wašte kin he on hecamon ece; hecen he en miš eya owape kta.

24 He de sdoniyayapi šni he; Tona oinyanke kin en inyankapi kin hena owasin inyankapi, tuka wicašta wanjidıan oqipe kin yekiya ece: Niš yeyakiyapi kta e iyecen inyanka po.

25 Tuwe kašta kici econ kte cinhan taku owasin iyatahde ičiye šni un. Hena watešdake atakuni kte šni kin yekiya kta, tuka unkiye watešdake ohinnian un kte cin he *unkakitapi*.

26 Heon etanhan miš hecen waimnanka, toketu tanin šni kin he iyecece šni; hecen nape on econ waun, tuwe okaduza ape cin iyecece šni;

27 Tuka mitancan kin suta miçicage ça ñinsmiçiya ; okinni wicašta tokeca wotanin wašte kin owicawakiyaka ešta, miye qe heyata iyemayanpi kte cin he *kowakipa*.

## WICOWOYAKE 10.

1 Mihunkawanji he de sdoneye šni yaunpi kta wacin sni, hun-kake wicunyanpi kin owasin małpiya šapa kin ihukuya yukanpi, qa owasin miniwanca kin op-ta hiyupi.

2 Qa owasin małpiya šapa qa miniwanca kin en Moses baptem wicaqu.

3 Qa owasin woyute wakan wanjidan etanhan yutapi.

4 Qa owasin woyatke wakan wanjidan etanhan yatkanpi. Imnija wakan kin wicihakam iya-ye ciqon he etanhan yatkanpi. Imnija kin he Messiya hee.

5 Tuka hena wicota Wakan-tanka iwicayuškin šni, hecen makoskan ihpayapi.

6 Unkan hena e waonspekiya unkitawapi kin eepi, hecen taku šica cantiheunyanpi kte šni, is iye cantiheyapi qon iyececa.

7 Qa wakagapi ohoyadapi kte šni, is iyepi wanjikji heconpi qon iyececa. Kaken wowapi en ka-gapi, Oyate kin wota qa wa-yatke iyotankapi, qa škan najin hiyayapi.

8 Qa wiinalmanpi kin econku-pi kte šni, is iyepi wanjikji econpi qon iyececa ; qa anpetu wan-jidan en kektopawinge wikce-mna nonpa sanpa kektopawinge yamni ihpayapi.

9 Qa Messiya iyutan unyanpi kte šni, hena wanjikji iyutan yanpi qon iyececa ; unkan wa-mduška ihangwicayapi.

10 Qa wawiyahnupi kte šni, is

iyepi wanjikji wawihnupi qon iyececa, qa waihangye cin on yutakunipi šni.

11 Hena taku kin owasin waon-spekiyapi on en wicabiyahde, qa unkiyepi wicoicage owihan-keta unyakonpi kin wahokonun-kiyapi kte cin heon wowapi en kagapi.

12 Hecen tuwe ñinsa najin ke-cin kinhan, he wakta un nunwe, okinni ihpaye kta.

13 Wowiyutanyan wan wicašta sdoneyapi šni ece kin en aniupi šni. Wakantanka wacinyepica, hecen wawoyakihipi kin isanpa iyutanniyampi kta iyowinye kte šni, tuka wowiyutanyan kin he enakiye kta, hecen oyakihipi kta.

14 Heon etanhan wašte cici-da-pi kin, wakagapi ohodapi kin na-kicipa po.

15 Wicašta wacin ksape cin hena hecen ewicawakiya, token epe cin niš iyukan po.

16 Woyawašte wiyatke unya-waštepi kin he Messiya we kin en kodakiciyapi kin hee šni he. Aguyapi unkiyušpapi kin he Messiya tancan kin en kodakici-yapi kin hee šni he.

17 Unkiye unkotapi, tuka agu-yapi unwanjipidan, qa tancan unwanjipidan ; unkiye owasin aguyapi wanjidan en akiptan unkopapi.

18 Wicacełpi eciyatanhan Is-rael oyate kin ekta ewicaton-wan po. Tona wošnapi kin etanhan yutapi kin hena wahna wošnapi kin en opapi šni he.

19 Heon token epe kta he : Wakagapi kin he taku, qa is ta-ku wakagapi wakiyušnapi kin he taku tanka he : Hiya.

20 Tuka taku Ikcewicašta kin wayušnapi ece kin hena Wakan-šica wakiyušnapi, qa Wakan-tanka wakiyušnapi šni. Unkan



## I. KORINTH.

taku wakan sícapi kin en oyeci-papi kta wacin síni.

21 Itancan tawoyatke qa nakun taku wakan sícapi tawoyatke kin yatkan oyakhipi síni. Itancan kin wahna wotapi tawa kin en oyapapi, qa nakun taku wakan sícapi wahna wotapi tawapi kin en oyapapi kta oyakhipi síni.

22 Itancan kin síhda unyanpi kta he. Iye sam iyeya waunsa-kapi he.

23 Taku owasin iyemicihantu tuka owasin taku wašte icalíye síni. Taku owasin iyemicihantu tuka owasin waonspekiye síni.

24 Tuwedan ísnana taku amnacíye kte síni, tuka otoiyo hi taku token tawa kte cin he akicicite kta.

25 Taku owasin tihocoka kin ekta wiyopeyapi kin he yuta po, qa wiyukcanpi kin on takudan iwangapi síni po.

26 Maka kin de taku ohnaka ko Itancan kin tawa.

27 Wicašta wicadapi síni kin wanji nicopi, qa ekta dapi tawatenyayapi kinhan, taku nitokam ehdepi kin he yuta po, qa wiyukcanpi on wiwangapi síni po.

28 Tuka tuwe, De wakagapi wakiyuśnapi ce, eniciyapi kinhan, yutapi síni po, tuwe oniciyakapi qa wiyukcanpi kin hena on. Maka kin de taku ohnaka ko Itancan kin tawa.

29 Wiyukcanpi kin cajemdata, niye nitawa síni tuka token tawa kin he waka. Tokeca tawa miçiye cin he wicašta tokeca tawiyukcan kin on mayacopi kta he.

30 Wowašte on en owape cinhan, tokeca e taku on wopida epe cin he on mayašicapi he.

31 Heon wayatapi qa wadatkanpi, qa taku kašta ecanonpi

kin owasin Wakantanka yatanpi kta e on econ po.

32 Juda oyate, qa Helenes oyate, qa Wakantanka taokodakiciye tuwedan icansinyayapi kte síni.

33 Qa miye taku owasin on owasin iyokipi wicawaye cin he iyececa, taku mduhe kte cin he awakite síni, tuka taku wicota yuhapi kte cin, hecen nipi kta.

### WICOWOYAKE 11.

1 Miye omicipa po, Messiya opeya waun kin iyececa.

2 Mihunkawanji, ciyatanpi ce, taku owasin on miyeksyuyapi, qa woope ciçupi qon ecehin duhapi kin heon etanhan.

3 Tuka he de sdonyayapi kta wacin; Wicašta otoiyo hi en pa kin he Messiya ee; qa winohinca pa kin he wicašta kin ee; qa Messiya pa kin he Wakantanka ee.

4 Wicašta otoiyo hi pa akalípe ton cekiye qa wiyukcan kinhan, he iye pa kin wowištenya ece.

5 Tuka winohinca otoiyo hi pa akalípe ton síni cekiye qa, wiyukcan kinhan, he iye pa kin wowištenya; he paha yuśdapi kin kici akidececa.

6 Winohinca ís pa akalípe ton síni kinhan paha yuśdapi kta. Tuka winohinca paha yuśdapi, qa ís hđasanpi kin he wowištece kinhan, pa akalípe ton un kte.

7 Wicašta kin ís pa akalípe ton un kin he hecetu síni, he Wakantanka touncage qa towitan kin hee; qa winohinca kin wicašta towitan kin hee.

8 Wicašta kin he winohinca kin etanhan síni; tuka winohinca kin he wicašta kin etanhan un.

9 Qa wicašta kin he winohinca

kiçagapi šni, tuka winoħinca kin iŝ wicaŝta kiu *kiçagapi*.

10 Heon winoħinca kin pa kin akan wowaŝake hduhe kta, maħpiya ohnihde cin hena on etanhan.

11 Tuka nakun wicaŝta kin winoħinca codan un ŝni, qa winoħinca kin iŝ wicaŝta codan un ŝni, Itancan kin en.

12 Unkan winoħinca kin he wicaŝta kin etanhan un kin, he iyecen wicaŝta kin iŝ winoħinca kin eciyatanhan u ; qa taku owasin Wakantanka etanhan un.

13 Niŝ niyepi kin he iyukcan po ; winoħinca pa akalipe ton ŝni Wakantanka cekiye cinhan he hecetu he.

14 Taku oiyokipi kin hee kaeŝ he onspeniciyapi ŝni he ; wicaŝta kin paha hanskaska hecinhan he wowiŝtece.

15 Tuka winoħinca kin iŝ paha hanskaska koyake cinhan he wowitan kin ee ; paha kin he woaçalipe qupi.

16 Tuka tuwe waakinin un kinhan, wicoħan kin de iyececa takudan unhapi ŝni, qa nakun Wakantanka taokodakiciye kin.

17 Unkan he de omdake ça ciyatanpi ŝni ; taku sanpa waŝte kin on mniniciyapi ŝni ; tuka taku aoptetu kin heon etanhan.

18 Tokaheya okodakiciye mniniciyapi eca yuomdecapi dukanpi keyapi nawaħon ; qa onŝpa wicawada.

19 Waakinicapi niyepi en un kta, hecen tona owotanna iniyukcanpi kin tanin kta.

20 Heon witaya mniniciyapi eca, he ħtayetu wotapi Itancan tawa kin yutapi kte cin hee ŝni ;

21 Wotapi kin en otoiyohi taku yute kte cin tokaheya icu ece ; unkan wanji wotektehda qa wanji iŝ witko ece.

22 Tokeca, tipi ohua wayatapi, qa wadatkanpi kte cin yahduhapi ŝni he. Wakantanka taokodakiciye kin ayaktapi ŝni, qa tona taku yuhapi ŝni kin hena iŝtenwicayayapi he. Token eciyayapi kta he. Heon ciyatanpi kta he. Ĥiya, ciyatanpi ŝni.

23 Miye taku Itancan maqu qon he ciçupi, Jesus Itancan kin, hanyetu wan iyopeyapi qon he en, aguyapi icu ;

24 Qa wanna wopida eye cin hehan kiyuŝpe ça heya ; Icupi qa yuta po ; mitancan kin niyepi on kiyuŝpapi kin he dee ; decen miksuya econ po.

25 Nakun iŝ eya iyecen wanna yatkan qehan, wiyatke kin icu qa heya ; Mawe kin en wicotakuye teca kin he dee ce ; decen econ po, tohanhan datkanpi eca, miksuya po.

26 Hecen tohan aguyapi kin de yatapi, qa wiyatke kin de datkanpi kinhan, henakiya Itancan te cin he duotaninpi ece, tohanyan hi ŝni kin hehanyan.

27 Heon etanhan, tuwe aguyapi kin de iyacin ŝni yute ça, Itancan tawiyatke kin de yatke cinhan, he Itancan kin tancan, we ko, on yacopi.

28 Tuka wicaŝta kin wihdukecan kta, hecen aguyapi kin de yute ça, wiyatke kin de etanhan yatke kta.

29 Tuwe iyacin ŝni yute ça yatke cinhan, he woyaco hdute ça hdatkan, Itancan tancan kin iyukcan ŝni kin heon.

30 Heon etanhan niyepi ekta wicota waŝakapi ŝni, qa wayazanpi sa, qa hunħ iŝtinmapi.

31 Unkiye unkihdukecanpi kinhan, tokan tanhan unkiyukcanpi kte ŝni.

32 Qa unkiyukcanpi kinhan,

Itancan kin wahokonunkiyapi, hecen wicoicage kin om unyapocopi kte śni.

33 Hecen mihunkawanji tohan wota mniniciyapi kinhan, otioyohi akicipe po.

34 Qa tuwe wotektehda kinhan, he tiyata wote kta; hecen woyaco en witaya yaipi kte śni. Qa taku nahahin ihe cin hena tohan wau kinhan, wiyeya ewahna ke kta.

WICOWOYAKE 12.

1 Mihunkawanji, taku wakan-yan wicaqupi kin iyukan śni yaunpi kta wacin śni.

2 Ikcewicašta kin henicapi, wakagapi iapi okitpani kin en aniyampi, ye niyanpi qon iyececa, he sdonyakiyapi.

3 Heon he sdonye ciciyapi; Tuwedan Wakantanka Taniya kin eciyatanhan ie a, Jesus ya-šice kte śni; qa nakun tuwedan Jesus e Itancan eciye kta okihi śni, tuka Woniya Wakan ecedan eciyatanhan okihi ece.

4 Unkan taku wicaqupi kin hena okonwanjidan śni, tuka Woniya kin e wanjidan.

5 Qa waeconpi kin okonwanjidan śni, tuka Itancan kin e wanjidan.

6 Qa wicohan toktokeca; tuka Wakantanka kin e okonwanjidan, iye owasin en taku owasin owicakicihan.

7 Qa otioyohi on iyopta ye kte cin heon Woniya yuotaninpi kin wicaqupi ece.

8 Woniya kin wicašta wan woksape wicoie kin qu ece; qa wanji iś wosdonye wicoie kin, hena Woniya wanjidan etanhan.

9 Qa Woniya kin he wanji tokeca wowacinye qu ece; qa wanji tokeca iś wawokiziyapi

qu ece, qa hena Woniya wanjidan etanhan.

10 Qa wicašta wan wowape-tokeca econpi, qa wanji tokeca wiyukanpi, qa wanji tokeca taku wakan iyukanpi, qa wanji tokeca iapi ocaje ota, qa wanji tokeca iapi ieska oyakapi kin heceken wicaqupi ece.

11 Tuka hena owasin Woniya wanjidan qa okonwanjidan un kin he oħanye a, token cin kin hecen wicašta otioyohi kipamni wicaqu ece.

12 Wicatancan kin he wanjidan tuka wicahuha ota yukan; qa tancan kin en huha kin hena ota qeyaś tancan wanjidan; Messiya kin iś he iyececa.

13 Woniya wanjidan on, unkiye owasin wicatancan wanjidan kta e baptem unqupi, Juda qa Helenes oyate, wowidake un kin, tona tawa iciyapi kin hena koya; qa owasin Woniya wanjidan kin he en wayatke unkiyapi.

14 Wicatancan kin he huha wanjidan śni, tuka ota.

15 Hehan wicasiha kin he, Wicanape kin he miye śni heon wicatancan kin en opeya waun śni ce, eye cinhan, heon etanhan wicatancan kin en ope śni he.

16 Qa wicanoge kin he, Wicašta kin he miye śni qa heon wicatancan kin en opeya waun śni ce, eye cinhan, ehantanhan wicatancan kin en ope śni he.

17 Wicatancan kin ocowasin išta kin ee unkanś, winahionpi kin tokiya un kta he; qa ocowasin winahionpi kin ee unkanś, waomnapi kin tokiya un kta he.

18 Tuka nakaha Wakantanka token iyokipi kin hecen wicahuha kin otioyohi wicatancan kin en ehde.



19 Qa hena iyulipa wicahuha wanjidan unkanś, tancan kin tokiya un kta he.

20 Tuka nakaha wicahuha ota eśta, tancan wanjidan.

21 Hecen iśta kin he, Cicin śni ce, nape kin eciya okihi śni ; qa nakun pa kin he, Cicin śni ce, siha kin eciye kte śni.

22 Qa nakun sanpa, wicatančan en wicahuha kin tona waśake śni se un kin hena iyotan.

23 Qa wicatančan ekta tona yuonihan śni undakapi kin hena iyotan unhdunihanpi ece ; qa tona owanyag śice cin hena iyotan woyokipi ece.

24 Tona waśte unyukanpi kin hena takudan sanpa cinpi śni ; tuka Wakantanka wicatančan kin icikoyagya kage ęa, tukten iyokpaniyan un kin he en yuonihanpi tanka kaga.

25 Hecen wicatančan kin en yuomdecapi wanice kta ; qa wicahuha kin hena otoiyo hi awakicicimpi kta.

26 Qa hecen huha wanjidan iyotanhan iyekiye cinhan, he kici huha kin iyulipa iyotanhan iyekiyapi kta ; qa huha wanjidan yuonihanpi kinhan he kici huha kin iyulipa iyuśkinpi kta.

27 Messiya tancan kin he niyepi, qa otoiyo hi huha yecidukanpi.

28 Unkan okodakiciye kin en Wakantanka kakenken ewicahde, tokaheya yewicaśipi kin hena, qa iyokihe wokcanpi, qa iciyamni waonspekiyapi ; hehan wicowaśake, hehan waasniyanpi, waokiyapi, itancanpi, qa ceji toktokeca.

29 Owasin yewicaśipi kin hecapi he ; owasin wokcanpi he ; owasin waonspekiyapi he ; owasin wicowaśake kin heca he :

30 Owasin waasniyanpi okihipi

he ; owasin ceji tokeca on iapi he ; owasin ieskapi he.

31 Wookihi iyotan waśte kin hena nina akita po. Tuka hena isanpa canku waśte wan cici-pazopi kta.

## WICOWOYAKE 13.

1 Wicaśta akantu, qa małpiya ohnihde cejipi kin on iwaa eśta, wacanwakiye śni ehantanhan maza śa snasna, qa taku ituya sna kin he iyemaceca.

2 Qa wowiyukan mduhe ęa, taku analibeya un kin owasin, wookałnige owasin ko, sdonwaye ęa, wowacinye owasin mduha, on he kin yutokan iyewaye kta owakihi eśta, wacanwakiye śni ehantanhan matakun śni.

3 Qa taku mitawa kin owasin won wicayapi kin en wahdusote ęa, mitancan kin hee kaeś ĩułnige kta e waqu eśta, wacanwakiye śni ehantanhan takudan iciiyopteya waun śni.

4 Wacantkiyapi kin he wicotawacin tanka qa wowaśte owasin. Wacantkiyapi kin he wawinawizi śni. Wacantkiyapi kin he wałanłanięida śni, qa ihdatan śni ece ;

5 Wawiśtenya econ śni, qa iśnana takudan amnaięiye śni, wacinko śni, qa taku śica iya-wicaonpe śni ;

6 Woałtani en iyuśkin śni, tuka wowicake kin en iyuśkin ;

7 Taku owasin kajuju ; taku owasin wicada ; taku owasin ape ; qa taku owasin iyowin-yan.

8 Wacantkiyapi kin he tohin- ni owihanke śni. Wokcanpi kin heńa enakiyapi kta ; ceji tokeca kin hena ayuśtan aye kta ; qa wookałnige kin hee kaeś atakuni kte śni.

## I. KORINTH.

9 Apadan sdonunyanpi, qa apadan unkiyucanpi.

10 Tuka tohan woyuŝtan kin he hi kinhan tona woyuŝtan ŝni kin hena ihanke kta.

11 Homakŝiyooqopa qehan, hokŝiyooqopa iyecen iwae a, hokŝiyooqopa iyecen wimdukcan, qa hokŝiyooqopa iyecen awacin waun; tuka wicaŝta imacaga hehan taku hokŝiyooqopa tawa kin amduŝtan.

12 Dehan ihdiyomdasin en iyecen aotpasya wawanunyakapi ece; tuka eqe hehan anog ito- hnake icitkokim wanunkiciyakapi kta. Nakaha taku kin tanyan sdonwaye ŝni; tuka e qe tokata sdonmayanpi kin iyecen tanyan sdonwaye kta e imicihan.

13 Unkan nakaha hena yamni en oonyan, wacinyanpi, qa aperi, qa wacantkiyapi; tuka wacantkiyapi kin he iyotan tanka.

### WICOWOYAKE 14.

1 Wacantkiyapi kin he okipa po, qa taku wakanyan wicaqupi kin hena cin po; tuka widukcanpi kte cin he iyotan.

2 Tuwe ceji tokeca on ie cin he wicaŝta kin takudan owicakiyake ŝni, tuka Wakantanka taku eciya; tuwedan nahon ŝni kin heon: hececa eŝta Woniya kin eciyatanhan taku woanalibe kin oyaka tuka.

3 Tuka tuwe wiyukcan oyake cin he wicaŝta kin wowicakiyaka, on icaliyapi qa wahokonkiyapi qa kicanptapi.

4 Tuwe ceji tokeca on ie cin he iye ksamiiya; tuka tuwe wiyukcan oyake cinhan he okodakiciye kin ksamwicaya ece.

5 Niyepi kin owasin ceji toktokeca on iyaapi kta wacin,

tuka widukcanpi kte cin he iyotan wacin. Tuwe wiyukcan kin he tanka qa tuwe ceji tokeca on ie cin he ihukuya, ieska oyake ŝni kinhan, hecen okodakiciye kin icaliyapi kta tuka.

6 Unkan nakaha mihunkawanji, ceji tokeca on iwaa en ciupi kinhan, he token oniciyapi kta he; yaotaninpi, qa wookahnige, qa wiyucanpi, qa woonspe kin unmana eciyatanhan eciciyapi ŝni kinhan.

7 Unkan taku ni un ŝni kin hena, cotanka qa iŝ candowan-kiyapi kin hotanin kinhan, ho toktokeca ŝni kinhan, he taku on etanhan tukte e yajopi, qa tukte e dowankiyapi kin sdonyapi kta he.

8 Maza yahotonpi tanka kin ho okonwanjidan ŝni yahotonpi kinhan, tuwe zuyapi kta e wiye-ya icicage kta he.

9 He iyecen niŝ niyepi, ceji on wicoie okahnih waŝteŝte iyaapi ŝni kinhan, token on etanhan taku oyakapi kin he taku ee sdonyapi kta he; okaduza kin en iyaapi kta.

10 Maka kin akan ho ocaje tokeca kanakiya naceca, qa owasin taku kapi.

11 Tuka miŝ ho kin taku kapi kin sdonwaye ŝni kinhan, tuwe ie cin he Ikcewicaŝta kin kecan- makin kta, qa miŝ eya tuwe ie cin he Ikcewicaŝta kin heca wadake kta.

12 Hecen wicohan wakan nina yacinpi kinhan, okodakiciye kin icaliyapi kta e wadupipike kte cin he akita po.

13 Heon tuwe ceji tokeca on ie cinhan, he ieska oyake kta e icekiye kta.

14 Miye ŝaia cewakiye cinhan, minagi kin he cekiya; tuka mitawacin e qe takudan icaliyae ŝni.

15 Hecen toketu he. Miye minagi kin eciyatanhan cewakiye kta, qa nakun mitawacin kin eciyatanhan cewakiye kta; minagi kin on wadowan kta, qa nakun mitawacin kin on wadowan kta.

16 He hecece ūni kinhan, ninagi on wopida eha eca, tuwe onspe ūni en iyotanke cin he token, wopida ehe cin en, Amen eye kta he, taku ehe cin sdoney ūni nakaes.

17 Wopida tanyan eha, tuka iye kin okahnige ūni.

18 Wakantanka mitawa wopida ewakiya ce, niyepi kin owasin sam iyeya ceji tokeca on iwaa ece.

19 Tuka okodakiciye kin en mitawacin kin eciyatanhan wicoie zaptanna iwae kta, on wicaūta tokeca onpsewicawakiye kte cin he iyotan waūte, qa ceji tokeca on wicoie kektopawinge wikcemna iwae kte cin he aoptetu.

20 Mihunkawanji, wookahnige en hokūsiyoqopa unpi ūni po; tuka wicotawacin ūice cin en hokūsiyoqopa po, qa wookahnige kin en wicaūta tanka un po.

21 Wooke kin en kaken kagapi; Ceji tokeca, iha tokeca ko on oyate kin de owicaweciye kta; tuka hececa eūta, namaūhonpi kte ūni, Itancan kin eya.

22 Hecen ceji tokeca kin hena wowakta kin hee, tona wicadapi ūni kin hena eepi ūni, tuka tona wicadapi kin hena on wowapetokeca kin hee.

23 Okodakiciye kin ocowasin witaya mniciyapi, qa owasin ceji tokeca on iapi kinhan, qa tona wacinton ūni, wicada ūni ko en hipi kinhan, winitkotkopika kecannicinpi kte ūni he.

24 Tuka owasin wiyukanpi,

qa tuwe wicada ūni wacinton ūni un kin tin hiyu kinhan, he owasin on onspekiyapi, qa owasin on yacopi kta.

25 Qa hecen iye cante kin ekta taku analibe cin yutaninpi kta; hehan makipusdiya elpeiciye qa Wakantanka ohoda kta, qa Wakantanka niyepi en nicipi un kin oyake kta.

26 Heon mibunkawanji toketu he: Mniciciyapi eca niyepi otioyohi odowan duhapi, qa woonpe duhapi, qa ceji tokeca, qa yaotaninpi wan, qa ieska oyakapi wan duhapi ece. Taku owasin waonspekiyapi kta e on econpi nunwe.

27 Tuwe ceji tokeca on ie cinhan, wancadan wicaūta nomnom yannimni, qa hena wanji itokto econpi kta, qa wanji ieska kiyapi kta.

28 Tuka tuwe ieska kiyapi kte cin wanice cinhan, okodakiciye kin en inina yanke kta; is iye oiciciye qa Wakantanka okiye kta.

29 Qa wicaūta wokcan kin hena nomnom qa yannimni oyakapi kta, qa unmanpi kin wiyukan unpi kta.

30 Qa tuwe ikiyedan iyotanke cin he taku wakanyan okiyakapi kinhan, tokaheya kin he inina yanke kta.

31 Owasin wanji itokto wudukcanpi kin odakapi kta oyakihipi; hecen owasin onspekiyapi, qa owasin iwicakiyapi kta.

32 Qa wicaūta wokcanpi toksapepi kin wicaūta wokcanpi kin anawicakigoptanpi ece.

33 Wakantanka kin he oqoyapi kin kage ūni, tuka wookiye kin he tawa, oyate wakan okodakiciye kin owasin en un kin iyececa.

34 Unkan winohinca nitawapi



kin okodakiciye kin ekta inina yankapi kta. Hena ie kta e iyowinyanpi šni, tuka anagoptan yukanpi kta, woope heye cin iyecen.

35 Qa taku onspepi kta cinpi kinhan iye tipi ekta hihnakupi kin iwicawangapi kta. Okodakiciye kin en winohinca ie cin he wowištece.

36 Tokeca, niyepi kin etanhan Wakantanka oie kin hinanpa he; qa niyepi nišnanpidan ekta nihipi he.

37 Tuwe wicašta wokcan, qa iš wicašta wakan kin heca kecaničn kinhan, he taku wowapi en cicagapi kin hena Itancan ta-woahope kin hee e yaotanin kta.

38 Qa tuwe iyukcan šni un kinhan, he iyukcan šni un nunwe.

39 Hecen mihunkawanji wudukcanpi kte cin he akita po, qa ceji tokeca on iapi kte cin tehin-dapi šni po.

40 Qa taku owasin iyokipiya owotanna econpi nunwe.

#### WICOWOYAKE 15.

1 Tuka, mihunkawanji, wotanin wašte unkoniciyakapi, qa iyacupi qon en ayahanpi kin he sdon-ye ciciyapi.

2 He eciyatanhan nakun yanipi kta, wicoie unkoniciyakapi kin on, he tiŋsa duhapi kinhan, qa ecinšniyan awacanipi šni kinhan.

3 Otokaheya ekta taku iwacu qon he cičupi; Waunhtanipi kin on Messiya te cin, wowapi wakan *eye cin* ecetu;

4 Qa hnakapi, qa anpetu iciyamni kin piya ikicage cin, wowapi wakan *eye cin* ecetu.

5 Qa Inyan wanhdake ča, hehan ake nonpapi kin wanhdakapi.

6 Hehan he iyohakam wandan hunkawanjin kiciyapi opawinge zaptan wanyakapi, hena wicota nahahin ni unpi, tuka wanjikji ištinnapi.

7 Qa he iyohakam Jakob wandaka; hehan yewicašipi kin owasin wanhdakapi.

8 Qa ehake miš miye wanmdaka, okaškan tonpi kin iyemaceca.

9 Yewicašipi kin miye iyotan macistinna, qa Wakantanka taokodakiciye kin šicaya wakuwa qon heon yešipi emakiyapi kte cin iyemacece šni.

10 Tuka tomakece cin Wakantanka towaonšida kin on hema-ceca. Qa iye towaonšida mici un kin he taku šni wanica, tuka hena owasin iyakapeya nina htawani; qa he miye šni, Wakantanka towaonšida mici un kin hee.

11 Heon, he miš miye, qa iš iyepi kin, hecen unyaotaninpi, qa nakun hecen wicayadapi qon.

12 Unkan Messiya wiconte kin etanhan piya ikicage cin he oyakapi hecinhan, token on niyepi wanjikji, Wiconte etanhan piya wicoicage wanica ce, ehapi he.

13 Wicašte cin piya wicoicage wanica hecinhan, Messiya piya ikicage šni.

14 Qa Messiya piya ikicage šni hecinhan, hehan unkoyakapi kin he taku šni qa wacinyayapi kin he nakun taku šni.

15 Qa Wakantanka en unkitonpi šni kin; Wakantanka Messiya piya najin kiye cin he unkoyakapi; tuka he najin kiye šni, wicašte cin ake najinpi šni kinhan.

16 Wicašte cin piya najin ki-yapi kte šni kinhan, hehan Messiya nakun piya najin kiyapi šni.

17 Qa Messiya piya ikicage

śni hecinhan, wacinyayapi kin he takudan okihi śni, qa nahahin wayalitanipi kin ehna yaunpi.

18 Hehan tona Messiya on iştinma iyayapi qon hena nakun takunipi śni.

19 Wiconi kin de en ecedan Messiya on ape unyakonpi hecinhan, wicašta owasin unkiye iyotan iyotanhana iyeunkiyapi ece.

20 Tuka wanna Messiya wiconę etanhana piya ikicaga, qa tona iştinmapi qon hena en taku tokaheya icage cin hee.

21 Wicašta kin eciyatanhan wiconę u kin, he iyecen wicašta kin eciyatanhan wiconę etanhana piya wicoicage kin u ce.

22 Adam en owasin řapi kin, he iyecen Messiya en owasin piya ni yapi kta.

23 Tuka otoiyo hi tohan iye hantu kinhan; Messiya e tokaheya, qa hehan tona tawa kin hena, Messiya ake hi kinhan.

24 Qa hehan owihanke kta, tohan wokiconze kin Wakantanka Ateyapi kin kicu kta; wokiconze owasin, qa wicowaşake owasin, qa wookihi kin ihangye cinhan.

25 Tona toka yapi kin hena owasin iye siha kin ihukun iye wicaye kte cin hehanyan ito wicaştayatapi yanke kta.

26 Qa toka ehake ihangye kte cin he wiconę kin ee.

27 He siha kin ihukuya taku owasin ekihnaka. Tuka tohan, He ihukuya taku owasin ehna kapi kin, eye řehan, tuwe he ihukuya taku owasin ehna ke cin he okaptapi e tanin.

28 Qa tohan taku owasin he ihukun iyeyapi kinhan, hehan Cinhintku kin ege tuwe taku owasin iye ihukun iyeye cin he

ihukun un kta, hecen Wakan tanka owasin en ocowasin un kta.

29 Wicaę cin ecaca piya ikicagapi kte śni hecinhan, tona wicaę cin on baptem wicaęupi kin hena taku tokonpi kta he; qa tokeca e wicaę cin on baptem wicaęupi he.

30 Qa tokeca anpetu iyohi řa ikopeya unyakonpi he.

31 Jesus Messiya Itancan unkiyapi kin en widuşkinpi kin en owape cin he cajemdate řa, Anpetu iyohi mařa ce, epa.

32 Wicašta akantu iyecen, Ephesos ekta wamanica kici weci za eřta, on taku iyomapte kta he, wicaę cin piya wicoicage śni kinhan. Wauntapi, qa wanyatkanpi kta, heyakecinhan unřapi kta ce.

33 Içihnayanpi śni po; kodakiciyapi řice cin hena wicoňan waşte yuřica ece.

34 Wicoňan owotanna on ihduhicapi, qa waňtanipi śni po. Wanjikji Wakantanka sonyapi śni. Winiştecapı kte cin heon hena hecen epe.

35 Tuka okinni tuwe heye kta; Wicaę cin token piya icahyapi, qa taku tancan kin yuha hiyupi he.

36 Winitkotkoka, taku oyaju kin he ře śni kinhan, icage śni ece.

37 Qa taku oyaju kin he tancan icage kte cin he oyaju śni, tuka su ecedan, aguyapi qa iř taku toktokeca naceca.

38 Tuka Wakantanka token iyokipi kin hecen tancan qu, qa su ocaje otoiyo hi tancan tawa kin kicu ece.

39 Celępi owasin celępi okonwanjidan śni, tuka wicaceępi kin he wanji ee, qa woteca celępi kin wanji hee, qa hogan ce-

## I. KORINTH.

hpi kin wanji hee, qa zitkadan  
cehpi kin wanji hee.

40 Unkan mahpiyata tancan,  
qa makata tancan kin heca yu-  
kan. Tuka mahpiyata un kin  
he towitan kin wanjidan, qa  
makata un kin he towitan kin  
tokeca.

41 Anpetu wi towitan kin  
wanjidan, qa hanyetu wi towi-  
tan kin he tokeca, qa wicanhpi  
towitan kin he nakun tokeca;  
qa wicanhpi wanji wicanhpi to-  
keca kici wowitan en akidecece  
sni.

42 He iyecen wicate cin piya  
wicoicage. Tancan hwin ojupi,  
tuka hwin kte sni ekicetu  
yapi.

43 Wowihahaya ojupi, tuka  
wowitan ekicetu yapi. Wowa-  
sake sni yan ojupi, tuka wowa-  
sagya ekicetu yapi.

44 Wicacehpi tancan ojupi,  
tuka wowakan tancan ekicetu  
yapi. Wicacehpi tancan yukan,  
qa wowakan tancan kin yu-  
kan.

45 Kaken wowapi en kagapi  
qon, Adam wicasta tokaheya  
kin he wicanagi ni un kin heca  
kagapi, qa Adam ehake un kin  
he Woniya Wanikiye cin hee.

46 Tuka taku wakan un kin he  
tokaheya sni, tuka taku cehpi  
kin hee, qa iyohakam taku wa-  
kan kin.

47 Wicasta tokaheya kin he ma-  
ka etanhan un, qa maka kin he-  
ca; Wicasta iyokihe kin he  
Itancan mahpiya eciyatanhan  
un kin hee.

48 Maka kin heca un qon, tona  
maka hecapi kin hena hececapi;  
qa mahpiya tanhan un qon, tona  
mahpiya tanhan un kin hena  
hececapi.

49 Unkan makata un kin to-  
uncage kin unhapi kin, he iye-

cen mahpiya tanhan un kin to-  
uncage kin unhapi kta.

50 Mihunkawanji kaken epa;  
Wicacehpi qa wicawe kin Wa-  
kantanka tokiconze kin tawapi  
kta okihipi sni, qa nakun wica-  
hwin wicalhwin kte sni kin ta-  
wa kte sni.

51 Wanyaka po, wowiyukean  
wan ociciyakapi; owasin unki-  
stinmapi kte sni, tuka owasin  
unyutokecapi kta.

52 Ihnuhanna, ista karpapi se  
en maza yahotonpi tanka ehake  
kin *tanin* kinhan; maza yaho-  
tonpi tanka kin he yahotonpi kta,  
qa wicate cin hwin sni yan na-  
jin wicakiyapi kta, qa unkiye  
unyutokecapi kta.

53 Taku hwin kte cin de wi-  
calhwin sni koyake kta, qa te  
kte cin de tepica sni koyake  
kta.

54 Qa tohan taku hwin kte cin  
de wicalhwin sni koyake ca, tan-  
can wiconte kin de wiconi kin  
ogeton kinhan, hehan wicoie  
kin wowapi en kagapi qon ecetu  
kta; Wiconte kin he woohiye  
kin e ocowasin iocokaya.

55 Wiconte, wicape nitawa kin  
tokiya un he. Wicahnakapi,  
woohiye nitawa kin tokiya un  
he.

56 Wiconte icape kin he woah-  
litani ee, qa woahitani wowa-  
sake kin he woahope kin ee.

57 Tuka Wakantanka woohiye  
unqupi, Jesus Messiya Itancan  
unkiyapi kin eciyatanhan, he  
wopida yuha nunwe.

58 Hecen mihunkawanji wa-  
ste cicaidapi kin, sutaya yahanpi,  
qa pahoho sni yaunpi nunwe;  
qa ohinniyen Itancan ohan kin  
en ahiciya po, Itancan kin on  
htayanipi kin he taku sni wa-  
nice kta sdoniyayapi kin heon  
etanhan.



## WICOWOYAKE 16.

1 Wicašta owotanna un kin hena taku wicakicamnanpi kte cin, token Galatia ekta okodakiciye kin econ wicawaši qon, he iyecen niš econ po.

2 Anpetu tokaheya kin en niyepi otoiyohi token oyakhipi kin, iyacinyan eyahnakapi kta, hecen wau kinhan, wamnayanpi wanice kta.

3 Qa wau kinhan, tona wowapi on wicayakahnigapi kin, hena wicakupi nitawapi kin he Jerusaleim ekta aye wicawaši kta.

4 Qa miye ekta mde kte cin he wašte kta naceca hecinhan hena om mde kta.

5 Unkan Makedonia opta mde cinhan, hehan ekta ciupi kta : qa Makedonia opta mde kte cin he hecetu.

6 Qa okinni cicipi waun kta, han, waniyetu ihunniwaye kta naceca ; hecen hetanhan tokiya mde cinhan niye amayadapi kta.

7 Nakaha tahepi wanciyakapi kte šni, tuka Itancan kin iyokipi kinhan, cicipi owanji manke kta wacanmi.

8 Tuka anpetu iwikeemna zaptan kin hehanyan Ephesos en owanjidan manke kta.

9 Tiyopa tanka wawokihi kin makiyulidokapi, qa tona wakini-capi kin hena ota.

10 Unkan Timotheos ekta i kinhan, kokipešniyan en niunpi kta e akita po : He nakun miye *ecamon* kin iyecen Itancan tohtani kin econ ece.

11 Heon tuwedan ihaša kte šni ; tuka wookiye yuha au po, ekta mahiyu kta ; he hunkawanjin kiciyapi kin om u kta ape manka.

12 Apolos mihunkawanji, he hunkawanjin kiciyapi kin om ni-

yepi ekta niipi kta e nina cinwakiya ; tuka iye dehan ekta ye kta ecaca cin šni, tuka tohan cin kinhan ekta i kta.

13 Kiktahan un po, wowacinye en sutaya han po, wicašta iye-cen ohanyan po, wašaka po.

14 Taku nitawapi kin owasin wacantkiyapi on econpi nunwe.

15 Mihunkawanji, ceciciyapi ce ; Stephanas tiyohnaka kin sdon-yayapi, he Akeya en waskuyeca tokaheya icage cin hee, qa wicašta owotanna owicakiyapi kin en ye ičiyapi ece kin ;

16 Tona hececapi, qa tona wawokiyapi, qa htanipi kin hena owasin wicihukuya ye ničiyapi kta.

17 Stephanas qa Phortunatus qa Akekus hipi kin heon imduškin ; hena e taku ecamiyeconpi šni kin he ecetu miciciyapi.

18 Qa minagi kin magaga mayanpi, qa nitawapi nakun. Heon etanhan tona hececapi kin hena wicayuonihan po.

19 Asia ekta okodakiciye kin hena nape niyuzapi. Akula qa Priskila Itancan kin on sutaya nape niyuzapi, qa okodakiciye iye tipi ohna un kin hena koya.

20 Hunkawanjin kiciyapi kin owasin nape niyuzapi. Iiputakapi wakan kin on otoiyohi i ikiciputaka po.

21 Palos he miye nape kiciyuzapi kin de miye minape kin on *wakaga*.

22 Tuwe Jesus Messiya Itancan kin waštedake šni kinhan, he anathema maran-atha un nunwe.

23 Jesus Messiya Itancan unyanpi towaonsida kin nicipi un nunwe.

24 Jesus Messiya on wacanwakiye cin niyepi owasin en nicipi un nunwe. Amen.

## KORINTH OYATE

WOWAPI WICAKICAGE CIN;

INONPA KIN.

## WICOWOYAKE 1.

1 Palos, Wakantanka tawacin kin eciyatanhan, Jesus Messiya yeši qon he, qa Timotheos hun-kawanjinkiciyapi wan kici, Korinth ekta Wakantanka taokodakiciye kin, qa Akeya owancaya tona owotanna un kin hena koya, *wowapi unnicagapi*.

2 Wowaońsida, wookiye ko, Wakantanka Ateunyanpi, qa Jesus Messiya Itancan kin etanhan, nicipi un nunwe.

3 Wakantanka Jesus Messiya Itancan unkiyapi he Atkuku, qa waonsidapi en ateyapi, qa Wakantanka owasin wacintonhnag wicaye cin he wowaste yuha nunwe.

4 He unakijapi owasin en wacintonhnag unyanpi, hecen tona wokakije owasin ehna un kin hena iwicunkiyapi unkokilhipi kta, wacintonhnagyapi on Wakantanka unkikiyapi kin he eciyatanhan.

5 Hecen Messiya tokakije kin unkiyepi en unkiiciyuotapi kin, he iyecen Messiya eciyatanhan wacintonhnag unyanpi kin he nakun unkiiciyuotapi kta.

6 Kakişunyanpi eca he wacintonhnag niyanpi, qa ni niyanpi kte cin heon; he wokakije on kakişunyanpi kin hena yuha okilhi wicaye kta e ohanyan ece; qa wacintonhnag unyanpi hecin-

han, he wacintonhnake niyanpi, qa ni niyanpi kte cin heon.

7 Unkan niyepi kin on sutaya wacinunyanpi, wokakije kin en opeya yaunpi kin he iyecen wacintonhnakeyapi kin en oyapapi kta, sdonunyanpi.

8 Mihunkawanji, Asia en token wokakije unhiyahdepi qon he sdonye şni yaunpi kta uncinpi şni, iyotan nina unakijapi, unkokilhipi kin isanpa, hecen unni-pi kta unkecinpi şni.

9 Tuka unkiyepi kin mahen wiconęe woyaco kin unhapi, hecen takudan wacinunkiciyapi kte şni, tuka Wakantanka wicaye cin ekicetu wicaye cin he wacinunyanpi kta:

10 Iye wiconęe hinsko tanka etanhan eunhdakupi, qa nakaha ehdaku ece; qa ees nakun eunhdakupi kta wacinunyanpi:

11 Qa niş eya wocekiye on ounyakiyapi kta, hecen wicašta ota etanhan, taku unqupi qon he on, unkiyepi on etanhan wicota wopida eyapi kta.

12 Unkiyuşkinpi kin he unnagipi hdaotanin kin hee, wowicake wowakan ko en okonwanjidan, wicacełpi woksape yuhe şni, tuka Wakantanka towaonsida yuha, wicoicage kin ehna unnipi, qa niyepi kin ekta iyotan hececa.

13 Taku dawapi, qa sdonyayapi kin hecedan wowapi en un-

## WICOWOYAKE 2.

nicagapi; qa owihanke kin hehanyan wicayadapi kta kepece.

14 Onšpa sdonunyayapi, unkiyuškinpi kin he niyepi, he iyeceen wowitan nitawapi kin he unkiyepi, Jesus Itancan taanpetu kin en.

15 Hecen wacinmduza, tokaheya niyepi kin ekta ciupi kta tuka, on inonpa wowašte duhapi kte cin heon.

16 Qa niyepi kin etanhan iyo-opta Makedonia ekta mde ça, ake Makedonia etanhan niyepi kin ekta icicawin wahdi kta, qa Juda makoce kin ekta ye mayayapi kta wacin.

17 Hecen wacin mduze çehan, hehan iyowihan wacin mduza he; qa token miçiconze cin he wicacehpi eciyatanhan miçiconze ça hecen, Han, han, hiya, hiya, eya waun he.

18 Wakantanka wacinyepica, wicoie unkeniciyapi qon he, han qa hiya, hee šni.

19 Miye, qa Siluanos, qa Timotheos, Jesus Messiya Wakantanka Cinhintku kin unkoniciyakapi qon he, han, qa hiya, hee šni, tuka iye kin on, han ecedan.

20 Wakantanka iwahounyanpi kin hena owasin iye en, Han hee, qa iye en Amen, unkiyepi kin etanhan Wakantanka yatanpi kte cin heon.

21 Tuwe niyepi kici Messiya en unyusutapi, qa sdaunyanpi kin he Wakantanka kin ee.

22 Qa he unkapuspapi, qa uncantepi kin ekta Woniya tokaheya icupi ece kin he unqupi.

23 Unkan nakaha minagi kin ekta Wakantanka mayaotanin kta e cewakiya; Itoncipapi kta e on nahahin Korinth ekta wai šni.

24 Wacinyayapi kin on wowi-

dag unniyanpi šni, tuka widuškinpi kin en ounniciyapi kta. Wacinyanpi on sutaya nayajinpi ece.

## WICOWOYAKE 2.

1 Miye qe hecen mihdukean, ake iyokišinya ekta ciupi kte šni.

2 Miye iyokišinciyapi kinhan, tuwe iyuškinmaye kta he; iyo-kišinwaye cin hee kta.

3 Hecen on he wowapi cicagapi, ekta wau kinhan tona on imduškin kte cin hena on etanhan iyokišin waun kte šni. Qa niyepi owasin wacinciyapi, mitowiyuškin kin he en niyepi owasin *oyapapi kta*.

4 Wicokakije tanka, qa wicocantešica, qa ištamnihhanpe ota ehna wowapi cicagapi qon, iyo-kišinniyampi kte cin heon *hecamon* šni; tuka nina cantececiyapi kin he sdonyayapi kte cin heon.

5 Tuwe iyokišicapi kage ciqon he miye iyokišinmaye šni; tuka niye nihunhnanpidan, owasin cibapi kte šni.

6 He tuwe kin hecen yacopi qon, wicota econpi kin hecehnana kta.

7 Heon nakaha wicašta kin he iyuškinayapi, qa yecanptapi kta, ošinni nina iyokišice cin on ktepidan kta.

8 Heon ceciciyapi ce, he cante en duzapi kin hduotanin po.

9 Taku owasin on waanagoptan yaunpi hecinhan, iciyukeanpi kte cin heon wowapi cicagapi qon.

10 Tuwe taku yecicajujupi kinhan, miš eya *hecamon*, qa tuwe taku wecicajuju kin he niyepi kin on wecicajuju, Messiya itokam.

11 Hecen Satan ohunyanpi



## II. KORINTH.

kte *śni*; iye token içiconze cin sdonunyanpi.

12 Troas ekta Messiya tawotanin wašte yuha wahi, qa Itancan kin tiyopa wan makiyuzamni;

13 Hehan minagi ekta cante waštewa waun *śni*, Titos mihunkawanji kin hen iyewaye *śni* kin heon; hecen hena nape wicamduze ça, hetanhan Makedonia ekta imdamda.

14 Wakantanka, ohinniyan Messiya on ohiye unyanpi, qa ohinniyan unkiyepi kin on tawosdonye woomna yaotanin kin, hee wopida yuha nunwe.

15 Wakantanka ekta, Messiya on woomna wašte kin he unkiyepi, tona wiconi yuhapi kta, qa nakun tona yutakunipi kte *śni* kin hena en.

16 Dena is tapi kta e wiconte oomna kin he unkiyepi, qa hena e nipi kta e wiconi oomna kin he unkiyepi; qa tuwe hena taku kin okihi he.

17 Wicota Wakantanka oie kin hnayan kuwapi kin hena iyeuncacapi *śni*; tuka wowicake eciyatanhan, tuka Wakantanka eciyatanhan, qa Wakantanka itokam, Messiya unkoyakapi ece.

### WICOWOYAKE 3.

1 Ake unkihdatanpi unkayapi he; qa wicašta wanjikji iyecen waayatanin wowapi nicagapi kte cin heca uncinpi he; qa is waayatanin wowapi unyecagapi kta uncinpi he.

2 Wowapi unkitawapi unki-cantepi kin ekta owapi kin he niyepi, wicašta owasin sdonyapi qa yawapi;

3 Messiya tawowapi taninyan oyakapi unkiye unkgapi kin; mini sapa on kagapi *śni*, tuka

Wakantanka ni un kin Taniya kin on owapi; inyan mdaska kin en un *śni*, tuka wicacante conica kin he en.

4 Unkan Wakantanka ekta Messiya eciyatanhan woawacin kin de unhapi.

5 Unkiye cinka taku unkiyucanpi kta unkokitpanipi, unkiyepi atayedan, taku unkokhipi kin he Wakantanka eciyatanhan.

6 Iye wicotakuye teca kin en wowidake waokihhi unkgapi, oowa kin he en un *śni*, woniya kin hee en; oowa kin he waštewa, tuka woniya kin he waniya ece.

7 Wiconte wawokiyapi kin he owapi, qa inyan akan pagopi qon he wowitan yuhe cin, on Israel cinca kin Moses itohnake wiyatpa kin he opahta yukanpi kta okhipi *śni* hecinhan, wowitan kin he enakiyapi tuka;

8 Hecen Woniya wawokiyapi kin he sam iyeya nina wowitan kte *śni* he.

9 Woyaco wawokiyapi kin he wowitan hecinhan, wicoowotanana wawokiyapi kin he sanpa nina wowitan kta.

10 Qa taku yuwitanpi qon he taku wanji on wowitan *śni*, taku iyakapeya wowitan kin hee on etanhan.

11 Qa taku enakiyapi qon he wowitan kin hee hecinhan, taku ecen he cin he iyotan wowitan kin ee.

12 Woape hececa unhapi kin heon nina wadiuntakapi ece.

13 Unkan Moses ite akalipe wan itohnake kin akalipe kiton kin he iyecece *śni*, taku enakiyapi kin owihanke kin hehanyan Israel cincapi kin ekta etonwan okhipi *śni* kin heon etanhan.

14 Tuka iye tawacinpi kin ao-

tpasyapi : qa anpetu kin dehan-  
yan Wowapi Wakan tanina kin  
yawapi eca, ite akaŋpe kin he  
eyakupi ūni ecen un ; he Messi-  
ya eciyatanhan eyakupi tuka.

15 Tuka anpetu kin dehan-  
yan, Moses yawapi eca, ite akaŋpe  
kin he iye cantepi kin akaŋpa.

16 Tuka tohan Itancan kin  
ekta yuhomnipi kinhan, hehan  
ite akaŋpe kin he yuzamnipi  
kta.

17 Woniya kin he Itancan kin  
ee, qa tukten Itancan taniya kin  
un kin, hen tawa iŋiyapi yukan.

18 Tuka unkiye owasin itohna-  
ke kin en taku unkaŋpapi  
ūni, ihdiyomdasin en wawanya-  
kapi kin iyecen Itancan towitan  
kin wanunyakapi, qa iye ounca-  
ge kin iyecen unkaŋgapi, wowi-  
tan sanpa wowitan kin en, Itan-  
can Taniya kin on etanhan iye-  
ceca.

## WICOWOYAKE 4.

1 Heon etanhan wawokiyapi  
kin de unhapi kin, wowaonūda  
unkicupi kin heon wacin iboun-  
ūkapi ūni.

2 Tuka taku wowiūtece na-  
hmana un kin hena eŋpeunyan-  
pi, qa wicahnayanpi kin en ma-  
unnipi ūni, qa wohnyaye yuha  
Wakantanka oie kin unkiyuh-  
hapi ūni, tuka wowicake yaotan-  
inpi kin on wicaūta owasin wi-  
yukcanpi kin ekta unhdaotanin-  
pi, Wakantanka itokam.

3 Wootanin waūte unkitawapi  
kin he anaŋmanpi hecinhan, to-  
na takunipi ūni kin hena anawi-  
cakiŋmanpi.

4 Hena ekta wicoicage kin de  
taku wakan tawa kin tona wica-  
dapi ūni wicotawacin kin wacin-  
ton ūni wicakaga ; Messiya Wa-  
kantanka ouncege kin hee, ta-  
wootanin waūte wowitan iyoyan-

pa kin he iyoyanwicaye kte  
ūni heon etanhan.

5 Unkiye unkihdaotaninpi ūni,  
tuka Messiya Jesus Itancan kin  
he unyaotaninpi ece ; qa unkiye  
Jesus on ookiyewicayayapi kin.

6 Wakantanka iyoyanpa kin  
otpaza etanhan yege ūi qon he  
uncantepi kin iyoyamunyanpi,  
Jesus Messiya itohnake kin eci-  
yatanhan, Wakantanka towitan  
wodonye iyoyanpa kin unqupi  
kte cin heon.

7 Tuka woyuha kin de maka  
cega ohna unhapi, hecen wowa-  
ūake tanka kin Wakantanka  
etanhan un kta, qa unketanhan-  
pi kte ūni.

8 Ihdukūsantanhan aotinsunyan-  
pi, tuka unkaŋdaskicapi ūni : wa-  
cinhnuni unyanpi, tuka takudan  
waciŋye ūni kin heuncecapi ūni.

9 ūicaya unkuwapi, tuka eŋpe-  
unyanpi unyakonpi ūni : makata  
eŋpeunyanpi, tuka ihang unyan-  
pi ūni.

10 Ohinniyān untancanpi kin  
en Jesus Itancan ūe cin he yuha  
unkanpi, hecen Jesus wiconi ta-  
wa kin untancanpi kin en tan-  
inyan un kta.

11 Unkiye unnipi kin Jesus on  
ohinniyān wiconūe en iyaye un-  
yanpi, Jesus wiconi tawa kin  
unceŋpipi ūe kte cin en atanin  
kte cin heon.

12 Hecen unkiyepi kin en wi-  
conūe ohanyan un, tuka niyepi  
kin en wiconi.

13 Unkiye wowaciŋye woniya  
kin de unhapi, wowapi en kaga-  
pi qon iyececa ; Wicawada kin  
heon iwaa ce ; unkiū eya wica-  
undapi kin heon unkiapi ece.

14 Qa tuwe Jesus Itancan kin  
piya ekicetu ye ciqon, he Jesus  
eciyanhan, ake ekicetu unyan-  
pi kta, qa niyepi kin om sutaya  
he unkiyapi kta e sdonunyanpi.

## II. KORINTH.

15 Niyepi kin on etanhan taku owasin ecen un, hecen wowaon-sida tanka kin, wicota wopida eyapi kin on sanpa ota aye kta, Wakantanka towitan kin on.

16 Heon wacin ibounsakapi sni, tuka wicašta akantanhan unkitawapi kin he takuni sni aya ešta, wicašta mahen tanhan un kin he anpetu iyohi yute-capi.

17 Unkakijapi cistinna, qa ptecedan kin he wowitan ota hinca, ota hinca, owihanke wanin tke hinca unkiagapi kta.

18 Iacunhan taku wanyakapi kin hena ekta unketonwanpi sni, tuka taku tona wanyakapi sni kin hena ekta *ewauncinpi*. Taku tona wanyakapi kin hena ihanke kta, qa taku tona wanyakapi sni un kin hena owihanke wanica.

### WICOWOYAKE 5.

1 Makata wakeya unkitawapi kin de yujupipi kinhan, Wakantanka ticage cin tipi nape codan kagapi kin, mahpiya ekta, owihanke wanin yanke cin he unhapipi e sdonunyanpi.

2 Qa de ohna comniunhdazipi, qa tipi unkitawapi mahpiya eciyatanhan un kin he kounyakapi kta e cantounkpanipi.

3 He kounyakapi kinhan, tancodan unyakonpi kte sni.

4 Wakeya kin de ohna unkanpi kin hehanyan comniunhdazipi, unšakapi kin heon. Wokoyake unhdušdokapi kin he uncinpi sni, tuka kounyakapi kta: Hecen wiconi e wiconte ocowasin napce kta.

5 Tuwe he en icahunyanpi kin he Wakantanka ee; qa he Woniya tokaheya kin wanna unqupi.

6 Heon ohinniyan cante un-

waštepi, qa tohanyan wicatan-can kin ohna unkanpi kin hehanyan Itancan kin itehanyan unyakonpi kin he sdonunyanpi.

7 Wacinyanpi eciyatanhan maunnipi, qa wawanyakapi kin eciyatanhan sni.

8 Cante unwaštepi, tuka tancan kin de ohna unkanpi sni, qa Itancan kin kici unyakonpi kta e he iyotan uncinpi ece.

9 He de aičiciya unakitapi, ekta kici unyakonpi, qa is den unkanpi, unma tukte kašta, iyokipiunyanpi kte cin he.

10 Owasin Messiya tawoyaco oiyotanke kin itokam taninyan inaunjinpi kta, otioyohi taku iye tancan kin ohna ohanye cin hena icu kta, token econ qon eciyatanhan, he wašte qa šica unma tukte kašta.

11 Itancan wohitike cin he sdonunyanpi kin, heon wicašta cin wicunkiyapi; Wakantanka en unkihdaotaninpi, qa nakun widukanpi kin en unkihdaotaninpi wacanmi.

12 Ake niyepi en unkihdatanpi sni, tuka unkiyepi on iniwinktapipi kta e okihi unniyanpi; hecen tona cante kin eciyatanhan sni, tuka itohnake kin on iwinktapipi kin hena ekta, taku on iniwinktapipi kte cin duhapipi kta.

13 Wacinunhnunipi hecinhan, he Wakantanka on etanhan; qa wacinunksapapi hecinhan, he niyepi kin on etanhan.

14 Messiya wacantkiye cin he iyounpaštakapi ece.

15 Qa he de unkiyukanpi, wanji owasin on te cinhan hehan owasin tapi tuka; qa owasin on te cin, heon tona nipi kin hena is iyepi on nipi kte sni, tuka tuwe hena on te ca ake kini kin hee on nipi kta.

16 Heon etanhan, detanhan wi-



cacelipi eciyatanhan tuwedan sdonunyanpi šni; han, Messiya hee wicacelipi eciyatanhan sdonunyanpi ešta, nakaha detanhan sdonunyanpi šni.

17 Hecen tuwe Messiya en un kin he wanna wicašta teca; taku tannike cin hena enakiyapi; ibo, taku owasin teca icaga.

18 Qa taku owasin Wakantanka etanhan un, he iye kici okiciciye unkiyapi, Jesus Messiya eciyatanhan, qa wookiye wawokiyapi kin he unqupi.

19 Hecen Wakantanka Messiya on, wicoicage kin, iye kici, okiciciye wicaye ça, wahtanipi kin wicakiciyawa šni; qa wookiye wicoie kin he yuhe unkiyapi.

20 Heon Messiya on wawiciyapi kin unkiyepi, unkiyepi eciyatanhan Wakantanka ceniciyapi kin iyececa, Messiya caje on ceunniciyapi, Wakantanka kici okiciciya po.

21 Tuwe woahťani sdonkiye šni un qon he, unkiyepi on woahťani kagapi; hecen iye en Wakantanka toowotanna unkicagapi kta.

WICOWOYAKE 6.

1 Heon iye kici htaunnipi iyeecen, niyepi nakun ceunniciyapi ce, ituť Wakantanka towaonšida kin iyacupi kte šni.

2 He iye kaken eya, Omaka oiyokipi kin en nacihon qa wiconi anpetu kin en ociciya: Iho nakaha omaka oiyokipi kin hee; nakaha wiconi anpetu kin he dee.

3 Takudan on tuwedan ibotounyanpi šni, hecen wawokiyapi kin he bapi kte šni:

4 Tuka Wakantanka taokiye unyanpi kin he taku owasin on unkihduotaninpi ece, wacintan-

kapi kin en, wokakije en, walipaya unnicapi kin en, woiyokišice en;

5 Apapi kin en, kaška hnakapi kin en, yuomdecapi kin en, wicohtani kin en, kiktahan unpi kin en, wotektehđapi kin en;

6 Ecedan unpi kin on, wosdonye kin on, tehan apepi kin on, wacantkiyapi kin on, Woniya Wakan kin on, awicakehan wašteđakapi kin on;

7 Wowicake oie kin on, Wakantanka towašake kin on, wicoowotanna wipe, etapa qa caktatanhan unpi kin on;

8 Wowitan qa wowištece kin ohna; waaiaپی qa yaonihanpi kin ohna; wicahnayanpi kin iyececa, tuka wicakapi;

9 Sdonyapi šni un kin iyeuncapi, tuka tankaya sdonunyanpi; tapi se iyecen unyakonpi, tuka ito unnipi; unkaštakapi, tuka nahanhin unktepi šni;

10 Iyokišicapi iyeuncapi, tuka ohinniyān wiunyuškinpi; walpanicapi kin iyeuncapi, tuka wicota watonka wicunkagapi; takudan yuhapi šni kin iyeuncapi, tuka taku owasin untonpi.

11 Korinth oyate kin, niyepi on i unhđukawapi, uncantepi kin tanka aya.

12 Unkiyepi en takudan aotins niyanpi šni, tuka niye nicantepi kin en otins ničiyapi.

13 Hehan iyunwin kin de mayaqupi kta; micinca kin iyecen ociciyapi; niš eya tankaya ničicagapi nunwe.

14 lhnuhan tona awacin šni un kin hena en ecinšniyan iyanihdaskapi kinhan. Token wicoowotanna woahťani kici tidan kta he; qa token iyoyanpa kin otpaza kici un kta he:

15 Qa Messiya Belial kici token okonwanjidan cante yuzapi

## II. KORINTH.

he; qa tuwe wicada kin he wicada śni un kin kici taku akiptan tawapi kta he;

16 Qa tipi wakan Wakantanka tawa kin he wakagapi kin kici token un kta he. Wakantanka ni un tipi wakan tawa kin he niyepi. Wakantanka heye ciqon he iyececa; Hena om wati kta, qa om mawani kta. Hena Wakantanka mayanpi kta, qa mitaoyate kin hena eepi kta ce.

17 Heon etanhan hena cokaya tanhan tankan upi, qa icunonpa un po, Itancan kin eya, qa taku asape cin oyutanpi śni po, kinhan miś tawa ciyapi kta;

18 Niye ate mayayapi kta, qa miye cinkśi ciyapi qa cunkśi ciyapi kta ce, Itancan Iyotan Waśake cin he hena hecen eya.

### WICOWOYAKE 7.

1 Heon waśtecicidapi kin, wahoyapi kin dena unhapi kin heon wicacehpi wicanagi ko taku asape cin etanhan unhduecepidan, qa Wakantanka kokipeyahan wicoowotanna kin tanyan unhduśtanpi kta.

2 Anaungoptan pō; unkiye tuwedan śicaya ecawicunkiconpi śni, tuwedan wicunyuśicapi śni, tuwedan taku icakiś wicunyanpi śni.

3 He wayaco hepe śni; cante en unniyuzapi, ptaya unṭapi qa iś unnipi kta ce, epe ciqon.

4 Niyepi on wadimatake ĩnca, niyepi on nina imawinkta; wocantohnake omajudan, unka-kijapi owasin en nina imduśkin.

5 Makedonia en unhipi qehan, uncehpi kin takudan oziiċiye śni, tuka taku owasin on iyounkiśicapi; tankan tanhan wicokicize, qa mahen tanhan wokokipe.

6 Tuka Wakantanka tona iyokiśicapi iwicakiye cin he cantohnag mayan, Titos hen hdi kin heon:

7 Qa he hdi kin hecedan śni, tuka nakun niye cantohnagayapi kin heon; nina wacin en yeyayapi, qa iyonicicapi, qa token cante en unyakiduzapi kin hena unkokiyakapi qehan, nina imduśkin.

8 Wowapi wan on iyokiśinci-yapi eśta, heon nakaha iyopemiċiye śni, iyopemiċiya tuka qon. He wowapi kin ptenyeddan iyokiśinniyanpi wanmdaka.

9 Nakaha imduśkin, iyokiśinniyanpi kin heon etanhan śni, tuka nihduecetupi kta e on iyonicicapi kin heon. Wakantanka eciyatanhan iyokiśinniċiyapi, hecen takudan icakiś unniyanpi śni.

10 Wakantanka eciyatanhan iyowicakiśice cin he ihduecetupi on wiconi kta, on tohinni iyopeiċiyapi śni kin he kaga; tuka wicoicage kin de en iyowicakiśice cin he wiconṭe icaliya.

11 Wanyaka po, Wakantanka eciyatanhan iyonicicapi kin he itonpeya nicagapi, waayuptapi, qa wośihda, qa wokokipe, qa cante en hiyeyapi, qa winawizipi, qa hdajujupi kin hena niyepi en icalniciyapi; taku owasin on, he econpi qon en, takudan iyani-onpapi śni yaunpi e nihduotan-inpi.

12 Heon wowapi cicagapi, tuwe śicaya econ qon he on etanhan śni, qa tuwe śicaya ecakiconpi qon he on etanhan śni, tuka Wakantanka itokamya token wacin en unniyuzapi kin he niyepi en yutaninpi kta.

13 Heon etanhan inicyapi kin on unkikiyapi; qa Titos iyuśkin kin heon miś eya nina imduśkin,

## WICOWOYAKE 8.

iye nagi kin niyepi owasin eciyatanhan magagayapi kin heon etanhan.

14 Heon ciyatanpi qa owakiyaka ešta, on imaštece šni; tuka taku owasin eciyatanhan eciciyapi qon, he iyecen Titos en ciyatanpi kin he nakun wowicake.

15 Unkan niye owasin token anayagoptanpi, qa wokokipeya, cancanyan iyowinyakiyapi qon he kiksuya eca, iye iyotan cante en niyuzapi.

16 Heon etanhan, taku owasin on wicacidapi kin heon miš eya imduškin.

## WICOWOYAKE 8.

1 Mihunkawanji, Wakantanka towaonsida Makedonia okodakiciye kin en yutaninpi qon he sdonyeciciyapi.

2 Hena wokakije tanka en nina iyuškinpi, qa iyotan walpanica unpi kin he etanhan taku ota iyokipiya wicaqupi.

3 Okihipi kin iyacinyan, (miš mdaotanin,) qa okihipi kin kapeya, iye cinka wicaqu wacinpi.

4 Qa wocekiye ota on ceunkiyapi, taku wicaqupi kin he, qa tona ecedan un kin wicakipamnipi wawokiyapi kin he nakun unki cupi kte.

5 Qa unkecinpi qon iyecece šni, tuka tokaheya iye tancanpi kin Itancan kin içi cupi, qa nakun Wakantanka tawacin kin eciyatanhan unkiyepi kin en içi cupi.

6 Hecen Titos ceunkiyapi, niyepi en wanna tokaheya hecon kin, he iyecen wowaonsida kin de nakun niciyuštanpi kta.

7 Heon taku owasin on winijicapi, wacinyanpi, qa iapi, qa wosdonye, qa wicamniheca owasin,

qa wašteunyakidapi ko, he iyecen wowašte kin de on nakun winijicapi kta.

8 Wicoope eciyatanhan hena hepe šni, tuka wicašta tokeca aiçiciyapi kin heon; qa wacanyakiyapi kin he wowicake kinhan indute kta.

9 Jesus Messiya Itancan unkiyapi towaonsida kin he sdonyayapi, watonka tuka niyepi on walpaniçiya, hecen iye walpanica kin on winijicapi kta.

10 Unkan he de on wahokonciyapi; niye decanonpi kta iyececa, wanihan sanpa hecanonpi kta e niçiconzapi, qa wiyeya yaunpi kin heon etanhan.

11 Nakaha wocon kin he hduštan po, kohanna wicayadapi qon he iyecen taku duhapi kin etanhan ecen ecanonpi kta.

12 Tokaheya wicadapi yuke cinhan, wicašta taku yuhe cin he eciyatanhan iyokipiya icupi ece, qa taku yuhe šni kin eciyatanhan šni.

13 Wicašta tokeca oziçi yapi kta, qa niye dušakapi kte cin hee šni; tuka akiyecen unpi kta; heon nakaha wijinya yaunpi kin he hena taku iwicakakije cin en un kta;

14 Qa iš iyepi nakun wijicapi kinhan, wicakišya yaunpi kin en oniciyapi kta; hecen akiyececapi yuke kta.

15 Wowapi en kagapi qon iyececa; Tuwe ota pahi kin he takudan ohdapte šni, qa tuwe waniqadan pahi kin he takudan icakiš un šni ce.

16 Tuka Wakantanka wopida yuha nunwe, he niyepi on Titos hecen cante yuskiya.

17 Awicakehan wahokonkiyapi kin anagoptan; tuka iye hinca inañni, qa kohanna niyepi kin ekta ye wacin.



## II. KORINTH.

18 Unkan he kici hunkawan-jinkiciyapi wan, wotanin wašte on okodakiciye owasin en yatanpi kin hee ekta ye unšipi.

19 Qa hecedan šni, tuka kici ohnihde unyakonpi kta e he okodakiciye kin kalnigapi, Itancan kin yatanpi kta, qa unkiye de iyokipiya econkupi kta e heon taku ituhanpi kin de en unkiyapi kta.

20 Qa taku ota unpamnipi kin de on tuwedan unbapi kte šni e he unkakitapi.

21 Taku wašte ece unkihnipli kta, Itancan kin itokam, qa nakun wicašta kin en.

22 Unkan hena om hunkawan-jinunyanpi kin yeunšipi, he wanna ota unkiyucanpi, owotanna ohanyan ece, qa nakaha iyotan aičiciya, tanyan wacinniyampi nakaes.

23 Hecen Titos he *kapi hecinhan*, he mitawaši qa niyepi on omakiye cin hee; qa hunkawan-jinwicunyanpi kin hena eepi *kinhan*, okodakiciye yewicašipi qa Messiya towitan kin hena eepi ce.

24 Heon etanhan, hena en, qa okodakiciye kin wicitokam, wacanyakiyapi kin, qa unniyatampi qon he nakun wicakipazo po.

### WICOWOYAKE 9.

1 Wicašta owotanna owicakiyapi kte cin on wowapi cicagapi kta wanna iyecece šni.

2 Token wacin duzapi kin he sdonwaya, heon Makedonia etanhanpi kin hena en yaonihanyan cajeciyatapi, wanna waniyetu wanjidan hehanyan Akeya wiye ya yanka ce, qa inayahnipli kin he wicašta ota iyowicapaštaka.

3 Tuka hunkawanjin wicawa-

ye cin hena ekta yewicawaši, unniyatampi qon he ecetu kta, qa epe ciqon iyecen wiyeya nan-kapi kta e heon.

4 Okinni Makedonia etanhan upi kin hena om ekta wai, qa wiyeya yaunpi šni ecen wanunniyakapi kinhan, unkiye, niyepi epe šni, sutaya wacinyus unniyatampi qon he on unkištecapi kta.

5 Heon hunkawanjin kiciyapi kin cewicawakiye kta wacami qon, tokaheya niyepi ekta ipi, qa wowaonšida nitawapi ehanna iwahoniyampi qon he wiyeya ehnakapi kta, hecen awicakehan wowaonšida kta, qa watehindapi kin eciyatanhan kte šni.

6 Tuka de; Tuwe waniqadan oju kin he waniqadan mnaye kta; qa tuwe iyakičuya oju kin he iyakičuya mnaye kta ce.

7 Otoiyohi iye cante kin ekta ičiconze cin eciyatanhan *qu kta*, woiyokišice on qa econ šipi kin on etanhan šni; iyuškinyan wicaqu kin he Wakantanka wašte daka.

8 Wakantanka wowaonšida owasin niyepi en niciyuotapi kta okihi; hecen taku owasin ota duhapi kin on wicohan wašte kin wadupipike kta.

9 Wowapi en kagapi qon iye-cetu; Taku ehpeya, wahpaninica kin taku wicaqu ece kin he toowotanna kin ohinniyun un kta.

10 Tuwe woju kin ojupi yuhekia ece kin he aguyapi woyute yayapi kte cin ničupi, qa taku oyajupi kin ical ničiyapi, qa nitowotanna waskuyeca kin niciyuotapi nunwe.

11 Qa taku owasin en wijinya yaunpi kta on iyotan ohannipipi kta, heon unkiye Wakantanka wopida unkekiciyapi.

12 Wapamnipi wawokiyapi kin de tona owotanna un kin taku icakijapi kin enakiye kte ça, nakun Wakantanka wopida nina eciyapi kta e kaga.

13 Messiya tawootanin wašte kin en oyapapi e daotaninpi, qa hena taku ota wicayaqupi, qa owasin taku wicayaqupi kin he on wawokiyapi utapi kin de on etanhan Wakantanka yaonihanpi.

14 Qa niyepi on wocekiye eniciyapi kin heon nina cantonikpanipi, Wakantanka towaonsida tanka nicipi un kin heon etanhan.

15 Wakantanka taku yawapica šni unqupi kin he on wopida kiciun nunwe.

## WICOWOYAKE 10.

1 Palos he miye, Messiya wabibayedan qa wacintanka heon ceciciyapi ce, niyepi ekta onšihanyan waun, tuka en waun šni ehantanhan, niyepi on wadimataka ;

2 Tuka ceciciyapi, en waun kinhan, wanjikji wicacełpi kin eciyatanhan maunnipi kecanunkinpi kin, hena en waditagya waun kta wacanmi kin he iyeceen wadimatake kte šni.

3 Wicacełpi kin en maunnipi ešta, wicacełpi eciyatanhan unkieizapi šni.

4 Wipe unkunpi kin hena wicacełpi kin heca šni, tuka wašaka, Wakantanka on, inatake suta kin yujuju ece :

5 Wacinyuzapi kin kun ełpeya, qa taku tehan wankantuya un Wakantanka sonyapi kin en wankan iyeiçieye cin hena owasin, qa wicotawacin iyuhpa Messiya anagoptanpi kin en wayaka ai ece.

6 Qa wanałonpi šni kin tounkiconpi kta e wiyeya unkanpi ; tohan anayagoptanpi kin hduštanpi kinhan.

7 Wicašta itohnake kin hecedan iwandakapi he. Tuwe Messiya tawa kecaniçin kinhan, he ake kaken awacin kta ; is iye Messiya tawa kin heca he iyeceen unkiš unkiyepi Messiya tawa unyanpi.

8 Wookihi Itancan unqupi kin, on icalhunniyanpi kta, qa on ihangunniyanpi kte šni, heon sanpa mihdatan ešta, imaštece kte šni.

9 Wowapi on wakokipe cicagapi kta wacanmi šni.

10 He wowapi kage cin hena suta qa wašaka, tuka tancan en un kin he wašake šni qa ie cin he wowiha ce, eyapi.

11 Tuwe hecece cin he kaken awacin kta, en unkanpi šni wuwapi wicoie kin on tounkecapi kin, he tohan en unkanpi kinhan, wicołhan kin on heuncecapi kta.

12 Tona ihdatanpi kin hena unkihđacinpi, qa opeya unkihđawapi kta tawařenunyanpi šni ; hena e is iye on wiłhutapi, qa iyepi on ihđucanpi, qa hecen okahnigapi šni.

13 Unkiye wiunhđutapi kin isanpa unkihđatanpi kte šni ; tuka wicołhan iyutapi Wakantanka unqupi kin he eciyatanhan, iyutapi kin niyepi kin iyałde niyanpi.

14 Ekta iyahde unniyanpi kta e sanpa unkihđutitanpi šni. Tuka Messiya tawootanin wašte kin en niyepi kaeš ekta unniupi.

15 Wiunhđutapi kin isanpa unkihđatanpi šni, wicašta tokeca wicołtani kin en ; tuka wicayadapi kin he icage cinhan, niyepi

on wiyutapi unhapi kin eciyatanhan sanpa unyuonihanpi kta unkapepi.

16 Hecen niye dukanpi kin akowapa wotanin wašte kin unkoyakapi kta, qa tuwe tokeca taku tawa wiyeya yanke cin en unkiwinktapi kte šni.

17 Tuka tuwe iwinkta kinhan Itancan kin on iwinkta nunwe.

18 Tuwe ihdaonihan kin he ecetudakapi kin ee šni, tuka Itancan kin tuwe yaonihan kin hee kta.

### WICOWOYAKE 11.

1 Witkotkoya iwae cin cistiye-dan iyowinmayakiyapi kta wacin. He iyowinmayakiyapi nakaes.

2 Wakantanka winawizi kin iyecen inaciwizipi, wicašta wanjidan kiciyus ciyapi, hokšiwinna ecedan un kin Messiya ekta aciipi kta heon.

3 Tuka he kowakipa, wamduška wohnaye on Ewe hnaye ciquon he iyecen nitawacinpi kin yušicapi kta, qa woyuecedan Messiya en un kin etanhan iyaye niyanpi kta naceca.

4 Tuwe en niupi kin he Jesus tokeca wan unkiye unkoyakapi šni kin he oyaka, qa Woniya tokeca, iyacupi šni qon, he nakaha iyacupi, qa wotanin wašte tokeca, anayagoptanpi šni qon he oniciyakapi kinhan, iyowinyakiyapi kta.

5 Miye yewicašipi iyotan tanka kin takudan ihukuya waun šni, imdukan.

6 Ho magahan ešta, wosdonye kin on waksapa ; tuka niyepi kin en taku owasin on tanyan unkihdaotaninpi.

7 Wakantanka tawootanin wašte kin iyunwin codan ociciyakapi, qa wankantuya iyenianpi

kta e on mihduhukuya kin he wawahtani he.

8 Okodakiciye tokeca kin taku wicawaki, qa opemicatonpi kin iwacu, ociciyapi kte cin heon ; qa cicipi waun qa taku imakakije cehan, taku nitawapi kin mun šni :

9 Taku iyokpani waun qon he hunkawanjin kiciyapi Makedonia etanhan hipi kin maqupi, qa ohinniyan takudan inagiyeciyaipi šni waun, qa ees nakun hecen waun kta.

10 Messiya wowicake tawa micium kin heon Akeya makoce kin en imawinkta kin de ecetu šni makiyapi kte šni.

11 Tokeca he ; wašte ciciyapi šni kin heon etanhan he. Wakantanka sdonya.

12 Tuka taku ecamon kin he nakun ecamon kta, hecen tona wiyaonpapi akitapi kin hena etanhan wiyaonpapi kin emdaku kta, qa en iwinktapi kin he unkiyepi kin iyecen unpi kta.

13 Hena yewicašipi itonšni kin hecapi, wohnaye ohanyanpi, qa Messiya yewicaši qon hena iyecen ihduzapi.

14 Qa he taku wowinihan šni, Satan iye kaeš iyoyanpa ohnihde kin iyecen ihduza.

15 Heon etanhan, iye taokiye kin hena wicoowotanna ookiye kin iyecen ihduzapi kte cin he taku tanka šni, hena iye wicohan kin eciyatanhan ihang yapi kta.

16 Ake hecen epa ; Tuwedan witkotkoke madake kte šni. Tuka hecon kinhan witkotkoke cin iyecen iyowinmakiye kta, cistiyedan mihdatan kta.

17 Taku epe cin hena Itancan kin eciyatanhan epe šni, tuka nina ihdatanpi kin he on witkoya ie cin iyemaceca.



18 Wicota wicacehpi kin on ihdatanpi kin he iyecen miś eya mihdatan kta.

19 Witkotkopike cin hena iyokipiya iyowinwicayakiyapi ece, niye yaksapapi nakaes.

20 Tuwe wowidag niyanpi, tuwe temniyanpi, tuwe wanicipi, tuwe wahanicida, tuwe ite ohna anipapi hecinhan, iyowinwicayakiyapi ece.

21 Waoštehdapi kin he waka, waunśakapi śni kin heon. Tuka taku on tuwe waditake cinhan, witkotkoya iwaa ce, he on miś eya wadimataka.

22 Hena Hebrew wicašta kin hecapi he. Miś eya hemaca. Hena Israel etanhanpi he. Miś eya. Hena Abraham cinca he. Miś eya.

23 Hena e Messiya taokiye kin hecapi he; witkotkoke cin iyecen iwaa, miś eya imayotan. Wicolitani kin en imayotan; apapi kin en wopecta śni waun; kaška hnakapi kin en imayotan, qa wiconțe kin en otakiya waun.

24 Juda oyate zaptan akihde, *apapi* wikcemna topa wanjidan iyokpani maqupi.

25 Yamni akihde cansakadan on amapapi; wancadan inyan on makininpi; yamni akihde wita wata micamdecapi; anpetu wanjidan hanyetu iyahna ośbe kin mahen waun;

26 Nina icimawani, mini ota wokokipe kin en waun, wakipi sa okokipe kin en, mitaoyate on wokokipe kin en, Ikcewicašta on wokokipe en, otonwe ekta wokokipe en, hewoskantuya wokokipe en, miniwanca ekta wokokipe en, hunkawanjin kiciyapi itonpi śni kin hena ekta wokokipe en;

27 Mdowakita qa nina litawani kin on, ota kiktahan waun kin

on, wotektewahda qa imapuza on, ijehan amakihan kin on, macuwita qa tancodan waun kin on;

28 Qa tankan tanhan anpetu iyohi taku amaupi kin, okodakiye kin owasin awanhdakapi kin he nakun.

29 Tuwe waśake śni un, qa miye wamaśake śni he; tuwe aiapi un, qa miye śinwahda śni he.

30 Tuka imawinkta kta iyecece cinhan, wamaśake śni waun kin heon imawinkta kta.

31 Jesus Messiya Itancan unkiyapi he Wakantanka tawa, qa Atkuku kin, owihanke wanin wowašte yuhe cin he sdonmayan, itonśni mawanica.

32 Damaskos en, Aretas wicašta itancan kin akicita ota wicayuha, Damaskos oyate otonwe tawapi kin awanhdake ça, maktepi kta akita.

33 Hehan conkaške owanyeye wan etanhan, makanyankapi wan ohna, kun hiyumayanpi; qa iye nape kin etanhan nawajica.

## WICOWOYAKE 12.

1 Imawinkta kte cin he iyemihantu śni, wowihanmde qa Itancan woyakapi tawa kin ekta wau kta.

2 Ehanna waniyetu ake topa sam iyeya, wicašta wan Messiya en un kin he sdonwaya; (wicatancan kin ohna un kin sdonwaye śni, qa tanton śni un kinhan nakun sdonwaye śni, Wakantanka he sdonya;) wicašta kin he małpiya iciyamni kin ekta eyakupi;

3 Wicašta kin he sdonwaya, (wicatancan kin ohna un sdonwaye śni, qa tanton śni un kinhan nakun sdonwaye śni, Wakantanka he sdonya;)

## II. KORINTH.

4 He Wakantanka ti kin ekta eyakupi, unkan wicoie oyagpica šni kin nañon, hena wicašta oyake kta ešta okitpani kta.

5 Wicašta kin hecece cin on imawinkta kta, qa miye qe on imawinkta kte šni, tuka wamašake šni waun kin heceedan on.

6 Tuka imawinkta wacanmi keš wimatkotkoke kte šni, wovicake epe kta; tuka nakaha hecamon kte šni, tuwe wanmayake ça, token waun nañon kin he isanpa tanka kecanmakin kta he kowakipa.

7 Unkan woyakapi tanka kin on etanhan wañanmičida kte šni heon taku pepe wan micelipi kin en maqupi, Satan taokiye wanji hee, šicaya makuwa kta heon, wañanmičida kte šni heon etanhan.

8 Qa heon Itancan kin yamni wocekiye ewakiya, he amayuštan kte cin heon.

9 Heban, Mitowaonšida kin iyonihni kta, qa mitowašake kin he wowašake šni kin en hduštanpi ce, emakiya. Hecen Messiya towašake kin miye en miciun kte cin, heon makakije cin on iyuškinyan imawinkta kta.

10 Heon etanhan wowayazan kin en imduškin ece, qa waaiapi, qa iwicakakije, qa šicaya wicakuwapi, qa Messiya on wicokakije kin henakiya en; tohan wamašake šni eca taku owakihi ece.

11 Iwinktapi kin on witkotkoka imacaga, niye hecon mayakiyapi, mayadaotaninpi kta tuka qon; yewicašipi iyotan tankapi kin takudan en wicihukuya waun šni, matakú šni ešta.

12 Awicakehan niyepi ekta yewicašipi wowapetokeca tawapi kin econkupi, waeintankapi

owasin en, wapetogtokeca, taku wowinihan, qa wašagya wicoñan kin hena on.

13 Taku e on okodakiciye tokeca kin ihukuya yaunpi he; taku nitawapi kin iwacu šni kin hee naceca. Heon wawañtani kin he micicajuju po.

14 Wanyaka po, iciyamni ekta ciupi kta wiyeya manka, qa nakun taku nitawapi kin iwacu kte šni. Taku yatonpi kin he awakite šni, tuka niyepi atayedan. Cinca yapi kin hunkakepi kin taku wicakihnakapi kin he hecetu šni, tuka hunkake yapi kin hena hokšiyogopa kin on taku ekicihnakapi kta.

15 Ninagipi kin on htawani, qa mihdusote kte cin he iyomakipi; tuka iyotan canteciciyapi ešta, aoptetuya waštemadakapi ece.

16 Tuka he hecetu, taku nitawapi kin iwacu šni; hececa ešta wamdupike cin heon wohnaye on ciyuzapi, *keyapi*.

17 Tona niyepi ekta ye wicawaši qon hena eciyatanhan, taku mihdamna he.

18 Titos cewakiye ça kici hunkawanjitku wan ekta ye waši. Niyepi etanhan Titos taku kamna he. Wicoksape okonwanjidan en maunnipi šni he; oye okonwanjidan ohna *maunnipi* šni he.

19 Ake niyepi en unkihduwicakapi kecannipi he. Wakantanka itokamya Messiya kin en unkiapi ece. Waštecicidapi kin, tanyan icalñiyanpi kte cin heon taku owasin econkupi.

20 Ekta ciupi kinhan, niyepi token wacin kin hececa iyeciya-pi kte šni, qa miye nakun token yacinpi šni kin hecen iyemayayapi kta kowakipa. Wakinica-pi kin, winawizipi, canniyekici-

yapi, wicokicize, waaiapi, waa-  
jijipi, wahançidapi qa owoduta-  
ton kin henakiya en un kta ko-  
wakipa.

21 Qa okinni ekta wau kinhan,  
niyepi kin en Wakantanka mi-  
tawa kin iyokişin maye kta, qa  
tona wanna woahitani econpi, qa  
taku aşape cin, wiinalhmanpi, qa  
wicawihomnipi econpi kin on  
iyopeiçiyapi şni kin hena awica-  
wakiceye kta naceca, he kowa-  
kipa.

WICOWOYAKE 13.

1 De iciyamni ekta ciupi ; waa-  
yatanin nonpa qa yamni ipi  
kin on wicoie owasin yasutapi  
kta.

2 Ociciyakapi qon he ake na-  
kaha ociciyakapi, icinonpa ekta  
waun kin iyececa ; qa nakaha  
en waun şni, tona toka wahtani-  
pi, wicaşta tokeca ko owasin,  
wowapi wicawecaga, ake ekta  
wai kinhan itonwicawape kte  
şni.

3 Miye mahen tanhan Messiya  
ie cin on wowapetokeca ayaki-  
tapi kin heon etanhan ; he niye-  
pi ekta taku okitpani şni, tuka  
niyepi kin en waşake hinca.

4 He iye wowaşake şni on can  
susbeca kin en okatanpi ešta,  
Wakantanka towaşake kin on  
ni un. Heon unkiş eya waun-  
şakapi şni, tuka niyepi kin ekta  
Wakantanka towaşake kin on  
kici unnipi kta.

5 Niş niyepi ihdukan po, wa-  
cinyanpi kin en yaunpi hecin-  
han ; tanyan wihduta po. E-  
hpeniyanpi şni kinhan, Jesus

Messiya niyepi kin mahen un,  
he şdonyakiyapi şni he.

6 Tuka ehpewicayapi kin heun-  
capi şni e sdonyayapi kta imdu-  
kcan.

7 Taku şica takudan ecanonpi  
kte şni he Wakantanka icewa-  
kiya ; unkiye unwaştepi e un-  
yaotaninpi kte cin hee şni, tuka  
wahtepi şni kin iyeuncecapi kta  
ešta, niye taku waşte ecanonpi  
kte cin hee *wacin*.

8 Taku wowicake kaşeye cin  
takudan unkokihipi şni, tuka  
wowicake kin on etanhan.

9 Unkiye waunşakapi şni, qa  
niye wanişakapi eca unkiyuşkin-  
pi ece. Qa tanyan onihduştanpi  
kte cin he uncinpi.

10 Heon etanhan en waun şni  
icunhan, hena wowapi en waka-  
ga, okinni ekta waun kinhan  
yaşinya iapi kin ohna iwae kta  
naceca ; wowaşake Itancan ma-  
qu kin eciyatanhan, he waicafi-  
yapi kin on *maqupi*, qa waihang-  
yapi kin on etanhan şni.

11 Ehake, hunkawanjin ciyapi  
kin, wiyuşkin po ; oihduştan un  
po, cante waşte po, okonwanji-  
dan awacin po, wokiyapi kin en  
un po ; qa wowaşte, wookiye ko  
Wakantanka kin nicipi un nun-  
we.

12 Otoiyohi iiputakapi wakan  
kin on i ikiciputaka po. Wica-  
şta owotanna un kin owasin i  
iniputakapi.

13 Jesus Messiya Itancan to-  
waonşida kin, Wakantanka to-  
waştedake kin, qa Woniya Wa-  
kan iwicakiye cin niyepi owasin  
en nicipi unpi nunwe. Amen.



## GALATIA OYATE KIN

## WOWAPI WICAKICAGE CIN.

## WICOWOYAKE 1.

1 Palos yewicašipi kin heca, wicašta akantu kin etanhan šni, qa wicašta on kagapi šni, tuka Jesus Messiya etanhan, qa Wakantanka Ateyapi kin, he wiconțe etanhan najin kiye cin he nakun etanhan ;

2 Qa hunkawanjin kiciyapi mici unpi kin owasin ko, Galatia ekta okodakiciye kin *wowapi unnicagapi*.

3 Wowaońsida, wookiye ko, Wakantanka Ateyapi kin, qa Jesus Messiya Itancan unkiyapi kin etanhan, nicipi un nunwe.

4 He iye waunłitanipi kin on ičiçu, wicoicage šice cin de etanhan eunhdakupi kta, Wakantanka Ateunyanpi tawacin kin eciyatanhan :

5 He ohinniyan owihanke wanin wowitan kicihan nunwe. Amen.

6 Tuwe Messiya towaońsida kin inicopi kin kohanna aduštanpi, qa wotanin wašte tokeca en *oyapapi* kin, heon imanihan manka.

7 He nakun tokeca šni, tuka wicašta wanjikji nagiyenianpi, qa Messiya tawootanin wašte kin ayuštan niyanpi kta tuka.

8 Tuka he unkiš unkiyepi, qa is ohnihde wan małpiya kin eciyatanhan kin, wotanin wašte unkoniciyakapi qon he ohna šni, tuka tokeca oniciyakapi kinhan, wošnapi un nunwe.

9 Unkeyapi qon hecen ake nakaha epe, tuwe wotanin wašte iyacupi qon kici okonwanjidan šni kin oniciyakapi kinhan, he wošnapi un kte.

10 Wicašta qa Wakantanka, unma tukte cinwicawakiya he; qa wicašta kin iyokipiwicawaya awakita he. Wicašta kin iyokipiwicawaya unkanš, Messiya wowidagmaye kte šni tuka.

11 Mihunkawanji he de ociciyakapi, wotanin wašte omdake ciqon he wicašta akantu kagapi šni ;

12 Qa wicašta kin etanhan iwacu šni, qa iye omakiyakapi šni, tuka Jesus Messiya oyake cin eciyatanhan *onmaspe*.

13 Juda wicołan en opeya waun qehan, token owahanmde cin nayahonpi ; Wakantanka taokodakiciye kin nina šicaya wakuwa, qa mdujuju.

14 Qa mitaoyate kin en tona om akinimaskokeca kin hena ota Juda wicołan kin en kawicawape ęa, mihunkakepi wohdakapi qon iyotan nina tewahinda.

15 Tuka Wakantanka ina tezi kin etanhan imacu, qa iye towaońsida kin on mico kin he,

16 Iye Cinhintku kin sdoney mayan iyokipi qehan, Ikcewicašta wotanin wašte kin owicawakiyake kte cin heon, kohanna wicacełpi, wicawe ko, kici wowahdake šni :

17 Qa Jerusalem ekta tona

## WICOWOYAKE 2.

mitokapa tanhan yewicašipi qon hena ekta wicawai šni, tuka Arabia ekta imdamde ça, ake Damaskos ekta icicawin wahdi.

18 Hehan waniyetu yamni iyohakam Inyan kici wowahdake kta e Jerusalem ekta wai, qa anpetu ake zaptan kici manka.

19 Tuka yewicašipi kin tokeca tuwedan wanmdake šni, Jakob Itancan sunkaku kin hecedan.

20 Unkan wicoie wowapi en cicagapi kin de, iho, Wakantanka itokam itonšni mawanica.

21 He iyohakam Suria, qa Kilikia makoce kin en wahi.

22 Qa Juda makoce kin en okodakiciye kin Messiya en un kin, hena ekta ite kin sdonmayanpi šni waun.

23 Tuka, Tuwe šidaya unkuwapi qon he nakaha wowacinye ehanna yujuju qon he oyaka ce, hecedan nahonpi.

24 Unkan miye on Wakantanka yatanpi.

## WICOWOYAKE 2.

1 He iyohakam waniyetu ake topa, hehan ake Titos yuha, Barnabas kici Jerusalem ekta itawankanhde mda.

2 Woyakapi on ekta mde ça, Ikcewicašta ekta wotanin wašte omdake ciqon he hena owicawakiyaka, qa tona okinihanpi kin hena išnašnana *owicawakiyaka*; ituya waimnanke šni, qa taku šni on waimnanke kte šni heon.

3 Tuka Titos mici un kin he Helenes heca keš bakiħdayapi kta keyapi šni.

4 Qa he nakun hunkawanjinkiciyapi itonpišni kin heca, hena unkiye token Jesus Messiya on tawa unkiçiyapi kin he iwanya-

kapi kta e en hipi, wowidag unyanpi kte cin heon.

5 Tuka hena wihiyayedan oape wanjidan hehanyan wicihukuya unyakonpi šni, wotanin wašte wowicake kin nicipi un kte cin heon.

6 Unkan tona wicašta wicakinihanpi seca, qa takupi kašta he etanhan tokeca šni, Wakan-tanka wicašta itohnake kin iwan-yake šni, hena wicakinihanpi seca, tuka wicoie kin en takudan omakiyapi šni.

7 Tuka hececa ešta, tohan bakiħdayapi šni wotanin wašte kin he maqupi e wanyakapi qehan, bakiħdayapi wotanin wašte Inyan qupi qon he iyececa;

8 Tuwe bakiħdayapi kin on yewicašipi kin en Inyan okihiye cin hee Ikcewicašta ekta okihimayan;

9 Qa Jakob, Inyan qa Johannes kici, ipatanhdepi kin hecapi seca, wowaonšida maqupi kin he wanyakapi, hehan takodakiciyapi on Barnabas kici nape mayuzapi, unkiš Ikcewicašta ekta unyanpi kta, qa iyepi kin bakiħdayapi kin ekta yapi kta.

10 Tuka decedan, tona waiħpanicapi kin wicunkiksuyapi kta *keyapi*, unkan miš nakun hecamon tawaŧenwaya.

11 Unkan Inyan Antiyoka ekta hi qehan, kici taninyan awakinica, iye iyaonpepica nakaes.

12 Jakob etanhan wanjikji hipi šni kin he itokam Ikcewicašta kin om wota ece; tuka wanna en hipi, hehan tona bakiħdayapi qon hena kowicakipe ça, token iyaye ça ihdonica.

13 Qa he opeya Juda wicašta tokeca kin iyecen anaħbeya econpi, hecen hena wohnaye kin on Barnabas nakun opeya yeyapi.

14 Tuka wotanin wašte wovicake kin eciyatanhan owotanna manipi šni, he wanmdaka hehan owasin wicitokam Inyan hewakiya; Juda wicašta henica, tuka Ikcewicašta kin iyecen yani kinhan, qa Juda wicašta kin iyeccece šni, tokeca e Ikcewicašta kin Juda wicoħan kin en ope wicayaši he.

15 Ūnkiye wicaceħpi eciyatanhan Juda wicašta kin heuncapi, qa Ikcewicašta waħitanipi sa heuncapi šni;

16 Wicašta kin woope wicoħan kin eciyatanhan yaowotanpi šni ece, tuka Jesus Messiya wacinyanpi kin on, he sdonunyanpi kin heon unkiš eya Jesus Messiya wacinunyanpi, Messiya wicadapi kin on unyaowotanpi kta e heon, qa woope opapi kin on etanhan šni; woope wicoħan kin eciyatanhan wicaceħpi owasin tuwedan yaowotanpi kte šni.

17 Tuka Messiya on unyaowotanpi kta unkakitapi kin he icunhan, waħitanipi sa heuncapi hecinhan, heon Messiya woaħtani wowidake kin heca he. Hiya hecetu šni.

18 Taku mdujuju qon he ake piya wakage cinhan, wawaħtani e mihdutanin.

19 Wakantanka on wani kta e heon, woope eciyatanhan, woope kin ekta maťa ce.

20 Messiya kici icipaweħi omakatanpi; tuka nahalin wani; qa he miye šni tuka miye mahen Messiya ni un kin hee; qa wicaceħpi kin en wani kin he Wakantanka Cinhintku wacinyanpi kin eciyatanhan wani, he iye cantemakiye ça miye on iyeiçi.

21 Wakantanka towaonšida kin mdujuju šni; woope kin eciyatanhan wicoowotanna u kinhan, hehan Messiya ituya řa.

## WICOWOYAKE 3.

1 Galatia wicašta wacin tonpi šni kin, tuwe niyuhnaškinyanpi, qa hecen wovicake kin anayagoptanpi kte šni he; niyepi kin en Jesus Messiya icipaweħi okatanpi kin he ništapi kin itokam yuotaninpi.

2 Decedan omayakidakapi kta wacin, woope wicoħan kin on, qa wacinyan anagoptanpi kin, unma tukte eciyatanhan Woniya kin iyacupi he.

3 Tokaheya Woniya kin on ecanonpi, qa ehake wicaceħpi kin on nihduštanpi kta he, qa wacinyatonpi kte šni.

4 Kana owasin taku šni on iyotanhan iyeyakiyapi he; he taku šni on etanhan hecinhan.

5 Tuwe Woniya kin yuhe niciyapi, qa niyepi en tankaya oħanye cin he woope wicoħan kin on, qa wacinyan anagoptanpi kin unma tukte eciyatanhan he.

6 Hecen Abraham Wakantanka wicada, unkan he woowotanna kiciyawapi qon.

7 Heon etanhan, tona wacinyanpi kin en opapi kin hena Abraham cincawicaye cin eepi, he sdonya po.

8 Wacinyanpi kin on Wakantanka Ikcewicašta kin wicayawotanna kte cin, he Wowapi wakan otokaheya tanhan wanayake ça, hecen tokaheya Abraham wotanin wašte kin okiyaka; Niye en oyate kin owasin wicayawaštepi kta ce.

9 Hecen tona wacinyanpi kin hena Abraham wacinye ciqon kici wowašte yuhapi.

10 Tona woope wicoħan kin etanhanpi kin hena woyaco kin en unpi. Hecen wowapi en kagapi; Tona taku woope wowapi kin en kagapi kin owasin



opeya unpi śni, qa ecen econpi śni kin hena otoiyo hi wanna wicayacopi ce.

11 Unkan woope kin eciyatanhan tuwedan Wakantanka itokam yaowotanpi śni e sdonunyanpi: Tona owotanna un kin hena wacinyanpi eciyatanhan nipi kta ce.

12 Unkan woope kin he wacinyanpi kin eciyatanhan śni; tuka, Wicašta kin tuwe hena econkinhan, hena on ni kta ce.

13 Woope woyaco kin etanhan Messiya eunhdakupi, unkiyepi on iye woyaco ikicaga. Wowapi en hecen kagapi, Tona can en otkeyapi kin hena owasin yacopi ce.

14 Hecen Jesus Messiya eciyatanhan Abraham wowašte tawa kin he Ikcewicašta kin en awicau kta; hecen wacinyanpi kin on Woniya iwahounyanpi kin he unkiyepi kta.

15 Mihunkawanji, wicašta akantu iyecen iwaa. Wicašta akantu wicotakuye tawa kin hee kaeš, wanna hduštanpi kinhan, tuwedan hdujuju śni, qa taku en akage śni ece.

16 Abraham iye cinca kici wahoyapi; Cincapi kin eye śni, hehan ota kapi kta, tuka wanjidan, qa, Nicinksi kin, he Messiya kin ee.

17 Unkan miš kaken epe kta; Otokahe ekta wicotakuye Messiya en Wakantanka hdusuta kin he, iyohakam waniyetu opawinge topa sanpa wikcemna yamni hehan woope u kin he tokaheya kin yujuju, qa hecen wahoyapi qon ecetušniye kta okitpani.

18 Taku tawapi kte cin he woope eciyatanhan un unkanš, wahoyapi kin eciyatanhan śni; tuka he Wakantanka Abraham iwahoya.

19 Hehan tokeca e woope kin yukan he. He woahitani on kagapi, cinca iwahoyapi qon u śni kin hehanyan, qa ohnihdewicayapi kin on yusutapi, iyotahedan un wan nape kin ohna.

20 Iyotahedan un kin he wanjidan eciyatanhan śni, tuka Wakantanka eqe wanjidan.

21 Heon woope kin he Wakantanka taku iwahowicaye cin he kašeya he. Hiya hecetu śni. Woope wiconi kaga okihi unkanš, awicakehar woope kin eciyatanhan wicoowotanna u kta tuka.

22 Tuka Wowapi Wakan kin he owasin woahitani olidateya un wicayawa, qa hecen tona wicadapi kin hena, Jesus Messiya wacinyanpi wahoyapi qon he wicacupi kta.

23 Wowacinye kin hi śni itokam woope kin on unkaškapi; qa wowacinye yuotaninpi kte cin en onauntakapi.

24 Hecen woope kin he wayeunkiyapi kin hee, Messiya en unkahipi kta, hecen wowacinye on unyaowotanpi kta e heon.

25 Tuka wowacinye kin wanna hiyohi, hecen wanna wayekiyapi kin ihukuya unyakonpi śni.

26 Jesus Messiya wacinyanpi kin eciyatanhan owasin Wakantanka cinca kin heuncapi.

27 Tona Messiya caje on baptem ničupi kin hena Messiya kodakapi.

28 He en Juda qa Helenes wicašta ko wanica; wowidake un tawaičiya ko wanica; wica winyan ko wanica; tuka Jesus Messiya ekta owasin okonniwanjipidan.

29 Messiya tawa niyanpi hecinhan, Abraham cinca kin he nicapi, qa wahoyapi kin eciyatanhan tawayapi kte cin.

## WICOWOYAKE 4.

1 Unkan kaken epa; Tawaye kte cin tohanyan hoksiyopa un kin hehanyan wowidake kin takudan ocitpani s̄ni, taku owasin on itancan un ešta.

2 Tuka tohan Atkuku ke cin hehanyan waonspekiye ça tipi awanyag wicakiyapi kin hena he yuhapi.

3 He iyecen unkiš eya hounkšiyopapi qehan, wicoicage wonspe tokaheya kin ihukuya unyakonpi.

4 Tuka wanna anpetu iyehantu qehan, Wakantanka iye Cinhintku kin u š̄i, winohinca wan etanhan icage ça woope kin ohdateya kagapi.

5 Hecen tona woope kin ihukuya un kin hena opewicakiton kta, atayedan cinhintkuyapi kin unhapi kte cin heon etanhan.

6 Unkan cinkšiniyanpi kin heon Wakantanka iye Cinhintku Taniya kin nicantepi kin en niu š̄ipi, he, Abba, Ate, eya howaya ece.

7 Hecen wowidake kin henica s̄ni, tuka cinhintku kin henica. Qa cinhintku hecinhan, Messiya eciyatanhan Wakantanka ekta tawaye kte cin heca.

8 Tuka Wakantanka sdoniyapi s̄ni qehan, taku wakan s̄ni kin hena wowidag niyanpi.

9 Unkan nakaha Wakantanka sdoniyayapi, qa iš̄ Wakantanka sdonniyanpi yaunpi kin, hecen token ake taku tokaheya hunkeš̄ni qa takudan okihi s̄ni un kin ekta nihdohdapi, qa hena ake wowidag niyanpi kta yacinpi he.

10 Anpetu qa wi kin, omaka waniyetu ko awacanipi.

11 Kocicipapi, taku s̄ni on niyepi kin htacicinipi epca, heon etanhan.

12 Mihunkawanji, ceciciyapi ce; Miš̄ waun kin iyecen un po; niye yaunpi kin iyecen waun, taku š̄ica takudan ecamiyeconpi s̄ni.

13 Tokaheya ekta wicacełpi wašake s̄ni on wotanin wašte kin ociciyakapi kin he sdoniyayapi.

14 Qa micelłpi en taku iyutanmaye cin he š̄iceyadapi s̄ni, qa paha iyeyayapi s̄ni, tuka Wakantanka ohnihde ye cin iyecen, qa Jesus Messiya iyecen tin ye mayasıpi.

15 Hecen wowašte duhapi qon tukte e he. Kaken ciyaotaninpi, okihipica unkanš̄ ništapi kin yahduš̄dokapi qa mayaqupi kta wicayadapi kta tuka.

16 Wowicake ociciyakapi kin heon toka mayayapi he.

17 Hena e tanyan canteniciyuzapi seca, tuka he taku wašte on etanhan s̄ni, lieyata iyeunyanpi kta cinpi, hecen niye tanyan cantewicayakiyuzapi kta.

18 Tuka ohinniyan taku wašte on tanyan canteyuzapi kin he wašte, qa niyepi ekta waun kin hecedan s̄ni.

19 Micinca, niyepi kin en Messiya icaliyapi kte cin heon ake hokš̄iksuya waun.

20 Niyepi kin on, token wacin mduza tanin s̄ni, heon nakaha ekta cicipi waun qa miho kin wahdatokeca kta wacin.

21 Tona woope ihukuya yaunpi yacinpi kin, woope kin nayahonpi s̄ni hecinhan omakiyaka po.

22 Wowapi en hecen kagapi; Abraham cinhintku nonpa, unma wowidake winohinca etanhan, qa unma iš̄ winohinca tawaiciye cin etanhan.

23 Tuka wowidake winohinca etanhan un kin he wicacełpi

## WICOWOYAKE 5.

eciyanhan tonpi, qa tawaiçiye cin etanhan un kin wahoyapi kin on tonpi.

24 Hena e wiyacinpi wan ee ; qa wicotakuye nonpa kin heepi. Unma Sina he kin etanhan u, he wowidag yapi kaga, Hagar hee.

25 Qa Hagar he Arabia ekta Sina he kin hee, qa Jerusalem wanna he cin kici akidecen un, qa cinca kici wowidake un.

26 Tuka Jerusalem wankan tanhan u kin he tawaiçiya, he owasin ina unyanpi kin ee.

27 Hecen wowapi en kagapi ; Cinca oyakitpani qa cinca ton şni yaun kin iyuşkin wo ; tohin- ni hokşinyaksuye şni kin panpan qa dowan wo ; tuwe isnana un kin he cinca ota, qa hihnaton kin he cinca tonana.

28 Mihunkawanji, Isaak iyecen wahoyapi cinca kin heuncapi.

29 Tuka he ehan tuwe wica- celpi eciyanhan tonpi kin he Woniya eciyanhan un kin he şicaya kuwa qon, is eya dehan iyececa.

30 Tuka Wowapi wakan kin token eya he ; Winohinca wowi- dake un kin cinca kici tankan iyeya wo ; wowidake un cinca kin he tawaiçiya cinca kin kici akidecen tawaye kte şni.

31 Hecen mihunkawanji, wo- widake un cinca kin ee şni, tu- ka tawaiçiya cinca kin unkiyepi.

## WICOWOYAKE 5 .

1 Hecen tawaiçiyapi kin on Messiya tawaiçiye unyanpi kin he en şinsadan un po, qa ake wowidake yapi wanapin kin on iyaihdaşkapi şni po.

2 Wanyaka po, Palos he miye e kaken eciciyapi ; Baniçihda- yapi kinhan Messiya takudan on oniciyapi kte şni ce.

3 Wicašta bakihdayapi kin otoiyo hi kaken ewakiya ece ; Woope kin ocowasin econ kta iyececa tuka ce.

4 Tona woope kin on niyaowo- tanpidan keniçiyapi kin wanna Messiya ehepeyapi, qa wowa- onşida etanhan nihinhpayapi kin.

5 Unkiye Woniya kin eciya- tanhan wicoowotannia woape kin wacinyanpi on unkapepi ece.

6 Jesus Messiya en bakihdaya- pi kin he takudan okihi şni, qa nakun bakihdayapi şni kin ; tu- ka wacinyanpi wowaşte en oħanye cin he taku okihi ece.

7 Tanyan yainankapi ; tuwe iyoncipi şni kin, hecen wowica- ke kin wicayadapi kte şni he.

8 Woawacin kin de tuwe nico- pi kin eciyanhan u şni.

9 On napohiyapi cistinna kin he aguyapi ocowasin napohiya.

10 Itancan kin eciyanhan wacinciyapi, takudan tokeca awacanipi kte şni ; qa tuwe ka- šta nagiyenyanpi kinhan he wo- yaco hduhe kta.

11 Mihunkawanji, miş miye bakihdayapi kin ieyanwapaha kinhan tokeca e şicaya maku- wapi he ; kinhan, can susbeca iwoşihda kin he enakiyapi tuka.

12 Tokin tona cante okiçunin niyanpi kin hena yuşpa iyewica- yapin.

13 Mihunkawanji, tawaiçiyapi kin en nicopi, tuka tawaiçiyapi kin he wicacehpi iyokipi kta e wowinyunyanpi şni po ; tuka wowaşte on otoiyo hi okiciciya po.

14 Woahope kin ocowasin wi- coie wanjidan en ecetu, he dee, Niş niye inihdacinyan wicašta aiyog yaun kin canteyakiye kta ce.

15 Tuka yecidahtakapi qa tem-



yeciyapi kinhan, on wakta po, okinnihangyeciyapi kta naceca.

16 Miye kaken epe; Woniya kin on mani po, hecen wicacehpi on cantiheye cin yahduŝtanpi kte ŝni.

17 Wicacehpi kin he Woniya kin inakiwizi, qa Woniya kin iŝwicacehpi kin inakiwizi, qa henaozakiya anokatanhan kicizapi, hecen taku token yacimpi ŝni kin hena ecanonpi ece.

18 Tuka Woniya kin yus anyanpi hecinhan, wope kin ihukuya yaunpi ŝni.

19 Wicacehpi wicohan kin taninyan un; Wawicifahapi, wiinahmanpi, waaŝapapi, wicaŝtapi ŝni;

20 Wakagapi kin ohodapi, wapiyapi, ŝice kicidapi, wakinicapi, wawihnupi, wacantahdepi, wicokicize, wawakipajinpi, yuomdecapi,

21 Winawizipi, tin wicaktepi, witkopi, qa witkoya wacipi, qa taku tona hecece cin hena ee; wanakaja ociciyakapi kin he iyecen nakaha eciciyapi, Tona taku hececa econpi kin hena Wakantanka tokiconze kin tawapi kte ŝni.

22 Tuka Woniya kin waskuyeca tawa kin he, wowaŝtedake, wowiyuŝkin, wookiye, wacintankapi, wicowahbayedan, wowaŝte, wowacinye;

23 Wicotawacin waŝte, qa iyatahde iciyapi ŝni hena ee; qa taku hecece cin wope kin tuktedan iyamya un ŝni.

24 Unkan tona Messiya tawa wicaye cin hena wicacehpi kin icipaweŝ okatanpi, qa wacinyuzapi cantiheyapi koya.

25 Woniya kin unkininipi kinhan, Woniya kin unkopapi kta.

26 Otoiyoŝi ŝihdakiciyapi, qa winakiciwizipi, qa ecinŝnayan

iwinkta iciyapi wanin unyakonpi nunwe.

## WICOWOYAKE 6.

1 Mihunkawanji, wicaŝta wan ihnuhana taku ŝica en iyohpaye cinhan, niye tona owotanna yaunpi kin woksape wowahbayedan yuha wicaŝta kin he ake piya opeya maniya po; qa awanidaka wo, okinni taku wawiyutanyan un kin en niu nun ce.

2 Otoiyoŝi waqinpi kin kicin po, hecen Messiya toope kin tanyan ecetu yayapi kta.

3 Tuwe taku ŝni un eŝta, taku icida kinhan, he icihnayan.

4 Tuka otoiyoŝi iye ohan kin awakicin kta, hecen iye qe eciyatanhan, qa token tanhan ŝni, iyuŝkin kta.

5 Otoiyoŝi waqinpi tawa kin kicin kta.

6 Tuwe wicoie kin eciyatanhan onspekiyapi kinhan, he wonspekiye cin taku waŝte kin owasin etanhan okinikiya nunwe.

7 Ihnuhan nihnyanpi kin; Wakantanka uncapi kte ŝni ce. Wicaŝta kin taku oju kinhan, he yukse kta ce.

8 Tuwe iye celpi kin wokiciju kinhan, he wicacehpi kin etanhan wicotakuni ŝni mnaye kta; qa tuwe Woniya kin wokiciju kinhan, he Woniya kin eciyatanhan wiconi owihanke wanica mnaye kta.

9 Taku waŝte econ unkapinpi ŝni nunwe; hu unstakapi ŝni kinhan tohantu kte cin mnaunyanpi kta.

10 Heon tohanyan unkokihipi kinhan, wicaŝta owasin taku waŝte ecawicunkiconpi kta, qa wacinyanpi tiyohnaka kin hena iyotan.

## WICOWOYAKE 1.

11 Wowapi hinsko tanka miye minape on cicagapi e wandakapi.

12 Tona wicacehpi ekta wašte ihdutaninpi cinpi kin hena baniçihdayapi kta cinniciyapi, Messiya can susbeca tawa kin on sicaya kuwapi kte šni kin heon heconpi.

13 Tona bakiħdayapi kin hena e qe nakun woope kin tanyan yuhapi šni, tuka baniçihdayapi kta cinpi, nicehpi kin on iwinktapi kta heon.

14 Tuka takudan on imawinkta šni nunwe, Jesus Messiya Itancan unkiyapi can susbeca tawa kin hecedan on, he on miye ekta wicoicage kin icipaweħ

okatanpi, qa wicoicage kin ekta icipaweħ omakatanpi.

15 Jesus Messiya en bakiħdayapi kin he takudan okihi šni, qa bakiħdayapi šni kin he nakun, tuka wicašta teca kin.

16 Tona woope kin de eciyatanhan manipi, Israel Wakan-tanka tawa wicaye cin hena ko, wookiye, wowaonšida ko, wicakici unpi nunwe.

17 Detanhan tuwedan nagiyemaye šni nunwe; Jesus Messiya towapetogton kin mitancan kin en yuha waun.

18 Mihunkawanji, Jesus Messiya Itancan unkiyapi towaonšida kin ninagipi kin kici un nunwe. Amen.

## PALOS

# EPHESOS OYATE KIN

## WOWAPI WICAKICAGE CIN.

### WICOWOYAKE 1.

1 Palos, Wakantanka tawacin kin eciyatanhan, Jesus Messiya yeši qon hee, Ephesos ekta tona owotanna un, qa Jesus Messiya wacinyanpi kin hena *wowapi cicagapi*:

2 Wowaonšida, wookiye ko, Wakantanka Ateunyanpi kin etanhan, qa Jesus Messiya Itancan unkiyapi kin etanhan niyepi en nicipi un nunwe.

3 Jesus Messiya Itancan unkiyapi Wakantanka tawa, qa Atkuku kin yawaštepi nunwe; he iye Messiya en taku mahpiya tanhan un kin wowašte wakan ocaje owasin on unyuwaštepi:

4 He en maka kagapi kin itokam unkaħnigapi qon iyececa, unwakanpi kta qa iye itokam wowašte en iyaonpepica šni unyakonpi kte cin heon:

5 Qa iye en, Jesus Messiya eciyatanhan cinca unyanpi, iye tawacin oiyokipi kin eciyatanhan:

6 Iye towaonšida wowitan yatanpi kte cin on, he iye Waštekidake cin en wašteundakapi:

7 He on wopekintonpi kin unhapi, iye we kin on, woħitani kajujupi kin hee, iye towaonšida tanka kin eciyatanhan:

8 He iye unkiçiyuotapi, wicoksape owasin qa wookaħnige ko on:

9 Qa iye toiyokipi kin eciyatanhan, iye tawacin wowiyukean

kin sdoneunkiyapi, he iye en içiconze ciqon he iyecen :

10 Hecen tohan iyehantu kinhan, wokonze kin eciyatanhan taku owasin Messiya en witaya mnaye kta, taku mahpiya ekta un, qa taku maka akan un kin hena, iye en.

11 Qa tuwe iye tawacin wokonze kin eciyatanhan, taku owasin kage cin he otokaheya tanhan unkañigapi kin, he iye en woahpeye kin unhapi.

12 Hecen unkiye tokaheya Messiya wacinunyanpi qon, iye towitan kin yatan unyakonpi kte cin heon.

13 He niş niyepi nakun, wowicake oie kin nayañonpi qehan, wotanin wašte on ni niyanpi kte cin hee, he iye wacinyayapi, unkan Woniya wahoyapi kin he on wapetognitonpi :

14 He taku unhapi kte cin tokaheya wicaqu ece kin hee, taku opetonpi hdamnanpi kin *u kte* cin hehanyan, iye towitan yatanpi kte cin heon.

15 Hecen miş eya, Jesus Messiya wacinyayapi kin he, qa tona owotanna un kin owasin wašte wicayadakapi kin nawañon kin,

16 Ehantanhan niyepi on wopida eya amdaştan şni, qa wocekiye epa eca, ciksuyapi ece :

17 Jesus Messiya Itancan unkiyapi Wakantanka tawa, qa wowitan Ateyapi kin hee woksape wowiyukcan ko oniya kin niçupi kta, he iye sdonyayapi kta e heon :

18 Nitawacinpi išta kin iyoyam niyanpi kta, hecen nicopi wocinye kin he taku kin e sdonyayapi kta, qa tona owotanna un kin taku tawapi kte cin wowitan wijica kin he taku ;

19 Qa tona wicaundapi kin en

iye towaşake tanka hinca woptecaşni kin he taku kin nakun, iye towaşake waşagya oħanye cin eciyatanhan.

20 He Messiya okicihan, wiconțe etanhan najin kiye çehan, qa mahpiya ekta iye etapa kin en ekihde :

21 Wokiconze owasin, qa wowaşake, qa wookihi, qa itancan-kiyapi, qa wicacaje caje yatapi kin owasin, wiconi kin de en hecedan şni, wiconi u kte cin he nakun, hena iwankam tehan wankantuya ekihde :

22 Qa iye siha kin ihukuya taku owasin ekihnaka, qa taku hiyeye cin owasin iwankam okodakiciye kin en he pa kin kaga ;

23 He iye tancan kin hee, tuwe taku owasin on owasin ojuye cin wojudan kin hee.

## WICOWOYAKE 2.

1 Unkan niş niyepi kin woahñani wicoħan şica ko en nişapi :

2 Hena ehna ehanna mayanipi, wicoicage kin de wiconi kin eciyatanhan, qa okotonyan wowaşake kin itancan kin eciyatanhan, he taku wakan woakta şni cinca kin en oħanye cin hee.

3 Hena om, unkiyepi owasin ehanna unnipi, unceħpipi wacin yuze cin en, wicaceħpi wicotawacin ko wacinpi kin ecetu unyanpi, qa unmanpi kin iyecen wocantiyahde cinca kin heuncapi.

4 Tuka Wakantanka wowaonşida kin on wijica kin he towaştedake tanka kin on wašte undakapi kin heon ;

5 Unkiye wicoħan şica ehna unşapi qehan, Messiya kici niun-kiyapi ; wowaonşida on wiconi duhapi ece :



### WICOWOYAKE 3.

6 Qa Jesus Messiya en witaya najin unkiyapi, qa mahpiya kin ekta kici kiyotang unkiyapi ;

7 Hecen wiconi u kte cin en, Jesus Messiya on cantounhnakapi kin on, towaonsida woyuha wopteca sni kin hduotanin kta.

8 Wowaonsida kin on yanipi, wacinyanpi kin eciyatanhan, qa he niyepi kin etanhan sni, Wakantanka taku niçupi kin hee.

9 Wicohan kin eciyatanhan sni, okinni tuwe ihdatan kta tuka.

10 Iye taku kage cin he unkiyepi, Jesus Messiya en wicohan wašte aicali unyanpi, hena ohna maunnipi kte cin heon otokaheya tanhan Wakantanka wiye-ya ehnaka.

11 Hecen ehanna wicacelipi ekta Ikcewicašta henicapi kin he kiksuya po, qa wicacelipi bahdayapi eyapi, nape on econpi kin he bakiñdayapi sni eniciyapi qon :

12 He ehan Messiya yuhe sni yaunpi ; Israel wokiconze kin iyenicihantupi sni, qa wahoyapi wicotakuye kin sdonyayapi sni, wowacinye ninicapi, qa wicoicage kin en Wakantanka codan yaunpi.

13 Tuka nakaha Jesus Messiya en, niš niyepi ehanna itehanyan yaunpi qon, wanna Messiya we kin on kiyadan anihipi.

14 Unkan iye wookiye unki-tawapi kin hee, iye qe napin yuwanjidan, qa cokahnagya ehna-kapi qon he yujuju ;

15 Qa iye celipi kin en, tokakiciyapi kin woahope wope kin econ wicašipi qon he yutakuni sni ; is iye en nonpa etanhan wicašta wanjidan teca icaliye kta, hecen wookiye kage kte cin heon etanhan.

16 Qa tancan wanjidan on, can susbeca kin eciyatanhan, hena

napin Wakantanka kici okicici-ye wicakiye ça, heon tokakiciyapi kin kte.

17 Qa tona tehan dukanpi qon kiyadan un kin hena ko wooki-ye oniciyakapi hi.

18 He eciyatanhan Woniya wanjidan on, napin Ateunyanpi kin ekta kiyedan ipi kin he un-hapi.

19 Heon etanhan, detanhan togkicihdapi, qa oyate tokeca kin henicapi sni ; tuka tona owotanna unpi kin hena om ya-tipi, qa Wakantanka tiyohnaka tawa kin he niyepi :

20 Qa yewicašipi wicašta wokcan ko taku ahehde tawapi kin akan tinicagapi, Jesus Messiya he oise en otancanke kin hee.

21 Iye ohna tipi kin ocowasin ayucoco ehna-kapi, qa Itancan kin en tipi wakan icaga.

22 He ohna niyepi nakun ptaya tinicagapi, Woniya kin eciya-tanhan, Wakantanka tipi ye kte cin heon.

### WICOWOYAKE 3.

1 Heon Ikcewicašta kin niyepi on etanhan, Palos, Jesus Messiya on kaška hnakapi kin he miye.

2 Niyepi on Wakantanka to-waonsida wicohtani maqupi kin he nayalionpi hecinhan ;

3 Token woyakapi kin on wo-wiyukcan kin he sdonye maki-ya ; he wanna wicoie tonana on wakaga :

4 He dawapi kin ehanthan Messiya tawowiyukcan kin to-ken imdukcan kin sdonyayapi kta.

5 He wicoicage tokeca kin en wicašta cinca kin owicakiyaka-pi sni, tuka nakaha Woniya kin eciyatanhan, yewicašipi owotanna qa wicašta wokcan tawa-

wicaye cin hena owicakiyakapi kin iyecen :

6 Hecen Ikcewicašta kin nakun kici tawayapi kte ça, kici tancan wanjipidan kta, qa Messiya tawotanin wašte kin eciyatanhan wahoyapi qon he en opapi kta.

7 He on ookiye makagapi, Wakantanka towaonsida maqupi kin he eciyatanhan, iye towašake oħanye cin on.

8 Miye tona owotanna un kin owasin en iyotan macistinna, tuka wowaonsida kin de maqupi, Ikcewicašta kin ekta Messiya tawoyuha okahnihpica šni kin he omdake kte cin hee.

9 Qa wowiyukan kin otokahe wanin ehantanhan Wakantanka, taku owasin Jesus Messiya on kage cin, he en nahmanpi qon hee takodakiciyapi kin he owasin sonye wicawakiye kta.

10 Hecen nakaha okodakiciye kin eciyatanhan, wokiconze wowašake ko, mahpiya ekta un kin en, Wakantanka toksape wopteca šni kin atanin kta.

11 Wokonze otokahe wanin ehantanhan kage ciqon he eciyatanhan, Jesus Messiya Itancan unkiyapi kin en ;

12 Iye wacinunyanpi kin eciyatanhan, kokipešniyan ekta unkipi, qa waditagya unkiapi ece.

13 Heon etanhan niyepi kin on kakiš mayanpi kin heon canwannikapi kte šni wacin.

14 Qa heon Jesus Messiya Itancan unkiyapi he Atkuku kin en, anpetu iyohi canpeška makehde inawajin.

15 He eciyatanhan wicowazi mahpiya ekta un, qa maka akan un kin, ocowasin caštonpi.

16 Hecen iye towitan woyuha kin eciyatanhan taku niçupi kta, iye Taniya kin eciyatanhan, wo-

wašake on wicašta mahen tanhan wašagnianpi kta.

17 Hecen wacinyanpi on nican-tepi kin mahen Messiya ounye kta ;

18 Hecen wowaštedake on hutkan niyusutapi, qa sutaya hu nihdepi kta ; qa tona owotanna un kin owasin om, ohdakinyan qa ohanske cin, omahentuya qa obosdatu kin he taku kin iyukan oyakhipi kta ;

19 Qa Messiya towašte okahnihpica šni kin he sonyayapi kte, hecen Wakantanka toojudan kin ocowasin ojuniyanpi kte.

20 Tuwe nina wašagya econ okihi, unkiš unkidapi qa awauncinpi kin isanpa, wowašake kin on onicihanyanpi kin he eciyatanhan ;

21 He iye okodakiciye kin en, Jesus Messiya on, ohinniyan owihanke wanin wowitan kicihan nunwe.

#### WICOWOYAKE 4.

1 Heon etanhan miš miye Itancan *caje* on makaškapi, ceci-ciyapi ce, Wicakicopi on nicopi kin he iyacinyan mayanipi kte.

2 Wicotawacin wašte ocowasin qa wicowahbadan, wacin tankapi ko yuha, wowaštedake en otoiyoħi iyowinyeciciyapi kta :

3 Qa wookiye icaške kin on Woniya okonwanjidan kin he yahduhapi kta e aičiciya po.

4 Wicatancan wanjidan qa Woniya nakun wanjidan, nicopi kin en wowacinye wanjidan inicopi kin he iyececa ;

5 Itancan wanjidan, wowacinye wanjidan, baptem wanjidan,

6 Taku Wakan wanjidan, he owasin Ateyapi kin, owasin

iwankam un, qa owasin opta un, qa niyepi owasin en niunpi kin.

6 Tuka Messiya iyunwin codan wicaqu iyutapi kin eciyatanhan unkiyepi otoiyohe wowaonsida unqupi.

8 Heon kaken eya ; Wakantkiya kihde çehan, wayaka ahdapi qon he ocowasin ahde ça wicašta kin taku wicaqu ce.

9 Wankan kihde cin he taku he ; tokaheya maka mahentuya kin iyaye cin hee.

10 Tuwe kun hi qon he taku owasin ojuye kte cin heon, he mahpiya kin ako sanpa tehan wankantuya kihde cin.

11 Unkan apa yewicašipi kin heca wicaqu, qa wicašta wokcan wanjikji, qa wotanim wašte oyakapi kte cin wanjikji, qa waawanhdakapi waonspekiya ko wanjikji ;

12 Tona owotanna un kin hena wicayuecedan kta, wawokiyapi wicohan kin on, qa Messiya tancan icaliyapi kte cin heon.

13 Tohan owasin okonwanjidan wacinyanpi, qa Wakantanka Cinhintku sonyapi kin ekta, qa wicašta tanka Messiya toojudan kin iyehankeca iyutapi kin ekta iyounhipi kte cin hehanyan.

14 Hecen detanhan hokšiyopqa aptanptan iyeyapi, qa wonspe tate owasin on kaha iyeyapi kin heuncceapi kte šni, wicašta oškiškeya ohanyanpi, qa wohneye on wicahnayanpi wicohan kin eciyatanhan ;

15 Tuka wowaštedake en iwicaunkapi kta, hecen tuwe wicapa kin ee, Messiya hee en taku owasin on unkiçagapi kta.

16 Iye eciyatanhan tancan kin ocowasin wayupiya iciyakaškapi, qa okihe kin owasin wawokiyapi on icicazontapi, huha kin

otoiyohi iyacinyan icage cin he iyecen tancan kin icaliyapi, wowaštedake en icage kte cin heon.

17 Heon kaken epe ça Itancan kin on mdaotanin ; Ikcewicašta tokeca wicotawacin witkotkopi kin en manipi kin he iyecen mayanipi kte šni.

18 Hena wicotawacin aotpas-yapi, qa Wakantanka wiconi tawa kin itehanyan unpi, wosdonye šni iye tanmahen un kin eciyatanhan, wicocante telika yuhapi kin heon ;

19 Hena iyasaka icaliyapi, qa wicaštapi šni kin en iyohpe-iciyapi, taku ašapapi kin owasin wohitiya econpi kte cin heon.

20 Tuka niyepi e qe hecen Messiya kin onspeniçiciyapi šni :  
21 He nayahonpi, qa he onspeniçiyapi hecinhan, Jesus en wowicake kin iyececa.

22 Wicolian tokaheya kin en, wicašta tannike cin, wohneye wocantiheye kin on hwin kin hee yahdušdokapi kta ;

23 Qa nitawacinpi woksape kin en niyutecapi kta ;

24 Qa wicašta teca woowotan-na, qa wowicake wakan kin en, Wakantanka eciyatanhan icaliyapi kin he kodakapi kta.

25 Heon etanhan, itonpi šni kin ayaštanpi, qa otoiyohe wicašta tokeca kici wowicake ece ohdaka po ; otoiyohe huha yeciciyapi kin heon.

26 Šinyahdapi ešta, walitanipi šni po. Canniniyanpi ecen wi iyaye šni nunwe.

27 Qa Wakansica kiyukanpi šni po.

28 Tuwe wamanon kin he ake manon kte šni, tuka htani kta, nape on taku wašte econ kta, hecen walpanica kin he taku wicaqu kte cin yuhe kta.



29 Wicoie síce cin owasin takudan niipi kin etanhan hinanpe síni nunwe, tuka taku wašte, on icañ yapi kta, tona nahonpi kinhan wowaonsída wicaqu kte cin he ecedan.

30 Qa Wakantanka Taniya Wakan kin iyokisinyapi síni po; he on wopekintonpi anpetu kin aiyahdeya askam niyanpi.

31 Wicokige owasin, qa wocantiyahde, qa wošihda, qa iwašicunpi, qa waaiapi canniyekiciyapi ko owasin ehpeyayapi nunwe.

32 Qa otoiyo hi okiciciyapi, qa cantekiciyapi, qa otoiyo hi kicicajuju po, Wakantanka Messiya on nicicajujupi kin he iyecen.

#### WICOWOYAKE 5.

1 Heon hokšiyopa cantekiya-pi kin iyecen Wakantanka opa po.

2 Qa wacantkiyapi kin en mani po; Messiya canteunkiyapi, qa unkiyepi on Wakantanka en içi-çu, qa waihdusna, woomna iyokipi kin he iyececa.

3 Tuka wiinalmanpi, qa waša-papi, qa waicucupikte cin, niyepi ekta caje yatapi síni nunwe, tuka tona owotanna un taku iyokipi wicaye cin hena.

4 Qa wawištenyapi, qa wicoie ecinšniyan kin, qa iapi síca hena hecetu síni; tuka wopida eyapi kin he wašte.

5 He de sdonyayapi, tuwe wawicihalapi econ, qa tuwe wašape cin, qa tuwe waicucukte cin, he wakagapi cekiya ece, hena wanjidan ešta Messiya qa Wakantanka kici tokiconze kin en takudan tawapi kte síni.

6 Iapi ecinšniyan on ihnuhan tuwe nihnyanpi kin; wicoñan kin hena on Wakantanka tocan-

niye kin woakta síni cincapi kin en awicau kta.

7 Heon etanhan hena en opeya unpi síni po.

8 Ehanna otpaze cin henicapi, tuka wanna Itancan kin en iyoyanpa kin *henicapi*; iyoyanpa cinca kin iyecen mani po:

9 Woniya tawaskuyeca kin he wowašte owasin, qa wicoowotanna, qa wowicake kin en un:

10 Qa Itancan kin taku iyokipiye kte cin he akita po.

11 Qa otpaza wicoñan, on taku wašte icage síni kin hena en okicipapi síni po, tuka hena iyopeya po.

12 Hena taku nahmana econpi kin caje yatapi kin he wowištece.

13 Tuka taku tona iyopeyapi kin hena owasin iyoyanpa kin yuotanin; qa taku owasin yuotanin kin he iyoyanpa kin ee.

14 Heon etanhan kaken eya; Tuwe ištınbe cin kikta, qa wiconțe etanhan najin wo, Messiya iyoyamniye kta ce.

15 Hecen on wakta po, itonpeya mayanipi kta, witkotkoke cin iyecece síni, tuka wicašta wacin ksape cin iyececa.

16 Qa omaka kin tanyan hduha po, anpetu kin síce cin heon etanhan.

17 Heon etanhan wacin ksapa po, qa Itancan token tawacin kin sdonya po.

18 Qa miniša on witkopi síni po, he on iyatahdepi ece; tuka Woniya kin on ojudan un po.

19 Qa Psalm, qa odowan, qa wakan dowanpi kin on waho-konkiciciya po; ahiyayapi qa nicantepi kin ekta Itancan kin idowan po.

20 Qa ohinniyan, taku owasin on, Wakantanka Ateyapi kin wopida eciya po, Jesus Messiya Itancan unkiyapi caje kin on:

## WICOWOYAKE 6.

21 Qa Wakantanka kokipeyahan otoiyo hi token ihukun iyeiçiya po.

22 Winohinca, nihihnapi kin wicihukun iyeiçiya po ; Itancan kin en iyececa.

23 Wicašta kin he iye tawicu pa kin hee, Messiya okodakiciye pa kin hee he iyececa ; qa he iye wicatanca kin wanikiye cin hee.

24 Heon okodakiciye kin Messiya ihukuya yanke cin he iyecen winohinca kin iye hihnakupi kin taku owasin on ihukun unpi kta.

25 Wicašta, winohinca nitawipi kin cantewicakiya po, Messiya okodakiciye kin wašte kidake ça, on iye içiçu kin he iyecen ;

26 Hecen iye oie kin eciyatanhan, mini on hducedan, qa hduška kta ;

27 Qa hecen iye ekta ehdaku kta, wowitan okodakiciye kin heca, wošape qa yuškipi, qa taku hececa wanica ; hecen wakan, qa waašape šni un kta.

28 He iyecen, wicašta kin iye tancanpi kin iyecen tawicupi kin wašte wicakidakapi kta ; tuwe tawicu kin wašte kidake cinhan he wašte ičidaka.

29 Qa tohinni tuwedan iye cełpi kin šice kidake šni, tuka icałkiye ça, tanyan hduha, Messiya okodakiciye hduhe cin iyececa.

30 He tancan, qa cełpi, qa huhu kin en, huhu kin he unkiyepi.

31 Heon etanhan wicašta kin, atkuku, hunku ko ełpewicakiye ça, tawicu kin en iyaihdaske kta, qa heniyoš wicacełpi wanjidan kta.

32 He wowiyukkan wan tanka, tuka Messiya qa okodakiciye kin hena wicawaka.

33 Heon niš niyepi otoiyo hi niye inihdacin nitawin wašte yakidake kta, qa winohinca kin iš iye hihnaku kin kinihan kte.

## WICOWOYAKE 6.

1 Hokšiyooqopa, nihunkakepi kin anawicakigoptan po, Itancan kin en, he owotanna.

2 Niyate nihun kici wicahduonihan wo ; woahope on taku wahoyapi tokaheya kin hee ;

3 Hecen tanyan yaun, qa maka akan tehan yani kta.

4 Qa ateniyanpi kin, nicincapi kin wacinko wicakiyapi šni po, tuka Itancan waicałye ça wonspe tawa kin en icałwicakiya po.

5 Qa wowidake yaunpi kin, tona wicacełpi ekta niyuhapi kin wokokipeya cancałiçiya anawicakigoptan po, Messiya kin iyececa, nicantepi okonwanjidan on :

6 Wanniyakapi ecedan šni, wicašta iyokipiwicayapi kin iyececa ; tuka Messiya taokiye kin iyececa, nagi kin eciyatanhan, Wakantanka tawacin kin ecanonpi kta.

7 Iyokipiya wawokiya po, Itancan kin ekta hecetu, qa wicašta kin en iyecece šni.

8 Qa tuwe taku wašte econ kinhan, he on Itancan kin eciyatanhan wayuhe kta, wowidake un, qa iš tawaiçiya un kin, unma tukte kašta, he sdonyayapi.

9 Qa tona itancan yaunpi kin, niš eya he iyecen ecawicayeconpi kta, qa wakokipe wicayecagapi kte šni. Małpiya kin ekta iš iyepi qa niš niyepi nakun Itancan yakiyapi kin yanke ça, he ekta wicašta itohnake yuonihanpi wanica, he sdonyayapi.

10 Unkan ehake mihunkawanji,

## PHILIPPI.

Itancan kin en waśagya un po, iye towaśake wicookihi kin on.

11 Wakantanka tawipe kin ocowasin un po, hecen Wakanśica wohnaye oħanye cin itkokim inajin oyakihipi kta.

12 Wicawe, qa wicacełpi kin kici unkićizapi ŗni, tuka wokićonze, qa wicowaśake, qa wiconi kin de en otpaza itancanpi kin, qa taku wakan śicapi wan-kantuya yukanpi kin hena om.

13 Heon etanhan Wakantanka tawipe kin ocowasin icu po, hecen anpetu śice cin en najin oyakihipi kta, qa taku owasin hduśtan nayajinpi kta.

14 Heon wowicake ipiyag kitonpi ecen najin po, qa wicowotanna maza maku akahpe kin koyaka po.

15 Qa nisihapi kin en wookiye wotanin wašte ohduśtan kin okihan po.

16 Qa owasin akapa tanhan wowacinye wahacanka kin icu po, he on wicaśta śica tunwanhinkpe ide kin owasin yusni oyakihipi kta.

17 Qa wiconi maza wapaha kin he icu po, qa nakun Woniya tamazasagye kin, Wakantanka oie kin hee :

18 Wocekiye qa wokidapi owa-

sin on Woniya kin en, ohinniyan tona owotanna un kin on cekiya po, qa heon woape owasin wokidapi ko yuha kiktahan un po :

19 Qa nakun miye on, iapi owakihiki kte cin heon, hecen waditagya i wahdukawa, qa wotanin wašte wowiyukkan kin omdake kta.

20 Heon wahośiya un wan kaśka hnakapi kin hemaca, hecen on token iwae kte cin he iyecen waditagya iwae kta.

21 Tuka taku mitawa kin, token waun kin he nakun, sdonyayapi kta e heon Tucikos hunkawanjin kiciyapi wan wašte dakapi, qa Itancan kin en ookiye owotanna kin he taku kin owasin oniciyakapi kta :

22 Heon etanhan niyepi ekta ye waśi, unkiyepi ekta taku kin sdonyayapi kta, qa he nicantepi kin wacintonhnag niyanpi kte cin heon.

23 Hunkawanjin kiciyapi kin en wookiye un nunwe, qa wowašte, wowacinye ko, Wakan-tanka Ateyapi, qa Jesus Mes-siya Itancan kin eciyatanhan.

24 Tona awicakehan Jesus Messiya Itancan unkiyapi wašte dakapi kin hena owasin en, wo-waonśida wicakici un nunwe. Amen.

---

## PALOS

# PHILIPPI OYATE

## WOWAPI WICAKICAGE CIN.

---

### WICOWOYAKE 1.

1 Palos qa Timotheos, Jesus Messiya taokiyewicaye cin, tona Philippi ekta Jesus Messiya

en owotanna un kin hena, qa waawanhdake cin hena ookiye unpi ko, *wowapi unnicagapi* :

2 Wakantanka Ateunyanpi, qa Jesus Messiya Itancan unki-



yapi kin etanhan, wowaonsida, wookiye ko niyepi kin en nicipi un nunwe.

3 Ciksuyapi eca, Wakantanka mitawa wopida ewakiya ece.

4 Ohinniyan mitawocekiye o-toiyohi en, niyepi owasin on iyuskinyan cewakiya ece :

5 Anpetu tokaheya kin ehantahan, qa dehanyan, wotanin wašte kin en kodayeciyapi kin heon.

6 Unkan he sdonwaya ; tuwe tokaheya ohan wašte nicicagapi kin he niciyuştanpi kta, Jesus Messiya anpetu tawa kin hehanyan.

7 Hecen niyepi owasin wacin en ciyuzapi kte cin he hecetu, cante en mayaduzapi kin heon ; makaškapi kin, qa wotanin wašte omdake ça mdsuta kin he en, qa nakun wowašte mitawa kin en niyepi owasin oyapapi ece.

8 Wakantanka sdonmayan, Jesus Messiya cante kin on owasin cantocikpanipi.

9 Qa he de icewakiya, wašte yadakapi kin he wosdonye wiyukanpi ko owasin en, sanpa qa sanpa tankaya aye kta :

10 Kinhan, taku wašte kin hena idukanpi kta, hecen okonwanjidan hicahe šni yaunpi kta, Messiya anpetu tawa kin en ;

11 Qa wicoowotanna waskuyeca kin on ojudan yaunpi nunwe, hena Jesus Messiya on Wakantanka woyatan qa wowitan tawa kin ee.

12 Mihunkawanji, taku token ecamiconpi kin he on wotanin wašte kin sanpa otanin aye cin he sdonyayapi kta wacin.

13 Hecen wicaštayatapi tahocoka kin ekta, qa owancaya Messiya on makaškapi kin he otanin.

14 Qa Itancan kin en, hunkawanjin kiciyapi kin ota, miye makaškapi kin on, sanpa nina waditakapi, qa kokipešniyan wicoie kin taninyan oyakapi ece.

15 Hunh waakinicapi qa winawizipi kin on, qa hunh is waštedakapi kin on Messiya oyakapi ece.

16 Hena e waakinicapi kin on, wowicake eciyatanhan šni Messiya kin oyakapi, qa makaškapi kin en wokakije kokijuya aupi kta kecinpi ;

17 Qa unmapi kin is waštekidapi kin on etanhan, wotanin wašte mdusuta kta e on emahdipi kin sdonyapi.

18 Ecin to ; toketu kašta, wohnaye on etanhan, qa is awicakehan, unma tukte kakeš, oyakapi kin he on imduškin, qa ees nakun imduškin kta.

19 Nitawocekiyepi, qa Jesus Messiya Taniya wawokiye cin on, he wiconi emicicetu kta sdonwaya.

20 Qa nina awacanmi qa ape manka, hecen takudan on imaštece kte šni, tuka ohinniyan waditagya waun kin he iyecen nakaha mitancan kin on Messiya yuonihanpi kte, wani qa mašte kte cin unma tukte kašta on etanhan.

21 Wani kin he Messiya ee, qa mašte cinhan sanpa tanyan waun kta.

22 Wicacełpi kin en opeya wani kinhan, miohan waskuyeca kin hee, tuka unma tukte wacin nun tanin šni.

23 Taku nom aotins mayanpi ; ekta mde ça Messiya kici waun kte hinca, he iyotan wašte.

24 Tuka wicacełpi kin en opeya waun kin he niyepi on wawoki-yapi kin hee.

25 Hecen wahdukan, qa heon

wani, qa niyepi owasin om wau un kta sdonwakiya, sanpa inicagapi qa wacinyan iduŝkinpi kte cin heon.

26 Qa hecen akeŝ ekta ciupi kinhan miye on, Jesus Messiya en sanpa nina iduŝkinpi kta.

27 Tuka Messiya tawootanin waŝte kin eciyatanhan yanipi nunwe ; hecen wanciyakapi wau kinhan, qa iŝ wau ŝni, unma tukte kaŝta, niohanpi kin nawahon kta, wicotawacin wanjidan en sutaya yaunpi, qa wicanagi wanjidan yuha wotanin waŝte kin wacinyan oyecipapi kin.

28 Qa tona toka niyanpi kin hena on, ihnuhan taku ininihanpi kin : hee hena en wicotakuni ŝni au kta yuotanin, tuka heon niyepi kin en wiconi Wakantanka etanhan au kta otanin.

29 Messiya he ayuco niçupi, iye wacinyayapi kte ça, nakun iye on kakiŝniyanpi kte cin.

30 Qa makakije cin wanmaya-dakapi qon, qa nakaha en mau nayahonpi kin, he iyecen woka-kije duhapi kta.

## WICOWOYAKE 2.

1 Heon Messiya on iwicakiyapi yuke cinhan, qa wowaŝtedake en imagagaiçiyapi, qa Woniya kin en kodakiciyapi yuke cinhan, qa wacantkiyapi wowaonŝida ko yuke cinhan,

2 Mitowiyuŝkin kin miciyuŝtan po, akiyecen awacannipi, qa wowaŝte okonwanjidan duhapi, qa wicotawacin wanjidan yaunpi kta.

3 Waakinicapi qa ihdatanpi kin on takudan *ecanonpi* kte ŝni, tuka wahbayedan yaunpi, qa otoiyohi niye isanpa tokan waŝte yecidakapi kta.

4 Otoiyohi wicitawa kin ece-

dan ekta etonwanpi ŝni po, tuka nakun otoiyohi tokan tawa kin ekta.

5 Jesus Messiya token tawacin qon he iyecen wacin duzapi kta.

6 He Wakantanka ouncage kin en un, qa Wakantanka kici akidecen yanka keiçiye cin he wawicakipi ŝni kecin.

7 Tuka ihduŝdoke ça wowida-ke un kin ouncage kin icu, qa wicaŝta kin iyecen ihduŝ icaga ;

8 Qa wicaŝta ouncage kin en un qehan, ihduhukuya qa wiconte ekta aiyahdeya wanahon yanka, can susbeca en te cin he ehan.

9 Heon etanhan Wakantanka he tehan wankantuya hduwan-kan icu, qa caje wan wicacaje owasin isanpa waŝte kin he qu ;

10 Hecen Jesus caje kin on, hupahu kin owasin canpeŝka makehde enajin kta, mahpiya ekta un, qa maka akan un, qa maka kin ihukuya un kin hena-kiya.

11 Qa Wakantanka Ateyapi kin yatanpi kte cin on, Jesus Messiya he Itancan kin ee ce ; wicaceji owasin eya oyakapi kta.

12 Heon waŝte ciciyapi kin, ohinniyen nayahonpi kin he iyecen, en cicipi waun kin hecedan ŝni, tuka nakaha en waun ŝni eŝta, sanpa wokokipeya cancaniçiya yanipi kte cin hduŝtan po.

13 Tuwe cinniciyapi, qa econniciyapi kin he Wakantanka ee, iye toiyokipi kin eciyatanhan niyepi kin en ohanyan.

14 Wihnupi qa waakinicapi wanin taku owasin econ po.

15 Hecen iyaonpepica ŝni, qa owotanna, wicoicage wan pemni, qa yuŝankŝanyan un kin ehna Wakantanka cinca ecedan

### WICOWOYAKE 3.

yaunpi kta; hena en maka peti-  
janjan iyecen iyoyanpa yaun-  
pi;

16 Qa wiconi wicoie kin pazo  
yaunpi: Hecen Messiya anpetu  
tawa kin en taku on imawinkta  
kin he dee, taku šni on waimnan-  
ke šni, qa taku šni on hitawani  
šni kin hee.

17 Unkan wacinyayapi wošna-  
pi wawokiyapi kin en, amihda-  
pson ešta nakun imduškin, qa  
niyepi owasin om imduškin kta.

18 Heon niš niyepi nakun idu-  
škinpi qa miyeci iniwinktapi  
ece.

19 Tuka niyepi kin ekta Ti-  
motheos kohanna yewaši kta  
wacanmi, Jesus Messiya Itan-  
can kin on, hecen tohan token  
yaunpi kin sdonwaye cinhan,  
hehan miš nakun iyokipi waun  
kta.

20 Tuwe iyecen wacin yuze  
ča iye cinka taku nitawapi kin  
ihakta kte cin mduhe šni.

21 Owasin wicitawa kin aki-  
tapi, qa taku Jesus Messiya ta-  
wa kin *akitapi* šni.

22 Tuka he iyutapi kin sdon-  
yayapi, hokšidan wan atkuku ki-  
ci un kin he iyecen wotanin wa-  
šte kin en micica.

23 Iye kohanna ye waši kta,  
tohan token waun kte cin sdon-  
wakiya.

24 Qa miš eya ecanan wau kta  
e Itancan kin wacinwaya.

25 Tuka Epaphroditos misun-  
ka qa mitawaši, qa kici akicita  
waun, tuwe u yašipi, qa tuwe  
taku imakakije cin omakiye cin,  
he niyepi ekta hde waši kta iye-  
ceca epca.

26 He niyepi owasin cantoni-  
kpanipi, qa iyokišica un, waya-  
zanke cin nayakišonpi kin he-  
on.

27 He qeš wayazanke ča wan-

na te kta ikiyedana, tuka Wakan-  
tanka onšikida, qa he isnana šni,  
tuka miye nakun, hecen woiyo-  
kišice icitakihna mduhe kte šni  
e heon.

28 Qa heon itonpeyahan hde  
waši, ake wandakapi kinhan  
iduškinpi kta, qa miš aopten  
iyokišica amaye kta.

29 He Itancan kin on etanhan  
wopida owasin yuha tin u ši po,  
qa tona hececapi kin wicayuo-  
nihan po.

30 He Messiya wicošitani tawa  
kin on wanna aškanan te kta  
tuka, wiconi tawa kin itonkipe  
šni, miye en wawokiyapi aokpa-  
niyan ecanonpi kin he niciyu-  
štanpi kte cin heon etanhan.

### WICOWOYAKE 3.

1 Ehake mihunkawanji, Itan-  
can kin en iyuškin po. Taku kin  
dena on wowapi cicagapi kin he  
miye tehike wadake šni, qa ni-  
yepi kin on wašte.

2 Šunka kin on waktaya un po;  
tona šicaya econpi kin on wakta  
po; wayušpapi kin on waktaya  
un po.

3 Tona bakišdayapi, qa wico-  
cante on Wakantanka ohodapi,  
qa Jesus Messiya en iwinktapi,  
qa wicacelipi wacinyanpi šni kin  
heuncapi.

4 Miš nakun, taku on wicace-  
łipi kin wacinwaye kte cin mdu-  
ha tuka. Tuwe wicacelipi wa-  
cinyan okihi kecin kinhan he  
isanpa owakihi.

5 Anpetu išahdogan hehan ba-  
makihdayapi, Israel oyate qa  
Benjamin tawicoun kin hema-  
tanhan, Hebrew etanhan He-  
brew kin, qa woope kin eciya-  
tanhan Pharisee kin hemaca.

6 Ohodapi kin eciyatanhan  
okodakiciye kin šicaya wakuwa,



qa woope woowotanna kin he eciyatanhan takudan iyaonpepica śni *waun*.

7 Tuka taku tona mihdamna qon hena Messiya on takuśni wadake :

8 Han, awicakehan taku owasin taku śni wadake, Jesus Messiya Itancan mitawa kin wosdonye oiyokipi kin on, iye on taku owasin toki elipewaya, qa hena tacesdi ece mdawa, Messiya iyowahi kte cin heon ;

9 Qa he en waun kta, mitoo-wotanna wicoope kin eciyatanhan un kin he wahduhe śni, tuka taku Messiya wacinyanpi eciyatanhan un kin, Wakantanka too-wotanna wacinyanpi kin on ica-ge cin hee wacin.

10 Hecen he iye sdonwaye kta, qa piya ikicage cin wowaśake kin, qa iye kakije cin okicipapi kin hena ko, iye ƣe cin ounce kin en imacage kta :

11 Hecinhan, wiconƣe etanhan woekicetu kin en iyowahi kte linca.

12 Wanna dehan iyowahi, qa wanna mayuśtanpi kin ee śni ; tuka kuwa amde, okinni taku on Jesus Messiya mayuze cin hee mduze kta.

13 Mihunkawanji, nahanlin mduze mihdawa śni ;

14 Tuka taku wanji ecamon, taku hekta un kin hena akiktonś waun, qa taku tokata un kin hena ekta nape yewakiya ece ; hecen oinajinta awaimnanka, Jesus Messiya on Wakantanka wankantuya wicakico kin en oqipe kin yewakiye kte cin heon etanhan.

15 Heon tona unyuśtanpi kin hecen awauncinpi kta, qa taku on togye wacin duzapi hecinhan, he nakun Wakantanka oniciyakapi kta.

16 Tuka tohan iyounhipi kin he en woope wanjidan eciyatanhan maunnipi, qa okonwanjidan awauncinpi kte.

17 Hunkawanjin ciyapi kin, omicipa po, qa tona hecen manipi kin hena iwanwicayaka po, waonspekiya unyaduhapi kin he iyececa.

18 Wanna ota ociciyakapi, qa nakaha ake ceya omdake, wicaśta ota Messiya can susbeca tawa kin tokaye cin iyecen manipi ece.

19 Hena owihanke kin he wicotakuniśni ; iye tezipi kin Wakantanka yapi, wowiśtece kin en iwinktapi, qa taku makata un kin awacinpi ece.

20 Tuka okodakiciye unkita-wapi kin he mahpiya kin ekta un, qa hetanhan Wanikiya Jesus Messiya Itancan kin *hi kta* un-kapepi.

21 Iye untancanpi hanye cin he yutokeca kta ; qa iye tancan wakan kin ounce kin en icaliye kta, towaśake on taku owasin ohiye kta okihi kin heon etanhan.

#### WICOWOYAKE 4.

1 Heon etanhan mihunkawanji waśte cicidadapi, qa cantocikpanipi kin, wowiyuśkin mitawa qa wateśdake mitawa kin, Itancan kin en sutaya najin po, waśte cicidadapi.

2 Yuodiyas cewakiye ƣa, Sun-tuce cewakiya, Itancan kin en okonwanjidan awacinpi kta.

3 Qa mitawaśi wicake cin ceciciya ce, winohinca tona wotanin waśte kin en mici ohanye cin hena owicakiya wo, qa Klement, qa mitawaśi unmapi, ca-jepi kin wiconi wowapi kin en un kin hena kaya.

4 Ohinniyān Itancan kin en

iyuſkin po ; qa ake, Iyuſkin po, epe.

5 Niwahaſbapidan kin he wicaſta owasin sdonyapi kta. Itancan kin kiyadan un.

6 Takudan iyokiſinya awacinpi ſni po, tuka taku yacinpi kin owasin on, wocekiye, wokidapi qa wopida eyapi ko on Wakantanka oyakidakapi kta.

7 Qa Wakantanka tawookiye okaſinihpica ſni kin he nicante-pi qa nitawacinpi kin Jesus Meſſiya en niyuhapi kte.

8 Unkan ehake mihunkawanji, taku wicakapi kin, taku yuonihanpi kin, taku owotanna kin, taku wakan kin, taku waſte dapica kin, taku waſte eyapi kin, wowaſte qa wowitan yuke cinhan, hena awacin po.

9 Taku tona onnispepi, qa iyacupi, qa nayahonpi, qa miye en wandakapi kin hena econ po, qa Wookiye Wakantanka kin niyepi kin en nicipi un nunwe.

10 Itancan kin en nina imduſkin, nakaha unhanketa awamayacinpi kin he piya hca aya heon. He de en ihamayaktapi, tuka token on ecamiyeconpi nuntanin ſni.

11 Taku imakakije cin he wake ſni ; taku en micihe cin hena on iyokipiya waun kta e onspemiſiſiya.

12 Token wahpaniya waun kte cin he sdonwakiya, qa token wijinya waun kte cin he nakun sdonwakiya ; ohinniyan qa taku owasin on, wimapi, qa wotektewahda kta, wimajica qa mawahpanica kte cin onspemakiyapi.

13 Meſſiya waſagmaye cin he

eciyatanhan taku owasin owakibi.

14 Tuka makakije cin en omakakiyapi kin he tanyan ecanonpi.

15 Philippi wicaſta, he de sdonya po, wotandin waſte otokahe ekta, Makedonia etanhan imdamde cehan, waqupi qa icupi kin icalitaſya okodakiciye kin niye niſnana omayakiyapi.

16 Theſſalonike ekta waun qon he icunhan, taku imakakije cin on wancadan qa nonpa taku mayakaipi.

17 Taku maqupi kta wacin kin hee ſni, tuka waſkuyeca niyepi on sanpa niciyuotapi kte cin he wacin.

18 Tuka owasin mduhe ca wijica waun ; niyepi etanhan taku Epaphroditos maqu kin hena iwacu, taku waſtemna woſna waſte, qa Wakantanka iyokipi kin heca he iwamaſeca.

19 Taku inicakijapi kin owasin Wakantanka mitawa nicupi kta, iye woyuha wowitan kin en un kin hetanhan, Jesus Meſſiya eciyatanhan.

20 Wakantanka Ate unyanpi kin wowitan owihanke wanin kicihan nunwe. Amen.

21 Tona Meſſiya en owotanna un kin hena nape wicayuzo po. Hunkawanjin kiciyapi om waun kin hena nape niyuzapi.

22 Tona owotanna un kin hena owasin nape niyuzapi, Kesar tiyohnaka kin hena iyotan.

23 Jesus Meſſiya Itancan unkiyapi towaonſida kin niyepi owasin en nicipi un nunwe. Amen.

## K O L O S S E O Y A T E

WOWAPI WICAKICAGE CIN.

## WICOWOYAKE 1.

1 Palos, Wakantanka tawacin kin eciyatanhan, Jesus Messiya yeši qon he, qa Timotheos hunkawanjin unyanpi kin kici,

2 Kolosse ekta tona owotanna un, qa hunkawanjin kiciyapi Messiya wacinyanpi kin hena, *wowapi cicagapi*. Wowaońsida wookiye ko, Wakantanka Ate unyanpi, qa Jesus Messiya Itancan kin etanhan, niyepi kin en nicipi un nunwe.

3 Ohinniyar wocekiye unkeniciyapi, qa on Wakantanka Jesus Messiya Itancan unkiyapi Atku ku kin wopida unkekiciyapi.

4 Jesus Messiya wacinyayapi, qa tona owotanna un kin owasin wašte wicayadakapi kin he naunhonpi ;

5 Woape mahpiya kin ekta enicihnakapi kin on, he ehanna wotanin wašte wicoie wicakapi kin en nayahonpi kin ;

6 He en nihipi, maka kin owancaya iyaye cin he iyececa, qa waskuyeca aicaga, niyepi kin en nakun, anpetu kin en nayahonpi, qa awicakehan Wakantanka towaońsida iyacupi qon ehantanhan.

7 Epaphras unkitawaşıpi wašte, qa niyepi on Messiya taokiye wicake cin he hena hecen onspeniciyapi ;

8 Qa Woniya kin en wacanyakiyapi kin he nakun unkokiyakapi.

9 Heon anpetu kin he naunhonpi kin ehantanhan niyepi on cekiya unkayaştanpi şni, qa woksape owasin, wookalinige ko en, iye tawacin sdonyapi kin on, onijupidan kte cin he unki-dapi ece.

10 Hecen taku iyokipi kin owasin on, Itancan kin en tanyan mayanipi kta, wicohan wašte owasin en, waskuyeca icaliyayapi, qa Wakantanka sdonyapi kin en sanpa inicagapi kta.

11 Iye towitan wowaşake kin eciyatanhan, wicookihi kin owasin on waşagniyampi kta, wadiwicatake cin owasin on etanhan, qa wacin tankapi, wiyuşkinpi kici :

12 Qa Ateyapi kin wopida eyakiyapi kta, he iyoyanpa ekta tona owotanna un kin woaihpeye tawapi kte cin en ounpapi kta e iyehantu unyanpi :

13 He otpaza wowaşake kin etanhan unkiyuşpapi, qa iye Cinhintku wašte kidake cin toki-conze kin en ounye unkiyapi :

14 He en, iye we kin eciyatanhan, wopekitonpi unhapi, woahtani kajujupi kin hee :

15 Wakantanka wanyagpica şni un kin ounce kin hee, qa taku kagapi kin owasin en tokapa kin hee :

16 Iye eciyatanhan taku owasin kagapi, mahpiya ekta un qa maka akan un kin hena, taku wanyakapi qa taku wanyagpica şni, oiyotanke kin, wokiconze



kin, wicoškanskan kin, qa wicowaśake kin; taku owasin iye on icahyapi kin hena iye icicaga:

17 Qa taku owasin itokatam un kin he iye, qa he on taku owasin ecen han:

18 Qa iye tancan kin okodakiciye kin hee, qa pa kin he iye, qa otokahe kin, wiconṭe etanhan tokaheya tonpi kin hee, hecen iye taku owasin en tokapa un kta.

19 Iye ohna taku ocowasin ounye kte cin he *Atkuku* kin iyokipi.

20 Qa iye can susbeca we kin eciyatanhan wookiye kage ca, heon etanhan taku owasin iye kici okiciciye wicaye kta, taku maka akan un, qa taku mahpiya ekta un kin hena, iye on.

21 Qa niś niyepi, ehanna oyate nitokecapi, qa nitawacinpi kin en toka kin henicapi, wicohan śice cin on, tuka nakaha he kici wokiyeniyān nicagapi;

22 Iye celipi tancan kin en ṭe cin eciyatanhan, hecen iye itokam owotanna, qa waaśapapi śni qa takudan iyaonpepica śni, inajin niyanpi kta:

23 Wacinyayapi kin en nayajinpi kinhan, sutaya yaunpi, qa ṭinsa nayajinpi, qa wotanin waśte woape nayahonpi kin etanhan nihinhpayapi śni kinhan; he mahpiya kin ihukuya wicaśta hiyeye cin owasin owicakiyakapi, qa he en Palos he miye ookiye makagapi:

24 Nakaha niyepi kin on etanhan makakije cin heon imduśkin, qa Messiya wokakije tawa, taku micelipi kin en yuśtanpi śni kin hena iye tancan kin, okodakiciye kin hee, on weciyuśtan kta.

25 He en ookiye makagapi, Wakantanka wokonze kin eci-

yatanhan, he niyepi on maqupi, Wakantanka oie kin mduecetu kte cin heon.

26 Taku oyakapi śni kin, wicoicage qa wicoun ota kin ehan-tanhan anahmanpi kin, he nakaha tona owotanna iye tawa wicaye cin hena owicakiyaka.

27 Ikcewicaśta kin ekta taku otanin śni kin de wowitan woyuha kin tinskokeca kin, he Wakantanka hena sdonye wicakiye kta, he niyepi kin en Messiya wowitan woape kin hee.

28 He unkiye unyaotaninpi, wicaśta kin owasin wahokonwicunkiyapi qa wicaśta owasin onspewicunkiyapi ece, woksape owasin on; hecen Jesus Messiya en wicaśta otoiyohi owotan-na inajin wicunkiyapi kta.

29 Heon miś eya hitawani, iye ohan kin miye en waśagya ohan-ye cin he eciyatanhan inawahni.

## WICOWOYAKE 2.

1 Niyepi kin on, qa Laodikia ekta un kin hena, qa tona wicacelipi on miite kin wanmayakapi śni kin on token hitawani kin he sdonyayapi kta wacin:

2 Hecen iye cantepi kin kicanptapi kta, qa wacantkiyapi kin on kicicazontapi, qa wosdonye tanyan okaħnigapi kta wowijice kin owasin on, qa Wakantanka towiyukan sdonyapi kte cin on, Ateyapi qa Messiya tawa kin hee.

3 Iye en woksape, qa wookah-nige woyuha kin owasin nahmanpi.

4 Tuwedan wicoie skuya kin on nihnayanpi kte śni heon hena hepa.

5 Wicacelipi on, ekta waun śni eśta, woksape kin on cicipi waun, imduśkin, niohanpi owo-

tanna kin, qa Messiya sutaya wacinyayapi kin he wanyag waun.

6 Token Jesus Messiya Itancan kin iyacupi qon he iyecen ohna mani po.

7 Iye en sutaya hu nihdepi, qa en tinicagapi, qa wowacinye kin tinsa ayahampi kta, onspenicuyapi qon he iyececa, qa en wopida eyapi kin sanpa ota ecanonpi kta.

8 Ihnuhan wicoksape eyapi kin on, qa ikce wohnye kin on tuwe nihnyanpi kinhan, wicašta hitunkakanpi oyakapi kin on, qa wicoicage en woonspe tokaheya eciyatanhan, qa Messiya eciyatanhan šni :

9 Iye kin ohna tancanyan Taku Wakan kin ocowasin ounyan.

10 Qa iye en niš niyepi kin yuacetu yaunpi, qa he wokiconze wowašake ko owasin Itancan kin hee.

11 Qa he en banicihdayapi, bakihdayapi nape codan econpi kin he on, Messiya bakihdayapi tawa kin eciyatanhan, wicacehpi woahitani tancan kin ehpekiyapi kte cin heon.

12 Baptem on iye kici nihnakapi, qa nakun kici ekicetu niyanpi, Wakantanka wicašte cin etanhan najin kiye cin he wowašake kin wicayadapi kin heon etanhan.

13 Qa niyepi ehanna wayahitanipi, qa nicehpi banicihdayapi šni kin en nišapi qon, wanna wayahitanipi kin owasin nicicajujupi qa niniyanpi.

14 Qa wicoope kin taku nape on owapi qon, unkiyušepi qa kašeunyanpi kin he pajuju, qa can susbeca tawa kin en okatan, qa hecen yutokan iyeya.

15 Qa wokiconze, wicowašake

ko yutakuni šni iyeye çehan, tannyan wicakipazo, qa iye hinca on iwakte hdi.

16 Heon etanhan, woyute, qa woyatke, qa omniciye wakan, qa wi teca, qa anpetu okihpapi kin hena on ihnuhan tuwe niyacopi kin :

17 Hena e taku u kte ciqon ohanzi kin hee, tuka tancan kin he Messiya etanhan.

18 Tuwe wahpaniçiye ça, mahpiya ohnihde kin ohowicada kin ihnuhan he nihnyanpi kin : he taku wanyake šni kin en yeçiye ça, iye celhi tawacin kin on ecinšniyan ihdatan ;

19 Qa Pa kin he yuze šni ; he on tancan kin ocowasin okihe en iyakaškapi kin on woyute oiyahdeyapi, qa iciyakaškapi, qa hecen Wakantanka oicage kin on icaga ece.

20 Heon etanhan, wicoicage kin en woonspe tokaheya kin ekta Messiya kici nišapi hecinhan, tokeca e wicoicage kin en yanipi kin iyecen wicoope kin oyapapi he :

21 Oyutanpi šni, utapi šni, qa nape on yuzapi šni po, *eyapi ece* :

22 Hena owasin unpi kin on yasotapi ece ; wicašta akantu wicoope qa woonspe kin eciyatanhan.

23 Wicohan kin he wicotawacin ohodapi kin en taku woksa-pe iyecen yuhe ça, wicowahbadan, qa wicatančan itonkipapi šni kin hena en ; tuka wicacehpi iyokipiyapi kin he woyuonihan šni ece.

### WICOWOYAKE 3.

1 Heon etanhan, Messiya kici piya inicagapi hecinhan, taku wankantuya Wakantanka etap kin eciyatanhan, Messiya

kiyotanke cin hen, un kin hena akita po.

2 Taku wankan un kin hena awacin po, qa taku makata un kin hena *awacinpi* *śni* po.

3 Niṭapi, qa nitowiconi kin he Messiya kici, Wakantanka en nahmanpi.

4 Tohan Messiya wiconi unkitawapi kin taninyan hiyu kinhan, hehan wowitan en, kici niyuotaninpi kta.

5 Heon etanhan, nihuhapi makata un kin hena kikte po: wiinahmanpi, waaṣapapi, wawihnupi, tawacin śicapi, waicucupikte cin, he wakagapi ohodapi kin hee.

6 Hena on etanhan Wakantanka tocanniye kin woakta *śni* cincapi kin en awicau ece.

7 Ehanna hena ehna yanipi qehan, opeya mayanipi.

8 Tuka nakaha hena owasin ayuṣtan po; wocanniye, wośihda, wocantiyahdepi, waakagapi, qa iapi śice cin niipi kin etanhan.

9 Ihuhan oiyeitonpi *śni* kin; wicaśta tannike cin iye wicoḥan ko yahduśdokapi;

10 Qa wicaśta teca kin he wosdonye kin on yutecapi, waicaliya ouncage kin eciyatanhan, he kodakapi.

11 He en, Helenes, qa Juda wicaśta wanica; bakihdayapi qa bakihdayapi *śni* kin wanica; Ikcewicaśta qa Skuthes wicaśta kin wanica; wowidake un kin heca qa tawaiṣiyapi kin wanica, tuka Messiya hé ocowasin, qa owasin en un.

12 Heon etanhan, owotanna yaunpi qa waštenidakapi kin, Wakantanka wicakahnige cin iyecen, wocantekiye koyaka po, qa wowaonśida, wahaniṣidapi *śni*, wicowalibadan, qa wacin-tankapi kin hena ko.

13 Otoiyoḥi iyowinyeciciyapi, qa otoiyoḥi yecicajujupi kta, tuwe wicaśta tokeca on taku śihda kinhan, Messiya kin nicicajujupi kin he iyecen niś *econ* po.

14 Qa taku owasin akantanhan wocantekiye kieun po, he wicootanna iyakaśke cin ee.

15 Qa Wakantanka tawookiye kin nicantepi kin en waniconzapi nunwe, he en wicatancau wanjidan en nicopi kin pida un po.

16 Messiya oie kin wijinya en niunpi nunwe; woksape owasiun, Psalm, qa odowan, qa wakan dowanpi kin en, otoiyoḥi wahokonyeciciyapi, qa onspeyeciciyapi kta, qa nicantepi kin en wowaonśida yuha Itancan kin iyadowanpi kta.

17 Qa taku ecanonpi kinhan, wicoie qa wicoḥan kin unma tukte kaśta, Jesus Itancan kin caje on owasin *econ* po, qa on Wakantanka Ateyapi kin wopida eciya po.

18 Qa winoḥinca kin, nihihnapi kin wicihukuya un po, Itancan kin en hecetu kin he iyececa.

19 Wicaśta kin, nitawinpi kin waśte wicakida po, qa wicakigepi *śni* po.

20 Śiceca kin, nihunkakepi kin taku owasin anawicakigoptan po, he Itancan kin iyokipi.

21 Qa ateyapi kin, nicincapi kin śihdawicayapi *śni* po, okinni wacin ibośakapi kte.

22 Wowidake yaunpi kin, tona wicaceḥpi eciyatanhan niyuhapi kin anawicakigoptan po; wicaśta iyokipiwicayapi kin iyecen, iṣtapi kin itokam wawokiyapi kin hee *śni*, tuka nicantepi ocowasin on Wakantanka kokipa po.

23 Qa taku ecanonpi kin owasin nicantepi kin eciyatanhan *econ*



po, Itancan kin on etanhan, qa wicašta kin on etanhan šni.

24 Itancan kin etanhan woai-  
lpeye iyunwin kin iyacupi kta  
he sdonyayapi; Messiya Itancan  
kin wowidake niyanpi nakaeš.

25 Tuka tuwe šicaya econ kin-  
han, he eciyatadhan icu kta, qa  
wicašta itohnake iwanyakapi  
kin wanica.

#### WICOWOYAKE 4.

1 Unkan, itancan yaunpi kin,  
tona wowidake wicaduhapi kin  
hena, taku owotanna qa iyecetu  
kin wicaqu po; mahpiya ekta  
wanji Itancan yayapi yanke cin  
he sdonyayapi.

2 Ohinniyan cekiya un po, qa  
he en wopida eya wakta po.

3 Qa unkiye on wocekiye un-  
keyeciyapi kta, Wakantanka iapi  
tiyopa wan unkiyuhdokapi kta,  
Messiya tawowiyukkan kin un-  
koyakapi kta, on makaškapi kin  
hee :

4 Hecen on, taku token epe kte  
cin ecen mdaotanin kta.

5 Tona tankan unpi kin hena  
on ksamyahan mani po, qa an-  
petu kin opekiron po.

6 Ohinniyan iyaapi kin wowa-  
onšida en un, qa miniskuya on  
skuyeyapi kta, hecen wicašta  
otoiyohi token awicaduptapi kte  
cin sdonyayapi kta.

7 Tucikos hunkawanjin kici-  
yapi waštedakapi, qa waawan-  
hdake owotanna, mici Itancan  
taokiye kin hee token waun kin  
owasin oniciyakapi kta.

8 Heon etanhan niyepi kin ekta  
ye waši, token yaunpi kin he  
sdonye ça, nicantepi kin iyu-  
škin niyanpi kta ;

9 Qa he kici Onesimos ye waši,  
he hunkawanjin kiciyapi owo-

tanna, qa wašte enitanhanpi kin.  
Heniyozu taku owasin den un  
kin oniciyakapi kta.

10 Aristarkos kici makaškapi  
kin he nape niyuzapi, qa Markos  
Barnabas tonškaku nakun. He  
iwahoniyampi, niyepi ekta niipi  
kinhan ti mahen u ši po :

11 Qa Jesus, he nakun Justus  
eciyapi kin; hena e bakišda-  
yapi kin etanhanpi. Henana  
Wakantanka tokiconze kin en  
tawasi wicawaye ça, hena iyu-  
škin mayanpi.

12 Epaphras enitanhanpi kin,  
Messiya taokiye kin hee nape  
niyuzapi; he ohinniyan woce-  
kiye en, niyepi on nina cekiya,  
Wakantanka tawacin kin owasin  
en, owotanna, qa ecedan naya-  
jinpi kte cin heon.

13 Qa he omdaka, niyepi on,  
tona Laodikia ekta un, qa tona  
Hierapolis ekta un kin, hena ko-  
ya on nina htaničiya.

14 Lukas, pejihuta wicašta  
wašte kin, Demas kici, nape ni-  
yuzapi.

15 Hunkanwanjin kiciyapi Lao-  
dikia ekta unpi kin hena nape  
wicayuza po, qa Numphas, qa  
iye ti kin ohna okodakiciye kin  
he nakun.

16 Wowapi kin de niyepi ekta  
yawapi kinhan, okodakiciye La-  
odikia ekta un kin hena nakun  
yawa wicakiya po, qa niš niyepi  
kin wowapi Laodikia etanhan  
kin he nakun yawa po.

17 Qa Arcippos kaken eciya  
po, Nitohtani Itancan kin etan-  
han iyacu qon he awakicin wo,  
yahduštan kta ce.

18 Palos he miye, nape kiciyu-  
zapi kin de minape kin on waka-  
ga. Makaškapi kin kiksuya po.  
Wowaonšida niyepi en nicipi un  
nunwe. Amen.

PALOS

THESSALONIKE OYATE

WOWAPI WICAKICAGE CIN;

TOKAHEYA KIN.

WICOWOYAKE 1.

1 Palos, qa Siluanos, qa Timotheos, Thessalonike ekta okodakiciye kin, Wakantanka Ateyapi kin en, qa Jesus Messiya Itancan kin en un kin, *wowapi wicakicagapi*: Wowaosida, wookiye ko, Wakantanka Ateunyanpi etanhan, qa Jesus Messiya Itancan kin nakun, niyepi en nicipi un nunwe.

2 Niyepi owasin on Wakantanka ohinnian wopida unkekiciyapi, qa wocekiye unkeyapi kin en caje unniyatapi ece.

3 Qa wowacinye wicohan nitawapi kin, qa wacantkiyapi en litayanipi kin, qa Wakantanka Ateunyanpi kin itokam, Jesus Messiya Itancan unkiyapi kin en ape dukanpi kin hena ohinnian unkiksuyapi.

4 Mihunkawanji wašte, Wakantanka nicalinigapi kin he sdonunyanpi.

5 Wotanin wašte unkitawapi en niipi kin he wicoie ecedan en un šni, tuka wowašake nakun en, qa Woniya Wakan, qa tanyan sdonyapi kin en; niyepi ehna, qa niyepi on etanhan wicašta tounkecapi kin sdonyayapi.

6 Wicokakije ota ehna, qa Woniya Wakan wowiyuškin kin yuha wicoie kin iyacupi, hecen Itancan kin oyapapi, qa nakun unkiyepi.

7 Hecen Makedonia qa Akeya en, tona wacinyanpi kin owasin waonspekiye niyuhapi:

8 Qa niyepi kin etanhan Itancan oie kin oyakapi, Makedonia qa Akeya ekta, qa hecedan šni, tuka owancaya Wakantanka wacinyayapi kin he ieyanpahapi, qa hecen taku unkeyapi kta e iyehantu šni.

9 Hena e qe niye nicapi, qa niyepi ekta tukten canku kin ohna unkiyohpayapi kin he oyakapi, qa token wakagapi kin etanhan Wakantanka ekta nihduhonnipi, Wakantanka ni un qa wicake cin ohoyadapi kte cin heon:

10 Qa iye Cinhintku kin mahpiya eciyatanhan u ayapepi kta, he wiconšte etanhan najin kiya, Jesus wocanniye u kte cin etanhan eunhdakupi kin hee.

WICOWOYAKE 2.

1 Mihunkawanji, niyepi ekta token unkipi kin niye e sdonyayapi, ituya unkipi šni.

2 Tuka Philippi ekta kakišunyanpi, qa unkihahapike cin niye sdonyayapi; qa he iyohakam Wakantanka unkitawapi kin on wadiuntakapi, qa waakinicapi ota ehna wotanin wašte kin unkoniciyakapi.

3 Qa wowahokonkiye unkitawapi kin he wohunni, qa woša-

## I. THESSALONIKE.

pe eciyatanhan šni, qa wohnyaye en un šni ;

4 Tuka token wotanin wašte kin unhapi kta e Wakantanka iyokipi kin he iyecen unkiapi ece ; wicašta iyokipiwicayapi kin iyecece šni, tuka Wakantanka cante unkiyucanpi kin he.

5 Tohinni iskuya wicoie kin unkeyapi šni e niye sdonayapi, qa waicucupikte cin šina unkinpi šni e Wakantanka sdonya.

6 Qa wicašta kin etanhan wotitan unkakitapi šni, niyepi, qa wicašta tokeca nakun etanhan šni, Messiya yewicaši kin iyecen waecunwicunkiyapi kta iyececa tuka.

7 Tuka niyepi cokaya wahbandan unkanpi, azinkiya wan cinca icalwicakiye cin he iyecen.

8 Hecen nina cante en unniyuzapi, qa wašteunnidakapi kin heon Wakantanka tawootanin wašte kin hee, qa unnagipi kin hena ko unnicupi kta tawatunyanpi tuka.

9 Mihunkawanji, unkoňanyanpi qa hitaunnipi kin yeksuyapi, hanyetu anpetu ko hitaunnipi, wotanin wašte Wakantanka tawa unkoniciyakapi kin he icunhan, tuwedan tkeya waqinunniciyapi kte šni uncinpi kin heon etanhan.

10 Niye sdonayapi, qa Wakantanka nakun, tona wicayadapi kin en, wakanyan, owotanna, qa iyaonpepica šni unyakonpi.

11 Qa wicašta cinca wahokonkiye cin he iyecen, niyepi ototiyohi wahokonunniciyapi, qa token unnicihnapi qa econ unnišipi kin he sdonayapi ;

12 Wakantanka iye tokiconze, qa towitan kin en nicopi kin, he iyokipiya mayanipi kte cin heon.

13 Qa heon ohinniyan Wakantanka wopida unkekiciyapi ;

Wakantanka oie kin unkiyepi etanhan nayahonpi, qa iyacupi qehan, wicašta oie kin iyecen iyacupi šni, tuka awicakehan Wakantanka oie kin hee, niye tona wicayadapi kin en ohanyan ece kin iyececa.

14 Mihunkawanji, niš niyepi kin Wakantanka taokodakiciye, Juda makoce kin ekta, Jesus Messiya en un kin hena owicayecipapi ; niš niye takuwicayayapi kin eciyatanhan kakišniyanpi kin, iš iye Juda oyate kin eciyatanhan kakišwicayapi qon iyececa :

15 Hena e qe Jesus Itancan kin ktepi, qa wicašta wokcan wicayuhapi qon hena nakun, qa unkiye šicaya unkuwapi, Wakantanka iyokipiyapi šni, qa wicašta owasin kašewicayapi :

16 Qa Ikcewicašta nipi kte cin iwahokonwicunkiyapi kta he telindapi, qa hecen ohinniyan wahtanipi kin hduštanpi kta. Wocantiyahde owihonke aiya-hdeya wanna en awicau.

17 Tuka mihunkawanji, unkiš niyepi kin etanhan ptecedan eunyakupi, itohnake kin on, cante kin he wake šni, heon nitohnake wanunniyakapi kta nina cantokpaniyan unkakitapi.

18 Heon etanhan ekta unnikupi kta uncinpi, Palos miye hinca, wancadan qa nonpa, tuka Satan iyounkipi šni.

19 Woape, qa wowiyuškin, qa wowinkta watešdake unkitawapi kin he taku he ; he niš niyepi šni he ; Jesus Messiya Itancan unkiyapi hi kinhan he itokam.

20 Wowitan qa wowiyuškin unkitawapi kin he niyepi.

### WICOWOYAKE 3.

1 Heon etanhan sanpa ťinsiciya unkokhipi šni qehan, A-



thenas ekta unkišnana unyakonpi kta e iyounkipipi :

2 Qa Timotheos hunkawanjin unyanpi, Wakantanka taokiye, qa Messiya tawootanin wašte kin en unkitawašipi kin hee, ye unšipi, sutaya icañnyanpi, qa wacinyayapi kin eciyatanhan wahokonniciyapi kte cin heon.

3 Qa hecen wicokakije kin dena on tuwedan pahohopi kte šni, hena ehna eunhdepi kin niye sdonyayapi.

4 Unkan niyepi kin opeya unyakonpi qehan, wokakije unhapipi kta unkoniciyakapi, qa he ecetu kin sdonyayapi.

5 Heon etanhan řinsmičiye kta owakitpani, hehan token wacinyayapi kin sdonwaye kta e on he ekta ye waši, okinni taku wawiyutanyan un kin iniyutanpi naceca, qa hecen htaunnipi kin taku šni ye kta.

6 Tuka nakaha Timotheos niyepi kin etanhan en unhdipi, qa wacinyayapi wacanyakiyapi ko on wotanin wašte unkahipi, qa nakun ohinniyan wašte unyadakapi kin heon wanunyadakapi kte hinca, unkiš *wanunniyakapi* kte cin iyececa ;

7 Heon etanhan, mihunkawanji, wokakije wicocante šica ko unhapipi kin owasin ehna niyepi on unkiecanptapi, wacinyayapi kin heon.

8 Nakaha unnipi, niš niyepi kin Itancan en sutaya yaunpi kinhan.

9 Unkan niyepi kin on, Wakantanka unkitawapi kin itokam, wowiyuškin owasin on unkiyuškinpi kin he on, ake niyepi on, taku wopida Wakantanka eciya unkokhipi kta he ;

10 Hanyetu anpetu ko nina ceunkiyapi, nitohnake kin wanunniyakapi kta, qa wacinyayapi

kin en taku nahalin ocowasin šni un kin he tanyan unniciyustanpi kta.

11 Wakantanka is iye, Ateunyanpi kin, qa Jesus Messiya Itancan unkiyapi kin, niyepi ekta canku kin *ohna* tanyan ye unyanpi nunwe.

12 Qa otoiyohi wašteyecidakapi, qa owasin waštwicayadakapi kin he en, Itancan kin icañnyanpi, qa niciyuotapi nunwe, unkiš wašteunniciidakapi kin he iyececa.

13 Qa heon wowakan en nicantepi kin iyaonpepiča šni niciyusutapi kta, Wakantanka Ateunyanpi kin itokam, tohan Jesus Messiya Itancan unkiyapi kin tona wicayuwakan kin owasin om hi kinhan.

## WICOWOYAKE 4.

1 Unkan mihunkawanji, Jesus Itancan kin on etanhan cinunniciyapi qa ceunniciyapi, token mayanipi, qa Wakantanka iyokipiyayapi kte cin, unkiyepi etanhan iyacupi qon he iyecen sanpa iyoniptapi kte.

2 Jesus Itancan kin etanhan woahope kin tona unničupi kin sdonyayapi.

3 Wakantanka niyuecepidan kin he tawacin kin he dee, winalmanpi kin en nihdoyapi kte šni ;

4 Tuka otoiyohi nitancanpi kin yuecepidan, qa yuonihanpi kin en, yahduhapi kte cin sdonyakiyapi kta.

5 Qa wicotawacin šica cantiheyapi kin he en unpi kte šni ; Ikcewicašta Wakantanka sdonyapi šni kin hena iyececapi.

6 Taku en tuwedan hunkawanjitku kin kape ča hnaye kte šni ; tona heconpi kin owasin

## I. THESSALONIKE.

Itancan kin tokicon ece, unkoniciyakapi qa unniciyaotaninpi qon iyececa.

7 Waaſapapi kin ekta Wakantanka unkcipi ſni, tuka unyu-ecepidan kte cin heon.

8 Hecen tuwe waaktaſni kinhan, he wicaſta paha iyewicaye ſni, tuka Wakantanka iye Taniya Wakan unqupi kin hee aktaſni.

9 Hunkawanjinkiciyapi waſtekidakapi kin on wowapi cicagapi kta iyecece ſni. Otoyohi waſte yeçidakapi kta he niſ niye Wakantanka etanhan onniſepi.

10 Qa Makedonia owancaya hunkawanjinkiciyapi kin owasin hecawicayeconpi ece. Tuka mihunkawanji, ceunniciyapi ce, nakun sanpa nina ecanonpi kte.

11 Ito owanji dukanpi kta, qa taku tin nichihe cin he yahduſtanpi, qa niye ninapepi kin on htayanipi kta e aiçiciya po, econ unniſipi qon iyecen ;

12 Hecen tona tankan unpi kin hena itokam owotanna mayanipi kta, qa takudan icakije ſni yaunpi kta.

13 Tuka mihunkawanji, tona iſtinmapi kin hena on sonye ſni dukanpi kta, qa iyoniciſicapi kta, wicaſta tokeca wowacinye nicapi kin iyececa, e he wacin ſni.

14 Jesus te ça ake piya ikicage cin he wicaundapi kinhan, he iyecen tona Jesus en iſtinmapi kin hena iye kici Wakantanka uwicakiye kta.

15 Unkan Itancan oie kin eciyatanhan he de unkoniciyakapi, unkiye tona unnipi, qa Itancan hi kte cin iyounhipi kinhan, tona iſtinmapi kin hena wicitam anyanpi kte ſni.

16 Iyaſapi wan qa mahpiya

ohnihde itancan wan ho kin, qa Wakantanka maza yahotonpi tanka tawa ko Itancan kin hduha, mahpiya kin eciyatanhan kun u kta ; unkan tona Meſſiya en çapi qon hena tokaheya najinpi kta.

17 Hehan unkiye tona unnipi, qa he iyounhipi kinhan, hena om mahpiya ſapa ekta eunbakupi kta, okotonyan kin ehna Itancan kin itkounkipapi kta ; qa hecen ohinniyen Itancan kin kici unyakonpi kta.

18 Wicoie kin hena on otoyohi wahokonkiciciya po.

### WICOWOYAKE 5.

1 Mihunkawanji, omaka qa makoncage kin on wowapi cicagapi kta yacinpi ſni ;

2 Hanyetu en wamanon sa kin he iyecen Itancan taanpetu kin u, niſ niyepi kin tanyan sonyayapi.

3 Tohan, Wokiyapi qa tanyan yukanpi ce, eyapi kinhan, hehan ihnuhanna wicotakuni ſni en awicau kta, winolinca cinca ton kte cin yazan hinhde cin he iyececa, qa najicapi kte ſni.

4 Tuka mihunkawanji, niſ niyepi kin otpaza ehna yaunpi ſni, qa hecen anpetu kin he wamanon sa iyecen en nihipi kte ſni.

5 Niyepi owasin, iyoyanpa cinca kin henicapi qa anpetu cinca-pi kin. Unkiyepi hanyetu otpaza kici unketanhanpi ſni.

6 Heon etanhan wicaſta tokeca iyecen unkiſtinmapi kte ſni ; tuka kiktahan witko ſni unyakonpi kta.

7 Tona iſtinmapi kinhan, hena hanyetu icunhan iſtinmapi ; qa tona witkopi kinhan, hena hanyetu en witko unpi ece.

8 Tuka unkiye anpetu kin unketanhanpi, qa heon witko śni unyakonpi kta, wowacinye wacantkiyapi ko maku akahpe kin unkićunpi kta, qa wiconi aepi kin he maza wapaha unyanpi kta.

9 Wakantanka wocanteptanye en eunhdepi śni, tuka Jesus Messiya Itancan unkiyapi kin eciyatanhan wiconi unkićupi kte cin.

10 He iye, unkiyepi on ƚa, hecen kiktahan unyakonpi, qa iś unkiśtinmapi, unma tukte kaśta, kici unnipi kta.

11 Heon etanhan otoiyohi wahokonkiciciyapi, qa onspekiciciya po, ecanonpi kin hececa.

12 Hunkawanjin unniyanpi kin, ceunniciyapi ce; tona niyepi en Ĥtanipi, qa Itancan kin on awan-niyakapi, qa wahokonkiciciyapi kin hena sdonwicaya po.

13 Qa wicoĤan yuhapi kin on etanhan, wacantkiyapi on sutaya cante en wicayuzo po. Okićiciya yakon po.

14 Hunkawanjin unniyanpi kin, ceunniciyapi ce; tona yuśkiśkeya unpi kin hena iyopewicaya po, tona wacin cistinna kin hena wicakihna po, tona waśake śni un kin hena owicakiya po, qa wicaśta owasin on wacin tanka po.

15 Ihnuhan tuwe taku śica on itkom taku śica econ kinhan,

tuka ohinniyan niś niyepi kin otoiyohi on, qa wicaśta owasin on taku waśte ecedan akita po.

16 Ohinniyan wiyuśkin po.

17 Ayaśtan śni cekiya po.

18 Taku owasin on wopida eya po. He niyepi on Jesus Messiya en Wakantanka tawacin kin hee.

19 Woniya kin kasnipi śni po.

20 Wiyukcanpi kin iĤahapi śni po.

21 Taku owasin iyukcanpi, qa taku waśte kin he Ĥinsa yuha po.

22 Taku śica ocaje owasin nakicipa po.

23 Qa wookiye Wakantanka kin niyepi ocowasin niyuecepidan nunwe; hecen ninagipi kin ocowasin, qa nitawacinpi, qa nitancanpi kin iyaonpepica śni niyuhapi kta, Jesus Messiya Itancan unkiyapi kin hi kte cin hehanyan.

24 Tuwe nicopi kin he wacin-yepica, qa ecen econ kta.

25 Mihunkawanji, unkiyepi kin on cekiya po.

26 Iiputakapi wakan kin on hunkawanjin kiciyapi kin owasin i iwicaputaka po.

27 Itancan kin on hecon ciśipi, hunkawanjin kiciyapi wakan kin owasin ekta wowapi kin de yawapi kta.

28 Jesus Messiya Itancan unkiyapi kin towaonśida kin nićipi un nunwe. Amen.



PALOS

THESSALONIKE OYATE

WOWAPI WICAKICAGE CIN,

INONPA KIN.

WICOWOYAKE 1.

1 Palos, qa Siluanos, qa Timotheos, Thessalonike ekta okodakiciye Wakantanka Ateunyanpi, qa Jesus Messiya Itancan kin en un kin hena, *wowapi wicakicagapi*;

2 Wowaońsida, wookiye ko Wakantanka Ateunyanpi kin, qa Jesus Messiya Itancan kin etanhan nicipi un nunwe.

3 Mihunkawanji, wacinyayapi kin he nina icage a, wacanyakiyapi kin otoiyohei en nina niciyuotapi kin, heon ohinniyan niyepi on, Wakantanka wopida unkekiciyapi kte cin he hecetu.

4 Hecen niyepi on, unkiye Wakantanka okodakiciye tawa kin en unkiwinktapi ece; sicaya nicuwapi kin owasin, qa wokakije duhapi kin en, wacinyan wakisagya yaunpi kin heon.

5 Wakantanka tawoyaco owotanna wowapetokeca kin he dee, nicakijapi kin heon Wakantanka tokiconze kin iyehantu niyawapi kta.

6 Tona kakisńnianpi kin hena itkom Wakantanka wokakije wicaqu kte cin he owotanna.

7 Qa tona kakisya yaunpi kin, nisń niyepi kin oziiiya unkici yaunpi kta; tohan Jesus Itancan kin towaake ohnihde wicaye cin om mahpiya kin eciyatanhan ihdutaniyan u kinhan,

8 Peta ide kin en, tona Wakantanka sdonyapi ńni, qa Jesus Messiya Itancan unkiyapi tawotanin wašte anagoptanpi ńni kin hena wońtkihda wicaqu kta;

9 Hena e Itancan itohnake kin etanhan, wicotakuni ńni owihanke wanica on kakiswicayapi kta.

10 Tohan oyate owotanna tawa kin en ihduwitan kta, qa tona iye wacinyanpi kin hena owasin on yatanpi kta e on hi kinhan; anpetu kin he en taku unniciyataninpi qon he wicayadapi kin heon.

11 Qa heon etanhan ohinniyan niyepi on ceunkiyapi, Wakantanka wicakico kin de iyehantu niyawapi kta, qa niyepi en iye towašte oiyokipi kin ocowasin, qa wowaake on wacinyanpi wicoħan kin he nakun hduńtan kta.

12 Hecen Jesus Messiya Itancan unkiyapi caje kin niyepi on yuonihanpi kta, qa iye on, nisń eya niyuonihanpi kta, Wakantanka unkitawapi, qa Jesus Messiya Itancan towaońsida kin eciyatanhan.

WICOWOYAKE 2.

1 Mihunkawanji, Jesus Messiya Itancan unkiyapi u kte cin he, qa en mniunkiciyapi kte cin hena on ceunniciyapi ce;

### WICOWOYAKE 3.

2 Ihnuhan wicanagi qa wicoie qa wowapi unnicagapi kin on ihnuhana nitawacinpi ekta nihuhuzapi qa ininhanpi kin, Messiya taanpetu kin kiyadan u kin hececa.

3 Ihnuhan tuwe taku on nihnanpanpi kin; woayustan wan tokaheya u kta, qa woalitani wicašta kin wicotakuni šni cinhintku kin hee e yutaninpi kta.

4 He iye taku Wakan eyapi kin, taku ohodapi ko owasin iwankam yeiciye ça kici kiciza, hecen iye tipi wakan Wakantanka tawa kin en, Wakantanka iyecen iyotanke ça Wakantanka keiciya oihdaka.

5 Cicipi waun qehan hena oci-ciayakapi qon he yeksuyapi šni he.

6 Unkan nakaha taku iyowicaki šni ece kin he sdonayapi; hecen tohantu kinhan taninyan hiyu kta.

7 Wooke aktašni wowiyukan kin he wanna oňanyan ece, tuka tuwe he iyoki šni kin he, tohanyan token iyeyapi šni kin, hehanyan iyowicaki kte šni.

8 Unkan hehan wooke aktašni kin he tanin kta, Jesus Itancan kin Taniya, iye i kin etanhan hiyu kin on, qa ihdutanin wiya-tpa kin on, he ihangye kta.

9 Tuwe Satan oňan kin eciyatanhan wicookihi owasin, qa wowapetokeca, qa wowinihan wicohan itonšni kin yuha u,

10 Qa tona awihnnuni kin hena en woalitani wohneye owasin koya; hena wowicake wašte dakapi kin on nipi kte cin he aktapi šni, heon etanhan.

11 Qa heon etanhan hena en Wakantanka wohneye wawokihi kin awicau kta, hecen woi-tonšni kin wicadapi kta.

12 Qa hecen tona wowicake

wicadapi šni, qa woalitani en iyuškinpi kin hena owasin wicayacopi kta.

13 Tuka mihunkawanji, Itancan waštenidakapi kin, niyepi on unkiye ohinniyan Wakantanka wopida unkekiciyapi kta, otokaheya tanhan Woniya wicayuecedan, qa wowicake wicadapi kin on, Wakantanka yanipi kta e on nicaňnigapi kin heon etanhan.

14 Qa he en nicopi, wotanin wašte unkitawapi kin on, hecen Jesus Messiya Itancan unkiyapi towitan kin iyacupi kta.

15 Heon etanhan, hunkawanjinciyapi kin, sutaya najin po, qa wooke oyakapi wicoie, qa wowapi unkitawapi kin eciyatanhan onspeniciyapi kin hena űnsaya yuha po.

16 Qa Jesus Messiya Itancan unkiyapi kin hee, qa Wakantanka Ateunyanpi kin iye wašte undakapi, qa wicimdeza owihanke wanice cin wowaonšida eciyatanhan woape wašte ko unqupi kin,

17 He nicantepi kin mdesnyanpi, qa wicoie, wicohan ko wašte kin owasin en niyusutapi nunwe.

### WICOWOYAKE 3.

1 Unkan ehake mihunkawanji, unkiyepi on cekiya po, Itancan oie kin inyanke ça, wowitan kta, niyepi kin ehna iyececa.

2 Qa wicašta šice ça wicaštapi šni kin etanhan eunhdakupi kta; owasin wowacinye yuhapi šni kin heon.

3 Tuka Itancan kin he wacinyepica, he niyusutapi, qa taku šica etanhan enihdakupi kta.

4 Itancan kin en niyepi on kaken awauncinpi, token econ un-

## I. TIMOTHEOS.

nišipi qon ecen ecanonpi, qa ees nakun ecanonpi kta.

5 Qa Itancan kin nicantepi kin Wakantanka waštedakapi, qa Messiya wacintanka kin he en ope niyanpi nunwe.

6 Unkan mihunkawanji, Jesus Messiya Itancan unkiyapi caje kin on ceunniciyapi ce, hunkawanjin kiciyapi wan ecinšniyan mani, qa wicoope unničupi qon eciyatanhan šni kinhan, he nakicipa po.

7 Token unkojecipapi kte cin niye sdonyayapi; niyepi en oškiškeya maunnipi šni.

8 Qa tuwedan aguyapi tawa iyunwin codan untapi šni, tuka wicołtani, wicokakije ko ehna, hanyetu, anpetu ko łtaunnipi, tuwedan takudan unkiniczopi kte šni heon.

9 Unkokihipi šni kin heon etanhan šni; tuka unkiye waonspekija yuheunniciyapi, qa unko-yapapi kte cin heon.

10 Nicipi unyakonpi qehan, he de unkoniciyakapi, Tuwe łtanipi tawaŕenye šni kinhan, he takudan yute kte šni ce.

11 Enitanhanpi wanjikji ecinšniyan manipi, qa ecaca łtanipi

šni, tuka waaie sa hecapi kin he naunhonpi.

12 Tona hececapi kin hena Jesus Messiya Itancan unkiyapi kin etanhan wahokonwicun-kiyapi, qa econ wicunšipi, aini-na łtanipi, qa aguyapi tawapi kin ecedan hdutapi kta.

13 Unkan mihunkawanji, niš niyepi kin taku wašte econpi kin econ kapinpi šni po.

14 Qa tuwe awapapi kin de en, unkoiepi kin anaungoptanpi šni kinhan, he iwanyakapi, qa kici okiciciyapi šni po, hecen ištece kta.

15 Tokayapi šni po, tuka hunkawanjinkiciyapi kin iyecen wahokonkiya po.

16 Qa ohinniyan, taku owasin on etanhan wookiye Itancan kin wookiye ničupi nunwe. Itancan kin niyepi owasin en nicipi un nunwe.

17 Palos he miye, napekiciyuzapi kin de minape on owawa, he wowapi otoiyo hi en wowape-tokeca kin hee, hecen wakaga ece.

18 Jesus Messiya Itancan unkiyapi kin towaonšida kin niyepi owasin en nicipi un nunwe.

## PALOS

# TIMOTHEOS WOWAPI KICAGA;

## TOKAHEYA KIN.

### WICOWOYAKE 1.

1 Palos Jesus Messiya yeši qon, Wakantanka Wanikiya unkita-wapi, qa Jesus Messiya Itancan wacinunyanpi kin he toope kin eciyatanhan,

2 Timotheos, wacinyanpi kin eciyatanhan micinkši kin hee, wowašte, wowaonšida, wookiye ko, Wakantanka Ateunyanpi, qa Jesus Messiya Itancan unkiyapi kin hena etanhan kiciun nunwe.



## WICOWOYAKE 2.

3 Makedonia ekta mde çehan, Ephesos en owanji yanke cişi, wanjikji woonspe tokeca oyakapi kte şni e iwahokonwicayakiye kte cin heon;

4 Qa hitunkakanpi, wicoicage owihanke şni oyakapi ko awacimpi kte şni; hena taku kin wiwangapi ecedan okihi, qa on Wakantanka wacinyanpi kin en icahyapi şni.

5 Wicacante ecedan, wicanagi waşte, qa wacinyanpi wicakapi kin etanhan wacantkiyapi kin he woahope ecetuyapi kin hee.

6 Tona he icunonpa yapi kin hena takuşnişni akinicapi kin en yeiciyapi.

7 Woope kin tokan onspewicakiyapi kta cinpi; tuka taku eyapi, qa taku waditagya oyakapi kin he iyukanpi şni.

8 Woope kin he waşte sdonunyanpi, tuwe woope kin iyeccen yuhe cinhan.

9 Qa he de sdonunyanpi, woope kin he wicašta owotanna kicagapi şni, tuka tona woope opapi şni, qa anagoptanpi şni kin hena wicakicagapi, tona Taku Wakan ohodapi şni, qa wahtanipi sa, waonşidapi şni qa wayaşicapi, atkuku hunku kici wicakitepi kin, qa wicašta wicakaşapi kin hena,

10 Wawicihalıhapi econpi, waiuhupi sa, wicašta wiyopewicaye cin hena, itonpişni qa woope kicaksapi kin hena on woope kagapi ece; qa taku tokeca woonspe zani kin kaşeye cinhan he nakun:

11 Wakantanka wacantkiya wotanin waşte wowitan yuhe maşi kin he eciyatanhan.

12 Unkan Jesus Messiya Itancan unkiyapi he okihimaye ça, wacinyepica madake ça, wico-

hitani kin de en opemaye cigon he wopida ewakiya ece.

13 He itokam waoştewahda, qa şicaya wicawakuwa, qa wahtanmiçida; tuka wicawada şni icunhan hena iyukan şni ecamon kin heon onşimadapi.

14 Qa Itancan unkiyapi towaonşida kin he wacinyanpi qa wacantkiyapi Jesus Messiya en nina yuotapi.

15 Wicoie kin de wacinyepica, qa owancaya icupi kta iyececa, Jesus Messiya wahtanipi sa niwicaye kta e on makata hi; hena en miye imayotan.

16 Tuka heon etanhan onşimadapi, hecen miye en tokaheya Jesus Messiya wawacinkta yuzatanka owasin hdutanin kta, wicani kta e on wicadapi kte cin hena waonspewicawakiye kta e heon.

17 Hecen Wicaştayatapi owihanke wanica, şepica şni, qa wanyakepica şni un kin, Taku Wakan ecedan ksape cin hee, woyuonihan, wowitan ko, owihanke wanin kicihan nunwe.

18 Timotheos micinkşi, woope kin de ciçu, niye on wokcanpi tokaheya ekta un qon hena eciyatanhan, hecen hena on ozuye waşte en akicita oyape kta;

19 Wowacinye qa wicanagi waşte sutaya yahduhe kte cin heon. Wanjikşi hena elipeyapi qa on wacinyanpi ekta kamden iyeiciyapi.

20 Yumeneos qa Aleksander kici, hena hececapi, hena Satan waqu, waoşt ehdapi kte şni onspeiciyapi kte cin heon.

## WICOWOYAKE 2.

1 Heon, taku owasin itokam, wicašta kin owasin on, wokidapi, wocekiye, waiciyapi wicoie, wopida ko eyapi kta wacin.

## I. TIMOTHEOS.

2 Wicaštayatapi kin hena on, qa tona itanean unpi kin owasin on, hecen woohodapi owasin qa wicoħan owotanna kin en, owanjidan unkanpi qa wikope ūni un-nipi kta.

3 He wašte, qa Wakantanka Wanikiya unkitawapi kin ito-kam woiyokipi kin hee.

4 He iye wicašta owasin nipi, qa wowicake sdonypapi kin en hipi kte cin he cin.

5 Taku Wakan wanjidan, qa Taku Wakan qa wicašta kici wiciyotahedan un kin wanjidan, Jesus Messiya wicašta kin hee.

6 He iye atayedan owasin ope-wicakiton kta e iĉiĉu, anpetu tawa kin waayatanin kte cin heon.

7 He en eyanpaha qa yešipi kin heca makagapi; Messiya en wowicake epa, itonšni mawani-ca; wowacinye wowicake ko Ikcewicašta onspe wicawakiye kte cin heon.

8 Heon, wicašta kin owancaya, wocanniye, waakinicapi ko wanin nape ašape ūni kiyugan cekiyapi kta wacin.

9 Qa winoħinca kin iŝ eya iye-cen wokoyake oiyokipi kin ki-ĉunpi kta, qa tawacin wašte, wacin tankapi koya; qa paha sonpi, mazaskazi, inyan okitanin kin, qa wokoyake taku ota iyope-yapi kin hena ko *unpi* kte ūni;

10 Tuka wicoħan wašte kin hena, taku winoħinca tona Wakantanka awacinpi kin iyokipi-pi kin hee.

11 Qa winoħinca kin inina un, qa taku owasin en wanahon yanke ĉa on onspeiĉiĉiye kta.

12 Tuka winoħinca kin iŝ wa-onspekiye ĉa wicašta kin iwan-kam un kta e iyowinwakiye ūni, he inina yanke kta.

13 Adam he tokaheya kagapi, qa hehan Ewe.

14 Qa Adam hnayanpi ūni, tu-ka winoħinca kin iye hnayanpi, qa hecen woahitani hiyahdeya.

15 Tuka iŝ eya cinca tonpi kin en niyanpi kta, wacinyanpi, wacantkiyapi, wicoħan wašte qa wacintankapi kin hduha yukan-pi kinhan.

### WICOWOYAKE 3.

1 Iapi kin he wowicake; tuwe waawanhdake unpi cin kinhan he wicoħan wašte wan cin.

2 Tuka waawanhdake cin he iyaonpepica ūni un kta, winoħinca wanjidan yuze kta, waktaya un kta, wacinksapa, waħbayedan, oħanpi, wowicakiyaka;

3 Miniša en iyeiĉiye ūni, wawicape ūni, mazaska nina akite ūni; tuka wacintanka, wacinko ūni, waicucu wacin ūni;

4 Iye tiyohnaka kin tanyan hduhe kta, qa wicowahibadan owasin on cinca kin anagoptan-wicakiye kta.

5 Tuwe tiyohnaka tawa kin tanyan hduha okihi ūni kinhan, ecin token Wakantanka taokodakiciye kin tanyan yuhe kta he.

6 Aŝkatudan en opapi kin he-cece kte ūni, he heca kinhan, okinni wahaniĉida kin on Wakansica tawoyaco kin ekta iya-ye kta.

7 Qa tona itankan yakonpi kin hena tanyan oyakapi un kta, he hecetu ūni kinhan, wowiħahaya un kta, qa Wakansica wihmun-ke tawa kin en iyohpaye kta.

8 Iŝ eya ookiye unpi kin hena nakun wacinksapapi kta, ceji jatapi ūni, miniša en iyeiĉiyapi ūni, qa mazaska nina akitapi kte ūni:

9 Wicanagi ecedan ohna wowacinye wowiyukkan kin yuhapi kta.

## WICOWOYAKE 4.

10 Hena e tokaleya wicayukanpi kta, qa hehan takudan iyaonpepica šni kinhan, ookiye unpi kin en iyeyapi kta.

11 Nakun is tawicupi kin wabapidan kta, waaie šni unpi kta, waktaya unpi kta, taku owasin on owotanpidan.

12 Ookiye unpi kin is tawicu wanjidan kta, cinca wicayapi qa tiyolinaka tawapi kin tanyan hduhapi kta.

13 Tona ookiye unpi wicohan kin tanyan yuhapi kin hena wowitzan wašte hdamnanpi, qa Jesus Messiya wacinyanpi kin en waditaka icicagapi.

14 Dena hecen wowapi cicaga, kohanna niye en ciu kta wacin.

15 Tuka tehan wai šni kinhan, deciya tanhan on token Wakantanka ti kin ohua opiničiye kta sdonyaye kta, he okodakiciye Wakantanka ni un tawa kin ee, wowicake ihupa qa taku ahe cin hee.

16 Unkan he taku aiepica šni, Wakantanka awacinpi kin he wowiyukan tanka; Wakantanka wicacelipi en ihdutanin qon, Woniya kin on yaowotanna kagapi, mahipiya ohnihde kin wan-yakapi, Ikcewicasta kin ekta oyakapi, wicoicage kin en wicadapi, qa wowitan kin ekta wankan ehdakupi.

## WICOWOYAKE 4.

1 Woniya kin atayedan heya, Anpetu ihankeya kin en, wanjiksi wacinyanpi kin ayuŝtanpi kta, qa woniya šapa wahnaye sa, qa taku wakan šica tawoonspe ko anagoptanpi kta.

2 Wichahnayanpi on itonšni iapi kta, nagipi kin maza kata on guguyapi kin heon.

3 Winohinca wicayuzapi kin

he tehindapi, qa woyute, tona wowicake wicadapi, qa sdonyapi kin hena wopida eya icupi kta e Wakantanka kaga, hee. yute šni wicašipi kta.

4 Taku Wakantanka kage cin he owasin wašte, qa wopida yuha icupi kinhan, takudan ohinyanpi kte šni.

5 He Wakantanka oie, wocekiye ko on yuwakanpi.

6 Hena taku kin hunkawanjinkiciyapi kin kiksuyewicayaye cinhan, Jesus Messiya taokiye wašte yaun kta, wacinyanpi, wicoie, qa woonspe wašte ekta iyohiyaye cin hena en tanyan icalniyanpi kta.

7 Tuka iapi šice cin, wakanka hitunkakanpi yuhapi ko nakicipe ca, Wakantanka awacinpi kin he amnihečiya wo.

8 Wicatancan yeičiyapi kin he taku cistinna okihi; tuka Wakantanka awacinpi kin he taku owasin okihi, wiconi kin de, qa wanji u kte cin iwahoyapi kin en un.

9 Wicoie kin he wowicake, qa owancaya anagoptanpi kta iyececa;

10 Wakantanka ni un wicasta owasin Wanikiya tawapi, qa iyotan tona wicadapi kin hena, he wacinunyanpi kin heon hitunnipi, qa oštehdapi unyakonpi.

11 Hena taku kin iwahokonwicakiye ca onspewicakiya wo.

12 Koniška yaun kin heon tuwedan iwalitenida kte šni; tuka tona wicadapi kin hena waonspewicakiya wo, wicoie kin en, wicohan kin en, wacantkiyapi kin en, woksape kin en, wacinyanpi kin en, woyuecedan kin en.

13 Wowapi yawapi, qa wahokonwicakiyapi, waonspewicakiyapi ko, hena econ wo, en waj šni kin hehayan.



## I. TIMOTHEOS.

14 Taku wawokihi en niun kin, wocanpi, qa waawanhdake unpi, nape aniputakapi kin on niçupi qon he akiktonje šni wo.

15 Hena taku kin awacin, qa ocowasin en yeçiya wo, hecen onspeniçiyeye cin owasin sdon-yapi kta.

16 Atayedan awaiçicin, qa wonspe nitawa kin awakicin wo, he hduha wo. Hecanon kinhan niniçiyeye çä, tona nanihonpi kin hena nakun niwicayaye kta.

### WICOWOYAKE 5.

1 Hunkayapi wan iyopeye šni wo, tuka ateyapi un kin iyecen wahokonkiya wo, qa tona hakaktapi kin hena nihunkawanji iyeceçapi kta ;

2 Winohinca tankapi kin hena is inawicayaye cin iyecen, qa tona aškatudan unpi kin hena tawinohinwicayaye cin iyeceçapi kta, woyuecedan owasin en.

3 Wiwazicapi kin, tona awicakehan wiwazicapi un kin hena wicayuonihan wo.

4 Tuka wiwazica wan cinca wicaye cin, qa takojakpaku yuke cinhan, hena tokaheya wicowazi tawapi kin en wowašte econ onspeiçiyapi kta, qa hunkake wicayapi kin iyunwin wicakicupi kta ; taku wašte qa Wakantanka itokam oiyokipi kin hee.

5 Tuwe awicakehan wiwazica un kin he isnana ehpeyapi un, Wakantanka wacinye çä ohinnyan, hanyetu anpetu ko, wocakiye eyapi, qa hoyekiyapi kin en un.

6 Tuka tuwe iyokipi içiya un kinhan, he ni un icunhan wanna çä.

7 Hena hecen iwahokonwica-

kiya wo, hecen iyaonpepica šni unpi kta.

8 Qa tuwe tona wicayuhe cin, qa iyotan tiyohnaka tawa kin, taku wicakicamna šni kinhan, he wacinyanpi kin wanna ayušan, qa waawacin šni kin sam iyeya wicašta šica.

9 Wiwazica waniyetu wikcemna šakpe ihukuya un kin he kahniçigapi kte šni. He wicašta wanjidän hihnaye ciqon,

10 Wicohan wašte on tanyan oyakapi, cinca icahwicakiya, oicimani kin wonwicaya, tona owotanna un siha wicakiyujaja, tona kakijapi kin owicakiya, qa wicohan wašte owasin amniheçiya en opa hecinhan.

11 Tuka wiwazica tona aškatudan wotapi kin hena wicakahnige šni wo ; tohan Messiya en škehanhan aye cinhan ake hihna tonpi kta ;

12 Qa tokaheya wacinyanpi qon he ayušanpi kin heon woyaco aihduhapi kta.

13 Qa nakun kujapi, qa ti iyaza yakonpi ; qa kujapi hecedan šni, nakun taku oyakapi sa, qa waaiçipi sa, taku eyapi kte šni kin hena eyapi ece.

14 Heon, tona nahahin wikoškapi kin hena hihna tonpi kta, cinca tonpi kta, qa tiyohnaka hduhapi kta wacin, hecen toka kin taku iyawicaonpe kta okihi šni kagapi kta.

15 Wanna wanjikji icunonpa Satan ihakam iyayapi.

16 Wicašta wanji, qa is winohinca wanji wacinyan un kin, he wiwazica hduhe cinhan okiye kta ; hecen okodakiciye kin tkeya qinpi kte šni, qa tona awicakehan wiwazica unpi kin hena ece owicakiyapi kta.

17 Waawanhdake un kin, tona tanyan awanhdakapi kinhan, he-

## WICOWOYAKE 6.

na wowitan icitakhna wicakiciyawapi kta, tona wicoie, waonspekiyapi ko, en litanipi kin hena iyotan.

18 Wowapi wakan kin hecen eya, Tatanka aguyapi napan kin he iohmus sutaya iyacu kte šni. Qa ake, Tuwe litani kin he taku on opetonpi qon iyohi ece.

19 Waayatanin nonpa, qa yamni duhe šni kinhan, hunka yapi un kin wanji en wiyaonpapi aupi kin anagoptan šni wo.

20 Tona wahtanipi kinhan hena owasin wicitokam taninyan iyopewicaya wo, hecen unmapi kin kokipapi kta.

21 Wakantanka itokam, qa Jesus Messiya Itancan kin, mahpiya ohnihde wicakañigapi kin hena ko wicitokam wahokonciciya, dena taku kin ecinšniyan wiyukanpi wanin eanon kta, qa wicašta iwanyakapi kte ein on etanhan takudan eanon kte šni.

22 Ohankoya tuwedan nape aputake šni wo; qa wicašta tokeca wahtanipi kin en ope šni wo. Ecedan ihduha wo.

23 Tokata mini ecedan yatke šni wo, nitezi kin on, qa waniyazan sa kin heon, miniša waniqadan yatkan wo.

24 Wicašta wanjikji wahtanipi kin taninyan han, qa itokam woyaco ekta awicaya; qa hunh wicihakam tanin ece.

25 Qa he iyecen wicohan wašte wanjikši taninyan un, qa tona hecece šni ešta anañbepica šni.

## WICOWOYAKE 6.

1 Wowidake un kin tona can napinpi kin ihukuya yukanpi kin hena itancan wicayawapi kin wicakinhanpi owasin okihi wicahdawapi kta, hecen Wa-

kantanka caje qa tawoonspe kin oštehdapi kte šni.

2 Qa tona itancan wacinyan unpi kin heca ihukuya unpi kinhan, hena šicewicakidapi kte šni, om hunkawanjinkiciyapi kin heon; tuka hena wacinyan unpi, qa waštwicadakapi, qa taku wašte kin en owicakicipapi kin heon sanpa owicakiyapi kta. Hena hecen onspewicakiye ça wahokonwicakiya wo.

3 Tuwe wicoie wašte, Jesus Messiya Itancan unkiyapi oie kin, wicohan ecedan kin eciyatanhan un kin hena wicada šni kinhan, qa togye waonspewicakiye einhan,

4 He walianiçida, qa takudan sdonye šni un, tuka wakinicapi wiwangapi wicoie kin en cante kin ocowasin iyeiçiya; hena etanhan winawizipi, wakinicapi, waoštehdapi, woawacin šica ko icaga.

5 Qa wicašta tawacin šicapi kin oškiškeya hdokinicapi, wowicake yuhapi šni, qa taku kamnanpi kinhan, he Wakantanka ohodapi kin ee kecinpi. Tona hececapi kin hena awicayuŝtan wo.

6 Wakantanka ohodapi kin woiyokipi kici he woyuha tanaka.

7 Maka kin de en takudan unkahipi šni, qa awicakehan hetanhan takudan unkahdapi kte šni.

8 Hecen woyute, wokoyake ko unhapi kinhan, hena iyounkipipi kte.

9 Tona watonpika cinpi kinhan, hena taku wawiyutanyan un, qa mazahitakiyapi en iyohpayapi, qa witkotkoya cantiheyapi šica ota on kiuniyanpi ece kin hena en, hena e waihangyapi, wicotakuni šni ko mahen wica-

## II. TIMOTHEOS.

šta kin ocowasin iyohpewicayapi ece.

10 Taku šica owasin hutkan kin he mazaska waštedakapi kin hee ; he wanjikji inahnipi, qa on wacinyanpi kin etanhan iyaye yapı, qa wicokakije ota on caičipapi.

11 Tuka Wakantanka wicašta tawa kin he niye, hena taku kin nakicipa wo ; wicoowotanna, Wakantanka ohodapi, wacinyanpi, wacantkiyapi, wacintankapi qa wowaħbadan, hena akita wo.

12 Wowacinye okicize wašte kin he en econ wo, owihanke wanin wiconi kin he icu wo, he en nicopi qa waayataninpi ota itokam wohdakapi wašte ecen oyahdake ciqon.

13 Wakantanka taku owasin nikiye cin he itokam, qa Jesus Messiya Pontios Pilate itokam owotanna wohdake ciqon he on ceciciya ce ;

14 Ašape šni qa iyaonpepica šni, woahope kin de duhe kta, Jesus Messiya Itancan unkiyapi taninyan u kte cin hehanyan.

15 He tohan iyehantu kinhan, tuwe yawaštepi, qa ecedan Wawokili kin he taninyan hiyuye kta, wicaštayatapi kin en Wi-

caštayatapi, qa itancanpi kin en Itancan kin hee.

16 He išnana wiconi hduhe ča, iyoyanpa en hiyohipica šni kin he en ounyan, wicašta kin tuwe dan he wanyake šni, qa nakun wanyaka okihi kte šni ; he wowitan, qa wowašake owihanke wanin kiciun nunwe.

17 Tona maka kin den watonpike cin wahokonwicakiya wo, watankaicidapi kte šni, qa woyuha atakuni šni aya ece kin wacinyanpi kte šni, tuka Wakantanka ni un taku iyounkipipi kta e iyakičuya unqupi kin hee ;

18 Taku wašte ece econpi kta, wicohan wašte ijicapi kta, wapamnipi, qa wawicaqupi tawatenyapi kta ;

19 Taku tokata ihe cin he ekta ahehde wašte wan ičihnakapi kta, hecen wiconi owihanke wanica yuhapi kta.

20 Timotheos, taku yuheciciye cin hena tanyan yuha wo, qa ikcekceya ecinšniyan wakiničapi kin he nakicipa wo, wosdonye woitonšni akinicapi kin he nakun.

21 Wanjikji he en opapi, qa wacinyanpi kin icunonpa iyayapi. Wowaonšida niciun nunwe. Amen.

---

### P A L O S

## TIMOTHEOS WOWAPI KICAGA,

### I N O N P A K I N .

---

#### WICOWOYAKE 1.

1 Palos, Wakantanka tawacin kin on, Jesus Messiya yeši qon, Jesus Messiya wiconi iwahounyanpi qon he eciyatanhan,

2 Timotheos, hokšincantkiyapi mitawa kin, *wowapi cicaga*. Wowaonšida, wowašte, wookiye ko, Wakantanka Ateyapi kin etanhan, qa Jesus Messiya Itancan unkiyapi kin etanhan.



## WICOWOYAKE 2.

3 Wakantanka, mihunkake kin etanhan nagi ska hduha ohowada kin, he wopida ewakiya, anpetu, hanyetu ko wocekiye epa eca, ayaştan şni ciksuya waun ;

4 Wanciyaka nina wacin, iştamnihanpe ota aniu qon hena weksuya, hecen wowiyuşkin omajudan kta ;

5 Tohan wowacinye analibepica şni niye en niun kin he weksuye cinhan, he tokaheya nikunşi Lowis en un, qa nakun nihun Yunike en un, qa he niye en niun kin sdonwaya.

6 Heon etanhan kiksuyeciye kta, Wakantanka taku niçu kin, nape aciputake cin eciyatanhan, he amniheniçiye kta.

7 Wakantanka wokokipe woniya kin unqupi şni ; tuka wowaşake, wacantkiyapi, qa wacinksapapi woniya kin.

8 Hecen Itancan unkiyapi ta-wootanin kin on ištece şni wo, qa nakun miye makaşkapi tawa waun kin ; tuka Wakantanka towaşake kin eciyatanhan wotanin waşte en wokakije kin en okicipa wo :

9 He iye ni unyanpi, qa wicakicopi wakan kin on unkiyapi, unkoňanpi kin eciyatanhan şni, tuka iye tawacin, qa towaonşida, maka icage cin itokam Jesus Messiya on unqupi qon he eciyatanhan :

10 Tuka wanna hdutanin, Jesus Messiya Wanikiya unkita-wapi taniniçiye cin on, he wiconte ihangye ça, wotanin waşte kin en, wiconi qa tepica şni unpi kin iyoyanpa en au.

11 Heon eyanpaha qa yeşipi kin heca makagapi, Ikcewicaşta wowicawakiyake kte cin heon.

12 Qa he etanhan hena taku on iyotanhan iyewakiya ; tuka

imaštece şni. Tuwe wacinwakiye cin he sdonwakiye ça, taku ehna ke waşi kin hena anpetu wan u kte cin hehanyan miciyuha okihi sdonwaya.

13 Wicoie on zaniyan unpi nahonciye ciqon, wowacinye, wowaşte ko, Jesus Messiya en un kin he tinsa yuza wo.

14 Woniya Wakan unkicipi un kin eciyatanhan, wicoňan waşte niçupi qon he tanyan yuha wo.

15 Tona Asia en un kin owasin amayuştanpi kin he sdonyaya ; Phugellos qa Hermogenes he en opapi.

16 Onesiphoros tiyohnaka tawa kin Wakantanka onşikida nunwe ; iye ota micanpte ça makaşkapi kin on ištece şni.

17 Qa Roma ekta hi qehan, nina omade qa iyemayan.

18 He anpetu kin he en Itancan kin etanhan wowaonşida iyeye kta e Itancan okihikiya nunwe ; Ephesos ekta taku tona on omakiye ciqon he tanyan sdonyaya.

## WICOWOYAKE 2.

1 He etanhan, micinkşi, Jesus Messiya towaonşida kin he en wakişaka wo.

2 Qa miye etanhan taku nayanon, wicota yaotaninpi qon, hena wicaşta wacinyepica, tona tokan onspewicakiya okihihi kin, hena wicaqu wo.

3 Qa niye nakun Jesus Messiya taakicita waşte kin iyecen taku tehika en waditaka wo.

4 Tuwe ozuye econ kinhan, he taku wiconi kin de wicoňan kin en ihdupemni şni, tuwe taakicitaye cin he iyokipiye kte cin heon.

5 Qa tuwe ohiye wacin econ kinhan, qa wakiconzapi kin ecen

## II. TIMOTHEOS.

econ śni kinhan, he wateśdagki-  
catonpi śni ece.

6 Wicaśta wakicanye cin he  
ħtani kinhan, iye tokaheya taku  
icage cin etanhan yute kta.

7 Taku epe cin he awacin wo.  
Qa Itancan kin taku owasin  
okahnihniyan nunwe.

8 Wotanin wašte mitawa kin  
eciyanhan, Jesus Messiya, Da-  
wid wicowazi tawa kin etanhan,  
he wiconę etanhan ekicetuyapi  
kin he kiksuya wo.

9 Qa iye on wicaśta wabotice  
cin iyecen kakiśmayanpi, maka-  
śkapi kin he en; tuka Wakan-  
tanka oie kin he kaśkapi śni.

10 He etanhan tona wicaka-  
ħnigapi qon hena on taku owa-  
sin iyowinwaya, hena e wiconi  
Jesus Messiya en un kin he yu-  
hapi kta, qa nakun owihanke  
wanin wowitzan kin.

11 Wicoie kin de wicakapi;  
Iye kici unęapi kinhan, nakun  
kici unnipi kta;

12 Iye on unkakijapi kinhan,  
kici wicaśtayatapi unyakonpi  
kta. Qa unkiye ehpeunyanpi  
kinhan, is eya ehpeunyanpi kta.

13 Qa wacinunyanpi śni ešta,  
iye wacinyepica un, ihduecinśni-  
yan kta okihi śni ce.

14 Hena taku kin kiksuyewica-  
ye ęa, Itancan kin itokam, wi-  
coie wawokihi śni, tona naħonpi  
kin wicahnaye cin hena on aki-  
nicapi kte śni e iwahokonwica-  
kiya wo.

15 Wakantanka iyokipiyaye  
kta, wicaśta wakage cin ištece  
kta iyecece śni kin heca e ni-  
hdutanin kta, qa wowicake wi-  
coie kin owotanna yapamni kta  
e aięiciya wo.

16 Tuka iapi śica ecinśniyan  
kin he nakicipa wo, he iyotan  
wicośice ekta icah aye kta.

17 Unkan wicoie tawapi kin

śiyaka śica wan iyecen wai-  
hangye kta; Yumeneos qa Phi-  
letos hena hececapi;

18 Hena wowicake kin icunon-  
pa iyayapi qa, Woekicetu kin  
wanna yuśtanpi ce, eyapi, qa  
heon wanjikji wacinyanpi kin  
etanhan wicayahomni.

19 Hececa ešta, Wakantanka  
ahemde tawa kin sutaya he ęa  
ipuspe kin de en un; Itancan  
kin tona tawa wicaye cin hena  
sdonwicakiya. Qa nakun, Tuwe  
Messiya ęaje kin hoyekiye cin-  
han, he woahęani ayuśtan kta  
ce.

20 Tuka tipi tanka wanji ohna  
mazaskazi, qa mazaska wakśica  
hecedan śni, nakun can, qa ma-  
ka wakśica ko yukan, hunħ taku  
wašte, qa hunħ taku śica on yu-  
hapi.

21 Hecen on, tuwe hena taku  
kin etanhan itpakinte cinhan, he  
wakśica wašte kin heca kta, ece-  
dan, qa Itancan kin wowinyunye  
kta e iyokipi, qa wicoħan wašte  
owasin on yuśtanpi.

22 Kośka cantibeyapi śice cin  
hena nakicipa wo; tuka wicoo-  
wotanna, wowacinye, wacantki-  
yapi, wookiye ko, henakiya tona  
cante ecedan on Itancan ceki-  
yapi kin hena om en opa wo.

23 Tuka wiwangapi okahnih-  
pica śni ecinśniyan kin hena en  
yeięiye śni wo, hena wicokicize  
kaga e sdonyaya.

24 Unkan Itancan taokiye kin  
he wicakis un kte śni; tuka  
owasin en wahbayedan un kta,  
waonspekiye ęa, wawacinkta  
yuza tanka kta:

25 Qa tona tokaięiya unpi kin  
hena iwahnana wahokonwica-  
kiye kta, okinni Wakantanka  
ihduecetupi wicaqu kta, hecen  
wowicake kin iyucanpi kta.

26 Qa hecen, tona Wakansica

## WICOWOYAKE 4.

tolhan cin eca, wayaka awicahda ece kin hena mazahtakiyapi tawa kin etanhan ihdušpapi kta.

### WICOWOYAKE 3.

1 He de sdonya wo, anpetu ihankeya kin en taku tehika e u kta.

2 Hehan wicašta kin wašteičidapi kta, mazaska waštedakapi, wamnaičidapi, wahaničidapi, hunkakeyapi kin anawicakigoptanpi šni, wapidapi šni, owotapidan šni ;

3 Cinca cantekiyapi šni, wope kicaksapi, waałapi sa, iyatahdeičiyapi sa, ohitičidapi, qa taku wašte šicedapi ;

4 Wicahnayanpi sa, wacinkopi, watankaičidapi, magagaičiyapi kin he iyotandapi, qa Wakantanka iyotandapi šni.

5 Wakantanka awacinpi kin wiyacinpi kin yuhapi, tuka wowašake kin he wicadapi šni ; tona hececapi kin hena etanhan ihdamna wo.

6 Hena hececapi kin tipi nalmana tin ipi, qa winohınca wacintonpi šni, woahitani hdušakapi, qa šicaya wacin yuzapi on icunonpa ayapi ;

7 Ohinniyān waonspeičiciyapi keš wowicake sdonyapi kin ehan ipi okihipi šni kin wayaka awicayapi ece.

8 Unkan, Jannes qa Jambres hena Moses kici akinicapi qon he iyecen, dena iš eya wowicake kin en ibotopi, wicašta tawacin šicapi, qa wacinyanpi kin ayuštānpi.

9 Tuka dena e sanpa iyoopta aye kte šni, witkotkopike cin owasin en tanin kta, hena e qe econpi qon iyececa.

10 Tuka niye wowaonspekiye mitawa kin tanyan sdonyaya,

miohan kin, token mičiconze cin, wacinwaye cin, wawaciu- kta mduza tanka kin, wacanwakiye cin, wahbayedan awape kin,

11 Tehiya makuwapi kin, makakije cin, tona mahiyahde kin, Antiyoka ekta, Ikoniyon ekta, Lustra ekta, hena šicaya makuwapi kin mahiyahde ; unkan owasin etanhan Itancan kin emahdaku.

12 Qa tona Jesus Messiya en owotanna ohānyan cinpi kin hena owasin šicaya wacakuwapi kta.

13 Tuka wicašta šica, wicahnayanpi sa ko, hena sanpa šicapi kta, wicahnayanpi qa nakun hnayanpi kta.

14 Hececa tuka niye qe taku onnispe, qa wicayada kin hena en un wo, tokiya tanhan onnispe kin he sdonyaya.

15 Qa honikšiyooqopa kin ehan- tanhan Wowapi wakan sdonyaya, he niniyan on ksamniye kta okihi, Jesus Messiya wacinyanpi kin eciyatānhan.

16 Wowapi wakan ocowasin Wakantanka Taniya kin eciyatānhan, qa waonspekiyapi, wiyo- peyapi, owotanna kagāpi, qa wicohan wašte en onspewicakiye cin he okihi.

17 Hecen Wakantanka wicašta tawa kin ecedan un kta, qa wicohan wašte owasin on hduštānpi kta.

### WICOWOYAKE 4.

1 Heon, Wakantanka itokam, qa Jesus Messiya Itancan kin, tona nipi ťapi ko wicayaco kta, tohan wokiconze hduha hi kinhan, he nakun itokam wahokon- ciciya ;

2 Wicoie kin oyaka wo, tohan



## II. TIMOTHEOS.

otyokipi, qa nakun oiyokipi śni ešta, handitaiçiya, wo. Owotanna wicakage wacin, iyopewicaya, wahokonwicakiya wo, woonspe qa wawacinkta yuzapi tanka kin on.

3 Anpetu wan u kte cin he tohan hi kinhan, woonspe wašte kin aktapi kte śni, tuka iye wicotawacin śice cin eciyatanhan waonspekiyapi kin awicakitapi kta, noge yaşpuyapi se iyececa heon etanhan.

4 Qa nogepi kin wowicake kin etanhan hduhompni, qa hitunkakanpi kin ekta ihdoyapi kta.

5 Tuka niyeqe taku owasin en wakta yaun kta, wicokakije en waditaka wo; wotanin wašte oyakapi wicohan kin ecen econ wo; wicohan duhe cin he hduştan wo.

6 Wanna wamihduşna kta iye-michantu, qa wahde kte cin he wanna kiyadan ihan.

7 Okicize wašte kin ecamon, woinyanke kin ihuniwakiya, wacinyanpi kin he hduha waun;

8 Qa tokata, woowotanna wateşdake wan mihnakapi, he Itancan wayaco owotanna kin maqu kta, anpetu kin he en; qa miye mişnana śni, tuka tona iye taniniçiyeye kte cin waştadakapi kin hena owasin koya.

9 Kohanna en mayahi kta nina açiciya wo.

10 Demas he amayuştan, wiconi kin de waştedake ça Thessalonike ekta kihda, Kreskes Galatia ekta, qa Titos Dalmatia ekta.

11 Lukas kicişnana waun; Markos icu qa kici u wo, he iye wicohan kin de en omakiya ece.

12 Tucikos Ephesos ekta ye waşi.

13 Yau kinhan, Troas ekta Karpos śina emicihnake waşi qon he au wo, qa nakun wowapi kin hena, tahasaka owapi kin hena iyotan.

14 Aleksander mazazi kage cin he taku śica ota iyamaonpa; iye ohan kin on Itancan kin kici-cajuju nunwe.

15 He on waktaya un wo; wicoie unyaotaninpi qon he nina kipajin.

16 Tokaheya wowahdake ci-qon he ehan tuwedan micica śni, qa owasin inamatanpi, he wicakiciyawapi śni nunwe.

17 Tuka hececa ešta, Itancan kin mici inajin, qa waşagmaye, ça hecen miye on woyakapi kin tanyan sdonyapi kta, qa Ikcewicašta kin owasin naşionpi kta; qa mnaja i kin etanhan emahdakupi.

18 Nakun Itancan kin wicohan śica owasin etanhan emahdaku kta, qa wokiconze malpiya ekta un kin he en nimaye kta. He iye wowitan owihanke wanin kiciun nunwe.

19 Priskila qa Akula napewicayuza wo, qa nakun Onesiphoros tiyohnaka tawa kin.

20 Erastos Korinth ekta yan-ka. Miletos ekta Trophimos wazanka ehpeya wahdicu.

21 Nahahin waniyetu śni u kte hinca wo. Yubulos nape niyuza, qa nakun Pudens, qa Linos, qa Klauda, qa hunkawanjin kiciyapi kin owasin.

22 Jesus Messiya Itancan kin ninagi kici un nunwe. Wowanonşida nicipi un nunwe. Amen.

## TITOS WOWAPI KICAGE CIN.

## WICOWOYAKE 1.

1 Palos Wakantanka taokiye, qa Jesus Messiya yeši qon, tona Wakantanka wicakahniga, wacinyanpi kte cin heon, qa wowicake wicohan wašte en un kin sdonyapi kte cin heon;

2 Qa owihanke wanin wiconi opapi kte cin, Wakantanka itonšni okitpani, maka kagapi kin itokam iwahounyanpi qon he on;

3 Tuka wanna iyehantu qehan, eyanpahapi kin on oie kin hdatanin, he miye maqupi, Wakantanka Wanikiya unkitawapi kin he eciyatanhan;

4 Titos, wifaya wacinyanpi kin he eciyatanhan cinkšiwaye cin; Wowaste, wowaonšida, wookiye ko, Wakantanka Ateyapi kin etanhan, qa Jesus Messiya Itancan Wanikiya unhapi kin eciyatanhan kiciun nunwe.

5 He etanhan Krete en yanke ciši, taku tona yušanpi šni kin hena wiyeya eyahnake kta, qa otonwe otoiyohe en hunkayapi wicayakage kta e on; token econ ciši qon iyececa.

6 Tuwe iyaonpepica šni kinhan, wicašta tawicu wanjidan, qa cinca wacinyanpi wicahduhe cin, wicakis unpi ewicakiyapi qa wanašonpi šni kin hececapi šni:

7 Waawanhdake cin he takudan iyaonpepica šni un kta, he Wakantanka taokiye kin ee; išnana wacin en ihduze šni, wa-

cinko šni, miniša en iyeičiye šni, ohitičida šni, qa mazaska nina akite kte šni;

8 Tuka oicimani kin onšiwicada kta, qa taku wašte kin waštedake kta, wacin ksapa un kta, qa owotanna, wacantkiya, qa iyatahdeičiye šni un kta;

9 Qa token onspekiyapi qon he iyecen wicoie oyakapi kin sutaya hduhe kta, hecen woonspecedan kin on wahokonwicakiya okihi kta, qa tona kipajiničiyapi kin hena iyopewicaye kta.

10 Wicašta wicaštapi šni, qa witkoya iapi, qa wicahnayanpi kin beca ota, tona bakihdayapi etanhanpi kin hena iyotanpi.

11 Hena iohmus wicayapi kta iyececa; hena e qe tiyohnaka ocowasin yaptanyan iyewicayapi, qa mazaska wahtešni kin on taku iyecetu šni kin onspewicakiyapi ece.

12 Iyepi kin etanhan waayate wan heye ciqon; Krete oyate kin ohinniyan itonpišni, wamanica ocinšice cin, qa wicatezi kuja kin hecapi ce.

13 Wayaotanin kin he wowicake. He etanhan nina iyopewicaya wo, hecen wacinyanpi kin en ecedan unpi kta:

14 Qa hecen Juda oyate hitunkakanpi yuhapi kin, qa wicašta akantu woope kagapi kin wowicake kašeye cin hena awacinpi kte šni.

15 Tona ecedan unpi kin hena taku owasin ecedan yuhapi, qa tona ašapapi qa wicadapi šni kin

hena taku ecedan kin takudan yuhapi śni, tuka tawacinpi nagipi ko hena ee kaeś aśapapi.

16 Hena is Wakantanka sdon-yapi keyapi, tuka wicoħan on aktapi śni, walitepi śni, wanahonpi śni, qa wicoħan wašte owasin en wacintonpi śni.

## WICOWOYAKE 2.

1 Tuka niye ge taku woonspe ecedan en iyokipi kin hena eecen oie ya wo.

2 Wicašta tankapi kin hena waktaya unpi kta, mdesahan wacin ksamya unpi kta, wacinyanpi, wacantkiyapi, wacintankapi ko en ecedan unpi kta.

3 Qa winohinca tankapi kin is cya winohinca wašte iyecen oħanyanpi kta, waaiapi kte śni, miniša ota en iyeiçiyapi kte śni, qa taku wašte onspe wicakiyapi kta :

4 Hecen wikośka kin ksamwicayapi kta, wicašta yuhapi cinca ko wašte wicakidapi kta ;

5 Wacin ksapapi kta, ecepidan, tipi awanhdakapi kta, waštaya unpi kta, hihnakupi kin anawicakigoptanpi kta ; hecen Wakantanka oie kin yaśicapi kte śni.

6 Kośka kin is nakun wacin ksapapi kte cin iwahokonwicakiya wo.

7 Qa taku owasin on wicoħan wašte kin en waonspekiya nihdutanin kta ; woonspe kin en wayuśice śni, wacinksapa, owotanna ;

8 Qa iapi ecedan qa iyaonpica śni kin he nun kta ; hecen tuwe itkopatanhan un kinhan, he ištece kta, taku śica takudan anije kta okihi śni kin heon.

9 Tona wowidake un kin hena itancean wicayuhapi kin anawi-

cakigoptanpi kta, qa taku owasin wakinicapi wanin iyokipi wicayapi kta ;

10 Takudan nahmana icupi śni, qa wacinyanpi wašte ocowasin en ihdutaninpi kta. Hecen taku owasin on, Wakantanka Wani-kiya unhapi kin tawoonspe kin he tanyan yuhapi kta.

11 Wakantanka towaonśida wicašta owasin wiconi wicakahi kin he wanna tanin ;

12 Wakantanka aktapi śni, qa wicoicage cantiheyapi kin hena ehpeunyanpi kta, qa nakaha wiconi kin en, wacinksamya, owotanna, wakanyan unnipi kta e onspeunkiyapi.

13 Qa wacinyanpi wašte ape unyakonpi kta, Wakantanka iyotan tanka, qa Jesus Messiya Wani-kiya unhapi kin he wowitan hduha taniniçiye kte cin hee.

14 He unkiyepi on içiçu, woaħtani owasin etanhan opeunkitonpi kta, qa oyate taŵawicaye kte cin wicoħan wašte nina ħin akitapi kte cin hena wicahduska kta e heon.

15 Hena wicoie kin hecen oie ye ça, wahokonwicakiye ça iyopewicaya wo. Ihnuhan tuwe śicenidake cinhan.

## WICOWOYAKE 3.

1 He kiksuyewicaya wo, taku itanceanpi qa wicowaśake kin hena ihukun iyeiçiyapi kta, wicaštayatapi kin anawicagoptanpi kta, qa wicoħan wašte owasin econpi kta, on wiyeya yukanpi kta.

2 Tuwedan yaśicapi kte śni, qa wicakizapi kte śni, tuka wahbayedan unpi, qa wicašta owasin on wacin tankapi kta.

3 Ehanna unkiś cya wacin untonpi śni, qa waanaungoptanpi



## PHILEMON.

śni, unhnayanpi, qa cantiheyapi śica ota, qa iyokipięiyapi kin en wowidake unyakonpi, wocanniyey, icekinpi ko en unnipi, wahte śni unyakonpi, qa otoiyoři śiceunkicidakapi.

4 Tuka hehan Wakantanka Wanikiya unkitawapi kin he towašte, qa wacantkiye cin wicašta kin en yutaninpi qehan ;

5 Wicoħan owotanna econkupi kin eciyatanhan śni, tuka iye towaonśida kin eciyatanhan niunyanpi ; teca wicatonpi woyujaja kin on, qa Woniya Wakan wicayuteca kin heon etanhan ;

6 He Jesus Messiya Wanikiya unkitawapi kin eciyatanhan iyakięuya unkakaštanpi kin.

7 Hecen iye towaonśida kin on etanhan unyaowotanpidan kinhan, wiconi owihanke wanica unkaepi kin eciyatanhan, taku iye tawa kin he tawaunyanpi kta.

8 Iapi kin he wowicake ; qa heon hena taku kin ohinniyan yasutaya iyae kta wacin ; tona Wakantanka wicadapi kin hena wicoħan wašte wacin ksamyapopi kta. Hena taku wašte, qa wicašta kin en wawokihi.

9 Tuka witkoya wiwangapi, qa

wicoicage oyakapi, qa wawakipajinpi, qa woope akinicapi kin hena okamnayan ya wo ; hena takudan okiři śni qa ecinśnihan un.

10 Wicašta waakinica un kin he wancadan, qa inonpa iyopeyapi kin, ihakamya heyata iyeya wo.

11 Tuwe hecece cinhan, he wanna yuptanyanpi, qa woahťani econ, qa iye atayedan ihdaco kin he sdonyaya.

12 Tohan niye ekta Artemas, qa is Tucikos ye waři kinhan, kohanna Nikopolis ekta en mahi kte ģinca wo ; hen waniyetu waun kta mięiconza.

13 Zenas woope aie kiyapi kin he, qa Apollos icimani ipi kinhan, takudan icakięe śni tanyan iyoopteya yewicakiya wo.

14 Qa tona unkicicapi kin hena wicoħan wašte aięiciya econpi kta, wicakijapi kin owicakiyapi kta, qa hecen waskuyeca icahye śni yukanpi kte śni.

15 Tona micicapi kin hena owasin nape niyuzapi. Tona wacinyanpi kin eciyatanhan wašteundakapi kin hena nape wicayuzawa wo. Wowaonśida niyepi owasin en nicipi un nunwe. Amen.

## PALOS

### PHILEMON WOWAPI KICAGE CIN.

1 Palos, Jesus Messiya on, kaska hnakapi kin he, qa Timotheos sunkaunyanpi kici, Philemon wašte unkidapi qa ounkiyapi ece kin,

2 Qa nakun Apphia wašteundakapi kin, Arcippos kici ama-

kicita kin he kici, qa yati ohna okodakiciye kin, *witaya wowapi unnicagapi* :

3 Wowaonśida, wookiye ko, Wakantanka Ateunyanpi, qa Jesus Messiya Itancan kin etanhan, nicipi un nunwe.

## PHILEMON.

4 Wocekiye epa eca, ohinniyan ciksuye ça, on Wakantanka wopida ewakiya ece :

5 Jesus Itancan kin wacinyaye ça wašte yadaka, nakun tona owotanna un kin owasin, he nawañon kin heon ;

6 Hecen wacinyaye cin owicayaqu kin he sanpa wašaka aye kta, on taku wašte owasin, Jesus Messiya eciyatanhan, unkiyepi en un kin he yutaninpi kta.

7 Mihunkawanji, wacanyakiye cin heon nina unkiyuškinpi, qa unkanaptapi, tona owotanna un kin hena cantepi kin iyuškinwicayaye cin heon etanhan.

8 Qa heon taku iyokipi kin Messiya en itancanyan econ ciši kta owakihi :

9 Tuka wacantkiyapi kin eciyatanhan ceciciya ce, Palos he miye, wanna wimacahinca, qa nakaha Jesus Messiya on kaška mahnakapi waun.

10 Hecen Onesimos micinkši, makaškapi kin icunhan micinca wakage cin hee on ceciciya.

11 He ehanna takudan nicamna šni, tuka nakaha miye omakiye ça nakun niye oniciya okihi. He nakaha hde waši.

12 Niye he iyowinkiya wo, minagi kin hee kaes iyececa.

13 He yuha waun kta wacin, wotanin wašte kin on etanhan makaškapi icunhan niye eekiya omakiye kte cin heon.

14 Tuka token yacin kin sdonye šni waun takudan ecamon kte šni ; taku wašte econ nišipi kin he iyecen ecanon kte šni, tuka niye cinka econ wacani kta he wacin.

15 He iye anpetu tonana ani-

yuštan, ake ohinniyan yahduhe kta heon etanhan hecon naceca.

16 Wanna wowidake unpi kin iyecece šni, tuka wowidake kin ikapeya wašte, hunkawanjinkiciyapi waštekidapi kin iyecen ; miš hecen wacin wakiyuze cin, niye iyotan hecen wacin yakiduze kta, wicacehpi qa Itancan kin nakun eciyatanhan hunkawanjinyaye kta.

17 Kodayapi iyecen mayaduha hecinhan, he miye iyecen ake ehdaku wo.

18 Taku icakišniye ça, taku iyohiniciciye šni hecinhan, he miciyawa wo.

19 Palos he miye, minape kin on de owawa, he miye wakajuju kta. Qa taku miyecicajuju šni, niye atayedan ocowasin yaun kin he caje mdate šni.

20 Han, mihunkawanji, Itancan kin en niye on imduškin kta ; Itancan kin en micante kin iyuškinmayan wo.

21 Waanayagoptan kta imdukecan, heon wowapi cicaga ; qa epe cin sam iyeya ecanon kta sdonwaya.

22 Tipi tukten manke kte cin he nakun wiyeya emicihnaka wo ; wocekiye ehapi kin on etanhan niyepi on makiyuškapi kta epca waun.

23 Epaphras, Jesus Messiya on, kici makaškapi kin he nape niyuza ;

24 Qa Markos, Aristarkos, Demas, qa Lukas micihitanipi kin hena nakun.

25 Jesus Messiya Itancan unkiyapi towaonšida kin ninagi kin kici un nunwe. Amen.

## HEBREW OYATE

## WOWAPI WICAKICAGE CIN.

## WICOWOYAKE 1.

1 Ehanna, Wakantanka toktogye, otakiya wicašta wokcan kin eciyatanhan hunkake wicunyanpi kin wowicakiyake ciqon, he, anpetu ehake kin dena icunhan, iye Cinhintku kin eciyatanhan wounkiyakapi;

2 He on woicage kin owasin kage ça, he taku owasin tawaye kta e ehde:

3 He iye towitan okitanin, qa ouncage okagapi hince cin hee, iye towašake oie kin on taku owasin hduha yanka, he is iye eciyatanhan waunhtanipi wopakinte kage çehan, Taku iyotan tanka wankan yanke cin he etapa kin en kiyotanka.

4 He iye caje wan małpiya ohnihde kin isanpa wašte ałhpewayi qa yuhe cin, he iyecen sam iyeya wašte.

5 Micinksi kin he niye, anpetu kin de cinca cicaga ce, małpiya ohnihde kin tukte wanji eciya he. Qa ake, He atemaye kta, qa miye cinksiwaye kta ce.

6 Unkan, tokapa kin he wicoicage kin ekta hiyuye çehan hecen eya, Wakantanka ohnihde wicaye cin owasin he itokam canpeška makehde enajin kta ce.

7 Qa małpiya ohnihde kin hena on kaken eya, He tateyanpa kin ohnihdeye ça, peta ide kin wwidakeya ece.

8 Tuka Cinhintku kin heciya,

Wakantanka, oiyotanke nitawa kin he owihanke wanica; nito-kiconze mazasagye kin he maza-sagye owotanna;

9 Woowotanna wašteyadake cin heon Wakantanka, nita Wakantanka kin, tona nitawaši kin hena isanpa wowiyuški kin wiłdi on sdaniyan ce.

10 Qa, Itancan, otokahe ekta maka ahe cin eyahde, qa ninape kage cin małpiya kin hee;

11 Hena yutakuni šni aye kta, tuka niye ecen yaun; owasin onłohıda wan iyecen kuke kta;

12 Qa šina wan iyecen pehan eyahnake ça, hecen yutokecapi kta; tuka niye okonniwanjidan, qa waniyetu nitawa kin owihanke kte šni ce.

13 Tuka ohnihdewicaye cin tukte wanji e, Mietapa kin en iyotanka wo, tona toka niyanpi kin hena nisiha woahe kin en ewicawahnake kta ce, eciya he.

14 Hena owasin taku wakan wawokiya, tona wiconi ałhpewicayapi, qa tawapi kte cin hena owicakiyapi kta e u wicašipi qon hena eepi šni he.

## WICOWOYAKE 2.

1 Heon etanhan taku naunhonpi kin hena tohinni unkikusipi kte šni e on sutaya awauncinpi kta.

2 Wicoie małpiya ohnihde oyakapi qon he suta, qa tona anagoptan šni, qa he kašeye cin



hena owasin iyacinyan woyaco owotanna icupi hecinhan ;

3 Unkiye wiconi hinsko tanka kin unkaktapi šni kinhan, token naunpapi kta he. He tokaheya Itancan kin oyake ça, tona nahonpi kin hena atayedan unkoki-yakapi :

4 Wakantanka is eya, iye tawacin kin eciyatanhan, wicakiciyaotanin, wowapetokeca taku on yušinyewicaye cin hena ko, wašagya econpi ota, qa Woniya Wakan wicakipamni kin hena on etanhan.

5 Wicoicage u kte cin cajeunyatapi kin he małpiya ohnihde kin yuhewicakiye šni.

6 Tuka wanji tukten yaotanin qa heya, Wicašta kin he taku he, on yeksuye kta he ; qa wicašta cinhintku kin, hecen awan-yahdaka he :

7 Małpiya ohnihde kin kitanna ihukuya yakage ça, wowitan, woyuonihan ko watešdake yecaton, qa taku nape on yakage cin hena yuheyakiya :

8 Qa iye siha kin ihukuya taku owasin eyahnaka. Taku owasin iye ihukuya ehname cin, hecen taku ihukuya ehname kin šni kin takudan okapte šni. Tuka nakaha nahalin taku owasin ihukuya ehname kin wanunyakapi šni.

9 Tuka Jesus wiconę kakijapi kin on, małpiya ohnihde kin kitanna ihukuya kagapi kin he wowitan, woyuonihan ko watešdag kiton kin he wanunyakapi, hecen iye, Wakantanka towaonšida kin eciyatanhan, wicašta kin owasin on wiconę sdoney kta.

10 Tuwe iye tan tanhan taku owasin un, qa iye on taku owasin un kin he cinca ota wowitan ekta wicahdoye kte cin on, wi-

coni tawapi kte cin mdetahunka kin he wokakije on ecedan kage kta e iyokipi.

11 Hecen tuwe wicayuecedan, qa tona yuecepidan kin hena owasin okonwanjipidan ; heon etanhan hena hunkawanjin wicakiya kewicakiye kta ištece šni ;

12 Qa hecen eya, Nicaje kin mihunkawanji owicawakiyake kta, qa okodakiciye kin cokata icidowan kta ce.

13 Qa ake, He wacinwaye kta ce. Qa ake, Iho, miye, qa cinca Wakantanka maqu kin hena.

14 Cinca kin hena wicacełpi, qa wicawe kin en opapi kin heon is iye hena en opa ; hecen tuwe wiconę wowašake yuhe cin, Wakansica hec, e ihangye kta ;

15 Qa tona tohanyan ni unpi kin behanyan wiconę ikopapi kin on wowidake unpi kin hena ewicahdaku kta.

16 Awicakehan małpiya ohnihde kin he koyake šni, tuka Abraham cinca kin hecen ihduza.

17 Heon etanhan taku owasin en, iye hunkawanjinwicaye cin iyecen ikicage kte cin he hecetu ; hecen taku Wakantanka tawa kin en, Wawayušna Itancan waonšida, qa wicake kta, qa oyate wałtanipi kin on wookiye wicakicage kta.

18 Iye, iyutanyanpi kin on, atayedan kakije cin, heon etanhan tona iyutanwicayapi kin hena ewicahdaku kta okihi.

### WICOWOYAKE 3.

1 Heon, mihunkawanji wakan, małpiya tanhan wicakico kin en oyapapi kin, wounhdakapi kin on Jesus Messiya yešipi qa Wa-

wayuśna Itanean kin he awacin po.

2 Moses tipi ocowasin ohna owotanna un kin, he iyecen iye qe tuwe econ śi qon owotanna ecakicon.

3 Tuwe ticage cin he tipi kin sam iyeya yuonihanpi ece kin, he iyecen he qe Moses kapeya wowitan tanka yuha.

4 Tipi otoiyoĥi tuwe kaga ; tuka tuwe taku owasin kage cin he Wakantanka ee.

5 Moses wowidake un kin heca, tipi tawa ocowasin ohna wacinyepica un, taku oyakapi kte cin hena yaotanin kte cin heon.

6 Tuka Messiya, iye ti kin ocowasin ohna, Cinhintkuyapi kin iyececa ; tipi tawa kin he unkiyepi, waditagya wounhdakapi, qa wowiyuśkinyan wacinunyanpi kin he owihanketa ťinsa unhapi kinhan.

7 Heon etanhan, Woniya Wakan kin kaken eya, Anpe dehan iye ho kin nayaĥonpi kta hecinhan ;

8 Cante ihduteĥipi śni po, hepuza en, anpĕtu wawiyutanyan un kin en, wawakipajinpi qon iyecen ;

9 Nihunkakepi iyutanmayanpi, qa mayukanpi, qa waniyetu wikcemna topa hehanyan miohan kin wanyakapi ce.

10 Heon etanhan wicoicage kin he on iyomayake ca, hepa, Cantepi kin ekta ohinniyan nunipi, qa mitacanku kin sonyapi śni ce.

11 Hecen śinwahda qa, Okihpapi mitawa kin en yapi kte śni ce, eya wakonza.

12 Mihunkawanji, wakta po, okinni cante wicada śni, qa sice cin en niunpi, on Wakantanka ni un kin aduśtanpi kta.

13 Tuka anpetu otoiyoĥi waho-konkiciciya po, anpe dehan eyapi kin hehanyan ; okinni woahĥtani wohnaye kin on wanji tukte niyuteĥipi kta.

14 Tokaĥeya wicaundapi kin he owihanketa sutaya unhapi kinhan, Messiya en ounpapi.

15 Anpe dehan, iye ho kin nayaĥonpi kinhan, cante hduteĥipi śni po, wawakipajinpi qon en iyececa ce, eyapi kin hehanyan.

16 Tona naĥonpi qon hena kipajinpi he : tuka Moses tona Egupta etanhan awicau qon hena owasin śni he.

17 Tona waniyetu wikcemna topa hehanyan iyoyakeyapi qon hena tuwepi he ; tona waĥtani-pi, qa hepuza en tancan ihpaya-pi qon hena eepi śni he.

18 Qa okihpapi tawa kin en yapi kte śni, konza kewicakiye ciqon hena tuwepi he ; tona wicadapi śni qon hena eepi śni he.

19 Hecen wicadapi śni kin heon en yapi kta okihipi śni e wanunyakapi.

## WICOWOYAKE 4.

1 Hecen okihpapi kin de en unkopapi kta e iwahounyanpi kin, heon niyepi kin wanjikśi iyoyahipi kte śni se ececa e ikounpapi kta.

2 Wotanin waśte kin unkokiyakapi, iś iyepi kin iyececa ; tuka wicoie naĥonpi qon he owicakiye śni, tona naĥonpi kin wowacinye icicahiyapi śni kin heon etanhan.

3 Tuka tona wicaundapi kin okihpapi kin en ounpapi kta : heye ciqon iyececa ; Śinwahda on okihpapi mitawa kin en opapi kte śni ce, epa ce ; maka icage cin hehantanhan wicoĥan kin yuśtanpi tuka.

4 Tukten anpetu ísakowin kin he ke ça hecen eya, Anpetu ísakowin kin he Wakantanka okilipa, taku kage cin owasin etanhan.

5 Qa hen ake, Okilipapi mitawa kin en opapi kte śni.

6 Heon etanhan, hunh en opapi kte cin he tokata ihan, qa tona tokaheya wotanin wašte owicakiyakapi qon hena wicadapi śni kin heon en opapi śni.

7 Ake anpetu wan ke ça Dawid en heya, Anpe dehan, iye ho kin nayañonpi kinhan, cante hdutehipi śni po.

8 Jośuwa okilipe wicakiya unkanś, he iyohakam anpetu tokeca caje yate kte śni tuka.

9 Hecen Wakantanka taoyate kin okilipapi wan wicakicihan.

10 Tuwe okilipapi en ope cin he wanna tohtani kin ayuśtan, Wakantanka iye tawa ayuśtan qon iyececa.

11 Heon etanhan wookilipe kin he en unkopapi kta e amniheunkicijapi kta, okinni wicadapi śni qon he iyecen tuwe ilipaye kta naceca.

12 Wakantanka oie kin he ni un, wawokihi, qa mazasagye anog ope kin he isanpa pe hinca, wicanagi, wicaniya kici iyotahehdan capa iyaye ça, okihepi cupe ko kicakse ça, wicotawacin wicacante wacin yuze cin hena koya iyukcan ece.

13 Qa taku kagapi kin takudan iye ísta kin en anañbepica śni; tuwe oicazo unqupi kin he ísta kin en taku owasin tancodan qa śdayehnahan yanka.

14 Heon Wawayuśna Itancan tanka wan, Jesus Wakantanka Cinhintku, mañpiya kin ekta iyaye cin hee unhapi kin heon wounhdakapi kin he sutaya unhduzapi kta.

15 Wawayuśna itancan kin, unkiye unkakijapi kin en unkicanptapi kta okihi śni kin heca unhapi śni, tuka iye taku owasin on iyutanyanpi, unkiye iyeuncecapi, tuka woahntani codan un.

16 Heon etanhan wowašte oiyotanke kin en waditagya unkupi kta, hecen wowaonśida unkiçupi kta, qa tohan uncinpi eca wowašte wawokihi kin iyeunyanpi ece e kta.

### WICOWOYAKE 5.

1 Wawayuśna itancan otoiyo-hi, wicašta etanhan icupi kin, he Wakantanka taku tawa kin en, wicašta on etanhan ehdepi, taku kiciçupi, woahntani on woñnapi kin hena ko wayuśna kta e heon.

2 Tona onspepi śni, qa canku icunom yapi kin hena onśiwicada kta okihi, íś iye wookihi śni aohduteyapi nakaes.

3 Qa heon oyate kin on wośna ece kin, he iyecen íś iye woahntani econ kin on taku wayuśna ece kta.

4 Qa tuwedan iye cinka wowitzan kin de icu śni, tuka, Aaron iyecen, Wakantanka tuwe kico kin hecedan.

5 He iyecen, Messiya íś eya Wawayuśna itancan kta e ihdutan śni; tuka tuwe, Micinkśi kin he niye, anpe dehan cinca cicaga ce, eciye ciqon hee hecon.

6 Qa nakun tokan en kaken eya; Melkizedek ouncage kin iyecen Wawayuśna owihanke śni kin henica ce.

7 He qe anpetu wicacehipi en un qehan, wocekiye, wokidapi ko eye ça, ísta mnigaga nina hoyekiye ça, tuwe wiconte etanhan ehdaku kta okihi kin he ce-



## WICOWOYAKE 6.

kiye ça, kokipeyahan un kin, heon nahonpi.

8 Qa Cinbintku kin hee kaeś, taku token kakije cin on woa-nagoptan onspeiçiciya.

9 Qa iye yuśtanpi kin heon to-na anagoptanpi kin owasin owi-hanke wanin wiconi kin wica-kicaga.

10 Melkizedek ouncage kin iyecen, Wawayuśna Itancan, Wakantanka keciye cin.

11 Wicaśta kin he on taku ota unkoniciyakapi kta, tuka oyaka-pi tehika, wanañon yahunkapi śni nakaes.

12 Hinnakaha waonspekiya henicapi kta, tuka nahahin tuwe Wakantanka oie oowa tokaheya kin hena akta onspeniciyapi kta e iyenihantupi, qa tona asanpi ece cinpi, qa waconica Yun okihipi śni kin hee en iyonipta-pi.

13 Tuwe kaśta asanpi ece yute cinhan, he wicoowotanna wicoie kin en wayupike śni, nahahin hokśiyooqopa nakaes.

14 Tuka tona tankapi, qa wana taku utapi on tanyan ihdu-śtanpi, taku waśte, taku śica ko iyukcanpi kin, hena waconica yutapi ece.

### WICOWOYAKE 6.

1 Heon etanhan Messiya wonspe tokaheya tawa kin he he-cta ehpeunkiyapi, qa woyuśtan ekta unyanpi kta; wiconęe wicoñan on iyopeiçiyapi, qa Wakantanka wacinyanpi kin taku ahe cin akta eunhdepi kte śni;

2 Baptem eyapi woonspe kin, qa nape on awicaputakapi, qa wicaęe cin ekicetuwicayapi, qa woyaco owihanke wanice cin hena koya.

3 Unkan Wakantanka iyowin-

unkiyapi kinhan, hecen econku-pi kta.

4 Tona wancadan iyoyanpapi, qa malipiya tanhan taku wicaęu-pi kin he utapi, qa Woniya Wa-kan kin etanhan okinipi;

5 Qa Wakantanka oie waśte kin he utapi, wiconi u kte cin wowaśake kin nakun;

6 Hena ayuśtanpi hecinhan, ake piya iyopeiçiyęe wicakiyapi kte cin he okihipica śni; iye atayedan Wakantanka Cinhin-tku can susbeca en piya okatan-pi, qa taninyan wowiśtenyapi kin heon etanhan.

7 Maka kin ota amagaju kin he yuñhepe ça, tona kicanyanpi kin hena on taku peji iyecetuya aicage cin he Wakantanka yu-waśte.

8 Tuka taku takanheca hu, qa wapepeka aicage cin he ehpeya-pi, qa yaśicapi kte cin kiyadan ihan, he owihanketa huñnage kta.

9 Tuka, waśtecicidapi kin, he-na hecen unkeyapi eśta, niyepi kin on taku sanpa waśte qa wi-coni en ope cin hena en niunpi e sdonunyanpi.

10 Wakantanka owotanna, qa heon wicoñtani, qa wowaśte wokicanye nitawapi, iye caje kin on ecanonpi, tona owotanna un owicayakiyapi, qa nahahin owicakiya dukanpi kin he aki-tonje kte śni.

11 Unkan niyepi otoiyoñi owi-hanketa, woape woyuśtan kte cin behanyan iyecen amñiheni-çiyapi kta uncinpi.

12 Qa nikujapi kte śni, tuka tona wicadapi, qa wacintankapi on, taku iwahowicayapi qon wanna yuhapi kin, hena owica-yapapi kta.

13 Wakantanka Abraham taku iwahoye çeñan, taku sanpa tan-

ka cajeyate kta wanica, heon iye atayedan cajeihdata ;

14 Qa heya, Awicakehan wo- wašte on ciyawašte kta, qa yuo- tapi kin on yuotaciye kta ce.

15 Unkan walibayedan ape yanke cin he iyohakam taku iwahoyapi qon ekicicetu.

16 Wicašta akantu taku iyotan tanka cajeyatapi ece ; qa wokon- ze woyusuta kte cin he waaki- nicapi owasin en woanapte kin hee.

17 He en, Wakantanka, tona taku iwahoyapi qon tawapi kte cin hena en, iye tawacin yuhopica šni kin he iyotan sdoney wicakiye kta cin, qa heon wo- konze on hdusuta.

18 Heon taku nom yutokeca- pica šni, en Wakantanka iton- šni okihipica šni kin hena taku kin on etanhan, tona woape un- kitokam ehdepi kin en onaunpa- pi kin wicakicanpte wan waša- ka unhapi kta.

19 He unhapi, wicanagi taku on aspeičiya, wicakapi qa suta kin hee, taku tipi cokaya hna- kapi kin mahen tanhan un kin he en aspeičiya.

20 Heciya Jesus kahin tokam ye cin unkiyepi on timahen iya- ya, he Melkizedek ouncage kin iyecen Wawayušna Itancan kin heca kagapi.

## WICOWOYAKE 7.

1 Melkizedek, Salem Wicašta- yatapi, qa Wawayušna Wakan- tanka Iyotan wankantu kin he tawa, hee, Abraham, wicaštaya- tapi wicakaštake cin, etanhan hdicu kin he itkokipe ça yawa- šte.

2 Unkan Abraham taku owasin etanhan iwikcemna kin he qu. Wicašta kin he tokaheya caje

oyakapi kin on, Woowotanna wicaštayatapi kin hee, qa hehan, Salem wicaštayatapi kin, he Wookiye wicaštayatapi kin hee.

3 Atkuku wanica, hunku wani- ca, qa wicoicage oyakapi kin wanica, anpetu tokaheya wanice ça wiconi owihanke wanica, Wakantanka Cinhintku kin iye- cen icahyapi, qa Wawayušna ohinniyan yanka.

4 Wicašta tanka kin de wan- yaka po, Abraham, hunkakeyapi un kin hee kaeš, taku iwakte ahdi kin etanhan iwikcemna kin he qu.

5 Tona Lewi cinca kin etan- hanpi, wošnapı wicoħan yuhapi kin hena, wicoope kin eciyatan- han iye hunkawanjıtkupi oyate kin etanhan taku icupi kta e iwahowicayapi ; hena Abraham nite kin etanhan inanpapi tuka heconpi.

6 Tuka tuwe hena etanhan wi- coicage hdawa šni kin he Abra- ham etanhan taku iwikcemna kin icu, qa wahoyapi kin yuhe ciqon he yawašte.

7 Unkan he de akinicapi šni, tuwe ihukuya un kin he iyotan wašte kin on yawaštepi ece.

8 Qa deciya wicašta tapi kte cin hena taku iwikcemna kin icupi ece ; tuka heciya, he ni un e yaotaninpi.

9 Unkan he de heyepica ; Lewi taku iwikcemna kin icu ece kin, he iš eya Abraham eci- yatanhan taku iwikcemna kin wicaqu ;

10 Melkizedek itkokipe çehan he nahahin atkuku nite kin ma- hen un.

11 Heon etanhan, Lewi wo- šnapı wicoħan yuhe cin eciya- tanhan woyuštan en au unkanš ; he en oyate kin wicoope yu- hapi ; tokiyatanhan wawayušna

## WICOWOYAKE 8.

tokeca wan icage kta, Melkizedek ouncage kin eciyatanhan, qa Aaron ouncage kin eciyatanhan caje yatapi kte *śni* he.

12 Wośnapi wicoľian kin he yutokecapi kinhan, heon etanhan wicoope kin nakun yutokecapi kta.

13 Qa tuwe on hena hecen eyapi qon he wicoun tokeca etanhan inanpa; he etanhan tuwedan wahna wośnapi kin ekta oľhanye *śni*.

14 Itancan unkitawapi kin he J.uda wicoun kin etanhan icage e sdonunyanpi; qa wicoun kin he wośnapi kagapi kta e Moses takudan eye *śni*.

15 Qa de iyotan atanin, Melkizedek ouncage kin iyecen, Wawayuśna tokeca wan icage kta;

16 He wicaceľpi wicoie woope kin eciyatanhan *śni*, tuka wiconi owihanke wanica wowaśake kin eciyatanhan icahyapi.

17 Melkizedek ouncage kin iyecen, Wawayuśna ohinniyan nanka ce, eya yaotaninpi qon.

18 Unkan nakun woahope tokaheya ye cin he yutokan iyeyapi, waśake *śni* qa taku okihipica *śni* kin heon etanhan.

19 Woope kin he takudan yuśtan *śni*, tuka wowacinye iyotan wašte kin he en au; qa heon Wakantanka kin en ikiyedan unkupi.

20 Iye wokonze oie kin codan wawayuśna kin kagapi *śni*; dena e wokonze oie codan wawayuśna wicakagapi;

21 Tuka he qe wokonze wicoie kin eciyatanhan; tuwe, Melkizedek ouncage kin iyecen Wawayuśna ohinniyan nanka ce, Itancan kin heye ęa iyopeiciye kte *śni* ce, eciye ciqon hee *hecon*.

22 He iyecen wicotakuye ivo-

tan wašte kin en Jesus wayu-ecetu wan kagapi.

23 Wiconęe kin on, ohinniyan en un okitpanipi kin, heon hena wawayuśna kin otapi.

24 Tuka he qe owihanke wanin yanke cin, heon wośnapi wicoľian yutokecapica *śni* wan yuha.

25 Qa hecen tona iye eciyatanhan Wakantanka en upi kin hena owasin niwicaye kta okihi, hena wocekiye ewicakiciye kta e ohinniyan ni un kin heon.

26 Wawayuśna Itancan kin hececa he iyounkipipi, wakan, iyaponpepica *śni*, waaśape *śni*, qa waľtanipi sa wicicunonpa un, qa maľpiya kin sanpa wankantuya icahyapi.

27 He iye, wawayuśna kin hena iyecen, anpetu iyohi, tokaheya iye waľtani kin on, qa hehan oyate waľtanipi kin on etanhan wośna kte cin he iyecece *śni*; wancadan hecon, iye atayedan waiħduśna qon he ehan.

28 Woope kin he wicaśta waśakapi *śni* kin hena wawayuśna wicakaga ece; tuka wokonze wicoie kin, woope iyohakam un kin, he Cinhintkuyapi, owihanke wanin yawaštepi kin he kaga.

## WICOWOYAKE 8.

1 Taku nakaha unkeyapi yuptahnakapi kin he dee; Wawayuśna Itancan kin hececa unhapi, maľpiya ekta Otancanke oiýotanke etapa kin en kiyotanka;

2 Tipi wakan kin he, qa wakeya wicakapi kin, Itancan ticaga qa wicaśta akantu econpi *śni*, kin he en ookiye kin hee.

3 Wawayuśna otioyohi taku kicięupi, wośnapi ko wayuśna kta e kagapi; heon wicaśta kin



de is eya taku wayuśna hduhe kta e hecetu.

4 Maka akan un unkanś, Wawayuśna kin heca kte śni; wawayuśna woope kin eciyatanhan taku kiciçupi kin wayuśnapi ece kin hena yukanpi kin heon.

5 Hena oowa, qa taku maħpiyata un kin ohanzi kin en oħanyanpi ece; Moses wakeya qon kage kta hehan Wakantanka okiye ça, Awacin wo, ĩe kin ekta token wanyag niciyapi qon he iyecen owasin yakage kta ce, eciya.

6 Tuka nakaha iye wawokiyapi iyotan wašte wan yuha, wicotakuye wašte ĩinca, wahoyapi iyotan wašte kin en ahe cin he en wiciyotahedan un kin, heon etanhan.

7 Wicotakuye tokaheya kin he iyaonpepica śni unkanś, iyokihe kin he tuktedan kiyukanpi kte śni tuka.

8 Hena taku iyawicaonpe ça heya, Wanyaka wo, anpetu kin u kta, hena en Israel tiyohnaka, qa Juda tipi kin wicotakuye teca wicawecage kta, Itancan kin eya:

9 Egipta makoce kin etanhan awicawau kta e hena hunkakewicayapi kin nape wicamduze ciqon anpetu kin he en, wicotakuye wicawecage ciqon he iyecece śni; wicotakuye mitawa kin he miciyuhapi śni; qa heon miś ihawicawakta śni ce, Itancan kin eya.

10 Anpetu kin hena iyohakam wicotakuye wicawecage kte cin he dee; Hena wicotawacin kin en mitoope kin wicawaqu kta, qa cantepi kin akan owawa kta, qa miye Wakantanka mayanpi kta, qa miś hena mitaoyate wicawaye kta;

11 Qa wicašta otoiyoħi tuwe

ikiyadan ti, qa otoiyoħi hunkawanjitku kin onspewicakiyapi, qa, Itancan kin sdonya wo, eyapi kte śni; tuka owasin sdonmayanpi kta, wohakakta tankinkinyanpi ko:

12 Taku ecinśniyan econpi kin hena onśiwicawada kta, qa waħtanipi, wicoħan śica econpi ko, icimana wicaweciksuye kte śni ce, Itancan kin eya.

13 Taku teca cajeyate cin he tokaheya kin yutanina kin heon heya. Unkan taku tanina, qa takuni śni aye cin, he tanin śni iyaye kta kiyadan ihan.

### WICOWOYAKE 9.

1 Hehan awicakehan tokaheya qon he en woohoda wicoħan kin yukan, qa nakun makata tipi wakan.

2 Wakeya wan kagapi, tokaheya kin he ohna petijanjan ihupa, qa wahna wotapi, qa aguyapi taninyan ehnaƙapi kin, he tipi wakan eciyapi.

3 Qa ti cokahnakapi icinonpa mahen tanhan, he wakeya kin iyotan wakan eciyapi:

4 Hen mazaskazi oizinyapi kin, qa wicotakuye can koka kin akapatanhan owancaya mazaskazi akaħpeton, hee ohna mazaskazi cega manna ohnaƙapi kin, qa can sakadan Aaron tawa kin ĩea aye ciqon, qa wicotakuye inyan mdaska kin hena.

5 Qa he iwankapatanhan, wowan Cerubim wowaonśida ohe kin aohanziyapi; hena on nakaha atayedan taku unkeyapi kte śni.

6 Hena taku kin hecen yuśtanpi qehan, wawayuśnapi kin wakeya tokaheya kin en yapi, qa ohodapi wicoħan kin econpi ece.

7 Tuka icinonpa kin he en Wa-

wayuśna itancan kin ecedan, waniyetu otoiyo hi wancadan mahen i, qa we codan i śni, he iś iye atayedan on, qa oyate taku ecinśniyan econpi ko on en ai.

8 Heon Woniya Wakan kin hecen oyaka, Wakeya tokaheya kin nahahin ecen he cin icunhan, tipi iyotan wakan kin ekta canku kin nahahin yuotaninpi śni :

9 He ito kayehan wiyacinpi un, qa en taku wicaqupi wośnapi ko aipi, tuka hena e tuwe hecon kin nagi kin yuecedan kta okihi śni.

10 Hena e woyuecetu kte anpetu kin hehanyan, woyute, qa woyatke, qa woyujaja ota, econ wicaśipi kin.

11 Tuka Messiya, taku wašte u kte cin en, Wawayuśna Itancan ihdutanin, wakeya iyotan wašte qa yuśtanpi, nape on kagapi śni, wicoicage kin de etanhan śni, kin he ohna ;

12 Tatokadan qa ptejicadan we kin yuhe śni, tuka wopekitonpi owihanke wanin kage qa, iye we kin hduha wancadan tipi iyotan wakan kin timahen iyaya.

13 Hecen tatanka qa tatokadan we kin, qa pte heyuktanna caħota amnimnipi kin, tona waaśape cin wicayuecedan, qa wicaceħipi yuska kta e okihi hecinhan ;

14 Sam iyeya Messiya, Woniya owihanke wanice cin eciyatanhan, Wakantanka en iyaonpepica śni waiħduśna qon, he iye we kin, wiconte wicoħan kin etanhan nagi nipakintapi kta, Wakantanka ni un kin wowidag niyanpi kte cin heon.

15 Qa heon etanhan, Wicotakuye Teca kin en Iyotahedan un kin he iye, hecen wicotakuye tokaheya ihukuya waħitanipi qon

hena kajuju kta e on te cin, he eciyatanhan tona wicakico kin owihanke wanin taku tawapi kte cin iwahowicayapi qon he yuhapi kta.

16 Tukten wicotakuye wanji yukan hecinhan, hen wicotakuye kage cin he wanna ta e yuotaninpi.

17 Taku tapi kin hena on wicotakuye wowapi kin suta ece ; tuka wicotakuye kage cin nahahin ni un kinhan, he takudan okihi śni.

18 Unkan heon wicotakuye tokaheya qon he we codan yuecepidan śni.

19 Woope kin eciyatanhan, Moses woahope kin owasin oyate kin owicakiyaka yaśtan qehan, ptejicadan, qa tatokadan we kin icu, qa mini, taħinca hin duta, peji ħota ko, qa wowapi kin oyate kin owasin ko, awicamnimni ;

20 Qa heya, Wicotakuye Wakantanka econ niśipi kin we kin he dee ce.

21 Qa nakun wakeya kin, taku wakśica wowinyunyanpi kte cin owasin ko we amnimni.

22 Woope kin eciyatanhan taku owasin se we on pakintapi ; qa we papsonpi śni ehantanhan wokajuja wanica.

23 Heon etanhan, hena taku kin on, taku maħpiya ekta un iyacinpi kin pakintapi kta e hecetu ; tuka taku maħpiya ekta un kin hena e qe taku sanpa wašte wośnapi kin on.

24 Messiya tipi wakan nape on kagapi kin he mahen i śni, tipi wakan ħinca iyacinpi kin hena ee ; tuka maħpiya kin e qe mahen, qa heħiya unkiyepi on Wakantanka itokam ihdutanin kta.

25 Qa wawayuśna itancan kin he owanka wakan kin en, taku

tokeca we kin yuha, waniyetu otoiyo hi wancadan mahen i ece kin he iyecen ota akihde waihdusna kta iyeece s̄ni ;

26 He iyeececa unkanś, maka kagapi kin ehantanhan, wanna ota akihde kaki je kta tuka ; tuka nakaha woicage ihanke kin en, iye waihdusna kin eciyatanhan, woalitani yutokan iyeye kta e on taniniçiya.

27 Unkan wicašta kin wancadan țapi kte cin he iwahowicayapi, qa he iyohakam woyaco kta :

28 He iyecen Messiya, wicota wahtanipi kin yuhe kta e wancadan wayușnapi ; unkan, tona he wanyakapi kta ape yukanpi kin hena niwicaye kta e, woalitani codan, inonpa ihdutanin kta.

WICOWOYAKE 10.

1 Taku wašte u kte cin ohanzi kin he woope kin en un, qa hena atayedan taku kin ounce kin hee s̄ni ; heon etanhan, waniyetu otoiyo hi woșnapi ohinniyan aipi kin he tona en hipi kin wicayuecedan kta okihi s̄ni.

2 He okihi unkanś hena taku kin wayușnapi ayuștanpi kte s̄ni he. Tona en opapi wancadan pakintapi kinhan icimana woalitani sdonkiyapi kte s̄ni tuka.

3 Tuka hena on waniyetu otoiyo hi woalitani kiksuyapi ece.

4 Tatanka tatokadan kici hena we kin woalitani yutokan iyeye kta okihipica s̄ni.

5 Heon etanhan, makata hi qehan, Woșnapi, taku wicaqupi ko yacin s̄ni, qa tancan wan miyecaga ce, eya.

6 Peta woșnapi, qa woalitani on woșnapi kin hena iyonicipi s̄ni ;

7 Hehan, Ito wau, wowapi

tanka en miye on hecen owapi ce ; Wakantanka, nitawacin kin ecen ecamon kta ce, epa.

8 Wankan, Woșnapi, taku wicaqupi, peta woșnapi, qa woalitani on woșnapi kin ; woope eciyatanhan ahi wayușnapi kin ; hena yacin s̄ni, qa iyonicipi s̄ni, eye çehan ;

9 Hehan nakun, Wakantanka, nitawacin kin ecen ecamon kta wau ce, eye cin. Tokaheya kin he yutokan iyeya, icinonpa kin he hdusuta kte cin heon.

10 He iye tawacin kin ee on unyuecepidan, Jesus Messiya tancan wancadan wayușnapi kin he eciyatanhan.

11 Wawayușna otoiyo hi anpetu iyohi, en ohoda inajin, qa ohinniyan taku woșnapi ece kin hena ake ecekcen wayușna, hena woalitani kajuju kta tokadan okihi s̄ni.

12 Tuka wicašta kin de, woalitani on woșna wanjidan waihdusna, hehan Wakantanka etap kin eciyatanhan owihanke wanin kiyotanka ;

13 Qa hetanhan tona toka yapi kin hena owasin iye siha kin ihukun iyewicayapi kta ape yanka.

14 Woșnapi wanjidan on etanhan tona wicayuecepidan kin hena owihanke wanin wicahduștan.

15 Woniya Wakan kin he nakun unkiciyaotaninpi ; tokaheya eye ciqon he iyohakam ;

16 Anpetu kin hena iyohakam, wicotakuye wicawecage kte cin he dee kta, Itancan kin eya ; Mitoope kin hena iye cantepi kin en wicawaqu kta, qa tawacinpi kin en owakiwa kta ;

17 Qa iye wahtanipi, taku ecinșniyan econpi ko, icimana weksuye kte s̄ni.



18 Hena owasin kajujupi kinhan, woahtani on wošnapi kin wanice kta.

19 Heon, mihunkawanji, Jesus we kin eciyatanhan tipi iyotan wakan kin en waditagya unyanpi kte ;

20 Canku wan teca qa ni un, ti cokaya hnakapi, iye celpi kin hee, ohna unkiagapi kin he eciyatanhan.

21 Qa Wakantanka ti kin ohna Wawayušna Itancan wan unhanpi ;

22 Heon cante wicake linca hduha šogya wacinunyanpi qa ikiyedani unkupi kta, wicanagi sice cin etanhan uncantepi kin unkanmimipi ;

23 Qa mini ska kin on untan-canpi kin unyujajapi ; qa wacinunyanpi unhdotaninpi kin he yuhohopi šni unhduhapi kta ; tuwe wahounyanpi kin he wacinyepica :

24 Qa otoiyo hi awaunkicicini kta, wacantkiyapi, qa wicołan wašte en iyounkicipaštakapi kte cin heon.

25 Qa wanjikji econpi kin iye-cen mniunkiciyapi ece kin he unkayuštani kta šni ; tuka wahokonunkiciciyapi kta ; qa anpetu kin he kiyadan u wandakapi kinhan, sanpa nina ecanonpi kta.

26 Wowicake sdonyanpi kin unkiyapi kin he iyohaham iyokipiya waunhtanipi kinhan, woahtani on wošnapi kte cin wanica.

27 Tuka woyaco inihyanan aepi kin he, qa wocanniye ide kin, tona tokayapi kin hena ihangwicaye kta.

28 Tuwe Moses toope kin akta šni, nonpa qa iš yamni yaotaninpi kinhan, he onšidapi šni ta ece ;

29 Hecen tuwe Wakantanka Cinhintku we kin amani, qa wicotakuye we kin on yuecepidan qon he wakan šni dake ça, Wowaste Woniya kin he taku i en hiyeye cinhan, he wokakije iyotan tanka hiyahde kte šni kecan-nipi he.

30 Tokiçonpi kin he mitawa, towicaweciçon kta ce, Itancan kin eya ce, tuwe eye ciqon he sdonunyanpi. Qa ake, Itancan taoyate kin wicayaco kta ce.

31 Wakantanka ni un nape kin en ohinłpayapi kin he wokokipe.

32 Anpetu tokaheya kin kiksuya po, hena en iyoyamniyanpi, qa hehan wicokakije okicize tanka wan iyahdeniciyapi.

33 He icunhan waaiapi, wicokakije ko on iwanniyakapi kta enihdepi ; qa nakun tona hecawicakiconpi kin hena tawaši wicayayapi.

34 Miye makaškapi kin icunhan onšimayakidapi, qa woyuha duhapi qon nicipi kin he on wiđuškinpi, mahpiya ekta woyuha iyotan wašte ohinniyani ye kte cin he duhapi sdonyakiyapi kin heon etanhan.

35 Wadinitakapi qon he ayuštani šni po, he woyuha tanka okihi kta.

36 Wacinnitankapi kta iyececa ; hecen Wakantanka tawacin kin ecen ecanonpi kinhan, taku iwahounyanpi kin he iyacupi kta.

37 Wanna aškadan tuwe u kte cin he hi kta, qa yutehan kte šni.

38 Tuwe owotanna un kin he wacinyan un kin on ni kta. Tuka tuwe namni kinhan he minagi kin iyokipi kte šni ce.

39 Tuka tona wicotakuni šni ekta icicawin hdapi kin heunca-

pi šni ; tona wacanagi ni kta e on wicadapi kin hena unkiyepi.

WICOWOYAKE 11.

1 Wacinyanpi kin he taku aperi oae kin ee, qa taku wanyakapi šni un yuotanin kin hee.

2 He on hunka wicayapi kin yuonihanyan ihdaotaninpi qon.

3 Wacinyanpi kin eciyatanhan, Wakantanka oie kin on woicage kin icaliyapi kin he sdonunyanpi, taku wanyakapi un kin hena taku tanin kin etanhan kagapi šni.

4 Wacinyanpi kin eciyatanhan Abel Qain kape ça, wošnap iyotan wašte wan Wakantanka wakiyušna qon he on owotanna e hduotanin ; Wakantanka nakun hecen yaotanin, taku qu kin heon, qa he eciyatanhan ta keš nahahin ia ece.

5 Wacinyanpi kin eciyatanhan Henok wiconšte wanyake kte šni e tokan ayapi, qa tuktedan iye-yapi šni, Wakantanka tokan aye cin heon. Tokan ayapi šni itokam Wakantanka iyokipiye cin he okiyakapi.

6 Tuka wacinyanpi codan tuwedan iyokipiye kta okihi šni. Tuwe en u kinhan he Wakantanka ni un, qa tona aičiciya akitapi kin hena iyunwin wicaku ece kin he wicada kta.

7 Wacinyanpi kin eciyatanhan Nowa Wakantanka ihamna, taku nahahin wanyakapi šni kin hena, qa itonkipa un kin heon tiyohnaka tawa ni kte cin on wata tanka wan kaga ; qa iye ohan kin on oyate kin wicayaco, qa hecen woowotanna wacinyanpi eciyatanhan un kin he tawa kta e icaga.

8 Wacinyanpi kin eciyatanhan Abraham, makoce wan yuhe kte

cin he ekta ye šipi qehan, anagoptan, qa tokiya ye kte cin tanyan sdonkiye šni iyaya.

9 Wacinyanpi kin eciyatanhan makoce iwahoyapi qon he en ounyan, makoce tawa šni kin en iyececa, Isaak qa Jakob taku iwahoyapi qon om tawaye kte cin hena om wakeya ohna ti ece.

10 Otonwe wan taku ahde kin ahe cin he ape yanka, ticage ça icaliyeye cin he Wakantanka kin ee.

11 Wacinyanpi kin eciyatanhan, Sara iye qe cinca yuhe kta e wowašake icu, qa wanna waniyetu ece kin sanpa hiyu tuka cinca ton, tuwe iwahoye ciqon he wicaka e awacin yanke cin heon.

12 Heon wanjidan etanhan, qa he ta nun seca, tuka he etanhan wicota icaga, mahpiya wicanhipi kin iyenaka, qa miniwanca kahda wiyaka sukaza kin iyecen yawapica šni.

13 Dena owasin wacinyan tapi, taku iwahowicayapi qon nahahin icupi šni, tuka tehan tanhan wanyakapi, qa wicadapi, qa adoksohan icupi, qa maka akan oyate tokeca qa unhdaka unpi kin heca ihdaotaninpi.

14 Tona taku hececa eyapi kin hena makoce wanji akitapi e taninyan ohdakapi.

15 Unkan awicakehan makoce kin etanhan hiyupi qon he wacin en yuzapi unkanš, heciya ake ekta hdapi kta okihipi tuka.

16 Tuka nakaha wanji iyotan wašte mahpiya ekta wanke cin hee akitapi. Heon etanhan Wakantanka hena Wakantanka tawapi kin eciyapi kta ištece šni, qa otonwe wan wiyeya ewicakicihnaka.

17 Wacinyanpi kin eciyatan-

han, Abraham, iyutanyanpi qe-  
han, Isaak wahdušna, qa tuwe  
taku iwahoyapi qon wicada kin  
he cinhintku ecedan kin wahdu-  
šna.

18 Isaak etanhan wicoicage ni-  
tawa kin cajeyatapi kta ce, eci-  
yapi tuka qon.

19 Wiconŕe ee kaeš etanhan  
Wakantanka ekicetuya okihi he  
wicada ; qa hetanhan nakun wi-  
yacinpi on ehdaku.

20 Wacinyanpi kin eciyatan-  
han Isaak, Jakob qa Esa wica-  
hdawašte, taku u kte cin heon.

21 Wacinyanpi kin eciyatan-  
han Jakob, wanna ŕe kta hehan,  
Joseph cinhintku napin wicahda-  
wašte, qa cansagye oinkpa kin  
akan wocekiye eya.

22 Wacinyanpi kin eciyatan-  
han Joseph, wanna ŕe kta hehan,  
Israel cincapi kin hetanhan hda-  
pi kte cin he caje yate a, iye  
huhu kin aye wicaši.

23 Wacinyanpi kin eciyatan-  
han, Moses tonpi kin, hehan  
hunkakepi kin wi yamni hehan-  
yan anakihmanpi, hokšidan wa-  
šte e wanhdakapi, qa wicaštaya-  
tapi toope kin kokipapi šni.

24 Wacinyanpi kin eciyatan-  
han Moses wanna tanka icage  
ehan, Pharo cunwintku cinca  
eciyapi kta wicada šni ;

25 Wakantanka taoyate kin  
om kakija un kte cin he hda-  
hniĝa, qa woahani woyokipi  
kin he ptenyedana yuhe kta e cin  
šni ;

26 Messiya on aiapi kin he,  
woyuha Egupta en un kin sam  
iyeya wowijice tanka daka ; wo-  
kajuju iyunwin kin he awacin  
kin heon etanhan.

27 Wacinyanpi kin eciyatan-  
han Egupta makoce kin ayu-  
štan, qa wicaštayatapi tocanniye  
kin kokipe šni. Tuwe wanyag-

pica šni kin he wanyaka se ape  
yanka.

28 Wacinyanpi kin eciyatan-  
han wošnapi wohduze, qa we  
amninnipi kin hena kaga, tuwe  
cinca tokapapi kin ihangwicaye  
cin he iye owicayutan kte šni  
heon.

29 Wacinyanpi kin on Mde-ša  
kin he opta iyayapi, puze cin  
iyecen. Unkan Egupta oyate  
kin hecon utapi qehan, minin  
ŕapi.

30 Wacinyanpi kin eciyatan-  
han Jeriko conkaške kin makata  
ihpaya, anpetu šakowin ohomni  
unpi qehan.

31 Wacinyanpi kin on, Rahab  
witkowinna kin, tona anagoptan-  
pi šni kin om ihangyapi šni, ma-  
koce iwanyag hipi kin hena wo-  
okiyee on iyowinwicakiye ehan.

32 Qa taku sanpa epe kta he ;  
Gideon, qa Barak, qa Samson,  
qa Jeptha, qa Dawid, qa Samuel,  
qa wicašta wokcanpi kin owasin  
owicamdake kta anpetu kin iye-  
hankeca šni.

33 Hena wacinyanpi kin eciya-  
tanhan wokiconze kin ohiyapi,  
wicohan owotanna ohanyanpi,  
wahoyapi kin icupi, mnaja kin  
iohmusyapi ;

34 Peta wohitike cin kasnipi,  
maza sagye ope kin nakicipapi,  
wowašake šni etanhan wašagiči-  
yapi, okicize en waditaka icica-  
gapi, qa Ikcewicašta ozuye kin  
napewicayapi.

35 Winohinca kin cinca kiŕapi  
kin ekicetuyapi ewicahdakupi.  
Qa wanjikji nina kakišyapi, tuka  
etanhan ehdakupi kta cinpi šni,  
woekicetu iyotan wašte kin yu-  
hapi kte cin heon etanhan.

36 Qa wanjikji waaiapi, qa ni-  
na wicakaštakapi kin on iyutan-  
pi, qa nakun maza icicahihha, ka-  
ška wicahnakapi ko on.



37 Inyan on wicakininpi, can-ibakse on bawicaksapi, iyutan-wicayapi, mazasagye on wica-ktepi; tahinca ha qa tatokadan ha koyag manin unpi; taku owasin icakijapi, kakijapi un qa šicaya wicakuwapi.

38 Hena maka kin de iyewi-cakicihantu šni; hewoskan manin unpi, he kin akan, taku itu unpi otipi, qa makohdoka kin ohna.

39 Hena owasin wacinyanpi kin eciyatanhan tanyan ihdu-taninpi, qa taku wahoyapi kin ocowasin icupi šni.

40 Wakantanka taku sam iye-ya wašte unkiyepi on ehnaka, hecen hena e unkicunonpa tanhan wicahduštanpi kte šni.

### WICOWOYAKE 12.

1 Heon etanhan waayataninpi mahiyya šoka wan hinsko tanka aohdute unyanpi kin, hecen taku tkeya qinpi kin owasin eunhuakapi kta, woahitani ohinyanpi ece kin he koya, qa oinyanke unkitokam wanke cin he wacin tankaya unkinyankapi kta.

2 Qa Jesus wacinunyanpi kin toka kage ça hduštan kin hee ekta euntonwanpi kta. He iye, wowiyuškin itokam ehdepi qon he on, can susbeca kin hee kaes iyowinkiyeye ça, wowištece kin he taku da šni, qa Wakantanka oiyotanke etapa kin eciyatanhan kiyotanka.

3 Tuwe wahtanipi sa taku i en hiyeyapi kin he iye en walibayedan iyowinye ciqon he awacin po, hecen nitawacinpi kin ekta iconimnipi kte šni, qa wacin iboyašakapi kte šni.

4 Woahitani kici yecizapi kin en nahahin we kin ekta aiyahdeya ecanonpi šni.

5 Qa wowahokonkiye cinca iyecen oniciyapi kin he ayektonjapi he; Micinkši, Itancan wicakapsinsinte cin he šice dake šni wo, qa iyopeniye cinhan wacin ibošake šni wo, eye cin.

6 Itancan kin wicašta wašte-kida kinhan, he iyopekiye ça, cinca iyowinwicakiye cin otioyohi hdapsinsinta ece.

7 Wiyopeniyanpi kinhan, cinca kin iyecen Wakantanka ecaniconpi; tukte cinca kin he atku-ku iyopekiye šni he.

8 Tuka owasin en opapi ece kin iyecen iyopeniyanpi šni kinhan, tuwe cinca tanin šni kin henicapi, qa cinhintkuyapi uu kin henicapi šni.

9 Unkan, wicacehpi eciyatanhan atewicunyanpi kin hena iyopeunkiyapi ece, unkan wicunhduonihanpi hecinhan, sam iye-ya wicanagi Ateyapi kin he anungoptanpi kte ça on unnipi kta.

10 Hena e anpetu tonana hehanyan, token iyokipipi kin hecen iyopeunkiyapi; tuka he qe unwaštepi kte cin he on, hecen iye towakan kin en ounpapi kta.

11 Wiyopewicayapi kin owasin en icunhan woiyokipi šni, tuka woiyokišice; tuka ihakan tona hecawicakiconpi kin en wicoowotanna waskuyeca woo-kiye kin icalhwicakiya ece.

12 Heon etanhan wicanape kaozezeya un kin hena yuwan-kan icu po, qa hupahu wašake šni kin hena koya;

13 Qa nisihapi canku mdaya kicaga po, taku hušte kin he icunonpa iyeyapi kte šni, tuka okiziyapi kte cin heon.

14 Owasin en wookiye akita po, qa nakun wowakan kin, he tuwe yuhe šni kinhan Itancan kin wanyake kte šni.

15 Qa tuwe Wakantanka to-

## WICOWOYAKE 13.

waonsida kin iyohi kte sni naceca, heon aiciciya iwanihdaka po, okinni can hute paza icage ca, nagiyenyanpi kta, qa hecen wicota asamyapi kta.

16 Okinni wicawibomni wan yuke kta, qa taku wakan ohoda sni, Esa iyececa, he watokapa kin taku yutapi onspadan iyopekiya.

17 Qa iyohakam woyawašte kin hduhe kta, tuka heyata iye-yapi, he sdonyayapi, qa token tawacin yutokeca kte cin he iye-ye sni, istamnihanpe on nina akita tuka.

18 Paha oyutanpica, qa peta on ide qon he ekta yahipi sni, qa taku iyotan samya wanke cin, qa otpaza, qa nina icamna kin;

19 Qa nakun mazayahotonpi tanka hoton, wicoie ho kin hena koya; he tona nahonpi qon wicoie kin he akta owicakiyakapi kte sni e icekiyapi.

20 Taku econ wicasipi qon he okitpanipi; Woteca wan hee kaeš paha kin yutan kinhan he inyan on kininpi kta, qa is wanhinkpe on katpa iyeyapi kta ce.

21 Unkan he wanyakapi kin nina wowiniban, qa heon Moses, Nina mahniyanyan qa macancan ce, eya.

22 Tuka Zion Paha kin ekta yahipi, Wakantanka ni un otonwe tawa kin, Jerusalem mahpiya tanhan u kin, qa ohnihde unpi kin kektopawinge ota ekta;

23 Omniciye tanka, qa tokaheya wicatonpi okodakiciye kin, mahpiya ekta caje owicawapi kin hena, qa Wakantanka owasin wicayaco kin he, qa wicašta owotanna yuštanpi nagipi kin hena ekta;

24 Qa Jesus wicotakuye teca kin en iyotahedan un kin hee ekta, qa we amnimpipi kte cin, Abel sam iyeya taku wašte eye cin he ekta.

25 Ihnuhan tuwe ie cin anayagoptanpi sni kinhan; tona tuwe maka akan ie cion he anagoptanpi sni qon hena najicapi sni hecinhan, sam iyeya unkiye nanjicapi kte sni, tuwe mahpiya tanhan ie cin ihaunktapi sni kinhan.

26 Iye ho kin he ehan maka kin yahuhuza, tuka nakaha wahounyanpi qa heya, Ake wancadan maka ecedan mdahuhuza kte sni, tuka nakun mahpiya kin.

27 Unkan, Ake wancadan, eye cin he taku tona yahuhuzapi kte cin hena taku kagapi kin iyecen yutokan iyeyapi kta, hecen taku tona yahuhuzapica sni kin hena ecen he kta, he kapi.

28 Heon etanhan wokiconze yuhohopica sni kin unkipi, wowaonsida unhapi kta, hecen woyuonihan, wokokipe ko yuha Wakantanka iyokipiya ohoundapi kta.

29 Wakantanka unkitawapi kin he peta wahuňnaŕye cin heca.

## WICOWOYAKE 13.

1 Hunkawanjinkiciyapi wašte kicidapi kin he ecen un nunwe.

2 Oicimani kin wonwicaya akiktonjapi sni po; heconpi kin on wanjiksi mahpiya ohnihde kin sdonwicaye sni won wicayapi.

3 Tona kaška wicahnakapi kin hena om nicaškapi kin iyecen wicakiksuya po; qa tona kakis-yapi un kin hena koya, wicatanca kin ohna dukanpi kin heon.

4 Owasin en wakan kiciyuza-pi kin he woyuonihan, qa ohehdepi ašamyapi šni kin; tuka wicawihomnipi qa wawicifaħa-pi econpi kin hena Wakantanka wicayaco kta.

5 Waicucupikte cin wanin oyaħandapi kta, qa taku duhapi kin hena on iyonicipipi nunwe. Toħinni aciyuštan kte šni qa icimana eħpeciye kte šni, eye ciqon heon etanhan.

6 Heon, Itancan kin omakiye cin hee, qa he etanhan taku wicašta akantu ecamiconpi kte cin kowakipe kte šni ce, waditagya unkeyapi kta.

7 Tona awannihdakapi, Wakantanka oie kin oniciyakapi kin hena wicakiksuya po, hena wicoħan ibanke kin he awacin po, qa wacinyanpi qon he en opa po :

8 Jesus Messiya, ĩtanihan qa nakaha okonwanjidan, qa owihanke wanice kta.

9 Iħnuhan woonspe otakiya qa toktokeca on yutokan iyenianpi kinhan; woyute tona he awacinpi qon takudan okihiwicaye šni kin he wicacante kin yusuta šni, tuka wowaonšida kin on yusutapi kin he wašte.

10 Walna wošnapi wan unhapi kin he etanhan tona wakeya qon ohna oħanyanpi kin hena yutapi kta iyececapı šni.

11 Woteca, tona we kin woaħtani on, wawayušna itancan kin tipi wakan kin timahen ai qon, hena tancanpi kin tihocoka kin itankan ĩuħnaħyapi ece.

12 Heon Jesus iš eya, iye we kin on oyate kin wicayuecedan kta e otonwe tiyopa kin itankan kakišyapi qon.

13 Hecen iye on aiapi qon aħpeunyanpi kin yuħa ekta wico-ti kin tankan unyanpi kta.

14 Deciya otonwe ohinniyan ecen he cin unhapi šni, tuka wanji u kte cin he unkaķita-pi.

15 Heon etanhan, iye caje on, ohinniyan Wakantanka en wowitan wošnapi kin unkaupi kta, unkihapi etanhan waskuyeca, iye caje kin on, wounhdakapi kin hee.

16 Taku wašte econpi, qa wacantkiyapi kin hena akiktonjapi šni po, hena wošnapi kin Wakantanka iyokipi ece.

17 Tona wahokonniciyapi kin hena anawicakigoptan po, qa wicihukuya yeiçiya po, hena ninagipi kin on awanniyakapi, ohdakapi kte cin he iyecen; hecen wowiyuškinyan econpi kta, qa woyokišinya econpi kte šni; he niyepi kin on wašte.

18 Wocekiye unkekiciya po; wicanagi wašte unhapi unkecinpi, taku owasin en owotanna unkoħanyanpi kta uncinpi.

19 Tuka hecanonpi kta e iyotan ceciciyapi, kohanna niyepi ekta u mayanpi kte cin heon.

20 Unkan, Wookiye Wakan-tanka kin, Jesus Itancan unkiya-pi, taħınca awanwicahdake tanka kin he, wiconę etanhan ake ĩiyuye ciqon he wicotakuye owihanke wanica we kin eciya-tanhan,

21 Iye tawacin kin ecen eanonpi kta e, wicoħan wašte owasin en niyusutapi kte, qa taku iye išta kin en oiyokipi kin eanonpi kta, Jesus Messiya eciyatanhan; he wowitan owihanke wanica kicihan nunwe.

22 Mihunkawanji, ceciciyapi ce, wowahokonkiye wicoie kin iyowinkiya po, wicoie tonana on wowapi cicagapi.

23 Timotheos bunkawanjin unyanpi kin wanna kiyuškapi e



sdonya po, he ecadan u kinhan kici wanciyakapi kta.

24 Tona niyepi en itancanpi kin hena owasin, qa tona owotanna un kin owasin nape wica-

yuza po. Italia etanhanpi kin hena nape niyuzapi.

25 Wowaonšida kin niyepi owasin en nicipi un nunwe. Amen.

## JAKOB

### TAWOWAPIKIN.

#### WICOWOYAKE 1.

1 Jakob, Wakantanka taokiye, qa Jesus Messiya Itancan tawa kin he, wicowazi akenonpapi enanakiya eyaye cin hena *wowapi wicakicaga*; wookiye.

2 Mihunkawanji, taku wawiyutanyan un kin ota ayakipapi kinhan, he wowiyuškin ocowasin hdawa po:

3 Wacinyayapi iyutanpi kin he wacintankapi kaga e sdonyayapi.

4 Tuka wacintankapi kin he tohan kin tanyan hduštan kte; hecen niyuštanpi qa ocowasin yaunpi kta, qa takudan iyoni-tpanipi kte šni.

5 Niyepi etanhan tuwe woksa-pe nice cinhan, Wakantanka kida kta, iye owasin iyakiçuya wicaqu ece, qa iyopewicaye šni; unkan qupi kta.

6 Tuka takudan ceṭunhda šni wacinyan kida kta; tuwe waceṭunhda kin he miniwanca taja kin iyececa, tateyanpa kaškanškan qa kaħoya elpeye cin.

7 Wicašta kin he Itancan kin etanhan taku icu kta kecin kta iyecece šni.

8 Wicašta tawacin nonpa kin he tacanku owasin ohna kaktihanhan un ece.

9 Hunkawanjinkiciyapi walpa-

nica kin yuwankan iyeyapi kinhan, heon iyuškin kta.

10 Tuka wijica un kin yuwahpanicapi kinhan, on iyuškin kta; peji lica kin he iyecen tokan aye kte cin heon.

11 Anpetu wi kin hinanpe ça kata aya eca, wato kin šnišya ece, qa walica ilipaye ça owanyake wašte kin he atakuni šni ece: he iyecen wicašta wijica kin iye tohan kin en awihnuni kta.

12 Wicašta iyutanyanpi kin he yawaštepi ece; tohan tanyan yukcanpi kinhan, hehan wiconi watešdake, Itancan kin tona waštedakapi iwahowicaye ciqon, hee icu kta.

13 Tuwe iyutanyanpi kinhan, Wakantanka iyutanmayan ce, eye kte šni: Wakantanka taku šica on iyutanyanpi kta okihi šni, qa nakun tuwedan iyutanye šni.

14 Tuka wicašta otioyohi iye cantiheye šice cin on iyutanpi qa iyakapeyapi ece.

15 Hehan wocantiheye šice cin icage cinhan woahṭani kaga; qa woahṭani yuštanpi eca, wiconṭe icalya ece.

16 Mihunkawanji wašte, içihnyanpi šni po.

17 Taku wicaçupi wašte qa yuštanpi kin owasin wankantan-

han un, qa iyoyanpa Ateyapi kin eciyatanhan kun u ece; iye qe tokeca šni, qa yuhomnipica šni hinca.

18 Iye tawacin kin eciyatanhan, wowicake oie kin on cinca unkgapi, hecen taku kage cin ehna unkiye waskuyeca tokaheya iyeuncecapi kta.

19 Heon etanhan, mihunkawanji wašte, wicašta otoiyohti wanañon oñanko kta, ie kapin kta, qa wacintanka kte:

20 Wicašta šinhdapi kin he Wakantanka toowotanna kin icalye šni.

21 Heon etanhan, wicowahtešni kin owasin, qa taku šica iyatahdepi kin eñpeya po; qa wicoie ninagipi niye kta okihi kin he onšiičiya icu po.

22 Tuka wicoie kin ecen econ po, qa iye içihnayanpi, nañonpi ecedan, unpi šni po.

23 Tuwe wicoie nañon ešta ecen econ šni kinhan, he wicašta wan ihdiyomdasin on ite iwanihdake cin iyececa;

24 Iwanihdake ça tankan iyaya, unkan hehan hinnakaha ite tokeca kin he akiktonja ece.

25 Tuka tuwe wicoope on tawaiçiyapi yuštampi kin he opañta yanke ça, en un kinhan, tuwe nañon qa akiktonje cin heca šni, tuka wicoñan econ kin heca, hee e taku econ kin en yawaštepi kta.

26 Tuwe niyepi kin etanhan woohodapi kin en opa se ececa hecinhan, qa ceji hdaške šni, tuka iye cante içihnaye cinhan, he woohodapi ope cin he taku šni.

27 Wakantanka qa Ateyapi kin itokam woohodapi opapi ecedan qa ašape šni kin he dee; Wamdenica qa wiwazica kakiçapi eca en wicahipi, qa wicoi-

cage kin en taku iyaonpepica šni ihduhapi kin hee.

## WICOWOYAKE 2.

1 Mihunkawanji, Jesus Messiya, wowitan Itancan wacinyanpi kin, on wicašta iwandaka, kte cin he yuhapi šni po.

2 Nitomniciyepi kin en, wicašta wan mazaskazi napcupe yuhe ça wokoyake wašte kiçun kin en hi kinhan; qa nakun wicašta wañpanica wan heyake šica un kin en hi kinhan;

3 Qa tuwe wokoyake wašte kiçun kin he tanyan ayatonwanpi, qa heyakiyapi, Oiyotanke wašte kin de en hiyotanka wo; qa wicašta wañpanica qon, Hen najin wo, qa íš, siha wahde kin ihukuya hiyotanka wo, eyakiyapi kinhan;

4 Otoiyohti tanyan canteyeci-yuzapi šni, qa wicotawacin šica eciyatanhan widukcanpi šni he.

5 Nañon po, mihunkawanji wašte; Wakantanka maka akan wañpanicapi kin hena wicakaliniga he, wacinyanpi on wijiçapi, qa tona iye waštadakapi wokiconze iwahowicaye ciqon he tawayapi kte cin.

6 Tuka niye wañpanicapi kin wahtewicayadapi šni. Wijicapi kin hena iyotanhan iyeniciyapi šni, qa woyaco oiyotanke kin en aniyampi šni he.

7 Wicacaje wašte on cajiñiyatapi ece kin he yašicapi šni he.

8 Wowapi kin eciyatanhan, woope iyotan wašte, Nikiyedani un kin niye inihdacin waštewardake kta ce, eyapi kin he ecen ecanonpi kinhan, tanyan ecanonpi kta.

9 Tuka wicašta token ihduze cin ekta eyatonwanpi kinhan, woahñtani ecanonpi, qa woope

kin on śicaya econ oniyakapi ece.

10 Tuwe woahope owasin yuha ešta, wanjidan kicakse cinhan, he ocowasin on yacopi.

11 Tuwe, Wawicihalapi ecanon kte śni ce, eye ciqon he is nakun, Wamayanon kte śni ce, eya. Unkan wawicihalapi takudan ecanon śni ešta, wamayanon kinhan, wanna woope kin kiyecaksa.

12 Tona woope on tawaiçiyapi kin on wicayacopi kte cin hena iyecen iapi, qa econ po.

13 Tuwe waonśida śni kin he wowaonśida wanin woyaco ecedan qupi kta; qa wowaonśida woyaco kin kapeya iyuskin ece.

14 Mihunkawanji, tuwe wacinyan keya ešta, iyecen wicoħan yuhe śni kinhan, he taku iyokihiki kta he. Wacinyan un kin he niyan okihi he.

15 Nihunkawanji qa nitawinohitin tancokapidan, qa anpetu iyohi woyute nicapi kinhan;

16 Qa wanji hewicayakiyapi, Wookiye on hdapo, cosiciyapi qa wipiçiya po; tuka taku wicatančan icakije cin hena wicayaqupi śni ehantanhan, taku iwaštepi kta he.

17 He iyecen wacinyanpi kin, wicoħan codan kinhan, he wana ĩa, isnana un kin heon.

18 Han, tuwe heye kta; Niye wacinyan yaun, qa miye wicoħan mduba; hecen wacinyaye cin he nioħan codan makipazo wo, kinhan mioħan kin on wacinwaye cin he cicipazo kta ce.

19 Taku Wakan kin wanjidan he wicayada; he tanyan ecanon; taku wakan śicapi kin is eya wicadapi qa cancanpi ece.

20 Tuka, wicašta wacinton śni kin, wacinyanpi wicoħan codan kin he ĩa e sonyaye kta he.

21 Abraham ateunyanpi kin lie, cinhintku Isaak wahna woħnapi akan wahduřna qon he ehan, wicoħan on yaowotanpi śni he.

22 Qa iye oħan kin kici wacinye cin token oħanye ĩa, wicoħan on wacinye ciqon he yuřtanpi e wandaka he.

23 Unkan hecen wowapi kin, Abraham Wakantanka wicada, unkan he woowotanna kiciyawapi, qa he Wakantanka takicuwa eciyapi ce, eyapi qon he yueceptupi.

24 Heon, wacinyanpi ecedan on etanhan śni, tuka wicoħan kin on wicašta owotanna yawapi ece he wandakapi.

25 Nakun Rahab witkowinna kin ohnihde unpi qon hena iyowinwicakiye ĩa canku tokeca ohna hde wicaři qehan, is eya wicoħan on owotanna yawapi śni he.

26 Wicatančan kin woniya codan un kin he ĩa ece, he iyecen wacinyanpi kin wicoħan codan kinhan, he nakun ĩa ece.

### WICOWOYAKE 3.

1 Mihunkawanji, wicota waonspekiya unpi śni po; woyaco iyotan tanka unkiçupi kta e sdonyayapi.

2 Owasin taku ota on waunħtanipi ece. Tuwe oie on waħtani śni kinhan, he wicašta yuřtanpi qa tancan ocowasin hdaře kta okihi.

3 Wanyaka po, řuktanka anaungoptanpi kta e heon iikiyuwi i kin en iyewicunkiciyapi; qa tancanpi ocowasin wicunyuħomnipi ece.

4 Wita wata kin hena nakun wanyaka po, tankinkinyan qa tate ohitika on kaha iyeyapi ešta, iyupse yuza cistinna on



token itancan kin cin eca, yu-homnipi ece.

5 He iyecen wicaceji kin taku cistinna, tuka tanka içida ece. Iho, peta cistinna keş can tanka ideya ece.

6 Wicaceji kin he peta, qa woahtani iyatahdepi; hecen wicaceji unuhapi kin ehna un, wicatanhan kin ocowasin aşamya, qa wicoicage ohomniyan aideye ça, iş eya wakanşica ti kin etanhan ideciya.

7 Woteca ocaje owasin, qa taku kinyan unpi, taku sdohan unpi qa miniwanca mahen unpi kin, henakiya etanhan wicaşta wanunyanpi wicakage ça wicayuha :

8 Tuka wicaceji kin he tuwedan yuwahbaka okihi şni; he woşice wicaşta şni, pejihuta şica on wicaşa ece kin he ojudan.

9 He on Wakantanka Ateyapi kin unywaştepi; qa he on wicaşta akantu, Wakantanka oun-cage iyecen kagapi kin hena wicunyaşicapi ece.

10 Wicai wanjidan etanhan wayawaştepi qa wayaşicapi kin hinanpa ece. Mihunkawanji, hena hecetu şni.

11 Miniyowe wan oenape wanjidan etanhan, mini waşte qa nakun mini pa linca hiyuya he.

12 Mihunkawanji, suken can wan Oliwe waskuyeca aicaga, qa iş hastanyanka iyuwi wan suken waskuyeca okihi he; he iyecen miniyowe wan mini waşte qa nakun mini pa linca hiyuye şni ece.

13 Enitanhanpi tuwe wicaşta ksape ça wiyukcan un he; woksape wowalibadan on tanyan ahduhe cin eciyatanhan iye ohan waşte hduhanin kte.

14 Tuka winawizipi pa linca,

qa wakinicapi nicantepi kin en duhapi kinhan, ihnuhan widuşkinpi qa wowicake kin on iyatonpi şni kin.

15 Wicoksape kin he wakan-tanhan u şni; tuka maka kin etanhan, wicacelipi etanhan, qa wakanşica iyececa.

16 Tukten winawizipi qa wakinicapi yuke cinhan, wicotoke-tu tanin şni qa wicohan şica owasin hen un ece.

17 Tuka woksape wakan-tanhan un kin he tokaheya ecedan, hehan wokiyapi kaga, walibadan, waanagoptan, wowaonşida qa waskuyeca waşte on ojudan, owotanna wiyukcan qa owotan-na wohdaka ece.

18 Unkan tona wookiye kagapi kin hena woowotanna waskuyeca kin wookiye en owicakicijupi ece.

#### WICOWOYAKE 4.

1 Niyepi ekta wicokicize qa wakinicapi kin tokiyatanhan u he; cantiheyayapi şica nihuhapi en wakis un kin hena eciyatanhan şni he.

2 Cantiheyayapi tuka duhapi şni; wicayaktepi qa yuhe wacannipi, tuka icu oyakhipi şni; wicayakizapi qa zuya dapi, tuka taku duhapi şni, yadapi şni kin heon etanhan.

3 Yadapi tuka iyacupi şni ece, ecinşniyan yadapi kin on, cantiheyayapi şica on dusotapi kte cin heon.

4 Wiinayahmanpi qa wawicihaşhapi ecanonpi kin, wicoicage kin de waştedapi kin he Wakantanka şicedaka e sdonayayapi şni he. Heon tuwe wicoicage kin de wotakuye wacin kinhan, he Wakantanka tokaya.

5 Wowapi wakan kin, Woniya en unyakonpi kin he winawizipi

cantiheya ce, ituya eya idukcanpi he.

6 Tuka sanpa wowaonśida wicaqu ece; heon heya, Wakantanka wañaniçidapi kin wicakipajin, tuka tona onśikihanpi kin hena wowaonśida wicaqu ece.

7 Heon etanhan, Wakantanka ihukuya iyeçiya po. Wakanśica kipajin po, kinhan nanicipapi kta.

8 Wakantanka ikiyeddan u po, hecen is nikiyepidan u kta. Wahanipi sa, nape hdujaja po; qa wacin ninonpapi kin, cante hducepidan po.

9 Iyokiśicapi, waśihdapi qa ceya po; iyahapi kin he wicaceya ee kta, qa widuśkinpi kin he woiyokiśice kta.

10 Itancan kin itokam makata ehpeiçiya po, kinhan yuwankan inicupi kta.

11 Mihunkawanji, otoiyo hi akiçiapini po. Tuwe hunkawanjitku aie ça hunkawanjitku hdao kinhan, he woopu kin aie ça woopu kin yaco; tuka woopu kin daco kinhan, woopu kin ecen econpi kin henica ŗni, tuka wacyaco kin henica.

12 Woopu kage cin he Wanjiñdan, he wanikiye ça nakun waihangya okihi. Wicaśta tokeca daco kin niś nituwe he.

13 Iho po, nakaha tona hehapi; Dehan, qa is heyakecinhan, otonwe kin kae ekta unyanpi qa waniyetu wani en unyakonpi kta, wopeuntonpi qa wiyopeunyanpi qa taku unkamnanpi kta ce.

14 Tuka heyakecinhan taku u kte cin sdonyayapi ŗni; yanipi kin he taku he, opo wan cistiyeñdan tanin qa hehan atanin ŗni kin he heca.

15 Kaken ehapi kta iyececa; Itancan kin iyowinunkiyapi qa

unnipi kinhan, decen qa is kaken econkupi kta ce.

16 Tuka nakaha wañaniçidapi kin on iduśkinpi; hecen wiyuśkinpi kin owasin ŗica.

17 Heon etanhan, tuwe taku wašte econ kta sdonkiya tuka econ ŗni eca, he woahñani içiçaga ece.

## WICOWOYAKE 5.

1 Iho po, tona wijica yaunpi kin, wokakije nihiyahdepi kte cin hena on ceyapi qa ŗicahowaya po.

2 Woyuha nitawapi kin kuka, qa nitawokoyake kin wamduśkadan yapotapi.

3 Mazaskazi qa mazaska nitawapi kin gigi aya; qa gigi kin he niyutaninpi kta, qa nicehpipi kin ihangye kta, peta iyececa. Woyuha anpetu ehake kin amnaniciyapi.

4 Wanyaka po, tona maga nitawapi abaksapi wokajuju hnaye ayanicapi kin he howaya; qa tona aguyapi baniciksapi qon hoyeyapi kin he Sabaoth Itancan noqe kin en hiyołpaya.

5 Maka akan woiyokipi imnanhan yaunpi qa tanyan wayatapi ece; wapatapi anpetu kin en iyecen cante cemyakiyapi.

6 Wicaśta owotanna kin he dacopi qa yaktepi; tuka nicipajinpi ŗni.

7 Heon etanhan, mihunkawanji, Itancan kin hi kte cin hehanyan wacintanka po. Wanyaka po, wicaśta woju ece kin he maka waskuyeca wašte aicage cin hena ape yanke ça, on tehan wacintanka, magaju tokaheya qa nakun ehake kin ahinhe kte cin hehanyan.

8 Niś eya wacintanka po; cante hduşuta po; Itancan kin u kte cin he wanna kiyedan ihan.

## I. INYAN.

9 Mihunkawanji, otoiyo hi oki-  
cihinyanpi šni po, okinni niya-  
copi kta. Wanyaka po, Wayaco  
kin he tiyopa kin itokam inajin.

10 Mihunkawanji, wicašta wo-  
kecan Itancan caje kin on iapi  
qon hena kakijapi qa wacintan-  
kapi on waonspekiya wicayuha  
po.

11 Wanyaka po, tona wacin-  
tankaya unpi kin hena wašte ke-  
canwicunkinpi ece. Job token  
wacintanka qon he nayahonpi,  
qa Itancan owihankeye cin he  
wandakapi; Itancan kin waon-  
šida qa wawacinkta yuza tanka.

12 Tuka mihunkawanji, taku  
owasin isanpa, Taku namahon  
ce, eyapi šni po, mahipiya kin he,  
qa maka kin de, qa taku tokeca  
cajeyatapi ece kin nakun; tuka,  
han, ehapi kin he han ecedan  
kta, qa, hiya, ehapi kin he hiya  
ecedan kta; okinni woyaco kin  
en iyoyañpadapi nun ce.

13 Niyepi kin etanhan wanji  
kakija he; wocekiye eye kta.  
Wanji wiyuŝkin he; odowan  
ahiyaye kta.

14 Niyepi kin ekta wanji wa-  
yazanka he; okodakiciye kin en  
hunkawicayapi kin wicakico

kta; on cekiyapi qa Itancan ca-  
je kin on wihti on sdayapi kta.

15 Unkan wacinyan cekiyapi  
kin he wayazanke cin asniye  
kta; qa Itancan kin he najinki-  
ye kta; qa woahitani econ he-  
cinhan, hena kicicajujupi kta.

16 Wayahitanipi kin otoiyo hi  
okiciciyakapi qa otoiyo hi woce-  
kiye ekiciciya po, hecen anisni-  
pi kta. Wicašta owotanna nina  
waŝagya cekiyeye cin he taku  
tanka okihi ece.

17 Elijah wicašta wacinyuza  
iyeuncecapi, qa wocekiye on  
magaju kte šni e icekiya; unkan  
waniyetu yamni sanpa wi ŝakpe  
hehanyan maka kin ahinhe šni.

18 Hehan ake wocekiye eya,  
unkan mahipiya kin magaju hi-  
yuye qa, maka kin waskuyeca  
icaliya.

19 Mihunkawanji, wanji eni-  
tanhanpi wowicake kin etanhan  
nuni, qa tuwe he ake ekta yu-  
homni kinhan,

20 Tuwe wicašta wahtani sa  
wan canku onuni kin etanhan  
yuhomni kinhan, he wicanagi  
wan wiconŝe etanhan eyaku kta,  
qa woahitani ota akañpe kta e he  
sdonkiye kta.

## INYAN

### TAWOWAPI TOKAHEYA KIN.

#### WICOWOYAKE 1.

1 Inyan, Jesus Messiya yeŝi  
qon, wicašta toktokeca enana-  
kiya unpi, Pontus, Galatia, Kap-  
padokia, Asia qa Bithunia ekta,

2 Wakantanka Ateyapi kin oto-  
kaheya tanhan sdonwicaye cin

eciyatanhan, qa Woniya wica-  
yuecedan kta on wicakahniga,  
anagoptanpi kta, qa Jesus we  
kin awicamnimni kta e on, hena  
*wowapi wicakicaga*: Wowao-  
šida en niunpi, qa woikiye nici-  
yuotapi nunwe.

3 Wakantanka, Jesus Messiya



Itancan unyanpi Atkuku kin he yawaštepi nunwe ; iye towaonšida ota eciyatanhan Jesus Messiya wicašte cin etanhan kinikiye ciqon he on wowacinyan ni un kin en piya icalunyanpi ;

4 Woaihpeye wan liwinpica šni, ašapapi šni, qa ohinniyan un kta, małpiya ekta enicihnakapi kin on ;

5 Wacinyanpi eciyatanhan Wakantanka towašake kin on wiconi anikpatanpi, ege anpetu ehake kin en yutaninpi kta.

6 Heon nina iduškinpi ece, tuka nakaha ptenyedani, he hecetu naceca, taku wawiyutanyan un kin ota on iyonicišicapi :

7 Hecen wacinyayapi iyutanpi kin, he mazaskazi peta ece on šdoyapi keš atakuni šni ece, sam iyeya nina tełike cin he woyao-nihan, wicakinihanpi qa wowitan on tanin kta, tohan Jesus Messiya ihdutanin kinhan.

8 He wandakapi šni ešta wašteyadakapi ; qa nakaha wanyake šni yaunpi keš wacinyayapi kin on iduškinpi, wowiyuškin oyagpica šni qa wowitan ojudan kin on :

9 Wacinyayapi ihanke kin iya-cupi, ninagipi ni kte cin hee.

10 Wiconi kin he on, wicašta wokcan wowaonšida en niunpi kin he oyakapi qehan, aičiciya akitapi qa wiwangapi ;

11 Messiya Taniya iyepi en un kin, tohantu qa anpetu kin tukte e ka e iwangapi, Messiya kakije kte qa wowitan ihakam un kte cin hena itokam oyake ciqon he ehan.

12 Unkan, iš iyepi kte šni, tuka tona wotanin wašte, Woniya Wakan małpiya eciyatanhan kun u šipi kin iyahna sdonyen-yanpi kin ege nakaha taku onic-iyakapi kin hena unkiyepi on yuhapi e owicakiyakapi ; taku

kin hena małpiya ohnihde kin en eyokasin wacinpi.

13 Heon etanhan, nitawacin nisehu kin opta ipiyagkiton po, waktaya un po, qa Jesus Messiya ihdutanin kinhan wowašte ni-caupi kte cin he ape yukan po, owihanke kin hehayan.

14 Wicacinca waanagoptanpi kin iyenicecapi kta, qa ehanna wasdonye šni yaunpi qehan can-tiheyayapi šica ake iyecen niči-cagapi kte šni.

15 Tuka tuwe nicopi kin he wakan, he iyecen niš eya oya-handapi kin ocowasin en niwakanpi nunwe.

16 Heon hecen owapi qon, Wakanyan un po, miye mawakan kin heon etanhan.

17 Qa Ateyapi kin wicašta ito-hnake iwanyake šni wicašta oto-iyohi iye oħan kin eciyatanhan wicayukan ece kin he hoyeyakiyapi kinhan, tohanyan den unhdaka yaunpi kin kokipeyahan un po.

18 Witkotkoya oya-handapi kin, nihunkakepi wohdakapi eciya-tanhan duhapi qon he etanhan, taku atakunišni ece, mazaskazi qa mazaska on openicitonpi šni e sdonyakiyapi ;

19 Tuka Messiya we tełike cin he on, taħin wanunyanpi cincadan, taku iyaonpepica šni qa ecedan un kin iyececa.

20 Iye qe maka kin de kagapi šni itokam wakiconzapi, tuka anpetu ihankeya kin dena en yutaninpi, niyepi kin on ;

21 Wakantanka wicašte cin etanhan najinkiye qa wowitan qu qon he wicayadapi, iye eci-yatanhan ; hecen wicayadapi qa wacinyayapi kin he Wakantanka en un kta.

22 Woniya kin eciyatanhan wowicake anayagoptanpi kin

heon nagi nihduskapi, hunka-wanjinkiciyapi kin awicakehan waštewicayadakapi kta, heon cante ecedan on otoyohi nina waštেকicidaka po.

23 Piya icalñiyanpi, oicage kuke kte cin etanhan šni, tuka kukepica šni kin on, Wakantanka oie kin ni un qa owihanke wani-ce kte cin hee on.

24 Wicacełpi owasin peji iye-ceca, qa wicašta towitan kin owasin peji lica kin iyececa. Peji kin he šniš aye ça wałica kin hinłpaya ece ;

25 Tuka Itancan oie kin he owihanke wanin un kta. Unkan wotanin wašte oniciyakapi kin wicoie kin he hee.

## WICOWOYAKE 2.

1 Heon etanhan, wocanniye owasin, qa wohñaye ocowasin, qa woanakiłbe, qa wowinawizi, qa iapi šica iyulpa ehpeya po ;

2 Qa hokšiyooqopa nakaha tonpi kin iyecen, wicoie asanpi wohñaye wanin un kin he cin po, hecen on inicagapi kta :

3 Itancan kin wacantkiya e uyatapi hecinhan.

4 He en yahipi, inyan wan ni un kin iyececa, wicašta akantu ehpeyapi, tuka Wakantanka e kałñige ça tełike daka ;

5 Unkan niš eya, inyan ni un kin iyececa, tipi wakan wan en icalñiyanpi, wawayušnapi wakan kin, hecen wošnapi wakan qa Jesus Messiya eciyatadhan Wakantanka iyokipi kin wadušnapi kta.

6 Heon etanhan nakun wowa-pi en kagapi qon, Wanyaka po, Zion en inyan wan oise pa lin-ca ewahde, kałñigapi, tełika ; unkan tuwe he wacinye cinhan wištece kte šni ce.

7 Niye wacinyayapi kin he te-łike yadapi ; tuka tona waanago-ptanpi šni kin hena, inyan tipi kagapi ehpeyapi qon he oise pa linca icaga, inyan on siha iboto-pi qa imnija on šinhdapi ece kin hee ;

8 Tona wicoie kin on šinhdapi qa waanagoptan šni unpi kin he-na on ; heon hecen ewicalhdepi.

9 Tuka wicoicage kałñigapi, wawayušnapi wicaštayatapi, wicoun wakan, qa oyate opewica-ki-tonpi kin he niyepi ; hecen tu-we otpaza etanhan, iye iyoyan-pa wakan tawa kin en nicopi kin he ołhan wašte kin odakapi kta.

10 Ehanna oyate henicapi šni, tuka nakaha Wakantanka tao-yate yaunpi ; he ehan onšinida-pi šni, tuka wanna wowaonšida iyoyahipi.

11 Waštecicidapi, ceciciyapice, oyate tokeca qa unhdaka unpi kin iyecen wicacełpi cantiheya-pi kin, wicanagi kin kiei kicize cin, hena ayušan po :

12 Qa Ikcewicašta ehna owo-tanna ołhayan po ; hecen šica-ya econ keniciyapi keš, wiwica-wangapi anpetu kin en, niolhan-pi wašte wanyakapi kte cin he-na on Wakantanka yaonihanpi kta.

13 Itancan kin on etanhan, wicašta akantu wakonzapi kin owa-sin anagoptan po ; wicaštayata-pi kin he iyotan tanka ;

14 Qa wicašta itancanpi kin iš tona šicaya ołhayanpi šitkiłhda-wicayapi kta, qa tona tanyan econpi wicayaonihanpi kta e on u wicaši kin hena.

15 Hecen Wakantanka tawa-cin, tanyan oyałhandapi kin on wicašta witkotkoka wiyukcan šni kin hena inina yankewicaya-kiyapi kta.

16 Nihduhapi, tuka tawaniçiyapi kin he wocanniye onhoñda iyecen yeçunpi kte ñni, tuka Wakantanka tawowidake kin iyececa.

17 Owasin wicayuonihan po. Hunkawanjinkiciyapi kin wašte-kida po. Wakantanka kokipa po. Wicaštayatapi kin yuonihan po.

18 Wowidake yaunpi kin, tona niyuhapi kin ocowasin kokipeyahan anawicagoptan po, tona wašte qa walibadan kin hecedan ñni, tuka tona ksizece cin hena nakun.

19 Tuwe Wakantanka awacin un kin on, hecetu ñni ešta kakişyapi qa woyokişice yuha un kinhan, he wowašte.

20 Wayahtanipi kin on anipapi, qa wacinnitankapi kinhan taku iyokihi kta he ; tuka tanyan ecanonpi kin on kakişniyanpi kinhan, wacinnitankapi hecinhan, he Wakantanka iyokipi.

21 Unkan he on nicopi ; Messiya unkiyepi on kakije ça wonspe aihpeunkiyapi kin he iyecen niş eya iye owe kin en opa dapi kta.

22 Iye qe woahitani takudan econ ñni, qa i kin ohna wohnaye takudan iyeyapi ñni ;

23 Kigepi qehan itkom wicakige ñni ; kakişyapi he ehan owawicakiye ñni ; tuka tuwe owotanna wiyukcan ece kin he en ihdoya.

24 Iye hinca can akan un qehan, iye tancan kin en waunhtanipi kin yuha ; hecen unkiye woahitani ehpeunyanpi woowotanna en unnipi kta : Iye apapi qon on asniniyanpi ce.

25 Tahin wanunyanpi nunipi kin iyenicecapi ; tuka wanna tuwe wonniyanpi qa nagi awanniyakapi kin he ekta yahdipi.

## WICOWOYAKE 3.

1 He iyecen, winohncapi kin, nihihnapi wicihukun un po ; hecen tona wicoie kin anagoptanpi ñni kin hena, wicoie codan ešta, iye tawicupi ohanpi kin on iyakapewicayapi kta ;

2 Niohanpi wašte wokokipe iyahna wanyakapi kin icunhan.

3 Ihduzapi kin he akantanhan, paha kisonpi, qa mazaskazi oinpi, qa wokoyake unpi kin hee kte ñni :

4 Tuka wicašta mahentanhan cante kin ekta, taku hwinpica ñni kin, tawacin walibadan qa inina un, he Wakantanka itokam taku tehike cin ee.

5 Is eya, wanakaja, winohinca waštešte Wakantanka wacinyanpi qon hena e hecen kiçunpi, qa hihnakupi kin wicihukun unpi.

6 Hecen Sara Abraham anakigoptan, qa, Itancan, eciya ece ; he cunksiwicaye cin hena niyepi, tanyan ecanonpi qa wokokipe takudan on niyuşinyayapi ñni kinhan.

7 Nakun wicašta yaunpi kin, wosdonye eciyatanhan om yukkan po, nitawinpi wakşica wankadan iyececa, qa om wiconi wowašte kin tawaniçiyapi kta iyecen wicahduonihan po ; hecen wocekiye nitawapi kin kagipi kte ñni.

8 Ehake, owasin cante wanjidan hduwitaya onşikicida po ; hunkawanjinkiciyapi kin iyecen waştekcida po, waonşidapi qa wacantkiya po.

9 Taku şica on itkom taku şica econpi ñni po ; qa nicigepi ešta wicakigepi ñni po ; tuka itkopantanhan wayawašte po ; heon nicopi, hecen woyawašte tawayayapi kta e sdonya po. -



## I. INYAN.

10 Tuwe wiconi waštedake ça anpetu wašte wanyaka cin kinhan, iye ceji kin taku śica en yeye kte śni, qa iha kin wohneye takudan ie kte śni.

11 Taku śice cin okamna kta, qa taku wašte e econ kta; wokiye akite ça kuwa aye kta ce.

12 Jehowa išta kin wicašta owotanna awicatonwan, qa wocekiye eyapi kin he anohwicakiciya; tuka tona śicaya econpi kin Jehowa itohnake kin itkowicakipa ece.

13 Unkan taku wašte kin pasi yaunpi kinhan, tuwe e kiunninyanpi kta he.

14 Tuka owotanna oňanyanpi kin on śicaya nicuwapi kinhan, he wowašte; hecen wokokipe tawapi kin kokipapi śni, qa cante hahayedan yankapi śni po:

15 Tuka nicantepi kin en Wakantanka Itancan kin wakanda po; qa tuwe wowacinye en niunpi kin on iniwangapi kinhan, wahbayedan kokipeyahan adu-ptapi kta e ohinniyan wiyeya yanka po;

16 Wawiyukcan wašte hduha po; hecen śicaya oňanyanpi iyecen tona aniiapi kin hena ištecapi kta, Messiya on nioňanpi wašte kin itonśniyan oniyakapi kin.

17 Wakantanka hecen tawacin hecinhan, taku śica econpi kin hee śni, tuka taku wašte econpi kin on kakiśniyanpi kinhan hee wašte kta.

18 Messiya iś eya wancadan woahťani on kakija, owotanna un kin owotanpidan śni kin hena on, Wakantanka ekta unkau-pi kta e heon, wicacełpi kićun ktepi, tuka Woniya kin on kiniyanpi.

19 Nakun he on ekta ye ça wi-

canagi wicakaška tipi ohna unpi kin hena wowicakiyaka;

20 Hena e ehanna waanagoptanpi śni, Wakantanka wawacinkta yuza tanka tehan awicape, Nowa taanpetu kin en, wita wata kagapi kin icunhan, he ohna tonana, wicanagi śahdoganna mini on nipi.

21 Qa wiyacinpi kin he iyececa, baptem nakaha niunyanpi ece; wicacełpi aśape cin yutokan iyeyapi kin hee śni, tuka Wakantanka ekta wawiyukcan wašte waayupte cin hee, Jeśus Messiya ihduekicetu kin heon etanhan;

22 Iye qe mahpiya kin ekta kihde ça Wakantanka etapa kin eciyatanhan yanka; mahpiya ohnihde, qa wicookihi, qa wowaśake kin owasin iye ihukuu iyewicayapi.

### WICOWOYAKE 4.

1 Heon etanhan, Messiya wicacełpi en unkiyepi on kakije cin heon, niś eya iyecen tawacin kićun po: tuwe wicacełpi kin en kakije cin he wanna woahťani ayušťan:

2 Hecen, hetanhan icimana wicacełpi eciyatanhan ni kte śni, wicašta taku śica cantiheyapi kin en, tuka Wakantanka tawacin kin eciyatanhan.

3 Hekta unnipi kin, Ikcewicasta tawacinpi kin ecen econkupi kin he ota, wicoľhan śica, wocantiheye śica, miniśa ota, wakan wacipi, witkopi, qa wakagapi wakandapi śice cin hena omaunnipi qehan.

4 He en iś iye witkoya śkanpi kin on iyecen iyatahdenićiyapi śni kin heon tognihdapi qa niyaśicapi ece;

5 Hena e tuwe ni unpi řapi ko-

## WICOWOYAKE 5.

ya wicayaco kta wiyeya yanke cin hee itokam wohdakapi kta.

6 Heon etanhan, nakun tona tapi kin hena wotanin wašte owicakiyakapi qon, hecen wicašta wicacełpi en un kin iyecen wicayacopi ešta woniya en Wakantanka eciyatanhan nipi kta.

7 Tuka taku owasin ecanan owihanke kta. Heon etanhan wacinksapa po, qa wocekiye on waktaya un po.

8 Qa taku owasin isanpa niye iyakitedan nina cantekiciya po; wacantkiyapi kin he wołhtani ota akalıpe kta.

9 Iapi śica wanin otoiyołi wonkiciya po.

10 Taku wicaqupi kin wicašta otoiyołi icu kin he iyecen iyakitedan okinikiciya po, tona Wakantanka towaonśida ocaje ota tanyan yuhapi kin iyececa.

11 Tuwe ie cinhan Wakantanka oie kin iyecece kta; qa tuwe waokiya hecinhan wookiłi Wakantanka qu kin he eciyatanhan kte; hecen taku owasin on Wakantanka yatanpi kta, Jesus Messiya eciyatanhan; iye qe woyatan qa wookiłi owihanke wanin kiciun nunwe. Amen.

12 Waštecidapi kin, peta on iyutanpi kin on iniyutanpi kte cin he on yuśinyayapi śni po, taku tokeca ayakipapi iyececa.

13 Tuka Messiya kakije ciqon en oyapapi kin heon iyuśkin po; hecen tohan towitan tanin kinhan nina iduśkinpi kta.

14 Messiya caje kin on niyaśicapi kinhan, niyuwaštepi ece; wowitan qa Wakantanka Taniya kin en niunpi kin heon. Hena e eciyatanhan oštehdapi, tuka niye eciyatanhan yatanpi ece.

15 Tuka ihnuhan wanji tin wicakte sa, qa wamanon sa, qa taku śica econ sa, qa tokan tawa i

en iyewicakiciye cin iyecen kakiśniyanpi kinhan.

16 Hececa ešta tuwe Messiya tawa kin on kakiśyapi kinhan ištece kte śni; tuka heon Wakantanka yatan kta.

17 Wakantanka tiyohnaka tawa kin wicayukcanpi kte cin wanna iyehantu. Unkan he unkiyepi etanhan aye cinhan, tona Wakantanka tawootanin wašte wicadapi śni kin hena token owihankepi kta he.

18 Qa wicašta owotanna kin kitan se ni kinhan, tuwe śicaya econ qa wałhtani sa kin hena tukten yakonpi kta he.

19 Heon etanhan, tona Wakantanka eciyatanhan kakijapi kin hena, wašte ece econpi kin en, Wawicalıye wacinyepica kin iyecen iye nagipi kin yuhekiyapi kte.

## WICOWOYAKE 5.

1 Miye hunkayapi kin hemaca, qa Messiya kakije ciqon wamndake qa, wowitan yutaninpi kte cin he en owapa, tona hunkayapi yaunpi kin ceciciyapi ce;

2 Wakantanka optaye tawa ehna yaunpi kin he wonwicaya po; econ niciyapi kin iyecece śni, tuka iyokipiya awanwicadapapi kta; woyuha śica kin on etanhan śni, tuka tawacin wašte on ecanonpi kta:

3 *Wakantanka* taku tawa hince cin en itancanpi kin iyenicecapi kte śni, tuka optaye kin en wonspekiya yaunpi kta.

4 Hecen Waawanhdake Itancan kin tohan ihdutanin kinhan, hehan wowitan wateśdake wan śnije kte śni kin he iyacupi kta.

5 Nakun, tona aśkatudan yaunpi kin, hunkawicayapi kin anawicageoptan po: Han, owasin

## II. INYAN.

otoiyohi anakicigoptan po, qa wowahibadan koyaka po. Tona wahanicidapi kin hena Wakantanka wicakipajin, tuka tona onsikihanpi kin hena wowaonsida wicaqu ece.

6 Heon etanhan, Wakantanka nape wasake cin ihukuya onsikihan po; hecen tohan iyehantu kinhan yuwankan inicupi kta:

7 Wacin akipam duzapi kin owasin iye en aihpeya po; iye qe awanicinpi ece.

8 Witkopi sni po, waktaya un po; Wakansica tokaniyanpi kin he mnaja hoton ece kin iyecen omani un, tuwe yapote kte cin he akita ece.

9 Sutaya wacinyayapi kin on he kipajin po; nihunkawanjipi maka akan unpi kin hena en wokakije kin dena iyececa yustanpi ece e sdonyayapi.

10 Tuka Wakantanka wowaonsida ocowasin hduhe cin, Je-

sus Messiya eciyatanhan, wowitan owihanke wanica iye tawa kin en unkipi kin he, tohan cistiyedan nicakijapi kinhan, niyustanpi kte, pahohošni enihnakapi, niyuwasakapi, qa sutaya nihdepi nunwe.

11 Iye qe wowitan qa wokiconze kin owihanke wanin tawa nunwe. Amen.

12 Siluanos nihunkawanjipi wan wacinyepica wadake cin on wowapi ptecedan cicagapi; wahokonciciyapi qa wociciyakapi, Wakantanka towašte wicakapi en nayajinpi kin he dee ce.

13 Babulon ekta tona om nichahnigapi kin hena nape niyuzapi, qa nakun Markos micinksi kin.

14 Wacantkiyapi iiputakapi kin on otoiyohi nape kiciyuza po. Tona Jesus Messiya en yaunpi kin owasin wookiye nicipi un nunwe. Amen.

## IN Y A N

### T A W O W A P I I N O N P A K I N .

#### WICOWOYAKE I.

1 Simon Inyan, Jesus Messiya tawowidake qa yeši qon he, tona Wakantanka unkitawapi towo-tanna kin on, qa Jesus Messiya Wanikiye cin eciyatanhan, unkiye unhapi kin iyecen wocinye tehika yuhapi kin hena *wowapi wicakicaga*.

2 Wowaonsida, wookiye ko, Wakantanka sdonyapi kin en, qa Jesus Itancan unkiyapi kin on niciyuotapi nunwe.

3 Iye towašake wakan kin he taku on wiconi qa woolhodapi

kte cin owasin unqupi kin he iyececa, tuwe wowitan qa wookihi on unkipi kin he sdonyapi kin eciyatanhan.

4 Hena on taku tanka hinca, qa taku tehike hinca iwahounyanpi; hecen hena on Taku Wakan ouncage kin en oyapapi kta, wiconi kin de en wocantiheye šica on wicošice nayecipapi kin.

5 Qa nakun he on nina-mniheiciya po, wacinyayapi kin en waditakapi kin ikoyagya po; qa waditakapi kin en wosdonye;

6 Qa wosdonye kin en iyatahdeiciyapi sni; qa iyatahdeici-



## WICOWOYAKE 2.

yapi śni kin en wacintankapi ; qa wacintankapi kin en taku wakan iyececapı ;

7 Qa taku wakan iyececapı kin en waštekidapı ; qa waštekidapı kin en wacantkiyapı *iko-yagya po.*

8 Hena taku kin en niunpi qa niciyuotapı kinhan, Jesus Messiya Itancan unkiyapı sdonyapı kin en taku icalıye ça waskuyeca aicage cin henicapı kta e nicagapı.

9 Tuka tuwe dena yuhe śni kinhan, he išttagonge ça tehan wawanyaka okıbi śni, qa wahtanı qon hena kipakintapı kin he akiktonja.

10 Heon etanhan, mihunkawanji, nicopi qa nicalnıgapı kin aıciıya hdusuta po ; hena hecen ecanonpi kinhan icimana nihınhpıyapı kte śni.

11 Qa nakun heon Jesus Messiya Itancan qa Wanikiya unkitawapı tokiconze owıhanke wanıce cin en yaıpi kte cin wijinya niıupı kta.

12 Heon etanhan taku hececa ohınnıyan kiksuyecıciyapı kta awektonje kte śni, hena niye hınca sdonyayapı, qa nakaha wowıcake kin de en sutaya nihdıepı ešta.

13 Tohányan wakeya kin de ohna waun kin hehıyan kiksuyecıciyapı kin on iyocıpaštakapı kte cin he hecetu wadake :

14 Wakeya mitawa kin de aškadan wehnake kta sdonwakiya, Jesus Messiya Itancan unkiyapı omakıyake ciqon iyececa.

15 Tuka nakun detanhan imdamde cin iyohakam, taku kin dena ohınnıyan yeksuya oya-kıhipı kta e awakite kta.

16 Jesus Messiya Itancan unkiyapı towaške qa hi kte cin hena unkonıciyapı qehan, hi-

tunkakanpi ksamya kagapı kin unkunpi śni, tuka iye tanka hınce cin he išta on wanunyakapı.

17 Wakantanka Ateye cin eciyanhan woyuonıhan wowitan ko icu, wowitan wašte kin etanhan wıchaho kin de hiyu qehan, Micınkśı waštewakıdake cin he dee, on iyomakıpi hınca ce.

18 Unkan wıchaho kin he małpiya eciyanhan u kin he nanıhonpi, paha wakan kin akan kici unyakonpi qehan.

19 Tuka wokcanpi oie iyotan suta wan unhapı ; he qe anayagoptanpi kinhan tanyan ecanonpi kta, petıjanjan tukten otpaze cin en ijanjan kin iyececa, nicantepı kin ekta anpaı kamdeze ça, en anpaı wıcanłpi kin hınanpe kte cin hehıyan.

20 Qa de tokaheya sdonya po, wowapı wakan kin en wokcanpi kin owasin tuwedan iye cınka oyake śni.

21 Wokcanpi kin wanakajatanhan wıcašta tawacın kin eciyanhan u śni ; tuka wıcašta wakan Wakantanka tawa Woniya Wakan kin token iewıcakıye ciqon hena hecen eyapı ece.

## WICOWOYAKE 2.

1 Tuka he ehan oyate kin ehna wıcašta wokcan itonpi śni yukan qon, he iyecen niyepı kin ehna waonspekiya itonpi śni kin heca yuke kta, nałmana wohıunı woihangye kin en aupı kta, Itancan opewıcakıton qon he ehıpeyapı, qa wıcotakunıśni ohıanko amnaıciyapı kta.

2 Qa wıcohan śıca econpi kin en wıcota opapı kta ; hena on wowıcake canku kin yaııcapı ece e kta.

3 Qa waıcu wacınpi kin eciya-

## II. INYAN.

tanhan wicoie skuya on wiyopeniyanpi kta ; hena e wicayacopi kin wanakajatanhan en awicau, qa ihangwicayapi kte cin he ūba ūni.

4 Wakantanka malipiya ohni-hde wahtanipi qon hena wicakpatan ūni, tuka wakanūca ti kin ekta iyayewicaya, qa woyaco kte cin hehanyan wicayuhapi kta e otpaza maza icicalihūa on wicakaūka hecinhan ;

5 Qa maka tannike cin kpatan ūni, tuka Nowa wicaūta wiciūa-hdogan wicoowotanna oyake cin he kpatan, qa wicoicage wahtanipi sa ambitanwicaya ;

6 Qa Sodom qa Gomorra otonwe kin cahtota kaūya ehpewicaye, woihangye on wicayaco, qa tona tokata wahtani sa unpi kte cin hena woonspe wicakicaga ;

7 Qa Lot owotanna un, wicaūta wahtepi ūni ohan ūicapi kin wacin iyowicakiūica ece kin he ehdaku :

8 Wicaūta owotanna kin he hena wicehna ti, qa taku wanayake qa naūon kin on, anpetu eca iye nagi owotanna ekta wacin iyowicakiūica ece, ūicaya oūanyanpi kin on :

9 Itancan kin wicaūta waūte wowiyutanye kin etanhan token ewicahdaku kta sdonya, qa nakun wicaūta owotanna ūni kin woyaco anpetu kin hehanyan wicayuhe kta, ūitkihdawicayapi kta e heon :

10 Tuka tona woasameye cantihayapi kin en wicacehpi eciyatanhan manipi, qa wokiconze wahtedapi ūni kin hena iyotan : hena wahtaniūidapi qa wannaiūidapi ece ; qa tona tankapi kin wicayaūicapi kokipapi ūni.

11 Maūpiya ohnihde kin, wookihi qa wowaūake on iyotanpi qeyaū, Itancan kin itokam wa-

yaūicapi woyaco kin en awicayapi ūni ece.

12 Tuka dena iū, woteca iyececa, wicayuzapi qa ihangwicayapi kta e on wicakagapi kin, taku okalinigapi ūni keū he yaūicapi ece ; qa wicotakuniūni tawapi kin en ihangūiyapi kta ;

13 Qa anpetu icunhan tanyan wotapi kin he woiyokipi dakapi kin heon wahtani iyunwin kin icupi kta. Hena om wayatapi icunhan wohneyeūiyapi kin on iyuūkinpi, woasape qa taku samya wanke cin hecapi ;

14 Iūta yuknpi wiinahtmanpi kin on ojudan qa wahtani ayuūtanpica ūni ; wicanagi kacegya unpi kin hena wicahnayanpi ece ; cante wawicakipi e ecewakta kin heca yuhapi, wicotakuniūni cincapi kin :

15 Canku owotanna kin ayuūtanpi, qa onuniyata unpi, Ba-laam Bosor cinhintku wahtani iyunwin waūtedake cigon he tancanku kin en opapi :

16 Iye taku ūica econ qon on iyopeyapi ; ūonūonna kin ia okitpani ece wicaho on ie qa, wicaūta wokcan witkotkoya oūanye cin he kiūica.

17 Miniyowe mini wanica, malipiya ūapa tate iyumni on toke cincin eyaye cin hena hecapi ; hena on otpaza sape hınca owihanke wanica wicakicahnakapi.

18 Wahanhaniūidaya takuūniūni eyapi eca, wicacehpi cantihayapi kin eciyatanhan, witkoya oūanyanpi kin on, tona wohneye en ounyanpi kin kitan ecinyan nawicakicipapi qon hena iyakapewicayapi ece.

19 Tawaūiyapi kin wicakupi kta keyapi, tuka iyepi kaes wicotakuniūni iwicadaka. Taku on tuwe iyakapeyapi kinhan, he on wowidagayapi ece.

### WICOWOYAKE 3.

20 Itancean qa Wanikiya Jesus Messiya sdonyapi kin eciyatanhan, wicoicage kin de en woasape kin nakipapi ešta, ake hena on iyakapeyapi qa en ihdaškapi kinhan, hena otokahe ekta wašte qa owihankepi kin he šica ece.

21 Woowotanna canku kin he sdonyapi šni unkaš he wašte kta tuka, qa he sdonyapi qa wohofope wakan wicaqupi kin ayušta npi kin he šice hinca.

22 Tuka wiyacinpi eyapi wicakapi kin he iyecen waakipapi; Šunka taku hiyuye cin he ake hduta ce; qa, Kukuše yujajapi qon he ake upšija en iwanka ce.

### WICOWOYAKE 3.

1 Waštecicidapi kin, de nakaha wowapi inonpa cicagapi; hena en nitawacinpi mdesahan kiksuyapi on iyocipaštakapi.

2 Hecen wicašta wokcan wakan token oieyapi qon, qa nakun unkiye Itancean qa Wanikiya yeunšipi qon token econ unnišipi kin hena yeksuyapi kta.

3 Qa de tokaheya sdonya po, anpetu ehake kin en waihašapi; iye cantiheyapi šica eciyatanhan manipi kin heca hipi kta;

4 Qa heyapi kta; Hi kta keyapi qon he tukte e he; wicahunkake ištinnma ihpayapi ehanthanhan otokaheya tanhan taku owasin tokeca šni wanka ce.

5 Tuka he de sdonyapi šni, Wakantanka oie kin eciyatanhan mašpiya kin ehanna un, qa maka kin mini mahen qa nakun mini akan han;

6 Qa nakun he eciyatanhan, maka ehanna un qon he mini apašbog hiyaye ča ibangya.

7 Tuka mašpiya qa maka nakaha un kin hena iye oie kin on kihnakapi, peta on ayuhapi, wo-

yaco anpetu qa wicašta šica šitkih dawicayapi kte cin hehan tu.

8 Tuka, waštecicidapi kin, he de sdonye šni yukanpi šni po, Itancean kin ekta anpetu wanjidan waniyetu kektopawinge iyececa, qa waniyetu kektopawinge anpetu wanjidan iyececa ece.

9 Itancean kin taku wahowicaye cin yutehan šni, wicašta wanjikši yutehanpi eyapi kin iyececa; tuka unkiyepi on wawacinkta yuza tanka, tuwedan awihnnuničiye kte šni, tuka owasin woiyopečiye en ihdoupi kta cin.

10 Tuka Itancean taanpetu kin wamanon sa wan hanyen hi ece kin he iyecen u kta, hehan mašpiya kin limunhmunyan hinnda on tokan iyaye kta, qa taku kin peta hinca on skan kta; qa maka kin wicošan ohna un kin hena hušnage kta.

11 Hena taku kin owasin hecen skan kta hecinhan, wicošan wašte qa Taku Wakan iyececapi kin en taku wicašta yaunpi kta iyececa he:

12 Wakantanka taanpetu u kte cin he ayapepi qa on inayašnipi kta; he en mašpiya kin aide ecen atakuni kte šni, qa taku kin peta tanka hinca on skan kta.

13 Hececa ešta, unkiye, iye wahounyanpi kin eciyatanhan, mašpiya teca qa maka teca en woowotanna ounye cin he wanunyakapi kta e unkapipi.

14 Heon etanhan, waštecicidapi kin, taku hececa ayapepi kin heon aičiciya po, hecen iye wookiye en ašape šni qa iyaonpepicašni iyenianpi kta.

15 Qa Itancean wawacinkta yuza tanka kin he wiconi kecan kin po; Palos, hunkawanjinun-



## I. JOHANNES.

yanpi wašte kin, is eya woksape qupi kin eciyatanhan, wowapi nicagapi kin iyececa ;

16 He wowapi kage cin owasin en taku hececa cajeyata ece ; hena wanjiksi okalnihi telika, tona onspepi sni qa kaktihanhan unpi kin yatokecapi, wowapi unma kin iyececa, iye ihdutakunipi kte sni heon.

17 Heon etanhan, wastecici-

dapi kin, nis niyepi hena itokam sdonyayapi, heon ihnuhan wicasta sica wohnyaye kagapi kin nihnyanpi, qa sutaya nihdepi kin etanhan nihinhpayapi kinhan.

18 Tuka wowašte kin en, qa nakun Itancan unyanpi Wani-kiya Jesus Messiya sdonyapi kin en icaga po. Iye kin wowitan nakaha qa owihanke wanica kiciun nunwe. Amen.

# JOHANNES

## TAWOWAPI TOKAHEYA KIN.

### WICOWOYAKE 1.

1 Taku otokaheya tanhan un, taku naunhonpi, qa ista on wanunyakapi, opaunlitapi qa nape on unzapi, Wiconi Oie kin hee.

2 Wiconi kin he ihdutanin ; unkan Wiconi Owihanke Wanica Ateyapi kin kici un, qa unkiyepi kin en ihdutanin qon he wanunyakapi, qa unyaotaninpi qa unkoniciyakapi.

3 Taku wanunyakapi qa naunhonpi kin he unkoniciyakapi, hecen niye unyecicapi kta ; unkan awicakehan Ateyapi kin kici okiciciya unyakonpi, qa nakun iye Cinhintku Jesus Messiya kici.

4 Unkan nitowiyuskinpi kin yucopi kta e heon dena decen wowapi unnicagapi.

5 Hehan wotanin wašte iye eciyatanhan naunhonpi qa unkoniciyakapi kin, Wakantanka he iyoyanpa, qa otpaza takudan en un sni kin he hee.

6 Iye kici okiciciya unyakonpi ce, unkeyapi qa otpaza kin oma-

unnipi kinhan, unkitonpiśni qa wowicake kin econkupi sni ece.

7 Tuka iye iyoyanpa en un kin he iyecen iyoyanpa kin en maunnipi kinhan, otoiyo hi okiciciya unyakonpi, qa iye Cinhintku Jesus Messiya we kin he woalitani owasin unkipakintapi kta.

8 Woalitani unnicapi ce, unkeyapi kinhan, unkiçihnyanpi qa wowicake kin unkiyepi en un sni.

9 Tuka waunhitanipi kin unkohtakapi kinhan, iye kin wacinyepica qa owotanna un, hecen woalitani yutokan iyeunkiciciyapi kta, qa taku sica owasin unkipakintapi kta.

10 Eca waunhitanipi sni ce, unkeyapi kinhan, iye itonśni undakapi, qa iye oie kin unkiyepi en un sni ece.

### WICOWOYAKE 2.

1 Micinca cikcistinpidan, wa-yahtanipi kte sni e heon dena decen wowapi cicagapi. Unkan tuwe wahtani kinhan Ateyapi kin ekta Wawiciya wan unhapi,

Jesus Messiya owotanna kin hee.

2 Unkan waunhtanipi wokajuju kin he iye; qa unkiye unkita-wapi kin hecedan šni, tuka maka kin owancaya woahani econpi kin hena.

3 Unkan deciyatanhan iye kin wanna sdonunyanpi e sdonunkiyapi, tawoahope unkokicipapi kinhan.

4 Tuwe, He sdonwaya ce, eye ça tawoahope okicipe šni kin he itonšni, qa wowicake kin en un šni.

5 Tuka tuwe iye oie kin okicipe cinhan, awicakehan he en Wakantanka waštedake cin yuecetupi. Heciyatanhan iye kin en unyakonpi kin sdonunkiyapi ece.

6 Tuwe he kici un keye cinhan, iye token omani qon is iye-cen omani kta iyececa.

7 Mihunkawanji, woahope teca wan cicagapi šni, tuka woahope tanina, otokaheya tanhan duhapi qon hee. Woahope tanina kin wicoie otokahe ekta nayahonpi qon he hee.

8 Hehan akeš woahope teca wan cicagapi; he iye kin en wowicake, qa nakun niyepi kin en; otpaze cin he wanna hena-keca, qa iyoyanpa wicake cin he wanna tanin kin heon etanhan.

9 Tuwe iyoyanpa kin en un keciye ça, hunkawanjitku kin šicekidake cin he dehantu otpaza kin en un.

10 Tuwe hunkawanjitku waštekidake cin he iyoyanpa kin en un ece, qa wokašeye takudan en un šni.

11 Tuka tuwe hunkawanjitku šicekidake cin he otpaza en un, qa otpaza omani, qa tokiya ye cin sdonkiye šni, išta kin otpaza kašeya, heon etanhan.

12 Hokšiyopa cikcistinpidan, iye caje kin on wayahtanipi kin nicicajujupi kin heon wowapi cicagapi.

13 Hunkakeniyanpi kin, tuwe otokaheya tanhan un kin he sdonyayapi kin heon wowapi cicagapi. Koškapi kin, tuwe šice cin he ohiyayapi kin heon wowapi cicagapi.

14 Hokšiyopa cikcistinpidan, Ateyapi kin sdonyayapi kin he etanhan wowapi cicagapi. Hunkakeyapi kin tuwe otokaheya tanhan kin he iye sdonyayapi kin heon wowapi cicagapi. Koškapi kin, wanišakapi, qa Wakantanka oie kin en niunpi, qa tuwe šice cin he yaktepidan kin he etanhan wowapi cicagapi.

15 Wicoicage kin de waštedapi šni po, qa taku wicoicage kin ekta un kin hena nakun. Tuwe wicoicage kin de waštedake cinhan, Ateyapi kin waštedake cin en un šni.

16 Taku wicoicage en un kin owasin, wicacehi cantiheye cin, wicaišta cantiheye cin, qa wiconi kin den wahaničidapi kin, hena Ateyapi kin etanhan šni, tuka wicoicage kin de etanhan.

17 Unkan wicoicage kin de atakuni kte šni, qa wocantiheye kin nakun; tuka tuwe Wakantanka tawacin kin yuhe cinhan, he owihanke wanin ounye kta.

18 Hokšiyopa cikcistinpidan, anpetu ihankeya kin wanna hiyohi; unkan, Messiya kipajin kin he u kta ce, nayahonpi qon he iyecen Messiya kipajinpi kin ota wanna hipi; heon de anpetu ehake kin sdonunyanpi.

19 Unkiyepi kin etanhan inanpapi, tuka hena unkicicapi šni. Hena unkicicapi unkanš, unkici,

## I. JOHANNES.

pi un wacinpi kta : tuka owasin unketanhanpi šni tanin kta e heon etanhan hececa.

20 Tuka Wanji Wakan kin he niye sdaniyanpi, qa heon taku owasin sonyayapi.

21 Wowicake kin sonyayapi šni kin heon wowapi cicagapi šni ; tuka he sonyayapi, qa woi-tonšni takudan wowicake kin eciyatanhan u šni, heon etanhan.

22 Tuwe itonšni he ; tuwe Jesus he Messiya kin ee šni, keye cin hee ; Messiya kipajin kin hee, Ateyapi qa nakun Cinhintku kin anawicakilibe cin hee.

23 Tuwe Cinhintkuyapi kin wicada šni kin he Ateyapi kin yuhe šni : tuka tuwe Cinhintkuyapi kin oyake cinhan, he Ateyapi kin nakun yuha ece.

24 Taku otokaheya tanhan nayahonpi qon he yuha po. Taku otokahe ekta nayahonpi qon en niunpi kinhan, Cinhintkuyapi kin en yaunpi kta, qa nakun Ateyapi kin en.

25 Unkan wahoyapi qon taku iwahounyanpi kin, owihanke wanin wiconi kin hee.

26 Tona nihnyanpi kta cinpi kin hena on decen wowapi cicagapi.

27 Tuka sdaniyanpi, iye eciyatanhan duhapi kin he nicipi un ; qa tuwe waonspeniciyapi kta iyenicecapi šni ; tuka sdaniyanpi kin he taku owasin onspeniciyapi, he wowicake qa woi-tonšni wanica ; he taku onspeniciyapi kin iyecen, iye kin en un po.

28 Unkan dehan, hokšiyopa cikcistinpidan, iye kici un po ; hecen tohan iye ihdutanin kinhan wacinunyanpi kta, qa taninyan hinajin kinhan, itokam unkištecapi kte šni.

29 Iye owotanna un sonyaya-

pi kinhan, tuwe woowotanna econ kin he iye kin eciyatanhan wanna teca nien tonpi e nakun sdonya po.

### WICOWOYAKE 3.

1 Wanyaka po, Ateyapi kin wocantekiye hinsko tanka unqupi kin, Wakantanka cinca unkekiciyapi kta : heon etanhan wicoicage kin sdonunyanpi šni, iye kin sonyapi šni qon iyececa.

2 Waštecicidapi kin, wanna Wakantanka cinca kin heuncapi ; qa tounkecapi kte cin hinahin tanin šni : tuka iye kin ihdutanin kinhan, iyeuncecapi kta e sdonunkiyapi ; he token un kin wanunyakapi kta nakaes.

3 Unkan tuwe hecen wacinyan canteyuze cinhan ihducedan ece, iye kin ecedan un kin iyecen.

4 Tuwe woahitani econ kin he woope kin kicaksa ece ; woahitani he woope kicaksapi kin hee.

5 Unkan iye ihdutanin qon, waunhitanipi kin yutokan iyeye kta e heon, he sonyayapi ; qa iye kin woahitani takudan en un šni.

6 Tuwe iye en un kin he wahtani šni ; tuwe wahtani ece kin he iye kin tohinni wanyake šni, qa nakun sdone šni.

7 Hokšiyopa cikcistinpidan, ihnuhan tuwe nihnyanpi kinhan ; tuwe taku owotanna econ ece kin he owotanna, iye kin owotanna un kin iyececa.

8 Tuwe woahitani econ ece kin he wakanšica eciyatanhan un ; otokaheya tanhan wakanšica kin wahtani ece. Heon etanhan Wakantanka Cinhintku kin ihdutanin, wakanšica ohan kin ihangye kte cin heon.

9 Tuwe Wakantanka eciyatan-



han teca nien tonpi kin he woahitani econ śni, taku on icahye cin he en un kin heon; unkan wahitani okihi śni, Wakantanka eciyatanhan teca nien tonpi kin he etanhan.

10 Detanhan Wakantanka cinca kin sdonwicayapi, qa nakun wakansica cinca kin; tuwe taku owotanna ece econ śni kin he Wakantanka eciyatanhan śni, qa nakun tuwe hunkawanjitku tanyan cante kiyuze śni kin.

11 Otokaheya tanhan taku iwahokonunkiciyapi nayahonpi qon he dee, otoiyohe wašteunkicidakapi kte cin.

12 Qain taku śice cin eciyatanhan un, qa iye sunkaku kikte qon iyecece śni. Unkan taku on kikte he. Iye kin ohan śica, qa sunkaku kin wašte kin heon etanhan.

13 Mihunkawanji, wicoicage kin śicenedapi ešta inihanpi śni po.

14 Hunkawanjinkiciyapi waštewicunkidapi kin heon wiconte etanhan wiconi e ekta unkiyohipi sdonunkiyapi; tuwe hunkawanjitku waštekidada śni kin he wiconte ehna un.

15 Tuwe hunkawanjitku śicekidake cin he tinwicakte kin heca; unkan tuwe tinwicakte kin he wiconi owihanke wanica aihduhe śni e sdonyayapi.

16 Deciyatanhan wacantkiyapi kin sdonunyanpi; iye kin unkiyepi on wiconi elpekiye cin heon; hecen unkiś eya hunkawanjinkiciyapi kin on wiconi elpeunkiyapi kta iyececa.

17 Tuka tuwe maka akan woyuha ton, qa hunkawanjitku wahpanica wanhdake ca, cantekiye cin anakipte cinhan, token Wakantanka waštédake cin en un kta he.

18 Micinca cikcistinpidan, wicoie qa wicaceji ecedan on wacanunkiyapi kte śni, tuka wicohan qa wowicake kin on.

19 Unkan deciyatanhan wowicake eciyatanhan unyakonpi, qa iye itohnake kin en cante unhdutinzapi kta e sdonunkiyapi.

20 Uncantepi kin unhdacopi kinhan, Wakantanka uncantepi kin sam iyeya tanka, qa taku owasin sdonya un.

21 Waštəcicidapi kin, uncantepi kin unhdacopi śni kinhan, Wakantanka ekta wowaditake kin unhapi:

22 Qa taku unkidapi kin owasin unkićupi ece, tawoahope kin unkićiyuhapi, qa taku iye išta kin en iyokipi kin he econkupi, heon etanhan.

23 Unkan tawoahope kin he dee, Iye Cinhintku Jesus Messiya caje kin wacinunyanpi, qa otoiyohe wašteunkicidapi kta, econ unšipi qon iyececa.

24 Tuwe tawoahope kin opecinhan, he *Wakantanka* kici un, qa is iye kin en un; unkan Woniya unqupi kin he eciyatanhan iye unkićipi un kin he sdonunyanpi ece.

## WICOWOYAKE 4.

1 Waštəcicidapi kin, ihnuhan woniya owasin wicayadapi kinhan; tuka woniya kin wicayukan po, Wakantanka etanhan unpi kinhan; wicašta wokcan itonpiśni ota wanna wicoicage kin ehna iyayapi.

2 Deciyatanhan Wakantanka Taniya kin sdonyayapi kta; woniya kin tona Jesus Messiya wicacehpi un hi oyake cin hena Wakantanka eciyatanhanpi ece.

3 Qa woniya kin tona Jesus Messiya wicacehpi un hi oyake śni kin hena Wakantanka eciya-

tanhanpi šni; tuka Messiya kipajin u kta nayahonpi qon he dee, wanna wicoicage kin en un.

4 Hokšiyopa cikcistinpidan, Wakantanka eciyatanhan yaunpi, qa hena ohiwicayayapi; tuwe en niunpi kin he tuwe wicoicage en un kin isanpa tanka.

5 Hena e wicoicage kin etanhanpi; heon wicoicage kin iyeccen iapi, unkan wicoicage kin anawicagoptan ece.

6 Unkiye Wakantanka unketanhanpi; tuwe Wakantanka sdoneye cin he unkiye anaungoptanpi ece; qa tuwe Wakantanka eciyatanhan šni kin he anaungoptanpi šni. Deciyatanhan wowicake woniya qa wohnaye woniya kin napin sdonunyanpi.

7 Wašteccidapi kin, otoiyohe canteunkiciciyapi kte; wacantkiyapi kin he Wakantanka eciyatanhan un; qa tuwe wacantkiye cin he Wakantanka eciyatanhan tonpi, qa Wakantanka sdonya.

8 Tuwe wacantkiye šni kin he Wakantanka sdoneye šni; Wakantanka he wacantkiyapi kin hee.

9 Wakantanka canteunkiyapi kin he deciyatanhan tanin, Wakantanka iye Cinhintku išnana icage cin he makata u ši, heciyatanhan unnipi kta e heon.

10 Wacantkiyapi kin he deciyatanhan, unkiye Wakantanka wašteundakapi kin hee šni, tuka iye canteunkiyapi, qa Cinhintku waunhtanipi yutokan iyeye kta e on u ši qon hee.

11 Wašteccidapi kin, Wakantanka hecen canteunkiyapi kinhan, unkiš eya otoiyohe canteunkiciciyapi kta iyececa.

12 Tuwedan tohinni Wakantanka wanyake šni. Otoiyohe canteunkiciciyapi kinhan Wa-

kantanka unkiyapi un, qa iye canteunkiyapi kin unkiyepi en tanyan yuŝtanpi ece.

13 Heciyatanhan unkiye kici unyakonpi, qa iye unkiyepi un kin sdonunyanpi ece, iye Taniya unqupi kin heon.

14 Unkan wanunyakapi, qa Ateyapi kin Cinhintku ukiya, wicoicage kin ekta, Wanikiya hee kta e he unyaotaninpi.

15 Tuwe Jesus he Wakantanka Cinhintku kin hee e oyake cin he kici Wakantanka un, qa iš eya Wakantanka en un ece.

16 Wakantanka canteunkiyapi kin he sdonunyanpi qa wicaundapi. Wakantanka wacantkiyapi kin hee; qa tuwe wacantkiyapi en un kin he Wakantanka kici un, qa Wakantanka iš nakun iye en un ece.

17 Deciyatanhan wocantekiye unkiyepi en unkiciyuŝtanpi ece, hecen woyaco anpetu kin en wowaditake unhapi kta: iye un kin unkiš iyeccen wicoicage kin den unyakonpi ece.

18 Wacantkiyapi kin en wokokipe wanica, tuka wacantkiyapi yuŝtanpi kin he wokokipe tankan ehpeya ece; wokokipe kin he wicocante ŝica yuha ece; tuwe wakokipe cin he nahanhin wacantkiyapi kin en yuŝtanpi šni.

19 Iye tokaheya canteunkiyapi kin heon unkiye *Wakantanka* wašteundakapi.

20 Tuwe, Wakantanka waŝtewadaka ce, eye a hunkawanjitku ŝicekidake cinhan, he itonšni. Tuwe hunkawanjitku wanhake cin he waŝtekidake šni kinhan, token ecin Wakantanka wanyake šni kin waŝtedaka okihi kta he.

21 Unkan iye etanhan woahope kin de unhapi; tuwe Wakan-

tanka waštedake cin he hunka-  
wanjittku kin is nakun wašteki-  
dake kta ce.

## WICOWOYAKE 5.

1 Tuwe Jesus he Messiya kin ee e wicada kin he Wakantanka eciyatanhan tonpi; qa tuwe wacihaye cin waštedake cinhan, he tuwe iye eciyatanhan teca ni en tonpi kin he nakun waštedaka ece.

2 Deciyatanhan Wakantanka cinca kin waštwicundakapi kin sdonunkiyapi, Wakantanka wašteundakapi qa tawoahope kin tanyan unkiyuhapi kinhan.

3 Wakantanka waštedakapi kin he dee, tawoahope kin tanyan ounpapi kin he; unkan tawoahope kin wošitkihda šni.

4 Tuwe Wakantanka eciyatanhan tonpi kin he wicoicage kin ohiya ece; unkan woohiye wicoicage ohiye cin he dee, wacinunyanpi kin hee.

5 Wicoicage ohiya ece kin he tuwe he; tuwe Jesus he Wakantanka Cinhintku kin ee e wicada kin hee.

6 Tuwe mini qa we eciyatanhan hi qon he Jesus Messiya ee; mini ecedan on hi šni, tuka mini we ahna. Unkan wayaotanin kin he Woniya kin hee; Woniya kin he wowicake, heon etanhan.

7 Mahpiya kin ekta yamni wayaotaninpi ece, Ateyapi kin, Wicoie kin, qa Woniya Wakan kin; unkan hena yamni wanjipidan.

8 Nakun maka akan taku yamni wayaotanin ece, Woniya kin, qa mini kin, qa we kin; unkan hena yamni wanjidan en un.

9 Wicašta akantu taku yaotaninpi kin he unkiyuhapi kinhan, Wakantanka taku yaotanin kin he iyotan tanka; Wakantanka

taku yaotanin kin he dee, iye Cinhintku hdaotanin qon hee.

10 Tuwe Wakantanka Cinhintku kin wicada kin he wayaotanin iye atayedan yuha un. Tuwe Wakantanka wicada šni kin he itonšni daka ece; wayaotanin kin on Wakantanka iye Cinhintku hdaotanin qon he wicada šni kin heon.

11 Unkan wayaotanin qon he dee, Wakantanka wiconi owihanke wanica unqupi kin he; unkan wiconi kin he iye Cinhintku kin en un.

12 Tuwe Cinhintkuyapi kin yuhe cin he wiconi yuha; qa tuwe Wakantanka Cinhintku kin yuhe šni kin he wiconi yuhe šni.

13 Wakantanka Cinhintku caje kin wacinyayapi kin dena wuwapi cicagapi kin; wiconi owihanke wanica duhapi e sdonunkiyapi kta, qa Wakantanka Cinhintku caje kin wacinyayapi kta e heon.

14 Unkan iye ekta wowaditake unhapi kin he dee, Iye tawacin kin eciyatanhan taku unkiyuhapi eca naunkilionpi ece:

15 Qa taku unkiyuhapi eca naunkilionpi ece e sdonunkiyapi kinhan, taku tona unkiyuhapi kin hena unhapi e nakun sdonunkiyapi ece.

16 Tuwe hunkawanjittku waštani wanhdake cinhan, woštani kin he wiconi ekta šni kinhan, wocekiye ekiciye kta, unkan *Wakantanka* wiconi qu kta, tona waštani wiconi ekta iyahde šni hena on. Woštani wani wiconi ekta; he on wocekiye eye kta epe šni.

17 Taku šica econpi kin owasin woštani; unkan woštani wiconi iyohi šni kin heca yukan.

18 Tuwe Wakantanka eciyatanhan tonpi kin he waštani šni



## II. JOHANNES.

eee e sdonunyanpi; tuka tuwe Wakantanka eciyatanhan icage cin he tanyeh ihduhe ça hecen taku síce cin he oyutan sñi eee.

19 Wakantanka eciyatanhan unyakonpi kin he sdonunkiyapi; qa wicoicage kin ocowasin woahtani en wanka:

20 Unkan Wakantanka Cinhintku kin he hi, qa wicoksape

unqupi, on tuwe wicake cin iye-unkiyapi kta e sdonunyanpi; unkan tuwe wicake cin he en unyakonpi, iye Cinhintku Jesus Messiya hee. Wowicake Wakantanka qa owihanke wanin wiconi kin hee.

21 Hoksiyopa cikcistinpidan, taku wakagapi kin itehan ihduha po. Amen.

# JOHANNES

## TAWOWAPI INONPA KIN.

1 Hunkayapi un kin, Kuria kahinigapi qon *wowapi kicaga*; iye cinca kin, wowicake eciyatanhan waštewicawadake cin hena om, qa mišnana sñi, tuka nakun tona wowicake sdonyapi kin hena owasin;

2 Wowicake kin en unyakonpi, qa owihanke wanin unkipi un kte cin heon etanhan.

3 Wowaste, wowaonsida, wooskiye ko, Wakantanka Ateyapi kin eciyatanhan, qa nakun Jesus Messiya Itancan, Ateyapi kin he Cinhintku kin eciyatanhan, wowicake wacantkiyapi ko en, nicipi un nunwe.

4 Ateyapi kin woahope unqupi qon iyecen, nicinca wowicake eciyatanhan manipi iyewicawakiye cehan nina imduškin.

5 Unkan nakaha, Kuria, ceciya ce, woahope teca wan cicage cin iyecece sñi, tuka wanji otokahe ekta unhapi qon, otoiyohi canteunkiciciyapi kte cin hee.

6 Qa wacantkiyapi kin he dee, tawoahope kin eciyatanhan maunni kte cin hee. Woahope kin he dee, Otokahe ekta taku nayahonpi qon he ohna mayanipi kte cin.

7 Wanna wicahnaye sa ota wicoicage kin ehna iyayapi, hena Jesus Messiya wicacehpi un hi qon oyakapi sñi. He wicahnaye sa qa Messiya kipajin kin heca.

8 Iwanihdaka po, hecen taku unkamnanpi kin toki elipeunyanpi kte sñi, tuka wokajuju iyakicuya unkipi kta.

9 Tuwe walitani qa Messiya tawoonspe kin en un sñi kin he Wakantanka yuhe sñi. Tuwe Messiya tawoonspe kin en un kin he Ateyapi kin yuhe ça nakun Cinhintku kin.

10 Tuwe en niipi qa woonspe kin de yuhe sñi kinhan, tin u šipi sñi po, qa wookiye eciyapi sñi po.

11 Tuwe wookiye eciye cin he iye ohan síce cin en opa.

12 Taku ota wowapi cicagapi kta mduha esta, minihuha minisapa ko on ecamon kte sñi: tuka en ciupi qa i eciyatanhan ociciyakapi kta e ecin cante mduza; hecen wowiyuškin unkitawapi kin ojudan kta.

13 Nitanka kahinigapi qon cincawicaye cin hena nape niyuzapi. Amen.

# JOHANNES

## TAWOWAPI IYAMNI KIN.

1 Hunkayapi *waun* kin, Gayos waštedakapi kin, wowicake en waštedawake cin he, *wowapi cicaga*.

2 Waštecicida, taku owasin isanpa, tanyan iyoopte de kta qa zaniyan yaun kta e cewakinya ece, ninagi iyoopta ye cin iyececa.

3 Hunkawanjinkiciyapi kin den hipi, qa wowicake en niun kin he oyakapi qehan, wowicake eciyatanhan mayani kin heon nina imduškin.

4 Micinca wowicake kin eciyatanhan manipi nawahon kin heon wowiyuškin iyotan tanka mduha, takudan kape šni.

5 Waštecicida, taku hunkawanjinkiciyapi kin, qa nakun wicašta toktokeca ecawicayecon kin he tanyeh ecanon:

6 Hena e okodakiciye kin en wacanyakiye cin tanyan oyakapi: hena icimanipi en, Taku Wakan iyecen, owicayakiye cinhan, tanyan ecanon kta.

7 Iye caje kin on iyayapi, qa Ikcewicašta kin etanhan takudan icupi šni, heon etanhan.

8 Heon tona hececapi kin hena iyowinwicunkiyapi kta iyececa; hecen wowicake kin ounkiyapi kta.

9 Okodakiciye kin wowapi

wicawecaga; tuka hena chna Diotrepheš itancan ičida kin he iyowinunkiyapi šni.

10 Heon etanhan wau kinhan, iye ohan kin, oie šica on unkaipapi ece kin hena weksuye kta. Unkan he on imnan šni, tuka iye hinca hunkawanjinkiciyapi kin iyowinwicakiye šni, qa tona hecon wacnpi kin iyowicaki šni, qa okodakiciye kin etanhan tankan iyayewicaya ece.

11 Waštecicida, taku šice cin he en ope šni wo, tuka taku wašte kin. Tuwe taku wašte econ kin he Wakantanka eciyatanhan un, tuka tuwe taku šica econ kin he Wakantanka wan-yake šni.

12 Demetrios owasin on tanyan oyakapi, qa wowicake kin nakun eciyatanhan; unkan unkiš eya he unyaotaninpi, qa waunyaotaninpi kin he wowicake e sdoniyayapi.

13 Taku ota ociciwa kta mduha tuka, tuka minisapa wiyaka ko on hena wowapi cicage kte šni:

14 Tuka eadan wapciyake kta, qa i eciyatanhan unkokiciye kta wacin.

15 Wookiye niye en niciun nunwe. Takukiciyapi kin hena nape niyuzapi. Takukiciyapi kin cajeyan nape wicayuza wo.

# JUDAS

## TAWOWAPIKIN.

1 Judas, Jesus Messiya tawowidake kin, qa Jakob sunkaku kin, tona Wakantanka Ateyapi kin en wicayuecepidan, qa Jesus Messiya en wicakpatanpi, qa wicakicopi kin hena *wowapi wicakicaga*.

2 Wowaosída, qa wookiye, wacantkiyapi ko niyepi en nicyuotapi nunwe.

3 Waštecicidapi kin, wiconi ptaya unhapi kin on aiciciya wowapi cicagapi eca, wowacinye ehanna wicašta wakan wicaqupi qon he nina yakitanpi kta e on wowapi cicagapi, qa wahokonci-ciyapi kta iyececa.

4 Wicašta wanjiksi nahmana en opapi, wanakajatanhan woyaco kin de on owicawapi ; hena Taku Wakan iyececapi šni, qa Wakantanka unkitawapi towaosída kin he wicowicaštašni kagapi, qa Wakantanka ecedan Itancan kin he anašmanpi, qa nakun Jesus Messiya Itancan unyanpi kin.

5 Heon etanhan, taku, ehanna sdonyayapi ešta, he ake kiksuyeciciyapi kta wacin, Itancan kin oyate kin Egipta etanhan ehduku, qa iyohakam tona wicadapi šni kin hena ihangwicaye cin.

6 Qa nakun mahpiya ohnihde otokahe unpi kin kpatanpi šni, tuka iye tipi ehpekiyapi qon, hena otpaza ihukuya, owihanke wanin mazaicahihla kin on, anpetu tanka woyaco kin he en awicayuha.

7 Sodom qa Gomorra iyececa,

qa otowwe hena ihdukšan wanke cin, hena is eya iyecece wiinašmanpi kin en icicupi, qa wicacehpi toktokeca akitapi ece qon hena e woonspe on ehdepi, qa peta owihanke wanica on wošitkihda en unpi.

8 He iyececa, wihamnanpi sa kin dena wicacehpi kin ašamyapi, qa wokiconze wahtedapi šni, qa taku tanka yašicapi ece.

9 Hececa, tuka Mikael mahpiya ohnihde itancan kin he wakanšica kin kici econ, qa Moses tancan kin on akinicapi qehan, woštehdá woiaonpe wan en aya tawašenye šni, tuka, Itancan kin iyopeniyan nunwe, eciya.

10 Tuka dena e qe taku sdonyapi šni kin hena yašicapi ece : tuka iye icagapi kin eciyatanhan taku sdonyapi kin hena on ihdušicapi, woteca ia okitpanipi kin iyececa.

11 Wotehi wicakiciun nunwe ; Qain tancanku kin ohna yapi, qa wokajuju on, Balaam tawohnaye kin nina ainyankapi, qa Kore wicakipajin qon en ihangciyapi.

12 Hena wošape kin heca, wacantkiya wayatapi kin en opeya wotapi, qa wikopešniyan cemiciyapi ; mahpiya šapa mini wanica tate on ayapi ece kin ; can kin ptanyetu eca šeca aya, waskuyeca codan, inonpa šeca, qa hute eciyatanhan yujunpi kin hena *hececapi*.

13 Miniwanca taja ohitika, iye wowištece tawapi kin minitaga



iyecen hiyuyapi ece ; wicanhpi onuniyata unpi, on otpaza sape hınca owihanke wanin wicakihnakapi.

14 Henok Adam etanhan wicašta isakowin qon he itokam hena owicayake ça heya ; Wan-yaka po, Itancan kin wicašta wašte wicayuhe cin woyawa tanka om u ce ;

15 Owasin wicayaco kta, qa tona Taku Wakan ohodašni kin hena wicohan šikšica owasin ohodašniyan econpi qon hena sdonkiyewicaye kta, qa wicoie canksiksi owasin walitanipi sa Taku Wakan ohodapi šni oie kicatonpi ece qon hena nakun.

16 Hena e wihnupi sa, wawiyaonpapi sa, iye cantiheyapi kin eciyatanhan manipi ece ; qa i eciyatanhan wahanhancidaya iapi, qa taku on etanhan wicašta itohnake kin waštedakapi ece.

17 Tuka wašteciidapi kin, niyepi, Jesus Messiya Itancan unyanpi yewicaši qon hena oiepi ehanna oyakapi qon hena kiksuya po ;

18 Anpetu ihankeya kin en wicašta wawihahapi kin yuke kta, iye cantiheyapi šice cin eciya-

tanhan manipi kin, he oniciyapikapi qon.

19 Ihdutokanpi kin dena eepi, witantanpi, qa Woniya kin yuhapi šni.

20 Tuka wašteciidapi kin, niš niyepi wowacinye iyotan wakan nitawapi kin he ohna icahičiyapi, qa Woniya Wakan kin eciyatanhan wocekiye eya po ;

21 Wakantanka waštedakapi kin en ihduha po ; qa Jesus Messiya Itancan unyanpi towaonšida wiconi owihanke wanica iyahde kte cin he ape yukan po.

22 Unkan hunh wicayukanyan onšiwicada po ;

23 Qa hunh iš wokokipe on niwicaya po, peta etanhan iwicacupi kin iyececa ; qa wokoyake wicacehpi on ašapapi kin hena ee kaeš šicedaka po.

24 Unkan tuwe woahani econ šni niyuhapi kta okihi, qa wowyuškun yuha iye towitan kin en iyaonpepica šni enihdepi kte cin,

25 Wakantanka ecedan ksapa, Wanikiya unkitawapi kin hee, Jesus Messiya Itancan unyanpi kin eciyatanhan, wowitan, woyaonihan, wookihi qa wokiconze, dehantu qa wicoicage owasin hehayan, tawa nunwe. Amen.

## JOHANNES

### WAYUOTANIN TAWA KIN.

#### WICOWOYAKE 1.

1 Jesus Messiya wayuotanin tawa, taku ecedan u kta e he tawowidake kin sdonyewicakiye kta Wakantanka qu qon he dee ; unkan taohnihde wan u ši,

qa tawowidake Johannes he okiyaka :

2 He Wakantanka oie kin, qa Jesus Messiya wohdake cin, taku tona wanyake cin hena yuotanin.

3 Tuwe wokcan oie kin de ya-

wa, qa tona nañonpi, qa taku en kagapi kin anagoptanpi kin, hena wowašte yuhapi. Wanna kiya-dan ihan.

4 Johannes, Asia ekta okodaki-ciye šakowinpi kin *wowapi wicakicaga*. Wowaonsida, wo-kiye ko, tuwe un, qa un qon, u kte cin hetanhan niyepi en nicipi un nunwe; qa Woniya šakowinpi oiyotanke tawa kin itokam unpi kin hena eciyatanhan;

5 Qa Jesus Messiya etanhan, he waayatanin wicaka, wiconțe etanhan tokaheya tonpi, qa maka wicaštayatapi kin Itancan kin hee. Tuwe wašte unkidapi, qa waunñtanipi kin etanhan iye we kin en unyujajapi,

6 Qa Atkuku Wakantanka ekta wicaštayatapi, wošna kagapi ko unkagapi kin hee, wowitan, wowašake ko owihanke wanin tawa nunwe. Amen.

7 Wanyaka po, malipiya šapa kin akan u; unkan wicišta owasin wanyakapi kta, qa tona he capapi qon hena nakun, qa iye on oyate maka ohnaka kin owasin aićipapi kta. Hecetu nunwe. Amen.

8 Alpha qa Omega, otokahe qa owihanke kin he miye ce; Itancan un, qa un qon, u kta, iyotan wašake cin he hena hecen eya.

9 Johannes hunkawanjinyayapi, wokakije, qa wokiconze, wowalñbadan ko, Jesus Messiya tawa kin en, tawaši yayapi kin he miye; Wakantanka oie qa Jesus Messiya wohdake cin on etanhan, wita wan, Patmos eciyapi, hen waun.

10 Itancan taanpetu kin en Woniya kin kici waun; unkan mihektapa tanhan wicaho wamtanka, maza yabotonpi tanka wan iyececa, nawañon;

11 He kaken eya, Alpha qa Omega, tokaheya qa ehake kin he miye ce. Taku wandake cin wowapi ecen kage ça, Asia ekta okodakiciye kin iwahowicaya wo; Ephesos, qa Smurna, qa Pergamos, qa Thuatira, qa Sardis, qa Philadelphia, qa Laodikia.

12 Unkan wicaho omakiye cin he wanmdake kta e ekta mihdamna. Unkan mihdamna qehan mazaskazi petijanjan ihupa šakowin wanmdaka.

13 Qa petijanjan ihupa šakowin kin cokaya Wanji Wicašta Cinhintku kin iyececa, tawokoyake kin siha kin ekta iyahdeya, qa maku kin opta mazaskazi ihduskita.

14 Qa pa kin paha ko ska, tahinca wanuyanpi hin kin iyecen ska, qa wa iyececa, qa išta kin peta ide kin iyececa;

15 Qa siha kin iš mazazi ecedan iyececa, peta tanka en itkonyahe seca; qa ho kin he mini ota ilialia kin iyececa.

16 Qa nape etapa kin ohna wicanñpi šakowin hduhe ça, i kin eciyatanhan maza sagye anogope kin heca wan hiyu, qa itohnake kin he anpetu wi nina iyege cin iyececa.

17 He wanmdaka, unkan řa wanke cin iyecen siha hde kin en mahinñpaya. Hehan iye nape etapa kin on omayutan qa, Ihnuhan koyakipe cin, emakiya; Tokaheya qa ehake kin he miye;

18 Tuwe ře ça ake kini, qa ito owihanke wanin ni waun; Amen; qa Wakansica ti kin wiconțe ko tiyopa iyuhdoke kin yuha manka ce.

19 Taku wandake cin he wowapi ecen kaga wo, taku nakaha un qa dena iyohakam taku u kte cin hena.

## WICOWOYAKE 2.

20 Wicanhpi šakowin minape etapa kin ohna wandake ciqon wowiyukan kin hee, qa mazaškazi petijanjan ihupa kin hena nakun. Wicanhpi šakowin qon okodakiciye šakowinpi ohnihde yuhapi kin hena eepi; qa petijanjan ihupa šakowin wandake cin okodakiciye šakowinpi kin hena eepi.

### WICOWOYAKE 2.

1 Ephesos ekta okodakiciye ohnihde yuhapi kin he ecen wowapi kicaga wo; Tuwe wicanhpi šakowin nape etapa kin ohna hduhe ča, mazaskazi petijanjan ihupa šakowin cokaya omani kin he hecen eya;

2 Niohan, qa nitohani, qa wacinnitanka kin he sdonwaya; qa tona šicapi kin hena iyowinwicakiya oyakihi šni; qa tona yewicašipi kin hecapi keičiyapi kin hena wicadukan qa itonpišni kin heca iyewicayaya.

3 Wacinnitanka, qa ayape, qa micaje kin on htayani, qa oya-kiče šni.

4 Tuka taku cistinna iyacionpa, tokaheya wašteyadake cin he adušan.

5 Heon tokiya tanhan nihinhpaye cin he kiksuye, ča ihduccetu, qa niohan tokaheya kin hdušan wo. *Hecanon* šni kinhan kohanna ekta ciu, qa petijanjan nitawa kin yutokan iye-ciciye kta, nihduccetu šni kinhan.

6 Tuka he duha, Nikoleton wicohan kin šiceyadake cin, hena miš eya šicewadaka.

7 Tuwe noge yukan hecinhan, taku Woniya kin okodakiciye kin ewicakiye cin he nahon kta. Tuwe ohiye cinhan he can wiconi, Wakantanka tamaga co-

kaya he cin, hetanhan yun wakiye kta.

8 Unkan Smurna ekta okodakiciye ohnihde yuhapi kin he ecen wowapi kicaga wo; Tuwe tokaheya qa ehake un kin, če ča ake kini kin hee hecen eya;

9 Niohan kin sdonwaya, wokakije wowahpanica ko nitawa kin, (tuka winijica;) qa tona Juda wicašta keičiyapi qa hecapi šni, tuka Satan omniciye tawa kin etanhanpi, hena waaiapi kin *nakun sdonwaya*.

10 Token nicakije kte cin ihnuhan taku koyakipe cin. Iho, Wakansica niyepi wanjikji wicakaška tipi kin en iyeniyampi kta, iniyukanpi kta e heon; unkan anpetu wikcemna hehanyan wokakije duhapi kta; tuka wicače cin hehanyan wicaka wo, kinhan wiconi watešdake wan ciču kta.

11 Tuwe noge yukan hecinhan, taku Woniya kin okodakiciye kin ewicakiye cin he nahon kta. Tuwe ohiye cinhan he wiconče icinonpa kin on kiunianpi kte šni.

12 Unkan Pergamos ekta okodakiciye ohnihde yuhapi kin he ecen wowapi kicaga wo; Tuwe maza sagye anog ope kin hduhe cin hee hecen eya;

13 Niohan kin sdonwaya, qa tukten Satan oiyotanke tawa yanke cin hen yati; qa micaje kin yuha yaun, qa wacinnmayanpi kin adušan šni, anpetu kin Antipas waayatanin wicaka mitawa kin niyepi kin en, tukten Satan ti kin, hen ktepi qon he ehan.

14 Tuka taku wanjikjidan iyacionpa; Balaam hee Balak Israel cinca kin taku on wahtani ičiyabi kte cin wicitokam ehde





ça, ihduacetu wo. Kiktahan yaun śni kinhan wamanon sa iyecen ekta ciu kta, qa tohan ekta cih kte cin he sdonyakiye kte śni.

4 Tuka Sardis ekta wicacaje tonana duba, hena e tawokoyake kin hdušapapi śni; qa ska ihduzapi ecen mici manipi kta; he iyehantupi nakaes.

5 Tuwe ohiye cinhan he wokoyake ska koyake kta, qa iye caje kin wiconi wowapi kin etanhan wapajuju kte śni, tuka he caje kin Ate itokam, qa ohni hde wicaye cin hena wicitokam omdake kta.

6 Tuwe noge yukan hecinhan taku Woniya kin okodakiciye kin ewicakiye cin he nahon kta.

7 Unkan Philadelphia ekta okodakiciye ohni hde yuhapi kin he ecen wowapi kicaga wo; Tuwe wakan qa wicaka un, qa Dawid tiyopa iyuhidoke kin yuhe ça, yuhidoka eca tuwedan ecen iyeye śni, qa ecen icu eca tuwedan yuhidoke śni ece kin hee hecen eya;

8 Niohan kin sdonwaya, tiyopa wan yuhidokapi ecen he cin he nitokam ewahde, qa tuwedan ecen iyeya okihi śni; wowašake cistinna duhe ça mioie kin yuha yaun, qa micaje kin ehpemayaye śni.

9 Ito, Satan omniciye tawa kin etanhanpi Juda wicašta keičiyapi, tuka hecapi śni, qa itonpi śni kin, hena iho, upi, qa nisiha kin itokam canpeška makehde inajin wicawakiye kta, qa waštecicida e sdonyapi kta.

10 Woape oie mitawa kin he awandake cin, heon tohan taku wawiyutanyan un kin tona maka owancaya unpi kin iyutanwicaye kta u kinhan, hehan awanciyake kta.

11 Iho ecadan wau kta; taku duhe cin he tinsa yuza wo, hecen watešdake nitawa kin tuwedan nici kte śni.

12 Tuwe ohiye cinhan, he tipi wakan mita Wakantanka tawa kin ohna can ihupa wan wakage kta, qa icimana tankan ye kte śni; qa he akan mita Wakantanka caje kin owawa kta, qa mita Wakantanka otonwe tawa caje kin, Jerusalem teca kin hee, malpiya kin etanhan Wakantanka mitawa kin eciyatanhan u kin hee, qa nakun micaje teca kin.

13 Tuwe noge yukan hecinhan, taku Woniya kin okodakiciye kin ewicakiye cin he nahon kta.

14 Unkan Laodikia ekta okodakiciye ohni hde yuhapi kin he ecen wowapi kicaga wo; Tuwe Amen *eci yapi*, waayatanin owotanna, qa wicaka, Wakantanka woicage tawa otokahe kin hee hecen eya;

15 Niohan kin sdonwaya, sni qa ipiga unmana ecen yaun śni, sni qa ipiga unma tukte e ecen yaun kta wacin;

16 Tuka initeca, qa sni ipiga kici unmana ecen yaun śni, heon mii kin etanhan icihdepe kta.

17 Wimajica, qa woyuha ota waton, qa takudan imakakije śni, keha ce; qa inicakije ça, onniške ça, niwahpanica, qa išta nigonge ça, tanconikadan e sdonyakiye śni.

18 Kaken wahokonciciya ce, mazaskazi peta on yuecedan kagapi kin he opemicaton wo, winijica kta ce; qa wokoyake ska, kodake kta e heon, hecen tanconikadan on winištece cin he tanin kte śni; qa wicišta wihdi kin, ništa iyakiun kta, hecen wawandake kta.

19 Tona cantewicawakiye cin

hena wahokonwicawakiye ça, iyopewicawakiya ece. Heon mniheiçiye ça ihduecetu wo.

20 Ito, tiyopa kin en nawajin qa wakabubu ece; tuwe miho kin nañon, qa tiyopa hduhdoke cinhan, he ekta tin hibu, qa kici wawate kta, qa is eya mici wote kta.

21 Tuwe ohiye cinhan he oi-yotanke mitawa kin akan mici iyotanke wakiye kta, miye ohi-waye ça Ate oi-yotanke tawa kin akan weci imdotanke cin he iye-cen.

22 Tuwe noge yukan hecinhan, taku Woniya kin okodaki-ciye kin ewicakiye cin he nahon kta.

#### WICOWOYAKE 4.

1 Hena iyohakam wanmdake ça ito malipiya kin ekta tiyopa wan yuhdokapi; qa wicaho tokaheya nawañon kin he maza yahotonpi tanka kin iyececa, he omakiye ça heya, Deciya u wo, dena iyohakam taku u kte cin hena wanyagciciye kta ce.

2 Unkan kohanna Woniya kin en waun; qa ito, malipiya kin ekta oi-yotanke wan ecen hdepi, qa tuwe akan iyotankehan yan-ka.

3 Tuwe akan iyotanke cin he iwanyakapi kin inyan tehika, iyaspis qa sahhdinos iyececa; qa oi-yotanke kin ihdukšan wi-hmunke wan hmihbeya yanka, sunahgdos inyan kin iyececa.

4 Qa oi-yotanke kin ihdukšan oyanke wikcemna nonpa sam topa wanka; qa oyanke kin hena en hunkawicayapi wikcemna nonpa sam topa iyotankapi, qa wokoyake ska koyakapi e wanmdaka; qa pa kin en mazaskazi tešdakapi.

5 Unkan oi-yotanke kin etanhan wakanhdi qa wakinyan hotonpi qa wicaho hiyu; qa oi-yotanke kin itokam petijanjan šakowin peta ece ideyapi, hena Wakantanka taniya šakowin kin heepi.

6 Unkan oi-yotanke kin itokam mde wan wanka janjan seca, cahtowata iyecen kohdi; qa oi-yotanke kin cokaya, qa oi-yotan-ke kin ihdukšan, taku ni un topa kin yukanpi, hena e tokapatanhan qa hektapatanhan ko ista ojupidan.

7 Unkan taku ni un tokaheya kin he mnaja ounce kin iyececa; qa taku ni un iyokihe kin he tatanka ounce kin iyececa; qa taku ni un iciyamni kin he wicašta itohnake kin iyecen yuha; qa taku ni un icitopa kin he wanmdi kinyan un ounce kin iyececa.

8 Qa taku ni un topa kin otoi-yohi lupahu šakpekpe yuhapi, qa ihdukšan, qa mahen tanhan ista ojupidan; qa anpetu hanyetu ko ayaštan šni hecen eyapi, Wakan, Wakan, Wakan, Itancan Wakantanka Iyotan wašaka, tuwe un, qa un qon, u kte cin hee ce.

9 Qa tohan taku ni un topa kin, tuwe oi-yotanke kin akan kiyotanke ça owihanke wanin ni un kin he wowitan, qa wootanin, qa wopida qupi kinhan;

10 Hehan hunkawicayapi wikcemna nonpa sam topa kin hena, tuwe oi-yotanke kin akan kiyotanke cin he itokam makata ehpeiçiyapi, qa tuwe ohinniyan ni un kin ohodapi, qa watešdake tawapi kin oi-yotanke kin itokam ehpekiyapi, qa hecen eyapi;

11 Itancan, wowitan, qa wootanin, qa wowašake iyacu kta e iyenihantu, taku owasin yaka-



## WICOWOYAKE 5.

ge ça nitoyokipi kin on owasin kagapi qa ecen han.

### WICOWOYAKE 5.

1 Unkan tuwe oiyotanke kin akan kiyotanke cin he etapa kin eciyatanhan wowapi wan mahen tanhan qa akapatanhan owapi, qa ipuspe śakowin on apuspa-pi kin he wanmdaka.

2 Qa mahpiya ohnihde waśaka wan wanmdaka, he hotankakiya hotanin qa, Wowapi kin he tuwe yumdaye ça ipuspe śakowin kin yuhdoke kta okihi he, *eya*.

3 Unkan mahpiya kin ekta, qa maka kin akan, qa maka kin ihukuya tanhan tuwedan wowapi kin he yumdaye ça, en wan-yaka okihi śni.

4 Hehan nina waceya, tuwe wowapi kin yumdaye ça yawa, qa en wanyake kta iyekicihantu kin tuwedan iyeyapi śni kin he-on etanhan.

5 Unkan hunkawicayapi kin wanji hemakiya; Ceye śni wo, ito Juda wicoun kin etanhan, mnaja kin, Dawid hutkan kin hee wowapi kin yumdaye ça, ipuspe śakowin kin yuhdoke kta okihi.

6 Hehan wanmdake ça, iho, oiyotanke kin cokaya, qa taku ni un topa, hunkawicayapi ko wicacokaya Amnos wan najin, wośnapi iyececa, he śakowin iśta śakowin ko yukan, Wakantanka taniya śakowin maka kin owancaya ye wicayapi kin hena eepi.

7 He en hi, qa tuwe oiyotanke kin akan kiyotanke cin nape etapa kin etanhan wowapi qon icu.

8 Unkan wowapi kin he icu qehan, taku ni un topa kin, qa hunkawicayapi wikcemna nonpa sam topa kin hena Amnos

kin itokam makata ehpeiçiyapi, otoyohi candowankiyapi hduhapi, qa nakun mazaskazi wiyatke taku waśtemna on ojudan, wicaśta waśte wocekiye tawapi kin hee:

9 Qa odowan teca wan ahiiyayapi, qa heyapi; Wowapi kin iyacu, qa ipuspe kin duhdoke kta e iyenihantu ce, waniyuśnapi qa Wakantanka ekta niwe kin on opeunyakitonpi, wicoun otoyohi etanhan, qa iapi kin, qa wicowazi kin, qa oyate kin otoyohi etanhan;

10 Qa Wakantanka ekta wicaśtatayapi wawayuśnapi ko unyakagapi; unkan maka kin ounnyanpi kta ce.

11 Unkan wanmdake ça, oiyotanke kin ihdukśan, qa taku ni unpi kin hunkawicayapi ko wicihdukśan, mahpiya ohnihde woyawa tanka ota, qa kektopawinge ece kektopawinge, hena hopi kin nawañon;

12 Hotankakiya heyapi, Amnos wośnapi qon he wowaśake, qa woyuha, qa woksape, qa wicookihi, qa wootanin, qa wowitan, qa wowaśte *henakiya* icu kta okihi ce.

13 Unkan taku mahpiya ekta un, qa taku maka akan un, qa taku maka ihukuya tanhan un, qa taku miniwanca mahen un, hena taku ohnaka ko owasin kaken eyapi nawañon; Tuwe oiyotanke kin akan kiyotanke cin Amnos kin kici wowaśte kin, wootanin kin, wowitan kin, qa wowaśake kin *henakiya* owihanke wanin tawapi nunwe.

14 Unkan taku ni un topa kin hena, Hecetu nunwe, eyapi; qa hunkawicayapi wikcemna nonpa sam topa kin hena makata ehpeiçiyapi, qa tuwe ohinniyan ni un kin he ohodapi.

## WICOWOYAKE 6.

1 Unkan Amnos kin ipuspe tokaheya yuhdoke cehan wanmdaka; unkan taku ni un topa kin wanji, wakinyan hotonpi kin iyecen hotanin qa, U qa wanyaka wo, eya nawahon.

2 Unkan wanmdake ça, ito, súktanka ska wan tuwe akan iyotanke cin he itazipa wan yuha; qa wateśdake wan qupi; unkan ohiye ça, ohiye kta e iyaya.

3 Unkan ipuspe inonpa yuhdoke cehan, taku ni un icinonpa kin he, U qa wanyaka wo, eya nawahon.

4 Unkan súktanka wan tokeca hin śa kin he hinanpa; unkan tuwe akan iyotanke cin he maka kin etanhan wookiye icu kta e qupi, hecen otoiyo hi kiciktepi kta; qa nakun maza sagye wan tanka qupi.

5 Unkan ipuspe iyamni kin yuhdoke cehan, taku ni un wiciyamni kin he, U qa wanyaka wo, eya nawahon. Unkan wanmdake ça ito súktanka sapa wan; qa tuwe akan iyotanke cin he nape ohna taku on tke utapi wanji yuha.

6 Unkan taku ni un topa kin cokaya tanhan wicaho wan nawahon, Aguyapi iyutapi wanji he kaśpapidan wanjidán, qa súktanka tawote iyutapi nonpa he kaśpapidan wanjidán kta; qa wihdi miniśa ko ihnuhan kiuniyaye cin, eya.

7 Unkan ipuspe itopa kin yuhdoke cehan, taku ni un icitopa kin he ho kin nawahon; U qa wanyaka wo, eya.

8 Unkan wanmdake ça ito súktanka wan hin san; tuwe akan iyotanke cin he Wiconṭe eciyapi, qa Wicalhapi kin he ihakam iyaya. Unkan maka hanke ito-

pa kin hehanyan maza sagye, qa wicaakihan, qa wiconṭe, qa wamanica maka akan un kin hena on wicaśta wicakte kta e wowaśake qupi.

9 Unkan ipuspe izaptan kin yuhdoke cehan, wahna wośnapi kin ihukuya tona Wakantanka oie, qa iye waayataninpi kin he on wicaktepi qon hena nagipi kin wanwicamdaka.

10 Hena hotankakiya hotaninpi qa heyapi, Itancan wakan, qa wicaka, tohanyan tona maka kin akan yukanpi kin wicadaco śni qa we unkitawapi kin on toyecon śni he.

11 Unkan hena otoiyo hi wokoyake ska wicaqupi, qa ptecedan ape yukanpi kta, tona om taokiyey unpi qon, qa iye hunkawanjiktupi kin, is iyepi iyecen wicaktepi kte cin he yuśtanpi kta hehanyan, kewicakiyapi.

12 Unkan ipuspe isakpe kin yuhdoke cehan, wanmdake ça ito maka śkanśkan tanka, qa anpetu wi kin sapa aya, wahinske ojuha kin iyececa, qa hanyetu wi kin is we iyecen icaga.

13 Qa małpiya wicanłpi kin makata hinłpayapi, witanśna hu wan tateyanpa tanka kahuhuza eca waskuyeca śtunkadan keś pałpa ece kin he iyececa.

14 Qa wowapi pehan ehna kapi kin he iyecen małpiya kin tanin śni iyaye ça, he otoiyo hi, wita otoiyo hi ko yutokan iyeyapi.

15 Qa maka wicaśtayatapi, qa wicaśta tankinkinyanpi, qa wicaśta watonpika, qa wicaśta itancanpi, qa wicaśta waśakśakapi, qa wicaśta wowidake unpi kin otoiyo hi, qa ihduhapi kin otoiyo hi, makohidoka qa he imnija kin ehna naiçihmanpi;

16 Qa inyan he imnija ko hena heciyapi, Unkahinłpayapi, qa tu-

## WICOWOYAKE 7.

we oiyotanke kin akan kiyotanke cin itohnake kin etanhan, qa Amnos kin wocanniye tawa kin etanhan anaunhman po :

17 He wosihda tawa anpetu tanka kin wanna hi ; unkan tuwe najin okihi kta he.

### WICOWOYAKE 7.

1 Unkan hena iyohakam mahpiya ohnihde topa maka oise topa kin en inajinpi kin wanwicamdaka, maka tate ouye topa kin yuhapi, hecen maka qa miniwanca qa can hiyeye cin wanjidan atateyanpa kte sni.

2 Hehan mahpiya ohnihde tokeca wan wiyohiyanpa tanhan wankantkiya u kin wanmdaka, he Wakantanka ni un ipuspe tawa kin yuhe ca mahpiya ohnihde topa maka miniwanca ko kiuniyanpi kta e wicaqupi qon hena hotankakiya hoyewicakiye ;

3 Qa heya, Maka, qa miniwanca, qa can hiyeye cin kiuniyanpi sni po, Wakantanka unkitawapi taokiye wicaye cin itepi kin en wapetog wicuntonpi sni kin hehanyan.

4 Unkan tona wapetog wicatonpi wicayawapi kin nawahon, Israel cincapi wicoun owasin etanhan kektopawinge opawinge sam kektopawinge wikcemna topa sanpa kektopawinge topa wapetog wicatonpi.

5 Juda wicoun kin etanhan kektopawinge ake nom wapetog wicatonpi ; qa Ruben wicoun kin etanhan kektopawinge ake nom wapetog wicatonpi ; qa Gad wicoun kin etanhan kektopawinge ake nom wapetog wicatonpi ;

6 Aser wicoun kin etanhan kektopawinge ake nom wapetog

wicatonpi ; qa Nephtalim wicoun kin etanhan kektopawinge akenonpa wapetog wicatonpi ; qa Manasse wicoun kin etanhan kektopawinge ake nom wapetog wicatonpi ;

7 Sumeon wicoun kin etanhan kektopawinge ake nom wapetog wicatonpi ; qa Lewi wicoun kin etanhan kektopawinge ake nom wapetog wicatonpi ; qa Isakar wicoun kin etanhan kektopawinge ake nom wapetog wicatonpi ;

8 Zabulon wicoun kin etanhan kektopawinge ake nom wapetog wicatonpi ; qa Joseph wicoun kin etanhan kektopawinge ake nom wapetog wicatonpi ; qa Benjamin wicoun kin etanhan kektopawinge ake nom wapetog wicatonpi.

9 Hena taku kin iyohakam wanmdake ca, iho, wicota hinca, wicayawa kta tuwedan okihi sni, oyate hiyeye cin, qa wicoun kin, wicowazi kin, iapi ko owasin otoiyo hi etanhanpi, oiyotanke kin itokam, qa Amnos kin itokam najinpi, wokoyake ska ece koyakapi, qa can wapa nape ohna yuhapi ;

10 Qa hotankakiya hotaninpi qa heyapi, Wakantanka unkitawapi oiyotanke kin akan kiyotanke cin hee, Amnos kin kici, niwicaye yuha nunwe.

11 Unkan mahpiya ohnihde owasin oiyotanke kin oksan, qa hunkawicayapi taku ni un topa kin hena ko wicihdukšan inajinpi, qa oiyotanke kin itokam ite makipusdiya ehpeiciyapi, qa Wakantanka ohodapi ;

12 Qa heyapi, Amen ; Wowaste, qa wowitan, qa woksape, qa wopida, qa woyuonihan, qa wowašake, qa wicookihi *henakiya* Wakantanka unkitawapi kin



owihanke wanin yuha nunwe. Amen.

13 Hehan hunkawicayapi kin etanhan wanji waayupte ça, Wokoyake ska koyakapi kin hena tuwepi, qa tokiya tanhan upi he, emakiya.

14 Unkan, Itancan, niye sdon-yaya ce, epa. Unkan hemakiya; Wicokakije tanka etanhan upi qon dena eepi, unkan wokoyake hdujajapi, qa Amnos we kin on hduškapi.

15 Heon etanhan Wakantanka oiyotanke kin itokam yakonpi, qa tipi wakan iye tawa kin ohna anpetu hanyetu ko ohodapi ece; qa tuwe oiyotanke kin akan ki-yotanke cin he hena wicacokaya ounye kta.

16 Qa tohinni wotektehdapi kte šni, qa ipuzapi kte šni, qa anpetu wi kin qa taku kata ašpanwicaye kte šni.

17 Tuka Amnos kin, oiyotan-ke cokaya un kin he, hena won-wicaye ça, minihdoka ni un kin icahda yus awicaye kta: qa hena ištapi kin etanhan Wakantanka ištammihanpe kin owasin wicakipakinte kta.

### WICOWOYAKE 8.

1 Unkan ipuspe iškawin kin yuhdoke çehan, mašpiya ekta wihiyayedan wancadan ape cin hanke hehanyan inina yukanpi.

2 Unkan mašpiya ohnihde šakowin Wakantanka itokam najinpi kin wanwicamdaka; qa maza yahotonpi tanka šakowin wicacupi.

3 Hehan mašpiya ohnihde wan tokeca u qa wahna wošnapı kin ekta hinajin, mazaskazi oizinye wan yuha: Unkan taku waštenna ota qupi kin he, tona owotanna un kin owasin wocekiye

tawapi kin alna, mazaskazi wahna wošnapı kin oiyotanke kin itokam wanke cin he akan wošna kta e heon.

4 Unkan mašpiya ohnihde nape kin etanhan šota izite cin, tona owotanna un wocekiye tawapi kin hena ko, Wakantanka itokam wankantkiya aya.

5 Unkan mašpiya ohnihde kin he oizinye kin icu, qa wahna wošnapı peta kin etanhan oju, qa maka kin ekta ešpeya; unkan iho, wicaho, qa wakinyan hotonpi, qa wakanhdi, qa maka škanškan.

6 Unkan mašpiya ohnihde šakowinpi maza yahotonpi tanka yuhapi kin hena yahotonpi kta e hduwiyeyapi.

7 Unkan mašpiya ohnihde tokaheya kin yahoton, qa wasu peta ko we icicahiyapi maka kin ahinhe: Qa can iyamnimni kin hušnaga, qa wato kin iyulıpa hušnaga.

8 Unkan mašpiya ohnihde iyokihe kin he yahoton, qa taku he wan tanka iyececa peta on itkon-yahe cin he miniwanca kin en iyohpeyapi: Qa miniwanca kin hanke iyamni we icaga:

9 Qa taku miniwanca oicage ni un kin hanke iyamni ŧapi, qa wita wata kin iyamnimni kin owihanke yapi.

10 Unkan mašpiya ohnihde iciyamni kin he yahoton, qa wicanlıpi wan tanka ideyapi petijanjan iyececa, mašpiya kin eciyatanhan hinłpaye ça wakpa iyamnimni kin ahinłpaye ça minihdoka kin en.

11 Wicanlıpi kin he, Yatkepicašni, ecıyapi. Unkan mini yatkepica šni icage ça wicašta ota mini kin on ŧapi, pa icage cin heon.

12 Unkan mašpiya ohnihde

icitopa kin he yahoton; unkan anpetu wi hanke iyamni, qa hanyetu wi hanke iyamni, qa wicanhipi iyamnimni kin apapi, qa hecen hanke iyamni otpaza icu, qa anpetu kin hanke iyamni hehanyan iyoyanpa šni un, qa hanyetu kin nakun iyececa.

13 Hehan wanmdake ça nawahon, małhiya ohnihde wan małhiya cokaya tanhan kinyan iyaye ça hotankakiya heya, Wicokakije, wicokakije, wicokakije, tona maka oonyanpi kin hena en, maza yahotonpi tanka hotonpi kin małhiya ohnihde yamni yahotonpi kte cin heon etanhan.

## WICOWOYAKE 9.

1 Unkan małhiya ohnihde icizaptan kin he yahoton, qa iho, wacanhipi małhiya kin eciyatanhan maka kin ahinłipaya wanmdaka; unkan he makohdoka ceteta wanica tiyopa iyuhdoka kin qupi.

2 Qa, makohdoka ceteta wanica he tiyopa kin yuhdoka, unkan makohdoka kin etanhan šota hiyu, peta on maza šdoyapi tanka hınca etanhan šota uye cin iyececa; qa wošbe etanhan šota kin he on anpetu wi kin okotonyan kici aotpaza.

3 Unkan šota kin etanhan psipicadan au, maka kin ekta, qa wicowašake wicaqupi, wamduška maka akan un kin wicowašake yuhe cin he iyececa.

4 Qa wato maka aicage cin, taku toya un, qa can kin owasin kiuniye šni wicašipi, tuka wicašta kin tona itepi kin en Wakan-tanka tawowapetogton yuhapi šni kin henana.

5 Qa hena wicaktepi kta e wicaqupi šni, tuka wi zaptan hehanyan kakišwicaye kta e wi-

caqupi. Unkan kakišyapi kin he wamduška wicašta cawicape cinhan kiuniyanpi kin he iyececa.

6 Unkan anpetu kin hena en wicašta wiconęe akitapi kta, tuka iyeyapi kte šni, qa řapi cinpi kta, tuka wiconęe e nawicakicipe kta.

7 Psipicadan kin hena ounce kin šuktanka ozuye on wiye-ya ehnag najinpi kin he iyececa; qa pa akan mazaskazi watešdake iyececa wapaha kitonpi, qa itepi kin wicašta ite kin iyececa.

8 Qa paha kin he winohınca paha iyecen yuhapi, qa hi kin hena mnaja hi kin iyececa.

9 Qa maza sapa maku akalipe iyececa maku akalipe tonpi; qa łupahu łimuhmunyan he ozuye canpahmihma, qa šuktanka ota ozuye ekta nawang yapi kin he iyececa.

10 Wamduška kin iyecen sinte yuhapi, qa sinte kin en icape yuke ça, wi zaptan hehanyan wicašta kin kiuniwicaye kta okihipi.

11 Unkan wicaštayatapi wan yuhapi, wošbe ceteta wanica etanhan ohnihde, Hebrew iapi kin eciyatanhan Abaddon eciyapi, qa Helenes iapi kin eciyatanhan Apoluon eciyapi kin hee.

12 Wicokakije kin wanji wanna henakeca, qa ito he iyohakam wicokakije nom u kta ce.

13 Unkan hehan małhiya ohnihde icišakpe kin yahoton, qa mazaskazi wahna wošnapi Wakantanka itokam wanke cin he he topa kin etanhan wicaho wan taninyan nawahon:

14 He małhiya ohnihde icišakpe maza yahotonpi tanka yuhe cin he heciya; Małhiya ohnihde

topa wakpa tanka Yuphrate kin ekta wicakaškapi kin hena wicakiyuška wo.

15 Hehan małpiya ohnihde topa kin wicakiyuškapi; hena e wancadan ape cin, qa anpetu wanji, qa wi wanji, qa omaka wanjidan hehanyan wiyeya ehmag unpi, wicašta iciyamnimni kin wicaktepi kta e heon.

16 Unkan ozuye kin šuktanka akan iyotankapi kin hena kektopawinge kektopawinge opawinge nonpa; hena wicayawapi kin nawahon.

17 Qa wowanyake kin en šuktanka kin hecen wanwicamdarka, qa wicašta akan iyotankapi kin hena maku akałpe šaša, toto, qa zizi yuhapi. Unkan šuktanka pa kin he mnaja pa kin iyececa, qa ipi kin etanhan peta, qa šota, qa całdi on kagapi kin hiyu.

18 Unkan hena yamni, peta, qa šota, qa całdi on kagapi, hena ipi kin etanhan hiyu qon he on wicašta iciyamninni kin wicaktepi.

19 Wowasake yuhapi kin he ipi kin ohna qa sintepi kin ohna; sintepi kin hena wamduška kin iyececa, qa pa yukan ece, qa hena on wakiuniyapi ece.

20 Unkan wicašta tona wicakakije kin hena on wicaktepi šni kin hena iye napepi wicołan kin on iyopeiçiyapi šni, hecen taku wakan šicapi kin ohowicadapi, qa mazaskazi, qa mazaska, qa mazazi, qa inyan, qa can wakagapi ohodapi ece kin ayuštampi šni; hena wawanyake šni, qa winahon šni qa mani okihi šni.

21 Qa nakun tinwicaktepi, qa wapiyapi, qa wiinalmanpi, qa wamanonpi econpi kin on iyopeiçiyapi šni.

## WICOWOYAKE 10.

1 Unkan behan małpiya ohnihde wan tokeca wašake hınca małpiya kin eciyatanhan kunkiya u, małpiya šapa hdown kin he wanmdaka; wihmunke wan wapaha kiye ça, ite kin he anpetu wi kin iyececa, qa siha kin peta wankantkiya ide kin iyececa.

2 Qa nape kin on wowapi wan cistinna yumdayeya yuha. Qa siha etapa kin miniwanca ahekiye ça, sicutka kin is maka kin akan.

3 Qa hotankakiya hotanin, mnaja wan hoton kin iyececa. Unkan hotanin hehan wakinyan šakowin hotonpi.

4 Unkan wakinyan šakowin kin hotonpi hehan wowapi wakage kta, tuka wicaho wan nawahon, małpiya kin eciyatanhan hemałkiya, Taku wakinyan šakowin eyapi kin he sutaya apuspa wo, qa wowapi en kage šni wo.

5 Unkan małpiya ohnihde miniwanca maka ko akan najin wanmdake ciqon he nape kin małpiya kin ekta hdugate;

6 Qa tuwe ohinniyani ni un, qa małpiya kage ça, taku ohnaka ko, maka qa taku ohnaka ko, miniwanca qa taku ohnaka ko kage cin hee on konza, Anpetu kin wanna henakeca kta;

7 Tuka małpiya ohnihde icišakowin yahoton kinhan, anpetu kin hena en Wakantanka tawowiyukan henakeca kte cin hehanyan, iye taokiyeye, wicašta wokcan kin owicakiyake ciqon he iyecetu ce.

8 Unkan wicaho małpiya kin eciyatanhan tanin qon he ake hoyemakiye ça heya, Małpiya ohnihde miniwanca maka ko akan najin kin he ekta ye ça,



## WICOWOYAKE 11.

wowapi cistinna yumdayapi kin nape en un kin he icu wo.

9 Hehan malipiya ohnihde kin he en wai qa hewakiya, Wowapi cistinna kin he maqu wo. Unkan, Icu qa yuta wo, tezi kin pa niye kta, tuka nii kin ohna tuhmagā canhanpi kin iyecen skuye kta ce, emakiya.

10 Unkan wowapi cistinna kin malipiya ohnihde nape kin etanhan iwacu, qa temwaya; qa mii kin en tuhmagā canhanpi kin iyecen skuya, tuka nawapca hehan tezi kin pa mayan.

11 Hehan, Oyate, qa Ikcewicašta, qa iapi kin, qa wicaštaya-tapi ota en wicayakidukean kta ce, emakiya.

## WICOWOYAKE 11.

1 Unkan cedi wan cansakadan iyecēca he maqupi; unkan malipiya ohnihde kin najinhan najin qa heya; Najin, qa tipi wakan Wakantanka tawa kin iyuta wo, qa wahna wošnapī, qa tona en cekiyapi ece kin hena nakun.

2 Tuka hocoka kin, tipi wakan itankan, he tankan iyeye qa iyute šni wo; he Ikcewicašta kin wicaqupi; unkan otonwe wakan kin amanipi kta, wi wikcemna topa sam nonpa hehanyan.

3 Unkan waayataninpi nom mitawa kin wahinske ojuha oihugepi waayatapi kta e wicawaqu kta, anpetu kektopawinge sanpa opawinge nonpa sanpa wikcemna šakpe hehanyan.

4 Hena e Oliwe can nonpa qa petijanjan nom, Wakantanka maka yuhe cin itokam he cin hena eepi.

5 Unkan tuwe hena kiuniwicayeye kta cin kinhan, ipi kin etanhan peta hiyu, qa toka wi-

cayapi kin ibang wicaye kta: Tuwe kiuniwicaya cin kinhan he hecen ktepi kta.

6 Hena e malipiya kin onataka okihipi, hecen magaju kte šni, waayatapi anpetu kin icunhan, qa mini kin we icaliyapi kta okihipi, qa tohan cinpi eca wokakije owasin on maka kin kakisiyapi ece.

7 Unkan taku yaotaninpi kin wanna yuštānpi kta hehan, wošbe kin etanhan wamanica wan wankantkiya hiyu, qa hena azuwicayeye kta, qa ohiwicayeye qa wicakte kta.

8 Unkan hena tancan tapi kin otonwe tanka canku kin ohna wanke kta, he iapi wakan kin eciyatanhan Sodom qa Egupta eciyapi, qa tukten Itancan unkitawapi kin icipaweh okatanpi qon.

9 Unkan wicašta kin, qa wicowazi kin, qa iapi kin, qa oyate kin, hena tancan tapi kin wanwicayakapi kta, anpetu yamni qa wanji hanke hehanyan, qa tancan tapi kin maka mahen wicalhapi kte cin iyowinwicakiyapi kte šni.

10 Unkan hena on etanhan tona makoce kin en oonyanpi kin magagaičiyapi, qa wiyuškinpi kta, qa taku kicičupi kta, waayatapi nom tona maka akan ni un kin kakiswicayapi qon hena on etanhan.

11 Unkan anpetu yamni qa wanji hanke iyohakam, wiconi oniya kin Wakantanka eciyatanhan hena mahen iwicayaya; qa siha on najinpi, unkan tona wanwicayakapi kin nina yušinyayapi.

12 Unkan hena wicaho wan tanka nahonpi, malipiya kin eciyatanhan hewicakiya; Deciya wankan u po, *eya*. Unkan ma-

lipiya šapa wan akan malipiya kin ekta iyayapi, qa tona toka wicayapi qon hena wanwicayakapi.

13 Unkan wihiyayedan ape cin he icunhan maka škanškan wan tanka, qa otonwe kin hankedan iwicemnamna kin hinlipaya, qa maka škanškan kin on tona ŋapi kin hena wicašta kektopawinge šakowin. Qa unmapi kin yušinyayapi qa malipiya Wakan-tanka kin wowitan qupi.

14 Wicokakije inonpa kin wana henakeca, qa ito wicokakije iyamni kin kohanna u kta ce.

15 Hehan malipiya ohnihe icišakowin kin yahoton, qa malipiya kin ekta wicaho tanka hotaninpi, qa heyapi, Itancan unkitawapi qa Messiya tawa kin, maka wokiconze kin tawaye ça, ohinnian en wicaštayatapi un kta ce.

16 Hehan hunkawicayapi wicemna nonpa sanpa topa, Wakantanka itokam oiyotanke kin akan kiyotankapi kin, hena makata elipeiciyapi, qa Wakantanka ohodapi;

17 Qa heyapi, Itancan Wakan-tanka Iyotan wašake cin, tuwe un, qa un qon, u kte cin he niye ce, pidaunyayapi, nitowašake tanka kin iyekcu, qa wicayeconza ce.

18 Qa oyate kin šindhapi, qa wocantiyahde nitawa kin wana hi; qa tohan wicašte cin wicayacopi kta, qa ookiye wicayaye cin wicašta wokcan, qa owotanna, qa tona nicaje kin kokipapi, cistinpidan tankinkinyan ko, taku wicayaqu kta, qa tona maka napištanyanpi kin hena napištanwicayaye kte cin.

19 Hehan malipiya kin ekta tipi wakan Wakantanka tawa kin yuħdokapi, qa tipi wakan

kin en wicotakuye can koka kin wanyakapi. Unkan ito wakanhdi, qa wicaho, qa wakinyan hotonpi, qa maka škanškan, qa wasu tanka.

## WICOWOYAKE 12.

1 Unkan malipiya kin ekta wowapetokeca tanka wan tanin: Winohinca wan anpetu wi kin koyake ça, hanyetu wi kin siha kin ihukuya, qa pa kin en wicanłpi ake nonpa wapaha kiya.

2 He ihdušake ça, hokšiksuye ça howaya, cinca ton kta e wazanka.

3 Unkan hehan malipiya kin ekta wowapetokeca tokeca wan tanin; wamduška duta tanka wan, he pa šakowin, qa he wicemna yuha, qa pa šakowin kin en watešdake šakowin tešdaka.

4 Qa sinte kin on malipiya wicanłpi iyammimni kin iwicacu, qa maka kin ekta elipewicaya. Unkan wamduška kin he winohinca hokšiksuye cin itokam najin, cinca ton kinhan temye kta.

5 Hehan cinca ton, wica kin, oyate hiyeye cin owasin maza icapsinte wan on wicayuhe kte cin hee. Unkan hokšiyooqopa kin he Wakantanka, qa iye oiyotanke kin ekta eyakupi.

6 Unkan winohinca kin he hewoskan makoce kin ekta napa, heciya Wakantanka taku wiyeya ekicihnaka, qa hen anpetu kektopawinge sanpa opawinge nonpa sam wicemna šakpe behanyan wonyapi kta.

7 Hehan malipiya kin ekta ozuye kagapi; Mikael qa iye taokiye kin wamduška kin kici kiczapi. Unkan wamduška kin qa iye taokiye kin kiczapi;

8 Qa ohiwicayapi šni; hecen

hetanhan mahipiya kin ekta tuktedan wicakiyukanpi šni.

9 Unkan wamduška tanka kin, wamduška wanakaja tanhan un kin hee, Wakanšica qa Satan eciyapi, wicašta hiyeye cin owasin wicahnaye cin hee, makata ehpeyapi, qa tona ookiye wicaye cin hena nakun kici tankan iyewicayapi.

10 Unkan mahipiya kin eciyatanhan wicaho wan tanka nawahon, hecen eya, Wanna un-kita Wakantankapi wiconi tawa, qa towašake qa tokiconze kin u; qa Messiya wicookihi tawa kin nakun; tuwe hunkawanjin wicunkiyapi kin taku iyawicaonpe cin, Wakantanka unkitawapi kin itokam, anpetu hanyetu ko awicaie cin hee kun ehpeyapi kin heon etanhan.

11 Unkan hena Amnos we kin he on, qa waayataninpi oie tawapi kin he on ohiyapi, qa wiconče hehanyan wiconi tawapi kin wašte kidapi šni.

12 Heon etanhan, mahipiya kin iyuškin po, qa tona ohna tipi kin. Tuka tona maka kin miniwanca ko ekta yakonpi kin hena wicokakije yuhapi kta; niyepi kin ekta Wakanšica kun iyaye ca wošihda tanka yuha, aškayedan kta e sdonkiye cin heon etanhan.

13 Unkan wamduška kin maka kin ekta ehpeyapi kin he wanhdaka, hehan winohinca cinca ton qon he šicaya kuwa.

14 Unkan winohinca kin he wanmdi tanka hupahu tawa nom qupi, on hewoskan makoce tukten ti kte cin heci kinyan iyaye kta, heciya waniyetu yamni qa wanji hanke hehanyan wonyapi kta, wamduška itohnake kin itehanyan.

15 Unkan wamduška kin iye i

kin etanhan mini hiyuya, wakpa wan iyececa, qa winohinca kin ihakam hiyayeya, minin țeyekta e heon.

16 Unkan maka kin winohinca kin he okiye ca, i hdukawa, qa wakpa wamduška i kin etanhan hiyuye cin he yahepa.

17 Unkan wamduška kin he winohinca kin on šinhda, qa winohinca cinca wicaye cin, tona Wakantanka tawoahope kin ahopapi, qa Jesus Messiya wootanin tawa yuhapi kin hena azuwicaya.

## WICOWOYAKE 13.

1 Unkan hehan miniwanca kahda wiyaka kin en nawajin. Qa miniwanca kin etanhan wamanica wan hiyu wanmdaka, pa šakowin, qa he wikcemna yuha, qa he kin akan wacinhe wikcemna, qa pa kin akan waoštehdapi caje kin.

2 Unkan wamanica wanmdake cin he inmu tanka iyececa, qa siha kin hena wahanksica siha kin iyececa, qa i kin mnaja i kin iyececa. Unkan wamduška qon towašake kin he qu, qa oiyotanke tawa kin, qa wicookihi tanka.

3 Unkan wanmdake ca, ito pa kin wanji kiunyanpi, on țe kta tuka; unkan kiunyanpi kin on țe kte cin he okizi, qa wicašta kin owasin wamanica kin on yušinyayapi.

4 Qa wamduška kin towašake kin wamanica qu qon he ohodapi, qa wamanica kin he nakun ohodapi, qa heyapi, Tuwe wamanica kin iyececa he, qa tuwe he kici kicize kta okihi he.

5 Unkan i wan qupi, he on taku tanka, qa iapi šice cin eye kta, qa wowašake qupi, wi wikcemna topa sanpa nonpa he-



hanyan, ozuye econ kte cin he-  
on.

6 Unkan i hdukawa qa Wakantanka yašica, caje, qa wakeya tawa kin, qa tona małpiya kin ekta etipi kin hena taku awicakicaga.

7 Qa tona owotanna un kin hena azuwicaye a wicaktedan kta e qupi, qa wicowazi, qa iapi kin, qa oyate kin owasin wicayuhe kta e wowašake qupi.

8 Unkan tona maka akan unpi cajepi kin wiconi wowapi Amnos, maka kagapi kin hehantanhan wošnapi qon, he tawa kin en owapi šni kin hena owasin wamanica kin ohodapi.

9 Tuwe noge yukan hecinhan, he nahon kta.

10 Tuwe wayaka awicahdi kinhan he wayaka ayapi kta, qa tuwe maza sagye on wicakte kin he maza sagye on ktepi kta ce. He en wicašta owotanna aepi qa wacinyanpi kin tanin.

11 Unkan wamanica wan tokeca maka kin etanhan hiyu kin he wanmdaka; he he nom yuha tašin wanuyanpi cincadan iyececa, qa wamduška iyecen ia.

12 Unkan wamanica tokaheya kin he towašake kin ocowasin yuha, qa maka kin, tona akan un kin hena ko wamanica tokaheya kin kiuniyanpi, qa on e kta, tuka okizi kin he ohodawicakiya.

13 Qa wowapetokeca tanka econ, wicašta wicitokam małpiya kin eciyatanhan peta maka kin ahinłpaye ya.

14 Qa tona maka akan unpi kin wicahnayan, wowapetokeca wamanica kin itokam econ kta e qupi qon hena on. Qa tona maka akan unpi kin wamanica maza sagye on capapi tuka kini

qon he iyacinpi wan kagapi kta e iwahokonwicakiya.

15 Qa wamanica iyacinpi kin he oniya qu okihi, hecen on wamanica iyacinpi kin ie kta, qa tona iyacinpi kin ohodapi šni kin hena wicakte kta okihi.

16 Unkan owasin, cistinpidan tankinkinyanpi ko, wijicapi qa wałpanicapi, tona ihduhapi, wowidake unpi kin hena ko, nape etapa kin en, qa is itepi kin en wowapetogton tawa kin yuhe wicakiya.

17 Unkan tuwedan wopeton kte šni, tuka tona wamanica towapetogton, caje kin, qa caje ihdawa kin he wanji tukte e yuhe cin henana.

18 De en woksape yukan. Tuwe ksape cin he wamanica tona ihdawa kin he yawa kta. He wicašta iyawapi kin hee, ihdawa kin he opawinge šakpc sanpa wikcemna šakpc sanpa šakpc.

#### WICOWOYAKE 14.

1 Hehan wanmdake a, iho, Amnos wan Zion Paha kin akan najin, qa kektopawinge opawinge sanpa kektopawinge wikcemna topa sam kektopawinge topa kici najinpi, iye Atkuku caje kin itepi kin en owapi qon.

2 Unkan małpiya kin eciyatanhan wicaho wan nawahon, mini ota ihaša kin iyececa, qa wakinyan tanka hoton kin iyececa. Qa dowankiyapi sa candowankiyapi on dowanpi wicahotanin nawahon.

3 Qa oiyotanke kin itokam, qa taku ni un topa kin, qa hunkawicayapi kin wicitokam odowan teca se ahियayapi. Odowan kin he tuwedan onspe kta okihi šni. tuka kektopawinge opawinge sam kektopawinge wikcemna

topa sam kektopawinge topa maka kin etanhan opewicatonpi qon hena.

4 Winohinca on aśamwicayapi śni kin hena eepi, tanśna unpi nakaes. Tona Amnos kin tokiya ye cinhan iyahna yapi kin hena eepi. Wicaśta kin etanhan Wakantanka qa Amnos kin ekta opewicatonpi tokaheya kin hena eepi

5 Qa hena ipi kin en wohnye takudan iyeyapi śni; qa Wakantanka oiyotanke kin itokam takudan iyaonpepica śni unpi.

6 Hehan maḥpiya ohnihde tokeca wan maḥpiya cokaya kinyan iyaye cin he wanmdaka, wotanin wašte owihanke wanin un kin, tona maka akan unpi kin, wicaśta kin, qa wicowazi, qa iapi, qa oyate hiyeeye cin owasin ieyanpaha owicakiyake kta yuha iyaya.

7 Qa hotankakiya heya, Wakantanka kinihanpi qa wowitan qu po; woyaco anpetu kin wana hi ce; qa tuwe maḥpiya, maka, miniwanca, qa wakoniya kin kage cin he itokam canpeśka makehde inajin po.

8 Unkan maḥpiya ohnihde icinonpa kin he ihakam ye ça heya, Hinḥpaya ce, Babulon otowe tanka kin he hinḥpaya; wawiciahapi wocantiyahde miniśa tawa kin etanhan oyate hiyeeye cin owasin yatke wicakiye cin he dee.

9 Unkan maḥpiya ohnihde iciyamni kin he hena wicihakam ye ça hotankakiya heya, Tuwe wamanica, qa iyacinpi kin ohoda, qa wowapetogton tawa kin ite, qa iś nape kin en yuhe cinhan;

10 He Wakantanka wocantiyahde miniśa tawa kin wocanteptanye miniyatke tawa kin en

okaśtan kin hetanhan yatke kta, qa maḥpiya ohnihde owotanna un kin hena wicitokam, qa Amnos kin itokam, peta, caḥdi ko en kakiśyapi kta.

11 Qa kakiświcayapi śota kin owihanke wanin wankan iyaya ece; qa tona wamanica iye iyacinpi ko ohodapi, qa tuwe he caje wapetogtonpi yuhe cin hena anpetu hanyetu ko oziyapi wanin unpi.

12 Wicaśta owotanna apepi kin he de en un, qa tona Wakantanka tawoahope opapi qa Jesus wacinyanpi kin hena.

13 Hehan maḥpiya kin eciyatanhan wicaho wan nawahon, hecen emakiya, Wowapi ecen kaga wo; Detanhan wicate cin tona Itancan kin en ṭapi kin hena wicayawaštepi ece. Han, Woniya kin eya, Wicohtani kin ayuśtanpi kta, qa wicohan kin wiciyahna iyaya ece.

14 Hehan wanmdake ça, ibo, maḥpiya ska wan, qa wanji Wicaśta Cinhintku kin iyececa akan iyotanka, he mazaskazi wapaha wan wapaha kiye ça, nape etapa kin on isan śkopa pe linca yuha.

15 Unkan maḥpiya ohnihde tokeca wan tipi wakan kin etanhan u, qa tuwe maḥpiya ska kin akan iyotanke cin he panyanhan heciya; Isan śkopa nitawa kin en iyekiye ça *aguyapi* baksa wo. Mnayanpi kte cin wanna iyehantu; maka woksapi kin wanna śeca ce.

16 Unkan maḥpiya ska akan iyotanke cin he isan śkopa tawa kin maka ekta yekiya, unkan maka kin baśdapi.

17 Hehan maḥpiya ohnihde wan tokeca tipi wakan maḥpiya kin ekta he cin hetanhan u, he nakun isan śkopa pe linca yuha.

18 Unkan maḥpiya ohnihde tokeca wan wahna wośnapi kin etanhan u, he peta on wowaśake yuha. Qa he tuwe isan śkopa pe ḥinca yuhe cin he panyanhan hoyekiye ḥa heya, Isan śkopa pe ḥinca nitawa kin ekta yekiye ḥa maka hastanhanka kin mnayan wo; hastanhanka iyage kin wanna sapa ce.

19 Unkan maḥpiya ohnihde kin he isan śkopa tawa kin maka ekta yekiye ḥa, maka hastanhanka iyuwi kin mnaye ḥa, Wakantanka wocantiyahde miniśa iyuśkice tawa tanka kin he en iyohpeya.

20 Unkan otonwe kin itankan mini śa iyuśkice kin napanpi, qa mini śa iyuśkice kin etanhan we hiyu, śuktanka i iyuwi kin hehanyan, stadiya kektopawinge sam opawinge śakpe hehanyan.

WICOWOYAKE 15.

1 Unkan maḥpiya kin ekta wowapetokeca tanka, qa wowinihan wanmdaka; maḥpiya ohnihde śakowin wicokakije śakowin ehake kin yuhapi, hena en Wakantanka wocantiyahde tawa kin henakeca kta.

2 Unkan mde wan janjan peta kici icicahiyapi seca wanmdaka, qa tona ohiya, wamanica qon, iye iyacinpi kin qa wowapetogton kin, qa tona caje iyawapi kin, ohiye ciqon hena janjan mde kin akan najinpi, qa Wakantanka candowankiyapi tawa kin heca yuhapi.

3 Qa Moses Wakantanka taokiye tadowan, qa Amnos kin tadowan kin ahiyayapi, qa heyapi, Itancan, Wakantanka Iyotan waśake cin niohan kin tanka, qa wowinihan, tona owotanna un kin en Wicaśtayatapi

kin *he niye ce*, nitacanku kin owotanna qa wicaka.

4 Itancan, tuwe konicipe kte śni, qa nicaje kin inidowan kte śni he; niśnana oniowotanna; qa oyate hiyeye cin owasin upi, qa nitokam canpeśka makehde enajin kta; woyaco nitawa kin wanna tanin kin heon etanhan.

5 Unkan he iyohakam wanmdake ḥa, iho, maḥpiya kin ekta waayataniinpi wakeya wakan kin he yuzamni han.

6 Qa maḥpiya ohnihde śakowin wicokakije śakowin yuhapi kin hena tipi wakan kin etanhan inanpapi, miniḥuha ska wiyatpa kin heca koyakapi, qa mazaskazi on maku opta ihdukitapi.

7 Unkan taku ni un topa kin wanji maḥpiya ohnihde śakowin kin mazaskazi wiyatke kin heca śakowin wicaqu; hena Wakantanka ohinniyan ni un wocantiyahde tawa kin on ojudan.

8 Unkan Wakantanka towitan, qa towaśake kin eciyatanhan tipi wakan kin śota ojudan. Qa tipi wakan kin tuwedan timahen ye kta okihi śni, wicokakije śakowin maḥpiya ohnihde śakowin yuhapi kin henakeca kte śni hehanyan.

WICOWOYAKE 16.

1 Unkan tipi wakan kin etanhan wicaho wan tanka nawahon, maḥpiya ohnihde śakowinpi qon hewicakiya, Yapi, qa wiyatke Wakantanka wocantiyahde tawa kin hena maka kin en akaśtan po, *eya*.

2 Hehan maḥpiya ohnihde tokaheya kin u, qa wiyatke tawa kin maka kin en akaśtan. Unkan wicaśta tona wamanica wowapetogton tawa kin yuhapi, qa iyacinpi kin ohodapi kin he-



na en śiyaka o tanka qa śica awicahinhpaya.

3 Unkan mahpiya ohnihde icinonpa kin wiyatke tawa kin miniwanca kin en akaŝtan; unkan he we icaga, wicaŝe cin we kin iyececa, qa miniwanca kin en taku niyake un kin owasin ŝapi.

4 Unkan mahpiya ohnihde iciyamni kin wiyatke tawa kin wakpa qa wakoniya kin hena en akaŝtan; unkan hena we icaga.

5 Hehan mahpiya ohnihde wan mini kin yuhe cin he kaken eya, nawahon; Itancan, tuwe un, qa un qon, u kte cin he niye, onio-wotanna, hecen wicadaco:

6 Wicaŝta owotanna, qa wokcanpi kin hena we kin wicakipapsonpi; qa hecen we yatke wicayakiya, he iyekicihantupi nakaes.

7 Unkan wanji tokeca wahna woŝnapi kin eciyatanhan kaken eya, nawahon; Itancan, Wakantanka Iyotan waŝaka, wadaco kin he ohinniyan owotanna qa wicaca ce.

8 Hehan mahpiya ohnihde icitopa kin wiyatke tawa kin anpetu wi kin en akaŝtan. Unkan he wicaŝta kin peta on wicagu kta e qupi.

9 Qa iyokatapi tanka kin wicaŝta wicagu, qa hecen Wakantanka wicokakije hena yuhe cin he caje kin oŝtehđapi, qa wowitan qupi kta on ihđuecetupi ŝni.

10 Unkan mahpiya ohnihde icizaptan kin wiyatke tawa kin wamanica oyanke tawa kin en akaŝtan; unkan wokiconze tawa kin otpaza ojudan, qa wayazanpi on cejipi kin hđahđahđakapi.

11 Qa wicokakije qa śiyaka o kin on etanhan mahpiya Wakantanka kin yaŝicapi, qa iye ohanpi kin on iyopeiciyapi ŝni.

12 Unkan mahpiya ohnihde

iciŝakpe kin wiyatke tawa wakpa tanka kin Yuphrate, he en akaŝtan; unkan mini kin puza aya, hecen wicaŝtayatapi wiyohiyanpa tanhan au kin canku kin wicakiciyumdayapi kta.

13 Unkan wamduŝka i kin etanhan, qa wamanica i kin etanhan, qa woitonŝni wokcan kin he i kin etanhan, taku wakan ŝica yamni, hnaŝka iyececa, hena hiyu wanmdaka.

14 Hena taku wakan ŝica taniyapi kin hecapi, wowapetokeca econpi, qa maka sitomniyan wicaŝtayatapi kin, qa wicoicage ocowasin ekta yapi, Wakantanka Iyotan waŝake cin anpetu tawa tanka kin en zuya awicaupi kta e heon.

15 Iho, wamanon sa wan iyecece wau ce. Tuwe kiktahan un, qa wokoyake kpatan kin he yawaŝtepi ece, hecen tancodan mani kte ŝni, qa wiŝtece cin wanyakapi kte ŝni.

16 Unkan Hebrew iapi kin eciyatanhan tukten Armagedon eciyapi, hen witaya u wicaya.

17 Hehan mahpiya ohnihde iciaŝakowin kin wiyatke tawa kin okaduze cin en akaŝtan. Unkan mahpiya kin ekta tipi wakan kin etanhan, qa oiyotanke kin etanhan, wicaho tanka wan tanin, qa heya, Wanna henakeca.

18 Unkan iho wicaho taninpi, qa wakinyan hotonpi, qa wakanhđi tanin, qa miaka ŝkanŝkan wan tanka, wicaŝta kin maka akan iwicacage cin ehantanhan maka ŝkanŝkan iyecen tanka wanica.

19 Qa otonwe tanka kin he yamni kiyuŝpapi; qa otonwe Ikcewicasta tawapi kin hena hinhpayapi. Qa Babulon tanka kin he Wakantanka itokam kiksuyapi, wocanniye ohitike cin

miniša wiyatke kin qu kta heon.

20 Unkan wita kin owasin naja, qa he kin hena tuktedan iyeyapi šni.

21 Unkan małpiya kin eciyatanhan wasu tanka wicašta kin awicahinhe, otoiyo hi taku tke utapi opawinge wanjidan inskokeca. Unkan wasu wicokakije kin on wicašta kin Wakantanka yašicapi ece, he wokakije iyotan tanka kin heon.

### WICOWOYAKE 17.

1 Hehan małpiya ohnihde šakowin wiyatke šakowin yuhapi qon etanhan wanji u, qa omakkiye qa hemakiya, Deciya u wo, wawicilałapi econ sa tanka mini ota akan iyotanke cin he token yacopi kin cicipazo kta ce.

2 He kici wicaštayatapi maka akan unpi kin wawicilałapi econpi ece, qa tona maka akan unpi kin wawicilałapi tawa miniša kin on witkopi ce.

3 Hehan Woniya kin on hewoskan makoce ekta amayan. Unkan winołince wan wamanica duta wan akan iyotanke cin he wanmdaka; he waoštehdapi wicacaje kin ojudan, qa pa šakowin, he wikcemna ko ikoyaka.

4 Unkan winołince kin he taku stan duta ko koyake qa, mazaskazi, inyan tehika, ołpidan ko hena on wiyatpa un, qa nape kin ohna mazaskazi wiyatke wan yuha waoštehdapi, wawicilałapi ko ašamyapi kin on ojudan.

5 Qa ite kin en caje wan owapi, Woanałbe kin, Babulon tanka, maka kin akan wawicilałapi, qa wayašicapi hunku kin hee.

6 Unkan wicašta owotanna we kin winołince kin he iwitko

wanmdaka, qa tona Jesus yotaninpi kin hena we kin on. He wanmdake qa nina imanihan waun.

7 Hehan małpiya ohnihde kin he, Tokeca e ininihan he, emakiya; Winołince woanałbe kin he ociciyake kta, qa wamanica akan iyotanke cin, pa šakowin, qa he wikcemna hduhe cin he nakun.

8 Wamanica wandake cin he un qon, qa un šni kin; qa wošbe cetete wanica etanhan hiyu kta, qa wicotakuni šni ekta hde kta. Qa tona maka akan unpi, maka kagapi kin ehantanhan, cajepi kin wiconi wowapi kin en owapi šni, hena wamanica kin wanyakapi kinhan yušinyayapi kta, he un qon, qa un šni, qa hinałin un kin heon etanhan.

9 Unkan wicotawacin wicksape yuhe cin he den un. Pa šakowin kin hena paha šakowin winołince kin akan iyotanke cin hee;

10 Qa wicaštayatapi šakowin kin heepi, zaptan wanna hinłpaya, qa wanji nahalın en yanaka, qa wanji iš hinałin hi šni; he hi kinhan ptededan he kta.

11 Qa wamanica wandake ciquon he un qon, qa un šni kin, he icišahdogan kin ee, šakowinpi kin he etanhan, qa wicotakuni šni ekta hde kta.

12 Qa he wikcemna wandake ciquon hena wicaštayatapi wikcemna kin eepi, nahalın wokiconze yuhapi šni, tuka wihiyayedan wancadan ape cin wicaštayatapi iyecen wamanica kin kici wicowašake icupi kta.

13 Hena wicotawacin wanjidan yuhapi, qa wicowašake wicookihi ko tawapi kin wamanica kin qupi.

14 Qa hena Amnos kin kici ki-

cizapi kta, tuka Amnos kin wicaktedan kta, he itancanpi kin Itancan, qa wicaštayatapi kin en Wicaštayatapi kin hee, qa tona om un kin hena wicakicopi, qa wicakalinigapi, qa wicakapi.

15 Hehan hecen emakiya, Mini wandake ciqon tukten wawicihalapi econ sa iyotanke cin he oyate, qa wicota, qa wicašta, qa iapi kin eepi.

16 Qa he wikcemna wandake ciqon, wamanica ikoyake cin hena, wawicihalapi econ sa kin šice kidakapi kta, qa hewoskantuya tancodan iyaye yapi kta, celipi kin temyapi, qa peta on hulnaliyapi kta.

17 Hena e Wakantanka tawacin kin ecen econpi kta, qa wicotawacin wanjidan unpi kta, qa wokiconze tawapi kin wamanica qupi kta e wacin yus wicakiya, Wakantanka oie kin yuacetu kte cin hehayan.

18 Qa winohinea wandake ciqon he otonwe tanka kin makata wicaštayatapi kin iwicadake cin hee.

## WICOWOYAKE 18.

1 Unkan hena taku kin iyohakam małpiya ohnihde wan małpiya kin eciyatanhan kutkiya u wanmdaka, wicowašake tanka yuha; qa he towitan kin on maka kin iyoyanpa.

2 Unkan he wašagya hotankakiya hotanin, qa heya, Hinłpaya ce, Babulon tanka kin he hinłpaya; qa taku wakan šicapi en ounyanpi, qa wanagi ašape cin owasin he otipi, qa zitkadan šice cin šicedapi kin owasin he hołpi yapi ce.

3 Wawicihalapi wocantiyahde miniša tawa kin hetanhan oyate hiyeye cin owasin yatkanpi; qa

he kici wicaštayatapi maka akan unpi kin wawicihalapi econpi, qa taku tełika ota yuhe cin on wopeton maka akan unpi kin wijiničiyapi ce.

4 Hehan małpiya eciyatanhan wicaho wan tokeca nawahon, kaken eya, Mitaoyate kin tankata inanpa po, hecen wołıtani tawa kin ehna yaunpi kte šni, qa wicokakije tawa kin en oya-papi kte šni.

5 He walıtani kin małpiya kin ekta iyahdeya, qa taku šica econ kin hena Wakantanka kiksuya un.

6 Token ecaniconpi qon he iyecen ecakicon po, qa iye ołan kin etanhan nonpa akihde kieu po, wiyatke ojudan ye cin he ohna nonpa akihde okicicaštan po.

7 Token wałaničida qa takudan icakije šni un qon he iyecen wicokakije, qa iyokišicapi kin qu po. Iye cante kin ekta kaken eya; Wicaštayatapi winohinea heca iyotankehan waun, qa wiwazica hemaca šni, qa iyokišicapi kin icimana wanmdake kte šni ce.

8 Heon etanhan anpetu wanjidan en wicokakije tawa kin hiyahde kta, wiconče, qa iyokišicapi, qa wicaakiłhan, qa ocowasin peta on hulnage kta; tuwe yaco kin Itancan kin Wakantanka hee wašaka ce, heon etanhan.

9 Unkan wicaštayatapi maka ohnaka kin kici wawicihalapi econpi, qa takudan icakije šni unpi kin hena he aceyapi kta, qa nihinci-yapi kta, he hulnage cin šota kin wanyakapi kinhan;

10 Wicokakije kin ikopapi kin on itehanyan inajinpi, qa heyapi kta, Hehehe, hehehe, Babulon otonwe tanka kin, otonwe wašake cin, ihnuhana niyacopi kin anihinłpaya ce.



11 *Qa heon wopeton maka akan unpi kin nihinciyapi, qa ceyapi kta, hetanhan maza tawapi kin tuwedan opewicakica-ton kte šni :*

12 *Maza kin he mazaskazi, qa mazaska, qa inyan tehika, qa oinpidan, qa minihuha wašte, qa šina to, qa minihuha zipzipe-dan, qa šina ša, qa can wašte-mna ocaje owasin, qa huhu wakšica owasin, qa can tehika, qa mazazi, qa mazasapa, qa inyan ska wakšica ;*

13 *Qa canha ša, qa taku wašte-mna, qa pejihuta pa, qa cansin, qa miniša, qa wiłdi, qa aguyapi mdu, qa woteca, qa talin wanuyampi, qa šuktanka, qa canpahmihma, qa wicatančan, wicnagi ko henakiya.*

14 *Waskuyeca kin ninagi wašte dake cin he wanna henakeca, qa woyute napin qa taku wicimdeza, hena owasin aniyuštán, qa hena ake tohinni iyeyaye kte šni.*

15 *Unkan wopeton tona taku hececa wiyopeyapi ece, qa on wijiničiyapi kin hena itehanyan inajinpi kta, he wokakije kin ikopapi, nihinciyapi, qa ceyapi ;*

16 *Qa heyapi ; Hehehe, hehehe, otonwe tanka kin minihuha wašte, ša stan, ša ko koyake ča, mazaskazi, inyan tehika oinpidan ko kohdaka ; qa ihnuhanna wiwicajica tanka kin he yutakuni šni.*

17 *Unkan tona wita wata iyupse yuzapi, qa tona ohna yapi, qa tona watopapi, qa tona miniwanca ohna wopetonpi ece kin hena owasin itehanyan inajinpi ;*

18 *Qa he hulinage cin šota kin wanyakapi qehan, hotaninpi qa heyapi ; Otonwe kin tukte wanji e otonwe tanka kin he iyececa he.*

19 *Qa pa kin akan maka ahdatapi, qa hotaninyan nihinciyapi, qa ceyapi, qa heyapi ; Hehehe, hehehe, otonwe tanka kin he eciyatanhan tona miniwanca kin ohna wita wata yuhapi kin hena owasin watonpika, taku tehika opeton qon heon, he ihnuhanna hewoskan kagapi ce.*

20 *Heon, mahpiya kin, iyuškiu wo, qa ohnihde owotanna yaunpi, qa wokcanpi kin nakun, niyepi kin on Wakantanka tokičon kin he etanhan.*

21 *Hehan mahpiya ohnihde wašake linca wan, inyan wan, inyan wiyutpan tanka iyececa, he icu, qa miniwanca kin en elpeye ča heya, Hecen wowašake on Babulon otonwe tanka kin jujuwahan elpeyapi kta, qa tohinni iyeyapi kte šni ce.*

22 *Unkan niye kin en cando-wankiyapi sa, qa dowanpi sa, qa cotanka yajopi sa, qa maza yahotonpi sa wicaho kin tohinni nahonpi kte šni ; qa taku kage sa, ocaje owasin, niye kin en iyeyapi kte šni, qa wiyutpan limun kin niye en hetanhan tohinni nahonpi kte šni.*

23 *Qa petijanjan ojanjan kin icimana iyoyamniye kte šni, qa niye en hihnayanpi qa tawicuyapi wicaho kin tohinni nahonpi kte šni. Wicašta wopeton nitawa kin hena maka akan wicašta itancanpi kin hecapi ; qa wicayahmunge cin on oyate kin owasin wicayahnyan.*

24 *Unkan he ohna wicašta wokcan wicašta owotanna ko we kin iyeyapi, qa tona maka akan ktepi kin hena nakun.*

#### WICOWOYAKE 19.

1 *Unkan hena iyohakam mahpiya kin ekta wicota hotanka-*

kiya hotaninpi nawahon, kaken eyapi, Jehowa yatan po, niwica-ye ça, wowitan, qa wootanin, qa wowaşake, Itancan Wakantanka unkitawapi kin he tawa nune.

2 Wayaco kin owotanna qa wicaka; witkowin tanka, wawicihalapi econ kin on maka kin yuşice cin he yaco, qa taokiye kin hena we kin he nape kin en tokicon.

3 Hehan inonpa heyapi, Jehowa yatan po. Unkan he şota kin owihanke wanin wankantkiya iyaya.

4 Hehan hunkawicayapi wikcemna nonpa sanpa topa, qa taku ni un topa kin hena makata elipeiciyapi, qa Wakantanka oiyotanke kin akan kiyotanke cin he ohodapi, qa heyapi, Amen, Jehowa yatan po.

5 Hehan oiyotanke kin etanhan wicaho wan taninyan heya, Taokiye niyanpi kin owasin, qa tona cekiyapi ece, cistinpidan tankinkinyanpi ko, Wakantanka nitawapi kin yatan po.

6 Unkan nawahon, wicota hotaninpi kin iyececa, qa mini ota ilaha kin iyececa, qa wakinyan tanka hotonpi kin iyececa, kaken eyapi, Jehowa yatan po; Itancan Wakantanka Iyotan Waşake cin he Wicaştatayapi un.

7 Heon etanhan piundapi, qa unkiyuşkinpi kta, qa wowitan unqupi kta; Amnos kin tohan tawicu ton kte cin wanna iye-hantu, qa winohinca kin taku owasin wiyeya ekihnaka.

8 Unkan he minihuha ska wiyatpa kin heca koyake kta e qupi; minihuha ska kin he tona waşte woowotanna yuhapi kin hee.

9 Hehan hecen emakiya, Ka-

ken wowapi kaş wo, Tona Amnos kin winohinca yuze kta omniciye kin en wicakicopi kin hena wicayawaştepi ce. Hehan ake hecen emakiya, Wakantanka oie wicake cin hena ee.

10 Unkan hehan he siha hdepi kin en makata elipemiçiye ça ohowada kta; tuka iye hemakiya, Ihnuhan hecanon kin, miş cici ookiye waun, qa nihunkawanji Jesus yaotanin yuhapi kin hemaca; Wakantanka ohoda wo. Jesus yaotanin kin he wokcanpi woniya kin hee.

11 Unkan malipiya kin yuzamnipi e wanmdaka, qa ito şuktanka ska wan, qa tuwe akan iyotanke cin he Wicake ça Owotanna eciyapi, he owotanna wicayaco qa ozuye econ ece.

12 İsta kin peta ide kin iyececa, qa pa kin akan wateşdake ota yukan; qa caje kin owapi, tuka he tuwedan sdonye şni, iye işnana sdonkiya.

13 Qa wokoyake we en oputkanpi kin heca koyaka: Qa Wakantanka Oie kin eciyapi.

14 Unkan malipiya wicobe kin owasin he ihakam yapi, şuktanka ska akan iyotankapi qa minihuha waşte, ska, qa wakaşote şni kin heca koyakapi.

15 Qa iye i kin etanhan maza sagye anog ope kin hiyu, heon oyate kin awicape kta, qa maza icapsinte wan on wicayuhe kta; qa Wakantanka Iyotan Waşake cin he wocantiyahde ohitike cin minişa iyuşkice kin he naşkica.

16 Qa onhoşida ceca sani ko akan caje kin owapi, Wicaştatayapi kin en Wicaştatayapi, qa itancanpi kin Itancan kin he dee.

17 Hehan malipiya ohnihde wan anpetu wi kin en najin kin he wanmdaka; he hotankakiya

hotanin, qa taku kinyanpi kin owasin, okotonyan kin en kinyan unpi kin hena hewicakiya; Upi qa Wakantanka he wotapi tanka tawa kin en mniciya po;

18 Wicaštayatapi cel̄pi kin yatapi kta, qa wicašta itancanpi cel̄pi kin, qa tona waśakśakapi cel̄pi kin he, qa śuktanka cel̄pi, qa tona akan iyotankapi kin, wicacełpi ocaje owasin, wowidake unpi, qa ihduhapi kin, cistinpidan tankinkinyanpi koya.

19 Unkan wamanica kin wanmdaka, qa wicaštayatapi maka akan unpi kin akicita wicayuhapi ko witaya mniciyapi, qa tuwe śuktanka akan iyotanke cin akicita wicayuhe cin ko, kici kiczapi kte cin heon.

20 Hehan wamanica kin he niyake yuzapi, qa woitonśni wokcan kin he nakun, he wamanica kin itokam wowapetokeca econ, qa on tona wamanica wowapetogton tawa yuhapi, qa iyacinpi kin ohodapi kin hena wicahnaye cin hee. Unkan hena napin niyake peta mde waninyan zi on itkonyahe cin he en iyohpewicayapi.

21 Unkan unmanpi kin owasin tuwe śuktanka akan iyotanke cin he maza sagye tawa kin on wicaktepi, maza sagye he i kin etanhan hiyu qon hee on. Unkan hena cel̄pi kin on taku kinyan un kin owasin imnanpi.

### WICOWOYAKE 20.

1 Hehan mahpiya ohnihde wan mahpiya kin eciyatanhan kun u wanmdaka, he wośbe ceteta wanica tiyopa iyuhdoke kin yuhe ca, nape ohna maza icicahiha wan tanka:

2 Qa he wamduśka kin iyałpaya, sintel̄ida wanakaja tanhan

un kin, Wakanśica qa Satan hee, qa kaśka ehnaka, waniyetu kektopawinge hehayan;

3 Qa wośbe ceteta wanica he en ehpeye ca onataka, qa ipuspe wan on apuspa, hecen oyate kin wicahnaye kte śni, waniyetu kektopawinge kin ihuniyanpi śni kin hehayan. Unkan he iyohakam ptenyedana kiyuśkapi kta.

4 Unkan oiyotanke kin heca wanmdaka, qa tona akan iyotankapi kin hena woyaco yuhapi. Unkan tona Jesus oyakapi kin on, qa Wakantanka oie kin on pa bawicaksapi qon, wamanica kin wakagapi ko ohodapi śni, qa wowapetogton tawa kin itepi, qa napepi kin en yuhapi śni, hena nagipi kin wanwicamdaka, ake kinipi qa Messiya kin kici ounyanpi, waniyetu kektopawinge hehayan.

5 Tuka wicašte cin unmanpi kin ake kinipi śni, waniyetu kektopawinge kin henakeca śni kin hehayan. Piya iwicacage tokaheya kin hee.

6 Tuwe piya iwicacage tokaheya kin en ope cinhan he ya waštepi qa owotanna un. Hena wiconšte inonpa kin iyowicahi kte śni, tuka Wakantanka qa Messiya kin ekta wawayuśnapi kin heca wicayawapi kta, qa kici ounyanpi kta, waniyetu kektopawinge hehayan.

7 Unkan waniyetu kektopawinge kin henakeca kinhan, Satan wicakaśka tipi kin etanhan kiyuśkapi kta.

8 Qa oyate kin wicahnaye kta e makata tate ouye topa kin ektakiya ye kta, qa Gog Magog kici zuya u wicaśi kta; hena miniwanca wiyaka sukaza kin iyecen wicota.

9 Unkan maka ohdakinyan ohna yapi, qa wicašta owotanna



ewanke cin ihdukšan hinajinpi, qa otonwe wakan kin nakun. Unkan mahpiya kin etanhan Wakantanka eciyatanhan peta hiyu, qa hulnahwicaya.

10 Unkan Wakanšica, hena wicahnaye cin he peta qa inyanzi mde kin en iyohpeyapi, heciya wamanica qa woitonšni wokcan kin unpi, qa anpetu hanyetu ko owihanke wanin kakijapi kta.

11 Hehan oiyotanke ska tanka wan wanmdaka, qa tuwe akan iyotanke cin he ite kin etanhan maka mahpiya ko najicapi; qa tukten wanke kte cin iyeyapi šni.

12 Qa wicate ciqon, cistinpidan tankinkinyanpi ko, hena Wakantanka itokam najinpi, wanmdaka. Unkan wowapi kin yumdayapi; qa wowapi tokeca wan yumdayapi, wiconi wowapi kin hee: Qa wicate ciqon token wowapi kin en kagapi kin he iyecen wicayacopi, iye wicohan kin eciyatanhan.

13 Unkan miniwanca kin wicate cin tona en un kin hena hiyuwicaya, qa wiconte Hades ko wicate cin tona en unpi kin hena hiyuwicayapi. Qa iye wicohan kin eciyatanhan otoiyohi wicayacopi.

14 Unkan wiconte qa Hades kin hena peta mde kin en iyohpewicayapi. Wiconte inonpa kin hee.

15 Unkan tuwe wiconi wowapi kin en owapi iyeyapi šni kin he peta mde kin en iyohpeyapi ece.

## WICOWOYAKE 21.

1 Hehan mahpiya teca qa maka teca wan wanmdaka. Mahpiya tokaheya qa maka tokaheya kin hena yutokan iyeyapi, qa miniwanca wanica.

2 Unkan Johannes he miye e otonwe wakan kin wanmdaka, Jerusalem teca kin hee mahpiya kin etanhan, Wakantanka eciyatanhan kun u, winohinca wan wicašta hihna ton kte cin on wiyeya un kin he iyececa.

3 Unkan mahpiya kin eciyatanhan wicaho wan tanka nawahon, kaken eya, Wanyaka wo, Wakantanka wakeya tawa kin wicašta kin ehna han, qa iye hena om ti kta, qa hena e oyate tawawicaye kta, qa Wakantanka hince cin hena om un kta, qa Wakantanka tawapi kta.

4 Qa wicišta kin etanhan Wakantanka istamnihhanpe owasin wicakipakinte kta, qa hetanhan wiconte wanice kta, wicocante šica, wicaceya, wicokakije ko wanice kta, taku tokaheya un kin wanna henakeca.

5 Unkan tuwe oiyotanke kin akan kiyotanke cin he, Ito taku owasin teca wakaga ce, eya. Hehan, Wowapi ecen kaga wo, hena oie kin wicake qa owotanna, emakiya.

6 Qa ake kaken emakiya, Wanna henakeca. Alpha qa Omega, otokahe qa owihanke kin he miye ce. Tuwe ipuza kinhan he wiconi mini hidoka kin etanhan iyunwin codan yatke wakiye kta.

7 Tuwe ohiye cinhan he taku owasin tawaye kta, qa iye Wakantanka maye kta, qa miš he cinkšiwaye kta.

8 Tuka tona wikopapi, qa wicadapi šni, qa walitepi šni, qa tin wicaktepi, qa wawicilahapi econpi sa, qa wapiyapi, qa wakagapi ohodapi sa, qa oitonpišni kin hena owasin mde wan peta qa inyan zi on itkonyahe cin he ohna taku tawapi kta, wiconte inonpa kin hee.

## WAYUOTANIN.

9 Hehan malipiya ohnihde šakowin wiyatke šakowin wicokakije ehake šakowin kin on ojudan yuhapi qon hena etanhan wanji hi, qa omakiye ça heya, U wo, winohinca wan Amnos kin tawicuye kte cin he cicipazo kta ce.

10 Unkan Woniya kin on paha wan tanka tehan wankantuya kin ekta amaye ça, otonwe tanka kin, Jerusalem wakan, malipiya kin etanhan Wakantanka eciyatanhan kutkiya u kin he makipazo;

11 Wakantanka wowitan tawa kin yuha, qa wiyatpa kin he inyan tehika iyececa, inyan wan acališdaya iyececa:

12 Qa ihdukšan aconkaškapi tanka qa tehan wankantu kin, qa tiyopa ake nonpa yukan, qa tiyopa kin hena en malipiya ohnihde ake nonpa yukanpi, qa akan wicacaje owapi, Israel cincapi wicoun ake nonpa kin hena eepi.

13 Wiyohiyanpa tanhan tiyopa yamni; qa waziyapa tanhan tiyopa yamni; qa itokaga tanhan tiyopa yamni; qa wiyolipeya tanhan tiyopa yamni.

14 Qa otonwe conkaške kin taku akan he cin hena ake nonpa, qa Amnos kin yewicaši ake nonpa cajepi kin hena en un.

15 Unkan tuwe omakiye cin he mazaskazi cedihu wan yuha, on otonwe, qa tiyopa kin, conkaške ko iyute kta.

16 Otonwe kin oise tom yukan, qa ohdakinyan kin ohanske cin kici akidehankeca. Unkan cedihu kin on otonwe kin iyuta, wiyutapi kektopawinge ake nom; ohdakinyan ohanske cin obosdatu ko akidecen han.

17 Qa conkaške kin he iyuta, wicišpa opawinge sanpa wikce-

mna topa sam topa, wicašta ihduta, malipiya ohnihde ihdute cin hee.

18 Conkaške kin he iyaspis inyan tehika on kagapi, qa otonwe kin he mazaskazi ecedan, janjan ecedan iyececa.

19 Qa otonwe conkaške kin taku akan he cin he inyan tehika ocaje owasin en un. Taku akan he cin tokaheya kin he iyaspis; inonpa kin he saphiros; iyamni kin he kalkedon; itopa kin he smaragdos;

20 Qa izaptan kin he sardonis; išakpe kin he sardius; išakowin kin he krusolitos; išahdogan kin he berulos; inapcinwanka kin he topaz; iwikcemna kin he krusophrasos; iakewanji kin he huakinthos; qa iakenonpa kin he amathustos.

21 Tiyopa ake nonpa kin hena inyan tehika ocaje ake nom, tiyopa otoiyo hi inyan tehika wanjidani; qa otonwe ocanku kin he mazaskazi ecedan janjan kin iyecen wiyatpa.

22 Qa he en tipi wakan wani-ca; Itancan Wakantanka Iyotan Wašake cin, qa Amnos kin hena tipi wakan kin eepi.

23 Qa otonwe kin he anpetu wi, hanyetu wi ko en iyoyanpapi kta cinpi šni; Wakantanka wowitan tawa kin iyoyanpa, qa Amnos kin he petijanjan kin hee.

24 Qa oyate kin tona ni wicayapi kin hena iyoyanpa kin he en manipi kta; qa wicaštayatapi maka akan unpi kin hena wowitan qa wootanin tawapi kin en ahipi kta.

25 Qa tiyopa kin hena anpetu icunhan ecen iyeyapi kte šni; qa heciya hanyetu wanica.

26 Oyate hiyeye cin wowitan, qa wootanin kin en ahipi kta.

27 Qa taku wiśamye aśamye cin he en i kte śni, qa taku śica-ya econ, qa itonśni kin; tuka tona cajepi kin wiconi wowapi Amnos tawa kin en owicawapi kin henapidan.

## WICOWOYAKE 22.

1 Hehan wakpa wan wiconi mini ska kin, cahtowata iyecen ska, he makipazo, he Wakantanka qa Amnos oiyotanke tawa kin etanhan kaduza.

2 Unkan canku cokaya, qa wakpa kin anokatanhan wiconi can kin icaga, he waskuyeca ocaje ake nonpa aicaga, wi otoi-yohi waskuyeca aicaliya ece; qa can wapa kin hena oyate kin okizi wicaya ece.

3 Unkan heciya wicayuśice wanice kta; tuka Wakantanka oiyotanke tawa kin he, qa Amnos tawa kin hen he kta, qa taokiye kin hena tawoahope kin ecen econpi kta:

4 Qa itohmake kin wanyakapi kta, qa caje kin iye itepi kin en yuhapi kta.

5 Qa heciya hanyetu wanice kta; qa petijanjan qa anpetu wi iyoyanpa kin he cinpi śni; Itancan Wakantanka iyoyamwicaya ece; qa ohinniyan owihanke wanin wicaśtayafapi ounyanpi kta.

6 Hehan hecen emakiya, Wicoie kin dena wacinyepica qa wicakapi. Qa Itancan Wakantanka wicaśta wokcan wakan tawapi kin hee, taku ecadan u kte cin hena taokiye kin owicakiyake kta e on ohnihde tawa kin u śi.

7 Iho ecadan wau kta. Tuwe wowapi kin de wowiyuكان oie kin tanyan yuhe cinhan he ya-waśtepi ce.

8 Unkan Johannes he miye e hena wanmdake qa nawahon. Hena nawahon, qa wanmdaka; unkan malipiya ohnihde hena wanyagmakiye cin he siha kin en makata ehpeمیچیye, ohowada kta tuka.

9 Hehan hemakiya, Ihnuhan hecanon kin; miś eya ookiye cici waun, qa nihunkawanji wicaśta wokcanpi kin etanhan wau, qa tona wowapi kin de oie yuhapi kin hena owicawapa; Wakantanka ohoda wo.

10 Hehan ake hemakiya, Wowapi kin de wowiyuكان oie kin hena sutaya apuspe śni wo. Wanna ecadan kta ce.

11 Tuwe owotanna śni kin ohinniyan owotanna kte śni, qa tuwe aśape cin he ohinniyan aśapa un nunwe; qa tuwe owotanna kin he ohinniyan owotanna kta, qa tuwe ecadan kin he ohinniyan ecadan un nunwe.

12 Unkan iho, kohanna wau kta, qa taku mitawa kin hduha waun, otoi-yohi iye wicohan kin eciyatatanhan wicawaqu kta.

13 Alpha qa Omega, tokapa qa hakakta, otokahe qa owihanke kin he miye ce.

14 Tona tawoahope kin ecen econpi kin hena wicayawaśtepi, hecen wiconi can kin en ya okihipi kta, qa tiyopa kin ohna o-tonwe kin timahen yapi kta.

15 Tuka śunka, qa tona wapi-yapi sa, qa wiinalimanpi sa, qa wawicihalapi econpi sa, qa wakagapi ohodapi sa, qa tuwe itonśni waśtedake qa econ kin hena tankan yakonpi ece.

16 Jesus he miye ce, okodaki- ciye kin ekta niyepi kin en hena oniciyakapi kta e heon ohnihde mitawa kin u waśi. Dawid can hutkan adefka ko he miye, qa anpao wicanhipi nina iyege cin.



17 Unkan Woniya kin tawicuyapi kin kici, Kuwa, eyapi. Qa tuwe nahon kinhan he, Kuwa, eye kta. Qa tuwe ipuza kinhan, he u kta. Qa tuwe cin kinhan he iyunwin codan wiconi mini kin icu nunwe.

18 Tona wowapi kin de wowiyukcan oie kin nahonpi kin hena kaken ewicawakiya ; Tuwe wicoie kin dena en taku sanpa kage cinhan, he wicokakije wowapi kin de en cajeyatapi kin Wakantanka qu kta :

19 Qa tuwe wowiyukcan wo-

wapi oie kin dena yuaoptetu kinhan, he taku tawa kte cin wiconi wowapi kin etanhan Wakantanka icu kta, qa otonwe wakan kin etanhan, qa taku tona wowapi kin de en kagapi kin he etanhan.

20 Tuwe hena yaotanin kin he kaken eya, Iho, kohanna wau kta ce. Amen. Itancan Jesus hecen yau nunwe.

21 Jesus Messiya Itancan unkitawapi kin he towaonsida kin niyepi owasin en nicipi un kta. Amen.

